

# Ttè Dör Íyi Ulitane Yöne E' Tsá

Génesis 1:1 dò Éxodo 20:21 ena Jonás

## Porciones del Antiguo Testamento Bribri



# Ttè Dör Íyi Ulitane Yöne E' Tsá

Génesis 1:1 dò Éxodo 20:21 ena Jonás

Porciones del Antiguo Testamento  
Bribri

Primera edición

© 2010, Wycliffe Bible Translators, Inc.

La ilustracion de la carátula se usa por cortesía de Carolyn Dyk, © WBT, 2001.

Las ilustraciones en las páginas 10, 81, 83, 99 y 104 se usan por cortesía de © 1978  
David C. Cook Publishing Co.

Las ilustraciones de Horace Knowles en las páginas 24, 47, 96, 100, 103, 116 y 118 se usan  
por cortesía de © The British & Foreign Bible Society, 1954, 1967, 1972, 1995.

Las ilustraciones de Horace Knowles y revisado por Luise Bass en las páginas 29 y 91 se  
usan por cortesía de © The British & Foreign Bible Society, 1994.

Las ilustraciones de Luise Bass en las páginas 11, 32, y 58 se usan por cortesía de © The  
British & Foreign Bible Society, 1994.

[www.ScriptureEarth.org](http://www.ScriptureEarth.org)

Licencia Creative Commons

Atribución-No Comercial-No Derivadas 3.0 Unported



**Eres libre de:**

copiar, distribuir y comunicar públicamente la obra

**Bajo las condiciones siguientes:**

- **Atribución** — Debes reconocer la autoría de la obra en los términos especificados por el propio autor o licenciatte.
- **No comercial** — No puedes utilizar esta obra para fines comerciales.
- **No Derivadas** — No está permitido que alteres, transformes o generes una obra derivada a partir de esta obra.

**Entendiendo que:**

- **Renuncia** — Alguna de estas condiciones puede no aplicarse si se obtiene el permiso del titular de los derechos de autor.
- **Otros derechos** — Los derechos siguientes no quedan afectados por la licencia de ninguna manera:
  - Los derechos derivados de *usos legítimos* otras limitaciones reconocidas por ley no se ven afectados por lo anterior;
  - Los derechos *mORALES* del autor;
  - Derechos que pueden ostentar otras personas sobre la propia obra o su uso, como por ejemplo *derechos de imagen* o de privacidad.
- **Aviso** — Al reutilizar o distribuir la obra, tiene que dejar bien claro los términos de la licencia de esta obra.

<http://creativecommons.org/licenses/by-nc-nd/3.0>

# Ì tso' yëkkuö i' ki

|                                      | página        |
|--------------------------------------|---------------|
| Íyi ultane e' wì tkënewami.....      | Génesis ..... |
| Israel aleripa yërulune Egipto ..... | Éxodo .....   |
| Jonás dör Jehová ttéköl e' pakè..... | Jonás .....   |
|                                      | 115           |



# Íyi ultane e' wì tkënewami

## Génesis

Si'kuiae yékkuö i' kiè *Génesis*, e' wà kiane chè, *íyi ultane e' wì tkënewami*. Yékkuö i' blatëule böt tsiní. Et tsiní e' dör capítulo et dò capítulo dabom eyök kí et (1-11). Iét tsiní e' dör capítulo dabom eyök kí böt dò capítulo dabom skeyök (12-50). Et tsiní e' tö se' a íyi kos e' wì pakè. Ká jaì ena ká i' e' yone kewe. Ñies ñiwe, nañewe, diwö, si'wö ena bëkwö e' yone tsawe. Es ñies dayë, ká sí, iyiwak, se' wëpa ena alakölpa, e' kos yo' Skéköl tö, e' pakè yékkuö et tsiní tö. Ñies wes s'ditsö tsá e'pa tö i sulu wamble' ena i o' Skéköl tö ie'pa tsatkoie inuì yoki, e' tso' kitule yékkuö et tsiní ki. Ñies wes s'ditsö pone'mi ká wa'ñe senuk ditsewö wa ditsewö wa ena i kueki s'ttö tso' tajé kuak'ki kuak'ki, e' kos pakè yékkuö et tsiní tö.

Yékkuö iét tsiní tö ikkachè se' a tö wes Israel aleripa e'pa dë'bitü wëm eköl kiè Abraham e' wa. Israel aleripa wa Skéköl tö ibikeitsétke ká ultane wakpa tsatkök inuì yoki. As e' wà tkò, e' kueki Skéköl tö Abraham klög' iwák a. Abraham erblë' Skéköl mik buaë, e' kueki Skéköl tö itte me' ie' a. E' tso' kitule yékkuö iét tsiní ki.

Ttè me' Skéköl tö Abraham a, e' è me'itö Abraham alà Isaac ena Isaac alà Jacob e'pa a. Jacob ñe' è kiè ñies Israel. E' kueki ie' aleripa kiësö Israel aleripa. Yékkuö iét tsiní è ki itso' kitule tö wes Skéköl tö Abraham, Isaac ena Jacob, e'pa tsatkë'bitü ibolokpa kos yoki as ttè me'itö ie'pa a e' wà tkò wake!

### Skéköl tö íyi ultane yö'

**1** <sup>1</sup>Tsawe ta ká jaì ena ká i', e' yö'at Skéköl tö. <sup>2</sup>Mik ie' tö íyi ultane tsá yö'mi, eta ká wa'ñe kë ki i ku' yés. Ká sí kë ta'. Di' è me'r iškië. Ká dör ttsettseë. Erë Skéköl Wiköl shkòar dil' tsaka.

<sup>3</sup>Eta Skéköl tö iché: "iKá ñinú!"

Eta ká ñine. <sup>4</sup>Ie' tö isué tö ká ñiwe e' dör buaë, e' méatitö ñiweie. Ká ttsettse, e' méatitö nañeweie. <sup>5</sup>Ñiwe, e' kiéitö ñiwe. Ká ttsettseë, e' kiéitö nañewe. Ekkë kanewéitö ká tsawe a.

<sup>6</sup>E' bulé es ta ie' tö iché: "iIyönü wes skatkë kkò dapee es dil' shua iblatoie as kë iwöiérwane ñì a!"

<sup>7</sup>Etä es iyuéítö di' blatoie. Es di' ate ká jaishet ena ká i' ki. <sup>8</sup>Í yuéítö, e' kiéítö kákölöttö. Ekkë kanewéítö etä ká de bööt.

<sup>9</sup>E' bule es tå ie' iché: "íDi' ate ká i' ki, e' e' dapa'úka ek tsiní ème as íyök poppo döka!"

Etä es iyöne. <sup>10</sup>Wé íyök poppo deka, e' kiéítö íyök. Wé di' dapane-ka, e' kiéítö dayé.

Ie' isué tö e' kos dör buaë. <sup>11</sup>E' ukuöki tå ie' tö iché: "íYöök ki íyi kuá ultane tskinú! Kákö wör ta' ese, ñies kal ultane wör ta' ese kos tskinú iwakmik iwakmik."

Etä es ekkëpa tskine. <sup>12</sup>Es íyök ki íyi kuá ultane tskine kákö wör ta' iwakmik iwakmik, ñies kal wör ta' iwakmik iwakmik. Ie' tö isué tö ekkëpa kos, e' dör buaë. <sup>13</sup>Ekkë kanewéítö etä ká de mañat.

<sup>14</sup>E' bule es tå ie' iché: "íl dalöburta' yönú ká jaì a! Ekkëpa dör buaë ká blatoie ñiwe nañe-we, ñies ikkachoie mik tå diwö de kawö tköwoie, ñies ká shtä'woie ena duas tköke e' jchënoie. <sup>15</sup>Ekkë-pa kos dalöburke tajë ká i' ki."

Etä es iyöne. <sup>16</sup>Es ie' tö ì dalöburta' tajë ese yuéat bök. Ikibiie dör ká ñiwoie ñiweie. Wéne dalöbur dioshet e' dör olo'bunoie nañeweie. <sup>17</sup>Ekkëpa méatitö ká jaì a dalöbunoie ká i' ki <sup>18</sup>ñiè nañeë, ñies ká ñiwe ká nañewe e' blatoie. Ie' tö isué tö ekkëpa dör buaë. <sup>19</sup>Ekkë kanewéítö etä ká de tkël.

<sup>20</sup>E' bule es tå ie' tö iché: "íIywak serke di' a dayë a, e' kos yönú tajë! Nies dù ultane yönú as iur kashuk a!"

<sup>21</sup>Etä es iywak blubluë serke dayë a, ekkëpa yuéítö. Nies iywak

kos serke di' a ena dayë a ekkëpa yuéítö iwakmik iwakmik. E' sù dù ultane yuéítö, iwakmik iwakmik.

Ie' isué tö ekkëpa kos dör buaë.

<sup>22</sup>Etä iywak yuéítö e'pa a ie' er buaë ché ttè i' wa: "a' alönú tajë, di' kos, dayë kos, e' wà ióka tajë. Nies as dù alör tajë ká wa'ñe."

<sup>23</sup>Ekkëpa kanewéítö etä ká de skel.

<sup>24</sup>E' bule es tå ie' tö iché: "íIywak serke ká sí ki, e' ultane yönú iwakmik iwakmik! Iywak uru, iywak kañiru, iywak e' kuke iski, ekkë kos yönú iwakmik iwakmik!"

<sup>25</sup>Etä es ie' tö iywak ultane yué ká sí ki iwakmik iwakmik. Ie' tö isué tö ekkëpa kos dör buaë.

<sup>26</sup>E' ukuöki tå ie' tö iché: "Ditsö yuòsö wes se' es as ie'pa tkòkasö ká i' kos wökirie. Nima, dù, iywak uru, iywak kañiru, iywak e' kuke iski, ekkë kos tso' ká i' ki, e' atdaë ie'pa ulà a."

<sup>27</sup>Mik Skéköl tö s'ditsö tsá yö!, eta iyuéítö wes ie' es; Ie'pa yuéítö wëm eköl ena ala-köl eköl.

<sup>28</sup>Ie' er buaë ché ie'pa a i' es: "A' ala'r kóka tajë, a' alönú tajë ká ultane ki. Ká i' kos e' kané ú a' tö. Nima, dù, ena iywak ultane ekkëpa kos wökir a' dör, e' wà ú."

<sup>29</sup>E' ukuöki tå Skéköl tö iché ie'pa a: "Ye' ttò ttsö. Íyi kuá kos wörtä' ñarta', ese méatyö a' a ñè. Nies kalwö ultane katarta'

ku'yarta' ese kos méatyö a' a katè ku'yè. <sup>30</sup>Erë iyiwak kañiru, iyiwak uru ena dù, ekképa kos a kakö méatyö katè." Eta es iate. <sup>31</sup>Ie' isuë tö ekké kos dör buaë shute. Ekké kanewéitö eta ká de teröl.

**2** <sup>1</sup>Es ká jaì ena ká i', nies íyi ulitane tso' iki, e' yone one se. <sup>2</sup>Ká de kul etä i kos yö'bituitö e' yone one, e' kueki diwö e' wa ie' kë kaneblène. <sup>3</sup>E' diwö wa kë ie' kaneblèneia ká i' yuök e' kueki ie' iché tö diwö e' dör buaë. Nies ie' iché tö semana bit e' diwö bata e' dör batse'r se' a.

### Skéköl Jehová tö s'ditsö tsá yué

<sup>4</sup>I' dör ká jaì ena ká i' tsá yoneat, e' pakè.

Mik Skéköl Jehová tö ká jaì ena ká i' e' yö', <sup>5</sup>e' kewö ska' ta kám ie' tö kali patkò ká i' kí, nies kë yi ku' ká kanéuk. E' kueki kám kal kuá tskir ena kám kakö tskir. <sup>6</sup>Erë d' tskirke íyök a, e' tö íyök kos nuweke. <sup>7</sup>Eta Skéköl Jehová tö íyök yué s'ditsöie eköl wák dör wém. Eta ie' tö iwöiké iyik a ta iyone se'ie ttsé'ka.

<sup>8</sup>E' ukuöki ta ie' tö ká buaala yué ekwöki diwö tskirke e' éka, ká kiè Edén ee. Eta wém yö'itö, e' méatitö ká buaala e' a senuk. <sup>9</sup>Ee ie' tö kal ulitane wér bua'buaë, nies iwö dör buaë katano ese tské. Ká buaala e' shusha, ie' tö kal tské bólka. Kal elka dör sene michoe e' kéli. Kal iélka e' dör íyi buaë ena íyi suluë ese jchenoie e' kéli.

<sup>10</sup>Edén ká shua' di' tskirke etö, e' tö ká buaala nuweke. Wé ká e'

kkò döwa ee di' e' ulà jchérke döka tkötö. <sup>11</sup>Di' ulà etö kiè Pisón. E' tkökemi ká kiè Havilá, e' kos a. Ká e' kí oro tso. <sup>12</sup>Oro e' dör oro bua'bua. Nies kiò masmas bua'bua, ese tso' ena ák bua'bua kiè ónice ese tso!. <sup>13</sup>Di' ulà etö tkökemi ká kiè Cus, e' kos a. E' kiè Guihón. <sup>14</sup>Iulà etö skà mir ká kiè Asiria diwö tskirke, e' éka. E' kiè Tigris. Eta di' ulà bataie, e' kiè Éufrates.

<sup>15</sup>Mik Skéköl Jehová tö wém tsémi méat ká buaala até Edén e' shua' as ikaneuitö, as ikkö'nùitö, <sup>16</sup>etä ie' tö ttè dalöieno i' mé ia: "Ká buaala e' kéliwö ulitane katémibö. <sup>17</sup>Erë íyi buaë ena íyi suluë ese jchenoie e' kéliwö kë katar. Mik kal e' wö katébö, etä be' duowaraë. E' kueki kë ikatar."

<sup>18</sup>E' ukuöki ta ie' tö iché: "Kë idör bua' wém a senuk ekörla. Súyö ie' a wapie yuè eköl ikimuk buaë."

<sup>19</sup>Eta iyiwak yö'itö íyök wa ekké kos debitü iwä wém a suè tö ima ie' tö ikiè mekami. Ta wes wém tö ikiè méka es iate. <sup>20</sup>Es wém tö iyiwak uru ena iyiwak kañiru, nies dù, ekké kos kiè méka. Erë kë ie' kímuk kune buaë ie' wapieie.

<sup>21</sup>Eta Skéköl Jehová tö wém kapowewa taié, e' dalewa ie' tö ichane yétsa etö, e' chkà wöiowaneitö. <sup>22</sup>Ichane e' yuéitö alakölie ta idebitü iwä wém a. <sup>23</sup>Mik wém tö isué, eta ichéitö:

"il' je' dör ye' wák dichewö ena ye' wák chkà! Alaköl dë'ká wém wa, e' kueki ikirdaë alaköl."\*

<sup>24</sup>E' kueki wépa kë serpaiä iyé ena imì e'pa dapömk, iserdawa

\* **2.23** Hebreoie ttè kiane yénuwem e' dör ish ena ttè kiane yénuwem alaköl e' dör isha.

alaköl ta. Ie'pa böl serdaë ñita, ta imíä wes wák eköl è es.

25 E' késka' ta wém ena alaköl iéter sume, erë ie'pa kë wä jaë jcher.

S'ditsö tö Skéköl ttò dalöséwéwa

**3** 1 Tkabè tso' etö, e' erbikò taië s'kitö'woie iyiwak kañiru yö' Skéköl Jehová tö, ekké kos tsata. Ká et ta ie' tö alaköl a ichaké:

—¿Moki Skéköl tö iyé'at a' a tö ká buaë shua kal ultane tso', e' wö kë katar yës?

2 Alaköl tö iiuté:

—Au, e' kë dör es. Ie' tö sa' a iché tö kal ultane wö katarmi. 3 Erë kal àr ká i' shushaë, e' wö kë katanuk, kë e' kanuk sa' a. E' wamblé sa' tö, eta sa' duöralur.

4 Etä tkabè tö iché alaköl a:

—Au, e' dör kache. A' kë duòpawa. 5 Ie' wä ijcher buaë tö mik kalwö e' katéwa a' tö, eta ì dör buaë, ì dör suluë e' jcherdaë a' wä wes ie' wák wä ijcher es.

6 Etä alaköl isuë tö kalwö e' wér buaë katè. Ie' éna ikatak íyi jchenoie buaë. E' kueki ie' tö kalwö batsée, katéwaitö. E' ukuökì ta ie' tö imé iwém a, eta iwém ikatéwa ñies. 7 E' bet ta ì dör sulu, ì dör buaë ese ane ie'pa éna, eta ie'pa wa ijchenewä tö ie'pa iéter sume. Etä ie'pa tö kal kië higuera, e' köyök yué banoie e' wa ie'pa e' patréwa.

8 Siwa! bitsirke tsáli, eta wém ena ilaköl tö Skéköl Jehová shkö-kedur ká buaë shua, e' ttsé. E' yöki ie'pa e' blélur kal tso' taië ese shua.

9 Erë Skéköl Jehová tö wém kié ta ichaké:

—¿Wé be' tso'?

10 Wém tö iiuté:

—Ye' tö ittsé tö be' shkökedur ká buaala shua. Ye' dur sume, e' kueki ye' suane be' yöki. E' kueki ye' e' bléwá be' yöki.

11 Etä Skéköl tö ie' a iché:

—¿Yi be' a iché tö be' dur sume? Ichó ña tö kalwö yë'yö be' a tö kë ikatar ñe' katébò?

12 Ie' tö iiuté:

—Be' tö ye' a alaköl me', ye' wapieie, e' tö ye' a kalwö mé katè. E' katéwayö.

13 Etä Skéköl Jehová tö alaköl a ichaké:

—¿Lók bö iwamblé?

Ie' tö iiuté:

—Tkabè tö ye' kitéka, e' kueki ye' tö kalwö e' katéwa.

14 Etä Skéköl Jehová tö tkabè a iché:

—Ì wamblé be' tö, e' kueki ye' tö be' a iché tö iyiwak kos shua be' è weirdaë michoë. Kekraë be' shkö-raë e' kule be' batsi' kí ta be' kkò a ká po mirawa. 15 Be' ena alaköl meraatyö ñi bolökie. Be' aleripa kos ena alaköl aleripa kos, e'pa ate ñi bolökie ñies. Alaköl aleri eköl tö be' wökir shka'weraë ena be' tö ie' klo kaniñak shka'weraë.

16 E' ukuökì ta ie' tö iché alaköl a:

—Mik be' alà kürketke eta be' weirdaë siarë, idalë'r taië e' ttse-raëbò. Erë be' kí be' wém kiardaë ena ie' döraë be' wökirie.\*

\* 3.16 Mik be' alà kürketke...ie' döraë be' wökirie: Ñies ttè e' mane'wëmisö i' es: Be' éna e' alakka be' wém kí, erë ie' e' alöraka be' kí.

<sup>17</sup>E' ukuöki ta ie' tö iché wëm a: —Be' tö be' alaköl ttò iuité, kalwö yë'yö be' a tö kë ikatar, e' wà katébö. E' kueki be' weirdaë nies. Be' kueki íyök sulu'wërawayö. Be' kaneblöraë darérëe be' chkè yulioie. <sup>18</sup>Íyök ki dika'chka ena kákö sulusi, alördaë. Nies kalwö kañiru katerabö. <sup>19</sup>Be' kawötä kaneblök darérëe chkoie dò mik be' duowa, míane íyökie wes be' dör kuaë es eta. Be' yöne íyök wa, e' kueki be' dörane íyökie.

<sup>20</sup>Wëm tsá yöne, e' kiè Adán. Ilaköl dör se' mì tsá. E' kueki Adán tö ikiè méka Eva.\*

<sup>21</sup>Eta Skéköl tö datsi' yué ie'pa a iyiwak kkuölit wa, ta ie'pa paiéito. <sup>22</sup>Eta ie' tö iché: "Iñë ì dör buaë ena ì dör suluë, e' jcher ditsö wa wes se' wa ijcher es. E' kueki dö' ie'pa mi', sene michoë e' kéli wöba-tsök katè ta iser michorak."

<sup>23</sup>E' kueki ie' tö wëm ena ilaköl yétsa ká buaala tso' Edén e' a, ta ipatkémii tö íyök wakanéuk. Íyök wa wëm yöne e' ki ipatkémi kaneblök. <sup>24</sup>IE' tö itrë'wëshka, e' ukuöki ta ì ttsë'ka pik ta' tso' ká jaì a kiè kérub, e'pa tuléwaitö ká buaala e' ñalé ska' diwö tskirke e' ëka ikkö'nuk. Nies tabè wöñarke dalö-löë ratkear siwa' ki, e' méatitö as kë yi döwaiq sene michoë kélí ska!.

### Caín tö iël kiè Abel, e' ttewa

**4** <sup>1</sup>Eta Adán sené Eva ta. Eva duneka ta ilà kune wëm. Ikiè mékaitö Caín.\* Mik alà kune, eta

Eva tö iché: "Jehová tö ye' kimé, e' kueki ye' alà kune eköl wëm." <sup>2</sup>E' ukuöki ta ilà skà kune ek, e' kiè Abel, Caín él tsirla. Abel tö obeja alöweke. Caín tö dalì kuatkeke.

<sup>3</sup>Ká et ta, Caín wà idali wöne, ese kak mí mè Jehová a idalöioie.

<sup>4</sup>Eta Abel wà ie' icha mí nies. Ie' obeja tsá bua'bua, ese kak mí ie' wa mè Jehová a. Abel ena ì méitö e' wér buaë Jehová wa. <sup>5</sup>Erë ie' kë wa Caín ena ì méitö e' sune es, e' kueki Caín uluneka taië, iwö yée suluë. <sup>6</sup>E' kueki Jehová tö Caín a ichaké: "¿Iók be' ulune wö yée sulu? <sup>7</sup>Be' tö ì bua' úpa, e'ma be' jañuke tsuleë. Erë ì sulu wamblébö, e' kueki ì sulu e' métér bér be' panuk namuie e' aloka be' ki. Erë be' ké e' alökka iki."

<sup>8</sup>Ká et ta, Caín tö iël Abel kiémi kañika. Mik ie'pa demi kañika, eta ee Caín nippéka iël ta eta iël ttewaitö. <sup>9</sup>E' ukuöki ta bet, Jehová tö Caín a ichaké:

—¿Wé be' él Abel?

Caín tö iuité:

—Ye' kë wà ijcher. Ye' kë dör ie' kkö'nukwak.

<sup>10</sup>Skéköl tö ie' a iché:

—¿Iók bö iwamblé es? Be' él ttewabö, e' pé tène taië íyök ki, e' nuí tso' be' ki. E' ki ye' kawötä be' we'ikök. <sup>11</sup>E' kueki be' weirdaë íyök ki wé be' tö be' él pé tkö'wé, e' ki be' yerattsayö. <sup>12</sup>Be' kaneblömi taië, erë kë wà wörpa buaë. Be' kawötä shkök ká wa'ñe, kë a eno ta' yës.

\* **3.20 Eva:** Hebreoie s'kiè e' wà kiane chè ttsë'ka.

\* **4.1 Caín:** Hebreoie s'kiè e' wà kiane chè ye' ulà g ide.

<sup>13</sup>Eta ie' tö Jehová iúté:  
—E' darérë ye' a. Kè ye' a  
idalë'ttsénuk. <sup>14</sup>I'ñe be' tö ye'  
uyéttṣa ká i' ki, e' ukuöki tā ye'  
kawöta shkök ká wa'ñe kamië, kē a  
eno ta!. Be! kē kū'iä ye' ta, e' kueki  
yi ye' kuéwa, ese tö ye' tterawa.

<sup>15</sup>Erë Jehová tö iiúté:  
—Yi be' ttéwa, ese kí weirdaë  
siaré taië iskéie.

Eta Skéköl tö iwakyuée iwà  
kkachoie as yi tö ikuéwa, ese kē tö  
ittòwa. <sup>16</sup>Eta Caín e' yéttṣa Jehová  
wörki tā imía ká kiè Nod ee, ká e'  
aṭe Edén diwö tskirke e' kke.

<sup>17</sup>Eta Caín sené ilaköl tā. Idune-  
ka tā tā kūne wák dör wém, e' kiè  
Enoc. E' ukuöki tā Caín tö ká yué  
et, kiè mékaitö ilà kiè wa Enoc.

<sup>18</sup>Enoc dör Irad yé. Irad dör Mehu-  
jael yé. Mehujael dör Metusael yé.  
Metusael dör Lámeç yé.

<sup>19</sup>Eta Lámeç senéwa alakölpə ból  
tā. Eköl kiè Adá, eköl kiè Silá. <sup>20</sup>Eta  
Adá dë' alàë kiè Jabal. E' aleripa  
dör iyiwak alöukwakpa e' serke  
úla yöule datsi'tak wa ese a. <sup>21</sup>Ie'  
ël kiè Jubal. E' aleripa dör ma'ma  
kicha tā' guitarra sù ena ma'ma  
pulë sù ese bla'ukwakpa. <sup>22</sup>Silá dë'  
alàë ñies kiè Tubal-Caín. E' aleripa  
dör tabechka kiè bronce ena hierro  
ese sté. E' kutá kiè Naamá.

<sup>23</sup>Ká et tā Lámeç tö iché ilaköl-  
pa a:

“A Adá, a Silá, ye' ttò ttsó:  
Wém eköl duladula tö ye' shkao!,  
e' kueki ye' tö ikötwa.

<sup>24</sup>Yi tö Caín ttéwa, e' tö iské  
tueraë siarë,

erë yi tö ye' ttéwa, e' tö iské kí  
tueraë jaishet shute.”

<sup>25</sup>Adán alà skà kékane ilaköl tā  
wák wém. Eva tö iché: “Skéköl tö  
ye' a alà ské mé eköl, Caín tö Abel  
kötwä, e' skéie.” E' kueki ie' tö ikiè  
méka Set.\*

<sup>26</sup>Nies Set de alàë wák wém  
kiè mékaitö Enós. E' kewö ska' tā  
s'ditsö tö Skéköl a íyi tsá kí'mi ena  
idalöië'mi ikiè Jehová e' wa.

### Adán aleripa

**5** <sup>1-2</sup>Mik Skéköl tö s'ditsö tsá  
yö!, eta iyuéítö wès ie' wák es.  
Ie'pa yuéítö wém ena alaköl. Ie' er  
buaë ché ie'pa a. Ie' tö ie'pa yué, e'  
diwö shà tā ikiè mékaitö s'ditsö. I'  
dör Adán aleripa e'pa kiè.

<sup>3</sup>Mik Adán kí duas de cien eyök  
kí dabom mañayök (130), eta ie'  
alà kūne eköl, e' dör wès ie' wák es,  
ikiè mékaitö Set. <sup>4</sup>E' ukuöki tā ie'  
kí seneia duas cien paryök (800).  
E' shua ie' ala'r kí kūne wëpa ena  
alakölpə. <sup>5</sup>Es ie' kí duas dekä sera  
cien suliyök kí dabom mañayök  
(930) eta ie' blenewa.

<sup>6</sup>Mik Set kí duas de cien eyök kí  
skel (105), eta ie' alà wém kiè Enós,  
e' kūne. <sup>7</sup>E' ukuöki tā ie' kí seneia  
duas cien kuryök kí kul (807). E'  
shua ie' ala'r kí kūne wëpa ena  
alakölpə. <sup>8</sup>Es ie' kí duas dekä sera  
cien suliyök kí dabom eyök kí böök  
(912) tā iblénawa.

<sup>9</sup>Mik Enós kí duas de dabom  
suliyök (90), eta ie' alà wém kiè  
Cainán, e' kūne. <sup>10</sup>E' ukuöki tā  
ie' kí seneia duas cien paryök kí

\*4.25 Set: Hebreoie s'kiè e' wà kiane chè ie' tö imé.

dabom eyök kí skel (815). E' shuqa ie' ala'r kí kune wëpa ena alakölpa. <sup>11</sup>Es ie' kí duas deka seraq cien suliyök kí skel (905) ta iblénewa.

<sup>12</sup>Mik Cainán kí duas de dabom kuryök (70), eta ie' alà wëm kiè Mahalalel, e' kune. <sup>13</sup>E' ukuöki ta, ie' kí seneiaq duas cien paryök kí dabom tkëyök (840). E' shuqa ie' ala'r kí kune wëpa ena alakölpa. <sup>14</sup>Es ie' kí duas deka seraq cien suliyök kí dabop (910) ta iblénewa.

<sup>15</sup>Mik Mahalalel kí duas de dabom teryök kí skel (65), eta ie' alà wëm kiè Jéréd, e' kune. <sup>16</sup>E' ukuöki ta, ie' kí seneiaq duas cien paryök kí dabom mañayök (830). E' shuqa ie' ala'r kí kune wëpa ena alakölpa. <sup>17</sup>Es ie' kí duas deka seraq cien paryök kí dabom suliyök kí skel (895) ta iblénewa.

<sup>18</sup>Mik Jéréd kí duas de cien eyök kí dabom teryök kí bök (162), eta ie' alà wëm kiè Enoc, e' kune. <sup>19</sup>E' ukuöki ta, ie' kí seneiaq duas cien paryök (800). E' shuqa ie' ala'r kí kune wëpa ena alakölpa. <sup>20</sup>Es ie' kí duas deka seraq cien suliyök kí dabom teryök kí bök (962) ta iblénewa.

<sup>21</sup>Mik Enoc kí duas de dabom teryök kí skel (65), eta ie' alà wëm kiè Matusalén, e' kune. <sup>22</sup>Ie' tó Skéköl ttò è dalöieke. Matusalén kune, eta ie' kí seneiaq duas cien mañayök (300). E' shuqa ie' ala'r kí

kune wëpa ena alakölpa. <sup>23</sup>Es ie' kí duas deka seraq cien mañayök kí dabom teryök kí skel (365). <sup>24</sup>Ie' seneq buaë Skéköl ta, e' kueki ká et ta Skéköl wa ie' mítser ttsé'ka, e' kueki ke ie' ku'ia.

<sup>25</sup>Mik Matusalén kí duas de cien eyök kí dabom paryök kí kul (187), eta ie' alà wëm kiè Lámec, e' kune. <sup>26</sup>E' ukuöki ta, ie' kí seneiaq duas cien kuryök kí dabom paryök kí bök (782). E' shuqa ie' ala'r kí kune wëpa ena alakölpa. <sup>27</sup>Es ie' kí duas deka seraq cien suliyök kí dabom teryök kí sulitu (969) ta iblénewa.

<sup>28</sup>Mik Lámec kí duas de cien eyök kí dabom paryök kí bök (182), eta ie' alà kune wëm. <sup>29</sup>E' kiè mékaitö Noé.\* Mik ie' tó ilà kiè méka, eta ie' tó iché: "Jehová tó íyök suluo'wä. E' kueki se' kawötä kaneblök darë-rë ikuatkoie; erë alà i' tó se' keraë enuk." <sup>30</sup>Noé kune, e' itöki Lámec kí seneiaq duas cien skeyök kí dabom suliyök kí skel (595). E' shuqa ila'r kí kune wëpa alakölpa; <sup>31</sup>Es ie' kí duas deka seraq cien kuryök kí dabom kuryök kí kul (777) ta iblénewa.

<sup>32</sup>Noé kí duas de cien skeyök, e' itöki ila'r kune mañal. Ikihi kiè Sem. Ishu ék kiè Cam. Ibata ék kiè Jafet.

S'ditsö ì sulu  
è wambleke kekraë

**6** <sup>1-2</sup>Mik s'ditsö alónémi tajé  
ká i' kí, eta Skéköl ala'r\*

\***5.29 Noé:** Hebreoie s'kiè e' wà kiane chè enuk.

**6.1 Skéköl ala'r:** Kè s'wa ijcher moki tó yi chéitö es. Welepa tó ibikeitsè tó e' dör Skéköl biyöchökawpaie ö aknамаie erë Jesús tó iché tó esepa ke a senukwa s'ditsö ta (Marcos 12,25). Welepa skà tó ibikeitsè tó e' dör s'ditsö wësele ser suliü. Ì wambleke-rakitö ese ke wér buaë Skéköl wa, e' è jcher se' wa.

tö isu   tö s'dits   al   busipa d  r bua'buaala. E' ku  ki ie'pa tö busipa wa ie'pa w  batse ese ts  lur. 3 Er   Jehov   t   ich  : "Dits   d  r du  ta'w   ese wakpa. I'  ne ta ye' k   tö k  w   mepai   dits   a seno k   taj  . Es iserda   duas cien ey  k t   dabom b  y  k (120), ekk   ulat."

4 Mik Sk  k  l ala'r bak s  nuk s'dits   al   busipa t   al   kok   ie'pa t  , eta e' k  s  ka' t   w  p   blublu  , k  k  e  , esepa welepa bak k   i' k  . Nies e' uku  k w  p   esepa bakia. E'pa d  r p  ' dar  r   kkeauluka taj   ia'chki t   ese.

5 Jehov   t   isu   tö s'dits   tö i   sulu    wambleke taj   shute. I   sulu      bikeitseke ie'pa t   k  kra  . 6 E' ku  ki Sk  k  l er a idal  nene taj  . Ie' t   ibikeits  : "K   y   dits   yu  p  ." 7 Et   ie' ich  : "Dits   y  ! ye' t   k   i' k  , s  y  o e'pa ew  wa. Nies iyiwak kos serke k   s   k  , e' eweraway  .   Iie ye' t   ie'pa y  ??" 8 Er   w  m tso' ek  l ki   No  , e' su  ke Jehov   t   er bua' wa.

### No   t   kan   b  rie yu  

9 Tt   ikk   d  r No   pak  .

No   d  r w  m y  sy  s   Sk  k  l w  rk  . K  kra   ie' t   Sk  k  l tt   dal  ieke bua  . Ie' ek  l    serke wes Sk  k  l k   ikiane es. 10 Ie' ala'r d  r ma  n  l w  p   k   Sem, Cam, ena Jafet.

11 Sk  k  l w  rk   s'dits   tso' e' wambl  k sulu   me, n  ipp  k taj   shute. 12 Ie' t   isu   tö taj   íyi sulu      tso' íy  k k  . 13 E' ku  ki ie' t   No   a ich  : "Ye' t   ibikeits  t  ke t   dits   kos tso' k   i' k   e' eweraway   se. Ie'pa n  ipp  k taj   shute k   i'

ki. E' ku  ki ye' t   dits   kos tso' k   i' k   e' ewerawa sera   di' taj   wa. 14 E' ku  ki kan   yu  t   et   b  rie kal bua'bua ese wa, e' sh   blat  . Kan   w  q  r tso' ipamik, e' w  t   kiochka dalolo b  tsb  ts ese wa u'rki ena ishu  a as di' k   tk  w  ia. 15 Kan   yu  t   bats   metro d  k   cien ey  k k   dabom ma  n  y  k k   sk  l (135 metros) ekk  . Nies ishol   yu  t   metro d  k   dabom b  y  k k   b  t k   shab  ts (22,5 metros) ekk  . E' s  isp   yu  t   metro d  k   dabom ey  k k   ma  n  t k   shab  ts (13,5 metros) ekk  . 16 Kan   k   u yu  t  ka, er   kan   kk   k   iulat m  u  t metro shab  ts. Kan   sh   blat   ma  n  t ku  . Nies iw  kk   yu  t   et kan   sp   mik shkw  w  ie kan   a. 17 Di' patkeray   íyi tso' tts  'ka k   i' k   e' kos ewowa. Ekk   du  rawa sera   k   wa'ne. 18 Er   ye' tt   mera   be' a t   be' ts  kera  y   kan   a di' y  k. Be' ala'r ena be' alak  l ena be' yakpa, e'pa ts  umi e' ta kan   a. 19 E' s  iyiwak kua'k kua'k tso' k   s   k  , e' i  omi kan   a et   w  'ne et   alaki as itsatk  r w  s be' es. 20 Iyw  k k   i   kan   a. Iyw  k kua'k kua'k urta', iyw  k uru, d   iyw  k e' k  ke isk  , e' kos i  omi kan   a, et   w  'ne et   alaki, as k   idu  lur. 21 Nies chk   ultane dapa'   bl   be' a ena iyw  k a kat  ."

22 Et   ekk   kos wakanew   No   t   se wes Sk  k  l t   ich   ia' es.

### Di' bak taj   k   i' k  

**7** 1-4 E' uku  k t   Jehov   t   No   a ich  : "I'  ne kuiki t   ye' t   k  li patker  t   k   i' k   d  k   k   dabom tk  y  k (40) ni   na  ne  . iE' wa íyi ultane y  l ye' t   tso' tts  'ka k   s  

ki, e' kos ewerawayö yës! Erë ye' tö isuë tö ditsö ultane shua be' è serke buaë yësyësë wës ye' kí ikiane es. E' kuëkí be' e' iökä kanò a be' yamipa kos ta. Ñies iyiwak batse'r\* kos ese tsúmi dökä kuktö wë'ñe kuktö alaki. Erë iyiwak kè dör batse'r, ese tsúmi etö wë'ñe etö alaki. E' sù ñies dù kuä'ki kuä'ki tsúmi dökä kul wë'ñe kul alaki aks kè ierwa. Kos ttè chéyö be' a, e' wakaneú es." 5 Eta e' kos wakanewé Noé tö yësyësë wës Jehová tö ie' a iché es.

"Mik di' bak tajë ká i' kí, eta Noé kí duas tso' cien teryök (600). 7 Ie' e' iékä kanò a ila'r ena ilaköl ena iyakpa e'pa kos ta e' tsatkök di' alörke tajë e' yoki. 8-9 Iywak batse'r, e' sù iyiwak kè dör batse'r, iyiwak e' kuke ibatsi! kí ñies dù, ekkë kos dewä kanò a Noé ta bölda bölda wës Skéköl tö iché ia es.

10 Ká de kul, eta di' tö ká katémite. 11 Noé kí duas de cien teryök (600), kí sí! et kí ká dabom eyök kí kul (17). E' diwö shà ta íyök tskirolone ta di' tso' idikia e' deka tajë ká wa'ñe. Ñies ká jaishet kköburolone ta di' biteshka tajë kaliie ká i' kí. 12 Eta kali yëne darérëe dökä ká dabom tkëyök (40) ñië nañeë. 13 Kali yënémi, e' diwö shà ta Noé e' iékä kanò a ila'r ta. Ila'r kië Sem, Cam ena Jafet. E' sù ilaköl, iyakpa mañal, e'pa e' iékä ñies ie' ta kanò a. 14 Ie'pa ta iyiwak ultane dewä kanò a, iyiwak uru, iyiwak kañiru, iyiwak e' kuke iski kí ena dù ultane. Ekkë kos dewä kanò a ie'pa

ta. 15 Iywak kos ekkë dewä kanò a bölda bölda. 16 E' shua imí wë'ñe etö alaki etö, wës Skéköl tö iché ia es. E' one yës ta, Skéköl tö kanò wékkö wötewa.

17 Eta kali yënémiie dökä ká dabom tkëyök (40). Wës di' alör mirka es kanò batsemirkaitö.

18 Es di' kí alönëmi taië ta kanò batsemirkaitö buaë. 19-20 Es di' alönëkä taië kabata kos blubluë, e' tsata jaishet dò metro kul ekkë.

21 Es kos íyi tso' ttsë'ka ká sí kí, ekkëpa duolur di' a se. Dù kos, iyiwak uru kos, iyiwak kañiru kos, iyiwak e' kuke iski kos, ñies s'ditsö ekkëpa kos duolur yës. 22 I kos tso' ká sí kí ttsë'ka, e' enewa se. 23 Erë Noé ena i tso' ie' ta kanò a, e'pa è tsatköne. Eta imalepa kos e' enewa. Es ñies iyiwak ultane ewëwa di' tö. Dù ultane, iyiwak uru, iyiwak kañiru dò iyiwak e' kuke iski, ekkë kos enewa seraq. 24 Es di' ate íyök kí ká dökä cien eyök kí dabom skeyök (150) ekkë.

### Di' sinewane

**8** 1 Erë Skéköl kè éna Noé chë'wa. Ñies iyiwak ultane tso' Noé ta kanò a e' kè chë'wa ie' éna. Ie' tö siwa' patké as itö di' siuwane ká wa'ñe. Eta di' pasinemine enaena. 2 Íyök tskirolone e' wöténene. Ñies ká jaishet kköburolone e' wötérulunene. Eta kali wöklönewa kè yérku'ia. 3 Di' tso'ia e' pasimirne enaena. Ká de cien eyök kí dabom skeyök (150), eta di'

\*7.1-4 *Iywak batse'r:* E' wà kiane chè iyiwak kè dör ná ie'pa a. Se' welepa tö iché iyiwak skítane.



*Skéköl tö Noé tsatkée kanò a di' tajé e' yöki. (Génesis 7.23)*

sirmir ème. <sup>4</sup>E' kí si' de teröl (6) diwö de dabom eyök kí kul (17), eta erpa kanò sineká kabata kiè Ararat e' ki. <sup>5</sup>Eta di' pasinemiie. Si' de dabop (10), e' tsá diwö, eta kabata kakkeë ese wénemite.

<sup>6</sup>E' kí ká de dabom tkéyök (40), eta Noé tö kanò wékkö tsitsir kköppée. <sup>7</sup>Ie' tö dù ölö sù, e' émi et. Eré dù e' kè dë'iāne kanò a ie' urke wishwish dò mik di' sine eta. <sup>8</sup>E' ukuöki tā ie' tö nuböl émi et isuøie tö ká sinene. <sup>9</sup>Eré di' tso'ia íyök ki, kam isirwa, e' kuékí nuböl dene kanò a. Kè ie' wá ká ulat poppo kune e' tkowä. Noé tö nuböl klö'wéwa ulà wa tā itséwaneitö kanò a.

<sup>10</sup>Ie' tö iskà pané dökä ká kul, eta ie' tö nuböl skà émine. <sup>11</sup>Ká tünemite tā nuböl dene, e' wá kal ulatska debitü ikà ki. Es Noé éna iāne tö íyök kí sirmir. <sup>12</sup>Ie' tö iskà pané dökä ká kul, eta ie' tö nuböl skà émine. Nuböl e' kè dë'iāne.

<sup>13</sup>Mik Noé kí duas tso' cien teryök ki et (601), eta íyök pasinene. Eta si' kewe, e' tsá diwö, ie' tö kanò kí u tso' e' klétsa. Eta ie' isué tö íyök pasinene. <sup>14</sup>Kawö de si' et kí diwö dabom böyök kí kul (27), eta ie' isué tö íyök pasinene seraä. <sup>15</sup>Eta Skéköl tö ie' a iché: <sup>16</sup>"Be' e' yóttsa kanò a, be' alaköl tā, be' ala'r tā, be' yakpa tā ñies. <sup>17</sup>Es iyiwak ultane yólurbö se. Dù ena



I' dör ák katatëule ka<sub>l</sub>ie týi ña'woie Skéköl a ese. (Génesis 8.20)

iyiwak uru ena iyiwak e' kuke iski  
e' kos yólurbö kanò a, as imi' ká  
wañne alönüuk tajé ká wà iökne."

<sup>18</sup> Es Noé alaköl ena ila'r ena iyakpa, e'pa e' yélur kanò a. <sup>19</sup> Es ñies iyiwak ultane, uru ena kañiru ena iyiwak e' kuke iski, ñies dù e' kos e' yétsä kanò a se. <sup>20</sup> E' ukuóki ta ie' tö ák kataté ka<sub>l</sub>ie\* et Jehová a. E' bata kí ie' tö iyiwak batse'r ese jché ña'wéítö etö etö Jehová dalöioie. Ñies dù batse'r jchéítö ña'wéítö Jehová a etk etk. <sup>21</sup> Mik ishklé alar buaë, e' demi Jehová ska' ta ittséitö ta ibikeitséitö: "Eré ditsö ià duladula dökä këchke, eta ì sulu è bikeitsekitö. Eré kë yö ká sulu'wepawaià ie'pa kueki. Es ñies kë yö ì kos tso' ttsë'ka e' ewèwaià wes yö iewéwa es.

<sup>22</sup> "Ká i' tso'ia,

etä dalì kuatkérmi, iwà wörmi;  
kaba tso', kàsé tso' ñies;  
kalí tso', duas tso' ñies;  
ká ñiwe tso', ká nañewe tso'  
ñies."

### Skéköl Jehová tö ittè mé Noé a

**9** <sup>1</sup> Etä Skéköl er buaë ché Noé a ñies ila'r a ta ichéítö ie'pa a: "A' alönü tajé. Ká wañne wà ióne a' ala'r wa. <sup>2</sup> Ditsö yökí iyiwak ultane suardaë. Iywak ultane ırke kashuk a ena iyiwak serke ká sí ki ena iyiwak serke dayé a, e' kos ate a' dikia. <sup>3</sup> Iywak ultane ena kalwö ena kákö e' katémi a' tö wé kiane a' ki ese. E' kos méatyö a' a katanoie. <sup>4</sup> Chkè ultane katémi a' tö, eré kë ikatar ipé ta, se' serke s'pé mik e' kueki. <sup>5</sup> Se' serke s'pé mik, e' kueki kë se' meneat ñi ttökwa, e' nuí ta!.

\*8.20 Ák kataté ka<sub>l</sub>ie: E' wà kiane chè si'kuiae altar.

Yi tö eköl ttéwa, ese kichatérdaë. E' sù iyiwak wé tö s'ttéwa, ese kawöta ttewa ñies. A' wé tö s'ttéwa, ese nuí patueraëtiò ye' a.

6 "Skéköl tö s'ditsö yö! wes ie' es, e' kueki yi tö se' ttéwa,  
ese wák kawöta' ttewa wake!"

7 Erë a' alönú taië,  
ká wa'ñe wà ió ala'r wa."

8 Ñies Skéköl tö iché Noé a ena ila'r a; 9-10 "I'ñe ye' ttè mukeat a'  
a ena iyiwak e' yétsa kanò a' ta,  
e' kos a. 11 Mokië ye' tö a' a iché  
tö ye' kè tö ditsö ena iyiwak tso' ká  
wa'ñe, e' kos ewepawaiä di' wa. Di'  
kè döpaiä ká wa'ñe sulu'ukwá wes  
itka es." 12-13 Ye' tö shkaba' tkekar  
mò shua iwà kkachoie a' a ena ditsö  
ulitane a tö ye' ttè méatyö a' a ena  
iyiwak kos a kekraë. 14 Mik ye' tö  
mò patké ta e' shua shkaba' tkene e'  
wérmi, 15 eta ye' éna iané tö ye' ttè  
me'atbak a' a ena iyiwak kos a tö  
kè ye' tö ditsö ena iyiwak ulitane  
ewepawaiä di' wa. 16 Es mik shkaba'  
tkene mò shua e' suéyö, eta bet ye'  
éna idaa tö ye' ttè me'at ditsö a ena  
iyiwak kos a michoë kekraë. 17 E'  
dör iwà kkachoie tö ye' ttè me'atbak  
ditsö ulitane a ñies iyiwak tso' ká i'  
ki e' kos a." Es Skéköl tö Noé a iché.

Noé alà kiè Cam  
e' kè wà iyé dalò ta'

18 Noé ala'r e' yé'lur kanò a, e'pa  
kiè Sem, Cam ena Jafet. Cam dör  
Canaán yé. 19 E'pa mañal dör Noé  
ala'r. Ie'pa aleripa tö ká wà íe.

20 Noé dalì kuatkémi. E' shua uva  
kuatkéito. 21 Ká et ta ie' tö uva diò

shköshkö e' yé ta e' tö ie' ttéka taië.  
Ie' datsi' yétsa ta ianewa iski sume  
iu a. 22 Cam dör Canaán yé, mik  
e' tö iyé sué sume, eta ie' mía ibiyó  
chök ielpa ból e'pa a. 23 Erë Sem  
ena Jafet e'pa kè éna iyé tür sume  
e' suak. E' kueki ie'pa tö datsi'  
klö'wéwa, imékarakitö e' o' bata-  
ki ta ie'pa shkémi tsikka iwotrélur  
bánet dò wé iyé tür ee ta ipabakéwa  
datsi' e' wa.

24 Noé tté taië blo' tö e' ti'neka.  
Mik ie' wà ijchenewa ilà tsirla ék kè  
wà ie' daloiëne', 25 eta ichéitö:

"iAs Canaán kawö tkò suluë!  
iIe' weirdaë siarë shute klöu-  
lewà ielpa ból e'pa kanè  
mésoise!"

26 E' ukuöki ta ikí chéitö:  
"iJehová dör Sem Kéköl as e'  
kikarka!  
As Canaán aleripa kaneblò Sem  
aleripa a ikanè mésopae.  
27 As Skéköl kawö buaë mù Jafet  
a as ie' alör michoë.  
As Jafet ditséwöpa ser Sem  
yamipa ska!  
As Canaán aleripa kaneblò ie' a  
kloulewa ikanè mésopae."

28 Di' bak taië ká i' ki, e' ukuöki  
ta Noé sene'iä duas cien mañayök  
kí dabom skeyök (350). 29 Mik ie'  
blenewa, eta ie' kí duas tso' cien  
suliyök kí dabom skeyök (950).

I' dör Noé aleripa kiè

**10** <sup>1</sup>Noé ala'r kiè Sem, Cam  
ena Jafet. Di' bak taië e'  
ukuöki ta ie'pa wák ala'r kune.  
Ikkëpa dör Noé aleripa kiè.

<sup>2</sup>Jafet ala'r wëpa dör Gómer, Magog, Madai, Javán, Tubal, Mésec, ena Tirás. <sup>3</sup>Gómer, e' ala'r wëpa dör Asquenaz, Rifat, ena Togarmá. <sup>4</sup>Javán e' ala'r wëpa dör Elisá, Tarsis, Quitim ena Rodanim. <sup>5</sup>E'pa kos dör Jafet aleripa. Ie'pa ñì blabatsérak ulawa ulawa. Es iká yuérakitö tseë iwakpa a dayë kkö-mik. Ittò kua'ki kua'ki iwakpamik.

<sup>6</sup>Cam ala'r wëpa dör Cus, Misraim, Fut, ena Canaán. <sup>7</sup>Cus ala'r wëpa dör Sebá, Havilá, Sabtá, Raamá ena Sab-tecá. Raamá ala'r wëpa dör Sebá ena Dedán. <sup>8</sup>Cus dör wëm kiè Nimrod, e' yé. Nimrod de keweie blu' darerëe ká i' ki. <sup>9</sup>Jehová ttò wa Nimrod dör yería poë. E' kueki ttè i' meneat se' a: "Be' dör yería poë Skéköl ttò wa wes Nimrod es." <sup>10</sup>Mik Nimrod bak ká kiè Sinar, e' wökirie eta ká e' shuqá ká tso' tkël kiè Babel, Érec, Acad, ena Calné. E' kos dör ká bua'ie ese. <sup>11</sup>Wëm e' yétsa Sinar a eköl kiè Asur. E' mía ká bánet. Eta ee ie' ká yué tkël kiè Nínive, Rehobot-ir, Quélah ena Resen. <sup>12</sup>Resen dör ká bërie. E' ate Nínive ena Quélah, e' shusha.

<sup>13</sup>Eta Misraim aleripa mía ie'pa ikkë wakpaie: ludeowak, ana-meowak, lehabiwak, naftuhiwak, <sup>14</sup>patruseowak, casluhítawak, ena caftoritawak. Filisteowak datse caf-toritawak wa.

<sup>15</sup>Canaán dör Sidón yé. Sidón dör ie' alà tsá. Ie' alà skà kiè Het. <sup>16</sup>Canaán aleripa mía ie'pa ikkë wakpaie: jebuseowak, amorreowak, gergeseowak, <sup>17</sup>heveowak, araceowak, sineowak, <sup>18</sup>arvadeowak,

semareowak ena hamateowak. Ká taië tå e' wakpa kos ñì blabatsérak ponemi ká kua'ki kua'ki. <sup>19</sup>Canaán-wak ká ate ká kiè Sidón döwá ká kiè Gaza. Gaza ate ká kiè Guerar e' kke. Ñies ie'pa ká ate döwá ká kiè Lesa diwö tskirke e' kke. Lesa ate ká tkël kiè Sodoma, Gomorra, Admá ena Seboím e' kke. <sup>20</sup>E' wakpa kos dör Cam aleripa. Ie'pa ñì blabatsérak ulawa ulawa. Es iká yuétörak tseë iwakpa a. Ittò kua'ki kua'ki iwakpamik.

<sup>21</sup>Ñies Sem dë' alàë, e' dör Jafet el kibi Ék. Heber ala'r kos dör Sem aleripa. <sup>22</sup>Sem ala'r dör Elam, Asur, Arfaxad, Lud ena Aram. <sup>23</sup>Aram ala'r dör Uz, Hul, Guéter ena Mas. <sup>24</sup>Arfaxad dör Sélah yé. Sélah dör Heber yé. <sup>25</sup>E' ukuöki tå Heber alà de böl. Eköl kiè Péleg. \* E' kewö ska' tå sulitane ñì blabatsérak, e' kueki ikiè mékaitö es. Iéköl kiè Joctán. <sup>26</sup>Joctán ala'r dör Almodad, Sélef, Hasar-mávet, Jérah, <sup>27</sup>Hadoram, Uzal, Diclá, <sup>28</sup>Obal, Abimael, Sebá, <sup>29</sup>Ofir, Havilá, ena Jobab. E'pa kos dör Joctán ala'r. <sup>30</sup>Ie'pa serke ká micho ká kiè Mesá tkörö ká kiè Sefar e' shuqulat a. Sefar ate kabata a, wé diwö tskirke, e' kke. <sup>31</sup>E' wakpa kos dör Sem aleripa. Ie'pa ñì blabatsérak ulawa ulawa. Es iká yuérakitö tseë iwakpa a. Ittò kua'ki kua'ki iwakpamik.

<sup>32</sup>Pë! kos ekkëpa dör Noé aleripa kiè kitule wës iditséwö kua'ki kua'ki ena wé iserke ká kua'ki kua'ki es. Di' bak taië, e' ukuöki tå se' alöne-ne taië e' ñì blabatsérak ká wa'ñe.

\* **10.25 Péleg:** Hebreoie s'kiè e' wà kiane chè ñì blabatsè.

Skëköl tö s'ditsö ké  
ttök kua'ki kua'ki

**11** <sup>1</sup>Kuaë tą sulitane ttöke ttè etökicha è wa. <sup>2</sup>Mik ie'pa míyaldak diwö tskirke, e' ëka, demirak kakkue kiè Sinar ee, eta ee ie'pa e' tséat senuk. <sup>3</sup>Ká et tą ie'pa iché ñì a: "Mishkarak skauchka yuöök blok sù, e' kukuësö bö' a as imi'a darérëe u yuoie." Es iwakanewérakitö ák skéie. Ñies kiöchka dalolo bötsböts ese wa ibatséra-kitö i tso' shytuule ese skéie. <sup>4</sup>E' ukuöki ta iskà chénerakitö ñì a: "Mishkarak ká blublu yuöök. E' shua u yuösö kakkeë döka ká jai a. Es se' e' chömi buaë kékëpa taië ena kè se' kawötä fìi blabatsök ká wa'ñe."

<sup>5</sup>Erë Jehová e' éwa isaqkrak tö ie'pa ká blublu yueke ena u kakkeë yuekerakitö. <sup>6</sup>Etä ie' tö ibikeitsé: "Ie'pa dör ká etkè wak ena ittörak etkè ñies, e' kueki ie'pa tö kanè i' kékami. E' ukuöki ta kè i a ie'pa wöklönuk. Ie'pa sermi wes ie'pa ki ikiane es. <sup>7</sup>E' kueki súyö ie'pa kè ttök kua'ki kua'ki as kè iñi ttò ania."

<sup>8</sup>Es Jehová tö iblabatsérak ká wa'ñe. Ee ie'pa ká yué e' kané wöpanere. <sup>9</sup>Ká e' kiè Jehová tö ie'pa kέ ttök kua'ki kua'ki ena iblabatsérakitö ká wa'ñe. E' kueki ká e' kinewa Babel.\*

### Sem aleripa

<sup>10</sup>I' dör Sem aleripa kiè. Di' bak taië, e' ukuöki duas bök, e' kewö ska' ta Sem ki dues tso' cien eyök (100). Etä ie' alà kune wëm kiè

Arfaxad. <sup>11</sup>Arfaxad kune, e' ukuöki Sem ki seneia duas dekä cien skeyök (500), eta ie' ala'r skà kune wëpa ena alakölpa.

<sup>12</sup>Mik Arfaxad ki dues tso' dabom mañayök (35) eta ie' alà kune wëm, e' kiè Sélah. <sup>13</sup>Sélah kune, e' ukuöki ta Arfaxad ki seneia duas cien tkëyök kí mañal (403), eta ie' ala'r skà kune wëpa ena alakölpa.

<sup>14</sup>Mik Sélah ki dues tso' dabom mañayök (30), eta ilà kune, e' kiè Heber. <sup>15</sup>Heber kune, e' ukuöki ta Sélah ki seneia duas cien tkëyök kí mañal (403), eta ie' ala'r skà kune wëpa ena alakölpa.

<sup>16</sup>Mik Heber ki dues tso' dabom mañayök kí tkël (34), eta ilà kune, e' kiè Péleg. <sup>17</sup>Péleg kune, e' ukuöki ta Heber ki seneia duas cien tkëyök kí dabom mañayök (430), eta ie' ala'r skà kune wëpa ena alakölpa.

<sup>18</sup>Mik Péleg ki dues tso' dabom mañayök (30), eta ilà kune, e' kiè Reú. <sup>19</sup>Reú kune, e' ukuöki ta Péleg ki seneia duas cien böyök kí silitu (209), eta ie' ala'r skà kune wëpa ena alakölpa.

<sup>20</sup>Mik Reú ki dues tso' dabom mañayök (32), eta ilà kune, e' kiè Serug. <sup>21</sup>Serug kune, e' ukuöki ta Reú ki seneia duas cien böyök kí kul (207), eta ie' ala'r skà kune wëpa ena alakölpa.

<sup>22</sup>Mik Serug ki dues tso' dabom mañayök (30), eta ilà kune, e' kiè Nahor. <sup>23</sup>Nahor kune, e' ukuöki ta Serug ki seneia duas cien böyök (200), eta ie' ala'r skà kune wëpa ena alakölpa.

\* 11.9 Babel: Hebreoie s'kiè e' wà kiane chè chilineka.

<sup>24</sup>Mik Nahor kí duas tso' dabom böyök kí sulitu (29), eta ilà kune, e' kiè Térah. <sup>25</sup>Térah kune, e' ukuöki tå Nahor kí seneia duas cien eyök kí dabom eyök kí sulitu (119), eta ie' ala'r skà kune wëpa ena alakölpa.

<sup>26</sup>Mik Térah kí duas tso' dabom kuryök (70), e' ukuöki tå ie' ala'r kune mañal. Ala'r e'pa kiè Abram, Nahor ena Harán.

### Térah ala'r

<sup>27</sup>E'pa dör Térah ala'r. Térah dör Abram, Nahor ena Harán, e'pa yé. Harán, e' dör Lot yé. <sup>28</sup>Harán blë-newä kewe iyé Térah e' yöki ká kiè Ur ee. Ká e' atë Caldea. Ie' blënewä wé ie' kune ee.

<sup>29</sup>Abram senewä alaköl kiè Sarai, e' ta. Nahor senewä alaköl kiè Milcá, e' ta. Milcá dör Harán alà busi ena Iscá kutà. <sup>30</sup>Sarai kë döta' alaë.

<sup>31</sup>Térah e' yétsa Ur, dör caldea-wak ká e' a. Ie' alà Abram ena itala kiè Lot dör Harán alà ena iyàk kiè Sarai e'pa mía ie' ta. Warma ie'pa mírō döka ká kiè Canaán ee, erë ie'pa demi ká kiè Harán, eta ee ie'pa e' tséat senuk. <sup>32</sup>Ee Térah blë-newä. Ie' kí duas tso' cien böyök kí skel (205).

### Jehová tté Abram ta

**12** <sup>1</sup>Mik Abram bak senuk ká kiè Ur ee, eta Jehová tö ie' a iyë!: "Be' ká ena be' ditsewöpa ena be' yé yamipa, e' müat ta be' yúshka senuk, ká kkachekeyö be' a ee. <sup>2</sup>Ká e' kí ye' tö be' aleripa alöweraë taië. Ie'pa döraë ká taië wakpaie. Ye' er buaë chöraë be'

a. Ye' tö pë' taië keraë be' kkeökkä taië. Nies be' er buaë chöraë pë' taië a. <sup>3</sup>Wépa er buaë ché be' a, esepa a ye' er bua' chöraë. Wépa tö alibché be' ki, esepa we'ikerayö. Be' batamik ye' er buaë chöraë ká ultane wakpa a."

<sup>4</sup>Etä Abram e' yétsa ká kiè Harán wes Jehová tö ie' a iyë! es. E' késka' tå ie' kí duas tso' dabom kuryök kí skel (75). Ie' mía Canaán.

<sup>5</sup>Etä ie' wá iyamipa mítser sera. Ilaköl kiè Sarai ena ilayök kiè Lot ena íyi ulitane tso'rak iwa, ekkë kos mítserak iwa. Nies Harán wakpa welepa tso' ie' wá kanè mésoie, e' mítser ie' wá. Mik ie' demi Canaán, <sup>6</sup>etä ie' tkami ká kos ekkë dömi ká kiè Siquem ate Canaán ee. Ee ká atë kiè Moré. Ee kós klö àr elka. Canaánwakpa a ká e' dör ká dalöiértä ese. (E' kewö ska' tå Canaánwakpa serkeia ee.) <sup>7</sup>Etä ee Jehová e' kkaché Abram a ta ichéitö ia: "Ká i! meraëyö be' ditsewö a."

Etä Abram tö ák kataté ka'ie et iyiwak jchoie Jehová dalöioie ee Jehová e' kkayë! ie' a e' kueki. <sup>8</sup>E' ukuöki tå imía ká dör kabataie atë Betel diwö tskirke e' èkä. Etä ee ie' sené ekuölö. Ká e' atë Betel ena ká kiè Ai e' shułat a. Ee ie' tö ák skà kataténe et. Ee ie' tö Jehová dalöi. <sup>9</sup>E' ukuöki tå Abram mía enaena Négueb kke.

### Abram mía Egípto

<sup>10</sup>E' kewö ska' tå ketba tkënnewä poë ká e' ki. Kè i ta' katè wé Abram serke ee. E' kueki ie' mía Egípto senuk ekuölö. <sup>11</sup>Abram dökemitke

Egipto eta ilaköl Sarai, e' a ichéitö: "Ye' ttò ttsó. Ye' wá ijcher buaë tö be' dör buaala. <sup>12</sup>Mik Egipto wakpa tö be' sué tö be' dör buaala, eta ie'pa tö ichèmi: 'Wí dör wém wí alaköl.' Etä ye' tterawá ie'pa tö be' kueki eré ie'pa be' meraqt senukwá ie'pa ta. <sup>13</sup>E' kueki, be' we'ikèyö, ichöö ie'pa a tö ye' dör be' aké as kë itö ye' ttòwá be' kueki as ye' kawö tkò buaë."

<sup>14</sup>Mik Abram demi Egipto, eta Egipto wakpa isué tö Sarai dör alaköl buaala. <sup>15</sup>Ká e' blú kueblupa tö isué ñies tö Sarai dör alaköl buaala. E' kueki ie'pa mía ichök blu' a tö alaköl e' dör buaala. Etä imítserak iwa blu' wé a.

<sup>16</sup>Etä Egipto blú tö Abram kkö'né buaë Sarai dalermik. Taië ie' tö Abram a iyiwak uru kakmé. Obeja, baka, burro ena kameio e' kakmétö ie' a. Se' ñies kakmétö ie' a kanè mósoie wëpa ena alakölpa. <sup>17</sup>Erë Sarai kueki Jehová tö Egipto blú ena iyamipa we'iké taië. Duè méka taië ie'pa ki. Kawö darerëe mékaitö ie'pa ki. <sup>18</sup>E' kueki Egipto blú tö Abram tsük patké tå ichéitö iä: "¿Iók bö iwamblé ye' ta es? ¿I kueki be' kë wá ye' a iyëne tö alaköl i' dör be' alaköl? <sup>19</sup>Be' tö ye' a iyë' tö ie' dör be' kutà. E' kueki tsir etä ye' sénewá ie' ta. I' be' alaköl, itsúmine tå be' yúshka." <sup>20</sup>Etä Egipto blú tö ishkëkipa patké Abram yoktsa ká e' ki ilaköl tå ena i kos tso' ie' wá ekképa tå.

### Abram ena Lot ñí blabatsélor

**13** <sup>1</sup>E' ukuöki tå Abram ena ilaköl e' yélur Egipto míane Négueb. Ie' íyi kos mítserak iwa seraqa. Ie' alayök Lot e' mía ie'pa

ta ñies. <sup>2</sup>Abram dör íyi blu' taië. Ie' wá oro tso'. Ie' wá inuköl tso' taië. Nies ie' wá iyiwak tso' taië. <sup>3</sup>Négueb ee tå ie' míane enaena dò Betel. Betel ee tå ie' míane tkörö wé ie' bak senuk kewe ee. Ká e' ate Betel ena Ai e' ulat shushá. <sup>4</sup>Ká e' a ie' wá ák katatéulebak ka'ie, ee ie' tö Jehová dalöiéne.

<sup>5</sup>Lot dör ñies íyi blu' taië wes iyëla Abram es. Iywak tso' taië ie' wá obeja ena baka. Se' tso' ie' wá ñies kanè mésopae. <sup>6</sup>Erë wé ie'pa serke ká e' ki kakö kë ky'ia ie'pa iyiwak kos a katè. Ie'pa kë chë'kaia ñì o'mik. <sup>7</sup>Abram ena Lot e'pa iyiwak kkö'nukwakpa ñippöke, ñì wöñatköke. Ñies pë' tso'tke kënet ká e' ki. E' wakpa dör canaánwak ena fereseowak. <sup>8</sup>Ká et tå Abram tö iché Lot a: "Se' dör ñì yami. Kë imène buaë tö se' ñippò. Ñies se' iyiwak kkö'nukwakpa ñippöke ème e' kë dör buaë. <sup>9</sup>Ká saú wí ká bua' tso'. Be' ishushtö wéne wa be' wöbatse, e' a be' yúshka. Be' mí wí éka, e' ta ye' mí dià éka. Etä be' mí dià éka, e' ta ye' mí wí éka."

<sup>10</sup>Etä Lot ká kí sué kamië, eta kos di' kiè Jordán, e' kkömic ká buaë tso', e' kí sué ie' tö. Etä ie' tö isué tö ká e' dör buaë dò ká kiè Sóar ee. Buaë di' tso' wes ká buaë yö' Jehová tö es ena wes Egipto es. (E' kewö ska' tå kam Jehová tö ká kiè Sodoma ena ká kiè Gomorra, e' böt eùwa.) <sup>11</sup>Etä kakkue tso' Jordán di' kkömic e' shushté Lot tö, eta e' wa ie' mía. Es ie'pa ñí blabatsélor. <sup>12</sup>Abram e' tséat senuk Canaán. Lot mía senuk Jordán kakkue ki, ee ká tso' tseë. Ie' sené tsinet ká kiè

Sodoma e' q'mik. <sup>13</sup>Sodoma wakpa, serke suluë. Ie'pa ñ sulu è wamble-ke kekraë Jehová wöa.

<sup>14</sup>Lot mía e' ukuöki tå, Jehová tö iché Abram a: "Wé be' tso' ee ká kí saú bua'ie shkit wöwí wöiá dià éka jaì éka ká wa'ñe tö ñis idör? <sup>15</sup>Ká kos kí suébö, e' meraëyö be' a ena be' aleripa a kekraë. <sup>16</sup>Ye' tö be' aleripa alöweraë taië wës íyök po taië es. Wës íyök po kë shtarta' es be' aleripa alördäe kë ishtarpa yi a. <sup>17</sup>Ká i' kos meraëyö be' a. E' kuëki be' yú iweblkö seraa."

<sup>18</sup>Eta Abram e' yétsa ta imía senuk kós klò wökir àr taië dör wëm kiè Mamré e' icha ee. E' ate tsinet ká kiè Hebrón ee. Ee Abram tö ák skà kataté ka'ie Jehová dalöioie.

### Abram tö ilayök Lot, e' tsatké

**14** <sup>1</sup>E' kewö ska' tå blu'pa tso' tkél. Eköl kiè Amrafel, e' dör ká kiè Sinar, e' blú. Ieköl kiè Arioc, e' dör ká kiè Elasar, e' blú. Ieköl skà kiè Quedorlaómer, e' dör ká kiè Elam, e' blú. Eta ibata ék kiè Tidal, e' dör ká kiè Goím, e' blú. <sup>2</sup>Blu'pa skà tso' dökä skel e' eköl kiè Bera, e' dör ká kiè Sodoma, e' blú. Ieköl kiè Birsá, e' dör ká kiè Gomorra, e' blú. Ieköl kiè Sinab, e' dör ká kiè Admá, e' blú. Skà kiè Seméber, e' dör ká kiè Seboím, e' blú. Ibata ekké e' dör ká kiè Bela, e' blú. Ká e' kiè Sóar ñies. E' kewö ska' tå blu'pa dökä tkél ñe' e' keká ñippök blu'pa skà dökä skel ñe' tå. <sup>3</sup>Blu'pa skel e'pa tö iñippök wakpa dapa'wé ek tsiní ñippök blu'pa tkél e'pa tå kakkue kiè Sidim ee.

Ee dayë wölö me'r bërie kiè Mar Muerto.

<sup>4</sup>Blu'pa dökä skel e'pa bak senuk iwakpa tå dökä duas dabom eyök kí bök (12), blu' kiè Quedorlaómer, e' dikia. Mik e' kí duas de dabom eyök kí mañal (13) eta ie'pa kë éna Quedorlaómer ttè dalöiakia. Ie'pa e' kakka ñippök ie' tå. <sup>5</sup>E' kí duas de ek eta Quedorlaómer e' yétsa mía ñippök ibolökpa tå. Blu'pa döka mañal dör ie' klépa, e' míyal ie' tå ñippök. Ie'pa mía ká kiè Astarot Carnaim ta ee ie'pa e' aléka refaitawak ki. E' ukuöki tå ie'pa e' aléka zuzitawak kí, ká kiè Ham ee. E' ukuöki tå ie'pa e' aléka emiwak kí, e' wakpa ká kiè Savé-quiriataim. <sup>6</sup>E' ukuöki ie'pa e' aléka horeowak kí kabata kiè Seír ee. Eta itötíemi ie'pa tö dò tkörö ká kiè El-parán ee. Ká e' ate ká sir poë, e' kkömic. <sup>7</sup>Eta ee ie'pa bitene itò wane dò ká kiè En-mispat. Ká e' kiè Cadés ñies. Ie'pa e' aléka Amalec aleripa kí tå iká klö'wéwärakito. Ñies ie'pa e' aléka amorreowak kí. E' wakpa ká kiè Hasesón-tamar. E' ukuöki tå ie'pa mi'ke ñippök blu'pa skel tå. E' kuëki blu'pa skel e' dapa'wéka Sidim kékkuë ki blu'pa tkél kinuk ñippoie.

<sup>8-9</sup>Eta Sodoma blú ena Gomorra blú ena Admá blú ena Seboím blú ena Bela blú (Bela kiè Sóar ñies), blu'pa skel ekképa ñi dapa'wéka Sidim kékkuë ki ñippoie, Quedorlaómer, e' dör Elam blu', e' tå ena blu'pa tso' ie' tå e'pa tå ñies. Blu'pa e'pa dör Tidal, e' dör Goím blu'. Ieköl dör Amrafel, e' dör Sinar blu'. Bata ék dör Arioc, e' dör

Elasar blu'. Es blu'pa tkël míyal ñippök blu'pa skel ta. <sup>10</sup>E' kewö ska' ta Sidim kékkué ki kiöchka dalolo bötsböts ese dapé tso' taié. Mik Sodoma wakpa ena Gomorra wakpa tkayal ñippè yoki etá ie'pa shaböts anemi kiöchka dapé tso' taié ese a. Imalepa tkayalmi kabata shua.

<sup>11</sup>Es blu'pa dökä tkël e'pa e' aléka blu'pa skel ki. Etá ie'pa tö chkwewö ena íyi bua'bua tso' Sodoma ena Gomorra e' kos klö'wéwarakitö ta iponemirak. <sup>12</sup>E' kewö ska' ta Abram alayök Lot serke Sodoma. E' mítserak iwá, es ie' dalì kos e' mítserak iwá ñies.

<sup>13</sup>Etá ñippè shua wém tka-shkar eköl, e' wa ibiyó mí Abram a. Abram e' dör hebreowak. Ie' serke tsinet wém kiè Mamré dör amorreowak e' kos klö wökir àr ee. Mamré dör Escol ena Aner él. Ie'pa wa Abram wér buaë.

<sup>14</sup>Mik Abram tö ibiyó ttsé, eta ie' kanè mésopa kune ie' u a, e'pa dapa'wéítö dökä cien mañayök ki dabom eyök ki pàköl (318) ilayök tsatkoie. Etá ie'pa míyal blu'pa tkël itökí dökä ká kiè Dan ee. <sup>15</sup>Etá nañewe ie'pa demi me'ie ñippémiie blu'pa ta. Etá ie'pa tö blu'pa töiémi tkörö ká kiè Hobá ee. Hobá aqé ká kiè Damasco e' wöwí. <sup>16</sup>Etá i kos minetser blu'pa wa, e' kos yélur ie'pa tö blu'pa ulà a. Es Abram tö ilayök Lot e' tsatkée. Ñies i tso' ilayök wa e' kos dene iulà a. Ñies alakölpa ena pë' malepa tso' klölewá e'pa kos tsatkée ie' tö.

### Melquisedec er buaë ché Abram a

<sup>17</sup>Mik Abram e' aléka Quedorlaómer ki, e' sù blu'pa mañal shköke ie' ta, e'pa ki. E' ukuöki ta ie' bitene de Savé kékkué ki. Kékkué e' kiè ñies Blu' Kékkué. Etá ee Sodoma blú de ie' ñaletsük ie' shke'uk. <sup>18</sup>Ñies ká kiè Salem, e' blú kiè Melquisedec, e' dör Skéköl dör íyi ultane tsata e' sacerdote. Ie' tö pan ena vino yéttsa. <sup>19</sup>Etá ie' er buaë ché Abram a ttè i' wa:

"Skéköl dör íyi ultane tsata, e'  
tö ká jaì ena ká i' yö.  
Ie' tö be' kimé as be' kawö tkò buaë kekraë.  
<sup>20</sup>Ie' dör íyi ultane tsata, e'  
kikökasö.  
Ie' tö be' kimé e' alökka  
be' bolökpa ki, e' kueki  
ikikökasö."

Etá íyi kos de Abram ulà a ñippè shua, e' mu blatèsö dökä dabop ta e' tsá eyök yéttsaítö méítö Melquisedec a Skéköl dalöioie. <sup>21</sup>E' ukuöki ta Sodoma blu' tö iché Abram a:

—Sa' yamipa tsatkée be' tö, e'pa muñé ye' a. Erë dalì kos e' tsúmi be' tö be' a.

<sup>22</sup>Erë Abram tö iiyté:

—Au. Jehová dör Skéköl íyi ultane tsata, e' tö ká jaì ena ká i' yö, ie' a ye' kablétke <sup>23</sup>tö i kos dör be' icha, e' kë tsepaatyö yës. Dö be' datsi'takla ö be' klökküö kicha kë tsepaatyö etkla wë'lä as kë be' ichö tö be' íyi wa ye' blune. <sup>24</sup>Kè i kiane ye' ki ye' wák a. Chkö kos ñétke ye' kanè mésopa tö, e'

è dör wë' ye' a. Erë wépa dare ye' ta nippök bulu'pa tå kiè Aner ena Escol ena Mamré, as ie'pa wä dali kakmí! kos ikawötå tsukmi eköl eköl ekkë.

### Jehová tö ittè mé Abram a

**15** <sup>1</sup>E' ukuöki tå Jehová tté Abram tå kabsueie, eta ichéitö ia:

—A Abram, kè be' suanuk. Ye' dör be' tsatkökawak. Íyi buaë merayö be' a taië shute.

<sup>2-3</sup>Erë Abram tö iiuté:

—A Skéköl, ye' wák alà kè tå!, e' kuëki i kos memibö ye' a e' kè dör iie bua' ye' a. Ye' íyi kos atdaë ye' kanè mésó kiè Eliézer dör Damasco wak e' ulà a. Erë ie' dör o'ka.

<sup>4</sup>Eta Jehová tö iiuté:

—Be' wák alà kurdaë, e' kè dör o'ka.

<sup>5</sup>Eta Jehová wä Abram mítser u'rki, tå ichéitö ia:

—Ká saú buaë siwa' ki. Békwö saú tå ishta'lú. ¿Be' a ishtarmi? E'ma bua', es be' aleripa alördæ tajë.

<sup>6</sup>Eta Abram erblé Jehová mik, e' kuëki iklö'wéitö wës pë' buaë yësyësë es.

<sup>7</sup>Eta ichéitö ia:

—Ye' dör Jehová. Ye' tö be' yë' ttsa caldeawak ká kiè Ur e' a ká i' moie be' a ena be' aleripa kos a.

<sup>8</sup>Eta Abram ie' a ichaké:

—A Skéköl, ñwes e' jchermi ye' wa yësyësë tó ká i' dòmi ye' ulà a?

<sup>9</sup>Jehová tö iiuté:

—Baka ena chibo ena obeja e' kos ki duas tso' mañal, ese tsúbitu

ña etö etö. Ñies nuböl et ena ipupula et, e' tsúbitu ña.

<sup>10</sup>Eta Abram wä iyiwak kos ekkë debitu Jehová a. Eta ie' tö iyiwak e' ttélur télor shushaë. Shaböts méwaitö wí wa shaböts méwaitö i' wa. Es iate ñi wöshaë. Erë dù kè ténane ie' wä es.

<sup>11</sup>Eta ölö dettsa iyiwak chkà dalér-mik, erë Abram tö ibukueke chkè ki.

<sup>12</sup>Ká tuinemitke, eta Abram kapowa taië. E' bet Abram pamik ká mía ttsetseë shute se' suawè ekkë.

<sup>13</sup>Eta Jehová tö iché ia:

—Be' wä ijchenú buaë tö be' aleripa serdaë ká kuä'ki ki wes ká kuä'ki wakpa es. Ee ie'pa klördawa kanè mésopaiè kè patueta!. Ie'pa weirdaë dökä duas cien tkéyök (400), ekkë ulatök. <sup>14</sup>Erë ká wé wakpa tö ie'pa we'ikera, e' wakpa ské we'ikerayö siarë. E' ukuöki tå be' aleripa yérdattsa ká e' a. Ie'pa wä íyi bua'bua tuè darë-rëe ese miraë tajë iwákpa a. <sup>15</sup>Eta mik be' kénéwë eta be' duówamí buaë, kë weir tå!. Es be' michoë be' dëutöpa itöki. <sup>16</sup>Eta mik be' aleripa tso' ká kuä'ki ñe' a e'pa de dökä tkötökicha, eta ie'pa dörane ká i' ki. Ká i' wakpa, kiè amorreowak, kám e'pa tó i sulu wambli dò wë' ishuloie. E' kuëki be' aleripa kè döpane ká i' ki bet.

<sup>17</sup>Katuine de kampië, eta i dettsa tabechka ukuöie, e' shuä shkle batröké tajë. Ñies kuàtak sí wöñarke tajë ese dettsa ta itkami iyiwak chkà blatëule tkéter ee, e' shusha.

<sup>18</sup>Eta Jehová tö tté mé Abram a i' es:

—Ká i' meraëyö be' aleripa a. Di' kiè Egípto dí\* eemi döka di'

\* **15.18 Egípto dí:** E' kè dör di' bërie tso' Egípto kiè Nilo e!. E' dör di' tsitsirla tso' Egípto ena Canaán e' shusha.

kibi kiè Éufrates, ká ekké kos meraëyö be' aleripa a. <sup>19</sup>Iññe tā ká e' dör quenitawak, quenizitawak, cadmoneowak, <sup>20</sup>hititawak, fere-seowak, refaitawak, <sup>21</sup>amorreowak, canaánwak, gergeseowak ena jebuseowak e'pa kos wakpa ká.

### Abram alà kune kiè Ismael

**16** <sup>1</sup>Abram alaköl Sarai, e' kè döta' alàë. Ie' wä alaköl tkér eköl kanè mésoie kiè Agar. E' dör egiptowak. <sup>2</sup>Etä Sarai tö iché Abram a:

—Isaú tö Jehová kè wä ye' a alà mène. E' kuekj be' senú ye' kanè méso Agar tā. Etä isalema ie' bata-mik alà dòmi ye' ulà a.

Etä Abram tö Sarai ttò iüté. <sup>3</sup>Etä Sarai tö egiptowak tso' ie' wä kanè mésoie, e' tsébitu, mé iwém a alakolie. E' kewö ska' tā ie'pa sené Canaán e' kí duas de dabop. <sup>4</sup>Etä Abram senewä Agar tā, etä Agar duneka. Mik ie' isuë tö ie' duneka, etä ie' tö iwökir Sarai suémi suluë. <sup>5</sup>Etä Sarai tö iché Abram a:

—iBe' iane iwiie tö Agar tö ye' suéke suluë! Ye' wák tö be' a Agar me' alakolie i' tā idurtke e' wä kurdaë, etä ie' e' ttsöke jaishet ye' tsata. iAs Jehová tö se' a ichò tö yi iane iwiie, ye' ö be'!

Etä Abram tö iiüté:

—Ye' ttò ttsó, be' kanè méso tso' be' ulà a. Be' iú wes be' éna iwak es.

E' ukuöki tā Sarai tö ikanè méso we'ikémi taië. E' kuekj Agar tka-shkar. <sup>7</sup>Etä Jehová biyöchökawak

bua'ie, e' tö ikué di' tum o'mik ká wé kë yi kū' ese ska!. Di' tum e' tso' ñalä micho ká kiè Sur e' kkömk.

<sup>8</sup>Etä Jehová biyöchökawak bua'ie tö ie' a ichaké:

—A Agar, Sarai kanè méso, ¿Wé be' bite? ¿Wé be' micho?

Ie' iiüté:

—Ye' tkashkar ye' wökir Sarai yöki.

<sup>9</sup>Etä ie' iché iá:

—Be' dakóne be' wökir ska' tā idalöiö bërë.

<sup>10</sup>Ie' tö ikí ché iá:

“Ye' be' aleripa alöweraë taië.

Kè yi a ishtanuk ekké.

<sup>11</sup>Be' eriarke, e' ttsé Jehová tö, e' kuekj se be' dur, e' wä kune, tā ikiè mukabö Ismael.\*

<sup>12</sup>Be' alà döraë wes burro pupula kë urutërtä' es.

Ie' ñippöraë darerë sulitane tā. Nies sulitane ñippöraë ie' tā.”

Ie' serdaë kekraë ñippök ielpa tā.

<sup>13</sup>Jehová tté Agar tā, e' ukuöki tā Agar tö iché: “Skéköl ye' sué, e' wák suéwayö.” E' kuekj ie' tö Skéköl kié i' es: “Skéköl tö ye' sué e'.” <sup>14</sup>E' kuekj nies di' tum e' kiè mékaitö: “Skéköl tso' e' ye' suéke”. Di' tum e' tso' Cadés ena Béred e' shushaë.

<sup>15</sup>E' ukuöki tā Abram alà kékä Agar tā e' wä kune wák wém. Abram tö ikiè mékä Ismael. <sup>16</sup>Ismael kune, e' kewö ska' tā Abram kí duas tso' dabom paryök kí teröl (86).

\*16.11 Ismael: Hebreoie s'kiè e' wä kiane chè Skéköl tö itsé.

Jehová tö ittè mé Abraham  
a, e' wà kkacho méatitö

**17** <sup>1</sup>Mik Abram kí duas tso'  
dabom suliyüök kí sulitu  
(99), eta Jehová e' kkaché ie' a ta  
iché ia:

—Ye' dör Skéköl Diché Ta' Íyi Uli-  
tane Tsata e'. Be' senú yësyësë ye'  
wörki kekraë, <sup>2</sup>e' ta ye' ttè meraë  
be' a tö be' aleripa alördaë taië be'  
itoki.

<sup>3</sup>Eta ie' e' téwa iski iwötsa méwa  
íyök kí. E' dalewa Skéköl tso' ttök  
ie' ta, ta ichéitö ia:

<sup>4</sup>Ye' ttè meke be' a e' dör i' es:  
Be' döraë ká taië wakpa yéie. <sup>5</sup>E'  
kuékí i'ñe ta be' kë kièia Abram.  
Ye' tö be' tkéka ká taië wakpa yéie,  
e' kuekí be' kiè mékayö Abra-  
ham. <sup>6</sup>Ye' tö be' aleripa alöweraë  
taië. Ie'pa döraë blu'paie ena ká  
taië wakpaie. <sup>7</sup>Kekraë ye' dör be'  
Kéköl nies be' aleripa Kéköl. Káwö  
e' mekeyö be' a. <sup>8</sup>I'ñe ta be' serke  
Canaán, ká e' kos meraëyö be' a  
ena be' aleripa a. E' ate ie'pa ulà a  
kekraë. Ye' dör ie'pa Kéköl.

<sup>9</sup>Skéköl tö iskà chéne Abraham  
a:

—Erë be' ena be' aleripa kos  
e' kawötä ttè muk ye' a nies. <sup>10</sup>E'  
dör i' es: A' wëpa kos kawötä  
itóttola kkuöltila tök tsir. <sup>11</sup>E'  
kuékí a' wëpa kos e' wakyuö es.  
E' tö ikkacheraë tö se' ttè me' ní  
a. <sup>12</sup>Kekraë kos a' ala'r kurke

wëpa, nies a' kanè mésopa ala'r  
wëpa, mik e' kí ká de pàköl, eta a'  
kawötä iwakyuök es. <sup>13</sup>A' kawötä  
iük kröröe ala'r kos kurke a' u  
a ekképa ta. Es ttè me'tkeyö a' a,  
e' ate wakyöule a' chka kí kekraë.  
<sup>14</sup>Wém kë wakyöule, ese kë wá ye'  
ttò dalöiène, e' kuekí kë ikawö ta'ia  
senuk a' shua.

<sup>15</sup>Nies Skéköl tö iché Abraham a:

—Be' alaköl kë kièia Sarai. <sup>16</sup>Ye' er buaë chöraë  
ie' a as ie' alà kòkä be' a. Moki ye'  
er buaë chöraë ie' a. Ie' döraë ká  
taië wakpa mìie. Nies ie' aleripa shu  
döraë blu'paie.

<sup>17</sup>Abraham skà e' téwane iski  
iwötsa méwaijtö íyök kí. E' dalewa  
ijañéka ta ibikeitséitö: “<sup>18</sup>Ye' kí duas  
tso' cien eyök (100), wes e' dömi  
yéie? <sup>19</sup>Sara kí duas tso' dabom  
suliyüök (90), eta wes ie' dömi alàë?”

<sup>18</sup>Erë ie' tö iché Skéköl a:

—iBe' mú er buaë chò Ismael a!

<sup>19</sup>Erë Skéköl tö iiuté:

—Au, e' kë dör es. Be' alaköl Sara,  
e' döraë alàë ta ikiè mukabö Isaac.  
Ttè me'yö be' a e' è meraneyö ie' a  
ena ie' aleripa a kekraë. <sup>20</sup>Kë ye' éna  
Ismael chë'wa. Ye' tö ie' kímerae  
nies. Ye' tö ie' ala'r alöweraë taië as  
ileripa dò taië ká i' kí. Ismael döraë  
s'blu'pa dökä dabom eyök kí ból e'pa  
yéie. Ie' aleripa alördaë taië. <sup>21</sup>Erë  
ttè me'tkeyö be' a e' atdaë be' alà  
kurdaë kiè Isaac e' a. Be' alà e' kera-  
kä Sara tö duas iék wa kawö ikkë ta.

\* 17.5 Abraham: Hebreoie s'kiè e' wà kiane chè ká wakpa taië, e' yé.

\* 17.15 Sarai: Erë s'kiè e' ena Sara ttsér bérë kua'ki, erë iwà dör nies. Iwà kiane chè blu' alà  
busi ö alaköl dalöièrtä' taië ese. Skéköl tö ie' kí mane'wé es iwà kkachoie tö ttè mène  
Abraham a' e' wà döraë ie' kí nies.

<sup>22</sup>Mik Skëköl tté one Abraham ta, t<sub>a</sub> imía. <sup>23</sup>E' wöshaë Abraham tö ilà Ismael e' tottola kkuölitla téne tsir. Nies ie' w<sub>a</sub> kanè mésopa tso' kune ie' u <sub>a</sub> ena wëpa toule ese, e'pa kos tottola kkuölitla téneitö tsir wes Skëköl tö iyë'ia es. <sup>24-25</sup>Mik Abraham k<sub>i</sub> duas tso' dabom suliyüök k<sub>i</sub> sulitu (99) ena ilà k<sub>i</sub> itso' dabom eyök k<sub>i</sub> mañal (13) eta ie'pa tottola kkuölitla téne tsir.

<sup>26-27</sup>Es e' diwö è wa Abraham ena ilà tottola kkuölitla téne tsir. Nies wëpa dör ie' kanè mésopa, e'pa kos tottola kkuölitla téne tsir.

**Jehová tö iché Abraham  
a tö alà meraëyö be' a**

**18** <sup>1</sup>Ká et dibata a t<sub>a</sub> Abraham tkér ie' ukkö a. Ie' u tso' wé wëm kiè Mamré e' kós klò wökir àr ee. Ie' tkér ee eta Jehová e' kkaché ie' a. <sup>2</sup>E' w<sub>a</sub> pakè i' es: Abraham wökéka t<sub>a</sub> ie' isuë tö wëpa de iëter ie' wörki mañal. E' sué ie' tö t<sub>a</sub> bet ie' e' kéka, mía ie'pa ñaletsuk t<sub>a</sub> ie' e' téwa ïskí t<sub>a</sub> iwötsä méwa íyök k<sub>i</sub> ie'pa shke'woie. <sup>3</sup>Ie' tö iché:

—A kéképa, be' we'ikëyö, k<sub>e</sub> be' minuk bet. <sup>4</sup>Ye' mi' di' tsuk a' klò skuoie, e' ukuöki t<sub>a</sub> a' enú bërë kal i' dikia. <sup>5</sup>A' detke ye' ska', eta ilè mekeyö a' a ñè as a' diché iérne shkoie.

Eta ie'pa tö ie' iüté:

—E'ma iú wes be' tö iché es.

6 Abraham tkaw<sub>a</sub> iu a, t<sub>a</sub> ichéitö Sara a:

—Bet, harina bua'bua yuló kilo dökä dabom böyük (20) ekkë, e' wa pan yuó.

7 E' ukuöki t<sub>a</sub> bet ie' wák tunemi baka pupula shushtök wé bua'bua

ese klö'wéwai tö. E' mítser ie' w<sub>a</sub> méitö ikanè mésö eköl a. Bet ta ikanè mésö tö ikanewé ie' a katè. <sup>8</sup>Abraham tö baka chkà ena baka tsu'dio wösi ena baka tsu'dio pa'ali e' mé ie'pa a. Ie'pa tulur chkök kal àr ukkö a e' dikia. E' dalewa Abraham dur ie'pa tiök ee.

<sup>9</sup>E' dalewa ie'pa tö ichaké Abraham a:

—¿Wé be' alaköl kiè Sara e'?

Ie' iiuté:

—Ie' tkér weshke.

<sup>10</sup>Etä ie'pa eköl tö iché ia:

—Duas iëk e' wa ye' döne be' pakök. E' kewö t<sub>a</sub> be' alaköl Sara alà t<sub>a</sub>t'ke.

E' dalewa Sara tkér Abraham tsikka u wékkö a. Ie' tso' ie'pa ttöke, e' ttsök. <sup>11</sup>Abraham ena ilaköl, e' dewatke kéképala. Bànët Sara kë tö alakölpa duè sueta'ia. <sup>12</sup>E' kueki Sara kë a jañë wöklö-nuk t<sub>a</sub> ibikeitsé: “¿Wes ye' tö ttè i' klö'wëmi tö sa' kérulunetke e' dòmi alàë?” <sup>13</sup>Jehová tö iché Abraham a:

—¿I kueki Sara jañéka? ¿I kueki ie' tö iché: “¿Wes ye' kénewanatke e' dòmi alàë?” <sup>14</sup>Kè i t<sub>a</sub> ye' a darerë. Duas iëk ye' döne, eta ie' alà t<sub>a</sub>t'ke.

<sup>15</sup>Sara suane e' kueki ichéitö: “Kè ye' jañine!”

Erë Jehová tö iché ia:

—E' kë dör es. Moki be' jañéka.

**Abraham kkoché Jehová a  
Sodoma wakpa tsatkò**

<sup>16</sup>E' ukuöki t<sub>a</sub> ipakökwakpa e' duékarak t<sub>a</sub> imýal dò wé Sodoma kí wëne ee. Abraham tö iñalé méré e' choat ie'pa a. <sup>17-19</sup>Etä Jehová tö

ibikeitsé: “Abraham aleripa alördaë taië diché tą' taijë. Ye' tö iyé'at ie' a tö ie' batamik ye' er buaë chöraë ká ultane wakpa a. Ye' tö ie' shukit as ie' tö ila'r ena ileripa a ichò tö ye' ttè daloió ñies tö i kos buaë yésyésë e' ú. Es i kos yé'yö ie' a e' weraëyö. E' kueki ye' kawötä ichökia tö iók ye' mí Sodoma.”<sup>20</sup> E' kueki ie' tö iché Abraham a:

—Sodoma wakpa ena Gomorra wakpa e' wamblökerak suluë taijë shute, e' ché sulitane tö.<sup>21</sup> E' kueki ye' mía ee' isauk tö yéne ie'pa e' wamblöke suluë ichök wès ye' a ikkatène es.

<sup>22</sup> Etä Abraham pakökwakpa ból e' yétsa mía Sodoma. Erë Abraham aṭe dur Jehová tą. <sup>23</sup> Ie' e' skewa tsinet Jehová ska' ta ichakéi-tö ia:

—¿S'ser mokië esepa ewèwamibö se' sulusipa tą? <sup>24</sup> Isalema s'ser mokië esepa tso' Sodoma döka dabom skeyök (50), eta ćká e' wakpa ewèwamibö seraä? ¿Kè be' tö ilo'ye pa ie'pa ki s'ser mokië tso' döka dabom skeyök (50), e'pa kueki?<sup>25</sup> iMoki be' kë tö s'ser yésyésë esepa ewepawa se' sulusipa tą nità! Kè bö iwamblepa es. iE' kë wamblerpä! Be' dör sulitane shulökwa e' kueki ćwès e' kë tö se' shulepa yésyésë?

<sup>26</sup> Jehová tö iiuté:

—S'ser mokië esepa kuéyö döka dabom skeyök (50) e' tą e'pa dalermik kë ye' tö imalepa ewepawa.

<sup>27</sup> Etä Abraham tö iskà chéne ia:

—Be' dör Skéköl. Tą ye' dör wès ká po ena muluchka es be' wöä. E' tö be' chakè taijë kë suane. Isalema

s'ser mokië esepa kianeia skel (5) as idökä dabom skeyök (50).<sup>28</sup> Skel e' kianeia, e' tą e'pa è kueki ćká e' wakpa ewèwamibö?

Jehová tö iiuté:

—S'ser mokië esepa kuéyö döka dabom tkeyök kí skel (45), e' tą kë ye' tö ká e' wakpa ewepawa.

<sup>29</sup> Abraham tö iskà chaké:

—Dö' dabom tkeyök (40) è tso', e' tą ćbe' tö ká e' wakpa ewèwami?

Jehová iiuté:

—Au, kë yò ká e' wakpa ewepawa dabom tkeyök (40) e' dalermik.

<sup>30</sup> Eta Abraham tö ikí ché ia:

—Taijë be' tsiriwéyö, e' kueki kë be' ulunuk ye' ki. Dö' s'ser yésyésë tso'ia dabom mañayök (30) è.

Jehová tö iiuténe:

—Au, dabom mañayök (30), e'pa dalermik kë yò iewepawa.

<sup>31</sup> Abraham tö ikí chaké ème:

—A ye' Kéköl, taijë yò be' dalosewéwa be' chakök i' es, erë ká ki s'ser mokië tso' dabom böyök (20) è, e' tą e'pa kueki, ćká e' wakpa ewèwamibö?

Jehová tö iiuté:

—Au, ie'pa dabom böyök (20), e' è dalermik kë ye' tö ká e' wakpa ewepawa.

<sup>32</sup> Abraham tö ikí chaké tą ichéi-tö ia:

—Kè be' ulunuk ye' ki. I' è chakekeyö be' a. S'ser mokië esepa tso' döka dabom eyök (10) è, e' tą ćwès bö iwegmi? ćká e' wakpa ewèwamibö?

Jehová tö iiuté:

—Dabom eyök è dalermik kë ye' tö ká e' wakpa ewepawa.

<sup>33</sup>Mik ie'pa tté one ñitá etá Jehová míane. Abraham biteane ie' u a.

**Skéköl tö Sodoma ena  
Gomorra wakpa ewéwa**

**19** <sup>1</sup>Ká tuinemitke ta Skéköl biyöchökawakpa böl e'pa demi ká kiè Sodoma ee. Abraham alayök kiè Lot, e' tkér ká e' kköièulewá e' wékkö a.<sup>\*</sup> Mik ie' tö Skéköl biyöchökawakpa sué, etá ie' e' kéka ie'pa shke'uk. Ie' e' téwa iski iwötsa mewaitö íyök ki. <sup>2</sup>Ie' tö iché ie'pa a:  
—A kéképa, ye' kköchò a' a tö a' kapörö ye' ska!. Ee a' klò skuòmi eta bule bla'mi a' mi'mine.

Ie'pa iiuté:

—Au. Kè be' tkinuk. Sa' kapömi u'rki.

<sup>3</sup>Erë Lot kköché taië ie'pa a. Bata ekkë ta ie'pa míyal ie' u a. Mik ie'pa dewa weshke, etá ie' tö ie'pa a chkè yulé buaë. Pan kë wötuuile iwölöwoka wa ese yuítö ie'pa a. Ie'pa chké.

<sup>4</sup>Kám ie'pa kapörlur e' yoki Sodoma wakpa wëpa debitü taië. E'pa tö

Lot u kköièwá shkit. Ie'pa ultane, duladulapa dò kéképaë, e'pa kulémi Lot wöq. <sup>5</sup>Ie'pa tö ichaké qaneule:

—Iñe wëpa böl debitü be' u a ɬwé e'pa? Ile'pa yólur ie sa' a u'rki as sa' serka ie'pa ta kësik wa!

<sup>6</sup>Lot e' yétsa ttök ie'pa ta. Ukkö wötewaitö buaë itsikka. <sup>7</sup>Ie' tö ie'pa a iché:


—A yampipa, ye' kköchò a' a tö i sulu e' kë wamblar ie'pa ta. <sup>8</sup>Ye' alà busipa tulur böl kám ser wëpa ta, e'pa yekeluryö a' a as a' tö iwamblö ie'pa ta wës a' kí ikiane es. Erë kë i wamblar sulu ye' pakök-wakpa dewa ye' ska!, e'pa ta.

<sup>9</sup>Erë ie'pa iiuté:

—iBe' e' skóu bánet! Be' kë dör ká i' wak. Be' kë a i yenuk sa' a. iE' kueki be' we'ikeraë sa' tö ie'pa se tsata!

E' ukuöki ta iwe'ikémi ie'pa tö ta idemirak u wékkö batsökök.

<sup>10</sup>Etá Lot pakökawakpa ulà tiéwa u'rki ukkö a Lot tséwa weshke. Etá ie'pa tö ukkö wötewa. <sup>11</sup>Pë' sulu-



I' dör ká kköièule ese wékkö. (Génesis 19.1)

\*19.1 ká e' kköièulewa e' wékkö a: E' kewö skà ta ká ultane dör kköièule ese kë wékkö tso!.

si kos wöbla sulu'wélur ie'pa tö, kè wawëneia. Duladulapa dò kékëpaë e'pa kos wöbla sulurulune. E' kueki ie'pa shtrinewa ukkó yulök. Kè ie'pa wá ikune. <sup>12-13</sup>Lot pakökawaka tö iché ia:

—Taië ká i' wakpa kkatène e' tté demi Jehová wö ki. E' kueki sa' patkéitö ie'pa eukwa. Ie'pa ewekewa sa' tö yës. E' kueki be' yamipa ekka kí tso' ká i' ki, e' ta e'pa yólur. Be' alà duladulapa ta! ö be' alà busipa ta! ö be' nuäkipa ta!, ö be' yamipa ská tso' ká i' ki, e' ta iiyólur bet tsúmi kämië!

<sup>14</sup>Etä Lot mía wëpa tté meule senukwá ila'r busipa ta e'pa weblök ta iché iarak:

—iA! e' kóka! iA! yúshka! Jehová tö ká i' ewekewa.

Erë ie'pa tö ibikeitsé tö ie' kalöke ie'pa ta. <sup>15</sup>Ká ñirketke, e' ulatök ta Skéköl biyöchökawaka tö iché Lot a:

—Sa' tö ká i' ewekewa. Kè be' duakwá, e' ta ibet, be' e' kóka! iBe' alaköl ena be' ala'r busipa tsúmi!

<sup>16</sup>Erë ie' e' uekia enaë. Erë Jehová er buaë ché ie' a, e' kueki Skéköl biyöchökawaka tö iklö'wéwá iulà a yëttsa. E' sù ñies ilaköl ena ilà busipa yélur ie'pa tö Sodoma a itsatkoe. <sup>17</sup>Mik ie'pa tö iyéttsarak bánet etä Skéköl biyöchökawaka tö iché ie'pa a:

—iA! tñunú as a' tsatkér! iKè a' ká i' sáukia tsíkkane yës! iE' sù kè a' e' wöklö'uk kakkue i' ki! iA! éna e' tsatkak, e' ta a' yúshka etkéme kabata a!

<sup>18</sup>Erë Lot tö iché ia:

—iA kékëpa, au, a' we'ikëyö! <sup>19</sup>A' tö ye' kimé taië. A' tö ye' tsatké duòwá ulà a, erë kè ye' shkak kabata a. Ye' ibikeitsé tö i sulu datse ká i' eukwa, e' tö ye' kuëmi ñala kí eta ye' duowami. <sup>20</sup>Ká tsitsir tso' fe tsinet, ee ye' tkòshkarmi. Kawö mú ña shkowa ee e' tsatkoie. Moki e' dör ká tsir.

<sup>21</sup>Eta ie'pa eköl tö iiuté:

—Ye' be' ttò tsé, e' kueki yö iwëke wes be' tö ye' a ikié es. Ká chébö ye' a e' kè eweku'wayö.

<sup>22</sup>Erë be' yú etkéme ee. Kè ye' a i wamblénuk kám be' dòmi e' dalewa.

E' kueki ká e' kië Sóar.\*

<sup>23</sup>Mik ká ñine etä Lot demi Sóar. <sup>24</sup>Eta azufre wöñarke bö'ie e' patkébitü Jehová tö taië Sodoma ena Gomorra ki. <sup>25</sup>Ká e' wakpa ewéwa bö' tö yës. Nies dalikua kos tskirke ká e' ki e' ñanewa seraa.

<sup>26</sup>Erë Lot alaköl dami itoki. E' tö ká sué itsikka. Bet ie' yönane dayë wösii shkë'ka.

<sup>27</sup>Bule es bla'mi ta Abraham míane wé ikapaké Jehová ta ee.

<sup>28</sup>Sodoma ena Gomorra kí suéítö ta ishklé batröke taië wes té blublu ña'wësö es. <sup>29</sup>Es Skéköl tö ká e' wakpa ewéwa. Erë i ki' Abraham tö ie' a, e' ska' ie' er de, e' kueki ie' tö Lot tsatkée.

**Lot alà busipa alà kékä ie' ta**

<sup>30</sup>Sodoma ena Gomorra ewéwa Skéköl tö, e' ukuöki ta Lot suane senukiä Sóar. E' kueki imíá senuk

\* **19.22 Sóar:** Hebreoie ká kië e' wá kiane chè ká tsir.

kabata a ila'r busipa ból tā. Ee ie'pa mañal sené ákuk a.

<sup>31</sup>Ká et tā ilà busi kibi tö iché itsirla a:

—Se' yé kënnewatke eta kë wé wëpa tā' senuk se' tā wes alakölp malepa wëpa tā' es. <sup>32</sup>E' kueki se' yé ttökasö blo' wa eta se' ser ie' tā, eta es se' ulà a alà dòomi.

<sup>33</sup>E' nañewe tā ie'pa tö iyé ttéka blo' wa taiē, eta ilà busi kibi ék sené ie' tā. Erë ie' tteke blo' tö taiē, e' kueki kë ie' éna ì aneia. <sup>34</sup>Bule es tā ilà busi kibi tö iché itsirla a:

—Bö ittső, ye' sené se' yé tā. I'ñe nañewe iskà ttökasö blo' wa. Etā be' senú ie' tā. Etā es se' ból ulà a alà dòomi.

<sup>35</sup>E' nañewe tā ie'pa tö iyé skà ttéka blo' wa. Etā ilà busi tsirla sené ie' tā. Erë ie' tteke blo' tö taiē, e' kueki kë ie' éna ì aneia. <sup>36</sup>Es ilà busipa ból e' bukluwékā iyé wa. <sup>37</sup>Etā ikibi ék alà kune kiè mékaitö Moab. I'ñe tā Moab aleripa datse e' batamik. <sup>38</sup>Nies itsirla de alàè, kiè mékaitö Ben-amí. I'ñe tā amonwak datse e' batamik.

### Abraham ena Abimélec

**20** <sup>1</sup>Abraham e' yétsa Mamré a, mía tkörö ká kiè Négueb ee. Etā ie' e' tséat senuk ká kiè Guerar ee. Guerar até Cadés ena Sur e' shushaë. <sup>2</sup>Ie' tö ká e' wakpa a iché tö Sara dör ie' kutà. Ká e' blú kiè Abimélec, e' tö Sara tsük patké alakölie e' a. <sup>3</sup>Erë nañewe tā ie' kapowa e' dalewa, Skéköl tté ie' tā kabsuè a tā iché ia:

—Alaköl tsük patkébō e' wém ta', e' kueki be' duöwami.

<sup>4</sup>Erë kám ie' ser Abraham alaköl ta, e' kueki ie' iiuté:

—A kéképa, ye' kë ki e' nuí ku' iwas e' ttewamibö? <sup>5</sup>E'ma Abraham wák tö ye' a iché tö alaköl e' dör ie' kutà. Nies ilaköl tö ye' a iché tö Abraham dör ie' aké. E' kueki ye' tö ì kos wé er bua' wa. Kë ye' wa iwamblène er sulu wa.

<sup>6</sup>Skéköl tö iskà iuténe kabsuè a ta ichéitö ia:

—Ye' éna iane buaë tö be' tö iwé er bua' wa. E' kueki kë ye' wa be' kàne ie' kókwa as be' kë tö ì sulu wamblö ye' ki. <sup>7</sup>Abraham dör ye' tteköl, e' kueki bet be' yú ilaköl mukne ia. Ie' tö ye' a ikieraë as be' seriä ttsé'ka. Erë be' kë dë'ne imukne, e' tā be' ena be' yamipa kos duöralur.

<sup>8</sup>Bule es bla'mi tā Abimélec shkene ikanè mésopa kiéitö tā ì suéitö kabsuè a e' kos pakéitö ie'pa a. Mik e' ttsé ie'pa tö etā taiē ie'pa suanékā iyöki.

<sup>9</sup>Etā Abimélec tö Abraham kié tā iché ia:

—¿Iók be' tö iwamblé sa' tā es? Be' kueki Skéköl tö sa' pañé ewëwa, erë Skéköl tö sa' pañé es, etā ñi sulu wambléyö be' tā? Iyi ese kë kawö tā' wamblénuk. <sup>10</sup>Be' tö ñi sulu wamblé ye' tā, etā ñi dör iwà?

<sup>11</sup>Abraham tö iiuté:

—Ye' tö ibikeitsé tö ká i' ki kë yi tö Skéköl dalöietä! Ye' suane dö' a' ye' ttewa ye' alaköl yottsa ye' ulà a. <sup>12</sup>Erë iyéne tö ie' dör ye' kutà. Ie' yé dör ye' yé, erë ie' mi kë dör ye' mi. Nies ie' dör ye' tayé. <sup>13</sup>Mik Skéköl tö ye' a iyé tö be' e' yottsa be' yé ká a, etā yó iché ye' alaköl a: “Ká

wa'ñie wé se' demi, eta ichó tö ye' dör be' aké."

<sup>14</sup>Eta Abimélec tö Sara méne iwém Abraham a. Ñies iyiwak kakméítö Abraham a obeja ena baka. Ñies kanè mésopa kakméítö ie' a wëpa ena alakölpa. <sup>15</sup>Eta ie' iché Abraham a:

—Ye' ká saú seraá wé wa be' wöbatse e' kí be' yú señuk.

<sup>16</sup>Eta Sara a ichéítö:

—Ye' tö inuköl wömule kakmé be' aké a dökä mil ekké. E' dör ì sulu wambléyö be' ta be' wakpa ultane wöa e' patuoie. Es be' kë jaëneia.

<sup>17</sup>Eta Abraham tö Skéköl a ikié tö Abimélec ena ilaköl duöke, e' bua'úne. Eta Skéköl tö ie'pa bua'wéne. <sup>18</sup>Alakölpa kos tso' Abimélec u a, e'pa shu mo'wá Jehová tö as kë idöiarak alàë Sara kuékí. Ie'pa kos shu wötséene Jehová tö.

### Sara alà kékä Abraham a

**21** <sup>1</sup>Ì yé' Jehová tö Sara a tö be' alà köraka, e' wà tka wes iyéne bak es. <sup>2</sup>Eré Sara ena iwém dör kéképalatke, eré ie' duneka e' wà kune. Alà e' kune mik Skéköl tö ikéwö yé' ie' a eta. <sup>3</sup>Sara alà kune wém e' kiè méka Abraham tö Isaac. <sup>4</sup>Mik Isaac kí ká de pàköl, eta Abraham tö itóttola kkuöltila téé tsir wes Skéköl tö ie' a iyé' es. <sup>5</sup>E' kewö ska' ta Abraham ki duas tso' cien eyök (100). <sup>6</sup>Eta Sara tö ibikeitsé: "Skéköl tö ye' jañawéka. Mik sulitane wa ijchenewa tö ye' de alàë eta taié ie'pa jañumi ye' ta. <sup>7</sup>Kam ye' alà kòkä eta kë yi a iyenuk tö ye' dòmi alàë. Eré i' ta ye' alà kékä Abraham a, ie' kénewanatke eta."

### Agar ena Ismael uyéttsa bánet

<sup>8</sup>Eta Abraham alà Isaac de bërie ta itsu'batsée e' kewö tkö'wé Abraham tö taié. <sup>9</sup>Eta Sara tö isué tö Abraham alà kune egiptowak kiè Agar e' ta kiè Ismael, e' tö Isaac wayueke sulué. <sup>10</sup>E' kuékí Sara mía ichök Abraham a: "Ì kos tso' be' wa mè se' alà Isaac a, e' kë kawö ta' blatè se' kanè méso e' alà a. E' kuékí iyuóshkar alàë."

<sup>11</sup>Ismael dör Abraham alà ñies e' kuékí ì ché Sara tö e' tö ie' eriawé taié. <sup>12</sup>Eré Skéköl tö iché ia: "Be' aleripa chökle e'pa döraë Isaac wa. E' kuékí kë be' tkinuk be' alà kibi ék kí ena imì kí. Ì kos ché Sara tö e' ú. <sup>13</sup>Be' alà kune a' kanè méso ta, ñies e' aleripa alöweraëyö taié, ie' dör be' alà e' kuékí."

<sup>14</sup>Eta bule es bla'mi ta Abraham tö Agar a chkè mé. Ñies di' méítö ia iyiwak kkuölit yóule di' tsoe ese a. E' tiéka ie' tö seraá itsi kí ta iyuéshkar ilà Ismael e' ta. Agar mía shkémi éanas wé kë yi serku' ese ska' ká kiè Beerseba e' éka. <sup>15</sup>Mik idíl enewa, eta ilà tkésérítö kal dikia. <sup>16</sup>Ie' kë kí ilà kiane suè duökwa, e' kuékí imíá e' tkésér kukuie. Mik ie' e' tkésér iski eta ilà iémi.

<sup>17</sup>Ilà iuke e' ttsé Skéköl tö ta bet Jehová biyöchökaw bua'ie e' tö Agar a ichaké ká jaì a: "¿A Agar wes be' de? Kë be' suanuk. Be' alà tkér iuk e' ttsé Skéköl tö. <sup>18</sup>Be' yú be' alà yulök. Ikókä ulà a kë arwa. Ye' tö ie' aleripa alöweraë taié."

<sup>19</sup>Eta Skéköl tö Agar a di' tum kchaché et. Ie' mía di' e' tsuk,

iyiwak kkuölit a e' méitö Ismael a yè. <sup>20</sup>Skéköl tö Ismael kkö'né buaë. Ie' talane sené ká wé ki kë yi ku' kiè Parán ee. Ie' de suléname buaë. <sup>21</sup>Ie' kibine ta imì tö iulabatséwa alaköl dör egip towak ese ta.

**Abraham ena Abimélec  
tö kawö mé ñì a**

<sup>22</sup>E' kewö ska' ta blu' kiè Abimélec mía ttök Abraham ta. Ie' nippökwakpa wökir, kiè Ficol, e' mí ie' wapie. Etä Abimélec tö iché Abraham a:

—Sa' wá ijcher tö Skéköl be'  
kimeke taië i kos wekebö e' wa.

<sup>23</sup>E' kueki be' ttè mü ye' a íé  
Skéköl wö wa tö be' kë tö i sulu  
wamblepa ye' ki ñies ye' ala'r ki  
ena ye' aleripa kos e'pa ki. Be' ttè  
mü ye' a tö be' er búa' chöraë ye' a  
wes ye' er búaë ché be' a es. Ñies  
be' ttè mü ye' a tö be' er búaë chöraë  
ká i' wé be' serke e' wakpa a.

<sup>24</sup>Abraham tö iiuté:

—Tó. Es ye' ttè mé be' a.

<sup>25</sup>Erë Abimélec wakpa tö di' tum  
biule yé'ttsa et Abraham wakpa ulà  
a. E' chaké Abraham tö ie' a. <sup>26</sup>Ie'  
tö iiuté:

—Erpa be' ye' tkiwéwá ttè e' wa.  
Kè bö ichópa ye' a, éma kë ye' wá  
ijcher. Brör éyi tö e' wamble be' ki?

<sup>27</sup>Abraham tö baka ena obeja  
kakmé Abimélec a etä ie'pa böl kawö  
mé ñì a. <sup>28</sup>E' ukuöki ta Abraham tö  
iobeja alakipa pupula e' dapa'wé döka  
kuktö ek tsiní. <sup>29</sup>Mik e' sué Abimélec  
tö etä ie' tö Abraham a ichaké:

—¿I kueki be' iyiwak kuktö  
dapa'wé ek tsiní?

<sup>30</sup>Abraham tö iiuté:

—Iyiwak kuktö, e' meke ye' tö be'  
a iwà kkachoie tö moki ye' tö di'  
tum e' bi'!

<sup>31</sup>Ie'pa böl kawö mé ñì a ee e'  
kueki ká e' kinewá Beerseba.\*

<sup>32</sup>Ie'pa kawö mé ñì a, e' ukuöki  
ta Abimélec ena Ficol e'pa biteyal  
filisteowak ká a. <sup>33</sup>Etä Abraham tö  
kal kuá kiè tamarisco ese kuatké  
elka Beerseba. Ee ie' tö Jehová dör  
Skéköl yöibi e' dalöié. <sup>34</sup>Ee ie' sené  
ká taië filisteowak ká a.

**Skéköl tö Abraham ma'wé ilà wa**

**22** <sup>1</sup>E' ukuöki ta Skéköl tö  
Abraham ma'wé tö moki ie'  
tö idalöietá. Ie' chakéitö:

—A Abraham.

Abraham tö iiuté:

—¿I?

<sup>2</sup>Etä Skéköl tö iché ia:

—Be' alà eköl è kiè Isaac e' dalér  
be' éna taië, e' tsúmi Moria. Mik  
be' demi ee, eta ye' tö be' a kabata  
kkacheke, e' ki be' alà ttówá ta  
iña'úwa ye' a ye' dalöioie.

<sup>3</sup>Bule es bla'mi ta Abraham e'  
kéka ta burro payuítö. Bö' jchéitö  
tsémi. Etä ie' mía wé Skéköl tö ie'  
a iyé! ee ilà ena ikané mésopa böl  
e'pa ta. <sup>4</sup>E' böiki es ta Abraham tö  
ká yéne ie' a e' ki sué kamië. <sup>5</sup>Etä  
ie' tö iché ikané mésopa a:

—Íe a' e' tsúat burro i' ta. Ye' ena  
ye' alà, sal' micho kabata jaì a Skéköl  
dalöök, e' wa sa' done.

\*<sup>21.31</sup> *Beerseba*: Hebreoie ká kiè e' wá kiane chè ttè mène ñì a e' di' tum biule ö Obeja kuktö e' di' tum biule.

<sup>6</sup>Eta Abraham wa bö' mí e'  
ppékaitö Isaac kuli' ki. Tabela ena  
bö'ka bö' batsoie e' mí Abraham  
wa. Eta imíyal ñita. <sup>7</sup>Eta Isaac tö  
iché iyé a:

—A, yéwö.

Abraham tö iiuté:

—A alà, cì kiane be' kiı?

Isaac tö iché ia:

—A Yéwö, bö' tso' se' wa, ñies  
bö'ka, eré ćwé obeja pupula tteke-  
wa Skéköl a e'?

<sup>8</sup>Iyé tö iiuté:

—A alà, Skéköl wák tö e' meraë  
se' a.

Ie'pa mir ñita. <sup>9</sup>Mik ie'pa demi  
wé Skéköl tö iyé! Abraham a ee, eta  
Abraham tö ák kataté et ka'ie. E'  
ukuökì ta ibö' dapa'wéka ka! e' kiı ta  
ilà klö'wéwaitö payuéwa mékaitö  
bö' bata kiı. <sup>10-11</sup>Ie' tabela klö'wéwa  
ilà ttowa ña'wè Jehová a. E' wöshaı  
ta Jehová biyöchökwak bua'ie e' tö  
Abraham chaké siwaı ki:

—iA Abraham, a Abraham!

Ie' tö iiuté bet:

—¿I?

<sup>12</sup>Jehová biyöchökwak bua'ie e'  
tö iché ia:

—iBe' alà ke shka'war, ke ittar-  
wa! Be' wák alà eköl ème e' ke  
kkéone be' wa ye' yoki. E' wa  
ye' wa ijcher tö moki be' tö ye'  
dalöjeta! taiı.

<sup>13</sup>E' wöshaı Abraham tö isuë tö  
obeja we'ñie e' malitséwa idula' a  
kal tsitsir chale a. Ie' tö iyiawak e'  
klö'wéwa jché ña'wéwa ilà skéie  
Jehová dalöioie. <sup>14</sup>Ie' tö ka e' kië  
méka i' es: “I kiane se' kiı e' mera  
Jehová tö.” E' kueki i'ñie ta se' tö  
ichekeia: “I kiane se' kiı, e' merdaë  
se' a Jehová kébata a.”

<sup>15-16</sup>Jehová biyöchökwak bua'ie  
e' tö Abraham skà kié ka jài a ta  
ichétö ia:

—Jehová tö iché: ‘Buaë be' tö ye'  
dalöieke, be' alà eköl è, e' méttsabö  
ye' a. <sup>17</sup>E' kuékì ye' er buaë chöraë be'  
a taiı. Be' aleripa alöweraëyö taiı wes  
békwo tso' taiı ka jài a es, wes ttsa'wö  
tso' taiı dayë kkömk es. Ñies ie'pa e'



I' dör obeja we'ñie malitséwa idula' a. (Génesis 22.13)

alörakä ibolökpa kí kekraë. <sup>18</sup>Be' tö ye' ttò dalöié, e' kuekí be' aleripa batamik ye' er buaë chöraë ká ultane wakpa a.'

<sup>19</sup>Eta Abraham biteane wé ikanè mésopa atéat ee ta imíyal seraq nítia dömine Beerseba wé ie' serke ee.

### Nahor ala'r

<sup>20-23</sup>E' ukuöki tā biyò debitu Abraham kí tö ie' él kiè Nahor, e' alaköl kiè Milcá, e' ala'r de pàköl (8). E' alà ko'k kiè Uz. Imalepa kiè dör Buz, Quemuel, e' dör Aram yé, Quésed, Hazó, Pildás, Idlaf ena Betuel e' dör Rebeca yé.

<sup>24</sup>Nahor alaköl skà tso' kiè Reumá, e' tā ie' ala'r kékä tkél. E'pa kiè dör Teba, Gáham, Tahas, ena Maacá.

### Sara blenewa

**23** <sup>1</sup>Mik Sara kí duas tso' cien eyök kí dabom böyük kí kul (127), <sup>2</sup>eta ie' blenewa ká kiè Quiriat-arbá até Canaan ee. Nies ká e' kiè Hebrón. Abraham schöne e' ieitséitö siaré. <sup>3</sup>Ie' tkér idéutö nu o'mik e' kékä tā imía ttök hititawakpa tā, tā ichéitö ie'pa a:

<sup>4</sup>—Eré ye' dör ká kua'ki wak serke a' shua e' è, eré ká wataú ña pöie ye' dëutö blowa.

<sup>5</sup>Ie'pa tö iiuté:

<sup>6</sup>—A kékäpa, be' we'ikè sa' tö, sa' ttò ttsö. Sa' a tā be' dör kékäpa taije e' serke sa' shua. E' kuekí be' dëutö nu blö sa' pö bua'ie ese a. Sa' ultane kë tö ichepa be' a tö kë iblar sa' pö a.

<sup>7</sup>Ie' e' duékä ie'pa wörki tā ie' e' tkewa kuchë kí ie'pa dalöiök <sup>8</sup>tā ichéitö ie'pa a:

—Moki a' kí ikiane tö ye' dëutö nu blèwayö íe a' ká a, e' tā wém kiè Efrón dör Sóhar alà, e' a ichó' 9tö ákuk tso' ie' ká kkò a kiè Macpelá e' wataútsa ye' a ye' yamipa pöie. Ye' tö ipatuèmi ie' a kos ituè ekké. Es ákuk e' ate ye' ulà a a' shua.

<sup>10</sup>Eta Efrón dör hititawak e' tkér-nak ie'pa shua, e' tö Abraham iuté dareré as iyamipa ena kos daparke ká e' wékkö a e'pa tö ittö ttsö. Ie' tö iché Abraham a:

<sup>11</sup>—A kékäpa, kë ye' tö ákuk watuepa be' a. Ká e' nies ákuk tso' ia, e' kakmekeyö be' a é. Ye' yamipa kos tso' íe e'pa tö ye' ttò ttsé tö ká e' kakmeyö be' a. Be' dëutö nu blö ee.

<sup>12</sup>Eré Abraham e' tkewa kuchë kí ká e' wakpa wörki <sup>13</sup>tā ichéitö ie' a sulitane wörki:

—Ye' ttò ttsö. Be' pablèyo tö ká e' ské klö'ú ye' ulà a. E' ukuöki ye' dëutö nu blekewayö.

<sup>14</sup>Ie' tö iiuté:

<sup>15</sup>—A kékäpa, ye' ttò ttsö. Ká e' ské dör inuköl wömule döka cien tkéyök (400), eré inuköl ekké è, kë e' kí se' tkinuk. Be' dëutö nu blö ee.

<sup>16</sup>Eta kos ie' tö ká ské imalepa wörki e' mène buaë Abraham a, ekké patuéttsaitö. <sup>\* 17-18</sup>Es Efrón ká tso' Macpelá até Mamré diwö tskirke e' èkä e' de Abraham ulà a iákuk tā ena kal tso' kos iki e' tā. Hititawak ena sulitane dami ká e' wékkö a e'pa kos dör ká tōne e' ttekölpa.

<sup>19</sup>E' ukuöki tā, Abraham tö idéutö nu bléwa ákuk tuéitö

\* 23.16 Es ie'pa wöblar íyi watauk nì a. Eré Efrón tö iché tö ká e' kakmeyitö Abraham a eré e' kë yéne. Nies e' ane Abraham éna, e' kuekí ie' tö Efrón patué bëre' kos Efrón ie' a iché ekké.

Macpelá ee. Ká e' ate Mamré ate Canaán e' o'mik tsinet (Mamré kiè ñies Hebrón). <sup>20</sup>Ká e' watuéttsa ie' a hititawak tö. Es ká e' ena ákuk e' de Abraham ulà a iyamipa pöie.

**Abraham tö alaköl  
yulök patké Isaac a**

**24** <sup>1</sup>Abraham dewa kékepalaie. Ie' a Jehová er buaë ché íyi ultane wa. <sup>2</sup>Ká et ta ie' tö ikanè méso kibi kié. E' dör ie' íyi kos e' kuéblu. Ie' tö iché ia:

—Be' ulà múwá ye' tu' dikiá iwá kkachioie tö mokí i kiekeyö be' a e' waweraëbó. <sup>3</sup>Jehová dör ká jaì ena ká i' e' Kéköl e' wörki be' tté mú ye' a mokië tö ye' alà kë kar senukwa Canaán íe se' serke e' alékölpa ta. <sup>4</sup>Be' yú ká wé ye' manét ee, eta ee alaköl yulö eköl ye' yamipa shua senukwa ye' alà ta.

<sup>5</sup>Ie' tö iiuté:

—Dö' alaköl kë bitu ye' ta, e' ta ñwes ye' iwèmi? ¿Buaë idir be' a tö be' alà mi' ye' wá dò wé be' manét ee?

<sup>6</sup>Ie' iiuté:

—iAu, kë ye' alà tsärmí ee! <sup>7</sup>Jehová dör ká jaì Kéköl, e' tö ye' yë'ttsa ye' yé u a ena ye' yamipa ká a. Ie' tö ittè me' ye' a tö ká i' meraëitö ye' aleripa a. Ie' tö ibiyöchökwak patkeraë be' kimuk alaköl tsükbitu ye' yàkie. <sup>8</sup>Alaköl kë shkak be' ta, e' ta kë be' tkinuk. Kë be' kàne iskà yulök. Erë kë ye' alà tsärmí ee.

<sup>9</sup>Eta ikanè méso ulà méwá ie' tu' dikiá ta ittè mé ia tö iweraë wes iuk patkéitö es. <sup>10</sup>E' ukuöki ta ie' tö iwökir íyí kos bua'bua, ese shté

tsèmi kakmè. Ekkë kos payuéítö iyiwak kiè kameio e' kí döka dabop. Etä ie' mía iyiwak wëttsë tkörö Nahor ate Mesopotamia ee. <sup>11</sup>Mik ie' demi tsinet Nahor, eta ká tuirketke. Diwö ekkë ta ká e' alékölpa mi'ke di' tsük. E' wöshä ta ie' de di' tum biule e' kkömkik ta ikameio kéítö e' tulökser enuk ee. <sup>12</sup>Eta ie' tö iché Skéköl a: "A Jehová, be' dör ye' wökir Abraham e' Kéköl. Ye' kímú il'ñe ñies er buaë chó ye' wökir a. <sup>13</sup>Íe di' tum biule o'mik ye' e' tsükeat bérber è ká i' busipa tso' di' tsük e' dalewa. <sup>14</sup>Kawö müña tö wéne ék a ye' iché: 'Be' kakö' ówa ye' a di' kakmú yè', as e' tö ye' iütö: 'Be' di' yó ñies be' kameio a ikakmekeyö.' Es ye' éna iane tö e' ék shushté be' tö Isaac a alakölie. Es ye' wá ijchermi tö be' er buaë ché ye' wökir a."

<sup>15</sup>Etä kam ì chekeitö e' or, eta ie' isué alaköl datse eköl kakö' bune kuli' kí di' tsoie. E' dör Rebeca, ie' dör wëm kiè Betuel e' alà busi. Betuel mì dör Milcá ena iyé dör Nahor. Nahor dör Abraham ël. <sup>16</sup>Rebeca dör busi buaala kam iser wëm ta. Ie' mía dötttsa di' tum biule e' a ikakö' wá iök. <sup>17</sup>Mik imítke eta Abraham kanè méso tunemi itöki ta iché ia:

—Be' we'ikèyö, di' dami be' wá e' kakmú ña yè.

<sup>18</sup>Ie' tö iiuté,

—A kékëpa, be' di' yó.

E' bet ie' kakö' éwa klö'wéwá ulà a ta di' méítö ia yè. <sup>19</sup>Mik ie' di'yé one ta Rebeca tö iché ia:

—Ye' mí di' tsük ñies mè be' kameio a.



*I' dör di' tum biule ese. (Génesis 24.11)*

20 Bet ikakö' wà ka'wéítö wé  
iyiwak di'yöke e' a tå imí di' kí tsuk  
iyiwak a. Es iwéítö kameio ultane  
a. 21 E' dalewa Abraham kanè méso  
tso' isäuk bërë, wà dör tö ie' kí ikia-  
ne jchenowá yësësë tö Jehová tö  
ie' kímé i dalérmi kie' shkò e' wa  
as idötsä buaë ö au. 22 Mik kameio  
di'yé one, eta ie' tö ula'tsio sù es dör  
gramo teröl ese tkewá busi yik a.  
Nies ulaio méito böt, e' es dör cien  
gramos tsata. 23 Etä ie' tö iché ia:  
—Be' we'ikèyö, ichó ña ¿Yi alà  
busi be' dör? ¿Ye' chòmi l'ñe nañe-  
we be' yé u a kapökrö ye' kanè  
mésopa ta?

24 Ie' iiuté:  
—Ye' dör Betuel alà busi, e' dör  
Milcá ena Nahor alà wém. 25 Sa' u  
a' chòmi. Nies a' kameio a chkè  
tso'.  
26 Etä Abraham kanè méso e'  
tkewá kuchë kí Jehová dalöiök  
27 tå ichéítö: “Jehová dör ye' wökir  
Abraham e' Kéköl. E' kikökkä ye'  
tso!. Kekraë ie' tö ye' wökir Abra-  
ham kimeke buaë. Kekraë ie' er  
buaë chöke ye' wökir a. Ie' wa ye'  
debitü buaë ñalä kí dò íe ye' wökir  
yamipa u a. E' kueki ikikèkayö.”  
28 Rebeca tñemí shkäläläe imì  
u a i kos tka ie' tå e' pakök. 29-30 Ie'

akë kiè Labán, e' tö ula'tsio sué ena ulaio sué ikutà ulà a. Ñies iì ché Abraham kanè méso tö e' tté ttséítö. E' kuekjí ie' biteqá iñalaletsuk di' tum biule a. Ie' de Abraham kanè méso ska! e' tso'iá ikameio ta di' tum biule ska!. 31 Etá Labán tö iché iá:

—Jehová tso' be' ta buaë. iMishka ye' ska! ?Wes be' e' tsukeat u'rki? Ye' u kanewétke be' a ñies kameio a.

32 Es Abraham kanè méso biteqá ie' ta. Ee ie' tö dalí tso' kameio kí e' éwa ta itiéítö. E' ukuöki ta ie' wá di' debitü Abraham kanè méso a ena iwapiépa a klò skuoie.

33 Mik ie'pa tö itié, eta Abraham kanè méso tö iché:

—Kè ye' chkòpa kam ye' tö iók ye' debitü e' wá pakò a' a eta.

Labán tö iiuté:

—E'ma ichó. Ðì dör iwà?

34 Ie' tö iché:

—Ye' dör Abraham kanè méso.

35 Jehová tö ikimé tajé. Ie' tö iblu'wé tajé. Obeja, baka, orochka, inukölchka, kanè mésopa wëpa ena alakölpa, kameio ena burro, e' kos méito iá tajé. 36 Ñies ilaköl Sara e' tö alà mé iá eköl wák wém ikenewatke eta. Í kos tso' ye' wökir wá e' méito ilà a. 37 Ie' tö ye' ké tté muk ie' a. Ye' a ichité: 'Ye' alà kè kar senukwa Canaán wé ye' serke e' alékölpa ta. 38 Be' yú wé ye' yépa tso' ee ta alaköl yuló eköl ye' yàkie ye' ditséwö shua.' 39 Ye' tö iiuté: 'A ye' wökir Abraham, ?dö' alaköl kè bitü ye' ta?' 40 Ie' tö ye' iuté: 'Kekraë ye' serke buaë Jehová wöa, e' kuekjí ie' tö ibiyöchökawak patke-

raë be' ta as be' kawö tkò buaë ñala ki, ñies as alaköl kùbò ye' yàkie ye' yamipa ye' yé wa e'pa shua. 41 Erë ye' yamipa kè éna ilà busi patkak be' ta, e' ta kè be' tkinuk. Kè iì tté ta'iá be' ki.'

42-44 "E' kuekjí ye' debitü jíñne di' tum biule ska!. Ee ye' tö ikié Jehová dör ye' wökir Abraham e' Kéköl e' a: 'tö mokí be' ye' kimeke alaköl yulök ye' wökir Abraham yàkie, e' ta as e' bitü ye' ska! íe di' tum biule ska!. Mik ye' tö ie' a di' kak kié, eta as imùitö ye' a ena ichòitö: Ñies ye' tö be' kameio a ikakmeke. Es ye' isuëmi tö alaköl e' shushté be' tö ye' wökir yàkie.' 45 Mik e' chekeyö e' erketke, eta ye' isuë tö Rebeca datse ikakö! bune ikuli' ki. 46 Mik ie' di' yinetke eta ye' tö ie' a iché: 'Be' we'ikèyö, di' dami be' wá e' kakmú ña yè.' E' bet ikakö! éwaitö ta ichité: 'Be' di' yó. Ñies imekeyö be' kameio a.' Ie' ye' a di' mé ñies ye' kameio a. 47 E' ukuöki ta ye' tö ie' a ichaké: '¿Yi alà busi be' dör?' Ie' iiuté: 'Ye' dör Betuel alà busi e' dör Nahor ena Milcá alà.' Etá ula'tsio sù e' tkéwayö iyik a ena ulaio tkéwayö böt iulà a. 48 E' ukuöki ta ye' e' tkéwá kuché ki ta Jehová dalóiéyö. Ie' dör ye' wökir Abraham e' Kéköl e' kikékayö. Ie' wá ye' debitü buaë yësësë busi shukititö ye' wökir yamipa shua ilà a e' ska!. 49 Es ia' er buaë chöke ye' wökir a? ?A! e' chöke ikimuk er bua' wa? Ichó ña i' ta yësësë ima a' tö iché, es ye' éna iarmi tö i wëmiyö."

50 Etá Labán ena Betuel e'pa tö iiuté:

—E'ma i' kos debitu Jehová ttò wa. E' kueki kè wes sa' a ì onuk. Kè sa' a ì yénuk yés. <sup>51</sup>I' Rebeca. Itsúmi be' wökir a senukwà ilà ta wes Jehová ki ikiane es.

<sup>52</sup>Mik Abraham kanè mésó tö ttè e' ttsé, eta ie' e' tkewà kuchë ki iwotsa méwa íyök ki Jehová dalöök. <sup>53</sup>E' ukuöki tå ie' tö íyi yóule orochka wa ena inuköchlcha wa ñies datsi' bua'bua e' taië yélur méítö Rebeca a. Ñies ie' tö ikakmè Rebeca akë a ena imì a. <sup>54</sup>E' ukuöki tå ie' ena iwapipea chkké di'yé tå ikapere ee. Bule es tå iti'nerak tå Abraham kanè mésó tö iché:

—Ye' míane ye' wökir ska!

<sup>55</sup>Erë Rebeca akë ena imì e'pa tö iché ia:

—Rebeca kè tsarmi bet. Kawö mú ie' a as ie' e' tsùat sa' tå ká dabop, e' wa wë' be' wä imi'mi.

<sup>56</sup>Erë ie' tö iché ie'pa a:

—Kè ye' wöklö'ukia a' tö. Jehová tö ye' kímé as ì kos döttsa buaë ye' a. E' kueki ye' ómi ye' wökir u a.

<sup>57</sup>Je'pa tö iiuté:

—Sa' mí Rebeca kiök chakè ɔjima ichèmiitö?

<sup>58</sup>Eta Rebeca kiérakitö tå ichaké-rakitö ia:

—A Rebeca ɔbe' shkak wëm i' ta?

—Ie' tö iiuté:

—Tô.

<sup>59</sup>Es ie'pa tö Rebeca ena alaköl tso' ie' kkö'nuk kékraë e'pa a kawö mé as imi'rak. Ñies Abraham kanè mésó ena iwapipea kos e'pa a kawö mérakitö as imi'rak. <sup>60</sup>Je'pa mitke tå Rebeca yamipa er buaë ché ie' a ttè i' wa:

“A sa' yami,

As be' alör taië shuteë.  
As be' aleripa e' alòka  
ibolökpa kos ki.”

<sup>61</sup>Eta Rebeca ena ikanè mésopa e' tulékä ie'pa kameio ki tå imiyal Abraham kanè mésó itöki.

<sup>62</sup>E' kewö ska' tå Isaac serke Négueb wé di' tum biule tso' kiè “Skéköl tso' e' tö ye' suèke” eè, e' dene iyé ska'. <sup>63</sup>Tsáli tå Isaac e' yétsa shkök kabikeitsörami. E' wöshä tå ie' isuë tö kameio datse tseë. <sup>64</sup>E' wöshä Rebeca tö ie' sué ñies tå ie' e' éwa kameio ki. <sup>65</sup>Rebeca tö ichaké Abraham kanè mésó a:

—¿Wëm doq wì se' kke, e' dör yi?  
Ie' iiuté:

—E' dör ye' wökir Isaac.

Eta Rebeca wö pabakewa datsi'tak wa.

<sup>66</sup>Abraham kanè mésó tö ì kos tka ie' tå e' paké Isaac a. <sup>67</sup>E' ukuöki tå Rebeca mítser Isaac wä imì Sara blenewa e' u a. Es Isaac senewa ie' tå. Isaac éna Rebeca dalér taië, es ie' er pabléne imì blenewa e' kueki.

### Abraham ena Queturá e'pa aleripa

**25** <sup>1</sup>Abraham alaköl ské tséwà kiè Queturá. <sup>2</sup>Ie' ala'r kékä Abraham tå wëpa dökä teröl. E'pa kiè dör Zimrán, Jocsán, Medán, Madián, Isbac ena Súah.

<sup>3</sup>Jocsán dör Sebá ena Dedán, e'pa yé. Dedán aleripa e' ditséwö dökä mañal kiè asurwak, letuswak ena leumwak. <sup>4</sup>Madián ala'r wëpa kiè Efá, Éfer, Hanoc, Abidá ena Eldaá. E'pa kos dör Queturá aleripa.

5-6 I kos tso' Abraham wà e' ate Isaac ulà a. Erë kám Abraham duòwà, e' yoki ie' tö íyi kakmé ilakölpa malepa ala'r a. Ie'pa patkémiiitö senuk ká bánet ate diwö tskirke e' éka kámie as kè iku'rak Isaac ska' tsinet.

### Abraham blénewa

7 Abraham sene' duas cien eyök kí dabom kulyök kí skel (175) seraá 8 etá iblénewa buaë ikénewatke kè weine siaré. Es ie' michoë idëutöpa itöki. 9-10 Illa'r Isaac ena Ismael e'pa tö inú blé ilaköl Sara pö e' o'mik ákuk kiè Macpelá ee. Ákuk e' ate Mamré diwö tskirke e' wa. Ká e' bak hititawak kiè Efrón dör Sóhar alà e' ulà a. Ká e' wato'ttsa hititawak tö Abraham a. 11 Abraham blénewa, e' ukuöki tå Skéköl er buaë ché Isaac a. Ie' e' tséat senuk tsinet di' tum biule kiè "Skéköl tso', e' ye' sueke" ee.

### Ismael ala'r

12 Ismael dör Abraham alà Agar ta. Agar dör Abraham alaköl Sara, e' kanè móso e' dör egiptowak. Ikké dör Ismael ala'r e'pa kiè 13 wes ikunerak es: Nebaiot, e' dör illa tsá. E' itöki Quedar, Adbeel, Mibsam, 14 Mismá, Dumá, Masá, 15 Hadar, Temá, Jetur, Nafis ena ibata kiè Quedmá. 16 E'pa kos dör Ismael ala'r dökä dabom eyök kí böl (12). Ie'pa ká kiérak iwákpa kiè wa. Ie'pa kos dör iwakpa ká wökirpa. 17 Ismael kí duas de cien eyök kí dabom mañayök kí kul (137) ta

iblénewa. Es ie' michoë idëutöpa itöki. 18 Ie'aleripa mía senuk Havilá ena Sur e' shusha. Ká e' ate Egípto wöshäé Asiria nälé kke. Ie'pa serke ee bánet Abraham aleripa malepa yoki.

### Jacob ena Esaú kune

19 Ttè i' dör Isaac dör Abraham alà, e' pakè. 20 Isaac kí duas de dabom tkéyök (40) tå isenewa Rebeca ta. Rebeca dör Betuel e' alà busi ena Labán kutà. Ie'pa dör arameowak serke ká kiè Padán-aram ee. 21 Rebeca kè dò alæ. E' kueki Isaac tö Jehová a ikié as Rebeca dò alæ. Jehová tö ittö ttsé tå Rebeca dunekä e' wakpa dör klò. 22 Erë klöpa nippöke taijë ie' shua. E' kueki ie' ibikeitsé: "Ye' weirke i' es, e'ma ciök ye' sermiaa?" E' kueki ie' mía iwà chakök Jehová a. 23 E' tö ie' a iché:

"Be' shua ala'r tso' böl.  
Mik ie'pa de këchke, etá ikibi  
ék döraë itsirla kanè mósoie.  
Ie'pa aleripa döraë ká böti nì  
bolökpa ese wakpa.  
Itsirla aleripa döraë diché  
kibiie ikibi aleripa tsata.  
E' kueki ie'pa nippémítke kam  
ikur e' yoki."

24 Rebeca kewö de, eta klöpa kune wëpa. 25 Ikewe ék kune e' tsà dör mashmash ipàkö shamamaë. Ie' kiè mékaitö Esaú. \* 26 Alà tsá kune e' klöulewà iél tsirla wà iklö kaniñak a iulà et wa. E' kueki ikié mékaitö

\* 25.25 *Esaú*: Esaú kiè ñies Seír. Hebreoie Seír wà kiane chè *pakò*. Génesis 36.8 saú.

Jacob.\* Mik Rebeca klöpa kune eta Isaac ki duas tso' dabom teryök (60).

**Iyé wà ì tso' mekeat Esaú a e' kewö watuetttsaitö**

27 Klöpa kibinetke. Esaú dör yeria poë. Ie' wöbatsö sulu yëble wa. Erë iél Jacob, e' kè dör es. Ie' serke bérë. Ie' wöbatsö senuk u a è. 28 Iyiwak kañiru tteke Esaú tö e' chkà wa Isaac wöbatsö suluë. E' kueki Isaac ki Esaú kiar kibiie Jacob tsata. Erë Rebeca ki Jacob kiar kibiie Esaú tsata.

29 Ká et ta Jacob tso' ulök. E' dalewa Esaú debitü shtrinewa taië datse kañikä. 30 Ie' iché Jacob a:

—Be' we'ikèyö, ì alé be' tö mat se kakmu' ye' a ñe. Sulu ye' dué bli wa. E' kueki Esaú kiè Edom\* ñies.

31 Jacob tö iiyté:

—Keweie ì mekeat se' yé tö be' a be' dör ilà kibi e' kueki, e' kewö mütttsa ye' a chkò i' skéie.

32 Esaú tö iché:

—Ye' tteke bli tö dö' e' tö ye' ttèwa, e' ta ì mekeat se' yé tö ye' a ñlie bua' e' dör ye' a?

33 Jacob tö ikí ché ia:

—I' ta be' ttè mü ye' a tö moki be' tö ye' a imeke.

Eta Esaú tö ittè mé Jacob a yésyésë Skéköl wöqa. Es ì mekeat iyé tö ie' a, e' kewö méttsaitö Jacob a. 34 Jacob tö chkò mé ia pan ta. Mik Esaú chké one di' yé one, ta ie' e' kékä ta imíä. Ie' dör ilà kibi e' ulà a íyi bua' kewö tso', e' kè ki ie' tkine yës.

\*25.26 Jacob: Hebreoie s'kiè e' wà kiane chè s'klò kaniñak.

\*25.30 Edom: Hebreoie s'kiè e' wà kiane chè mat.

**Isaac mía Guerar**

**26** 1 E' kewö ska' ta ketba a ne taië ká e' kos ki wes ibak Abraham kewö ska' ta es. E' kueki Isaac mía Guerar wé filisteowak blú serke kiè Abimélec ee. 2 Ee Jehová e' kkaché ie' a ta ichéitö ia: "Kè be' minuk Egipto. Be' e' tsúat wé ye' be' a iché ee. 3 Be' senúia ká i' ki. Ye' tso' be' ta. Ye' er buaë chöraë be' a. Ká i' kos meraëyö be' a ñies be' aleripa a. Es ye' ttè muke be' a wes kewe ime'yö be' yé Abraham a es. 4 Be' aleripa alöweraëyö taië wes bëkwö tso' taië es. Ká i' kos merayö be' aleripa a. Ñies ie'pa batamik ye' er buaë chöraë ká ultane wakpa a. 5 Abraham tö ye' ttè kos e' iutë' buaë. Ttè mé ye' tö ie' a e' kos blë' buaë ie' tö e' kueki ye' tö ttè buaë e' meke be' a ñies."

6 Isaac e' tséat senuk Guerar. 7 Ká e' wakpa tö Isaac a ichaké: "¿Rebeca dör be' yaie?" Erë ie' suane ichök: "Ie' dör ye' alaköl." E' kueki ie' iché: "Ie' dör ye' kutà." Ie' tö ibikeitsé tö ká e' wëpa tö ie' ttewami ilaköl buaala kueki.

8 Isaac ki ká de taië ee. Ká et ta, ká e' blú kiè Abimélec, e' tö isuë ukkö tsitsir a tö Isaac tso' ilaköl Rebeca peñuk. 9 Bet itsuk patkémii tö ta ichéitö ia:

—¿Moki tö alaköl se dör be' alaköl? ¿I' kueki be' tö iyë' kuaë tö ie' dör be' kutà?

Isaac tö iiyté:

—Ye' ibikeitsé tö isalema a' ye' ttewami ie' kueki.

<sup>10</sup>Erë Abimélec tö iché ia:

—čì kuekì i' wamblebö sa' ta?

Tsir etä wém wele senewà ie' ta, e'  
ta iekkë tå be' tö sa' ké ì sulu wam-  
blök Skéköl wöa.

<sup>11</sup>Abimélec tö iché sulitane a:

—A' isie tö Isaac tsiriwé ö ilaköl  
tsiriwé, e' ta e' tterawa.

<sup>12</sup>Duas e' wa Isaac tö dalì kua-  
tké, wà wöne buaë, Jehová er  
buaë ché ie' a e' kuekì. <sup>13</sup>Ie' de íyi  
blú taije. Taije íyi tso' ie' wa. <sup>14</sup>Ie'  
wà obeja ena baka tso' taije. Nies  
kanè mésopa tso' taije ie' wa. E'  
kuekì filisteowak er ttse'r suluë ie'  
ki. <sup>15</sup>E' kuekì ie'pa tö di' tum bi'  
iyé Abraham e' kanè mésopa tö, e'  
kos wötewà íyök wa. <sup>16</sup>Bata ekkë ta  
Abimélec tö iché Isaac a:

—Be' yöné íyi blu' taije sa' tsata, e'  
kuekì ibe' yúshka!

<sup>17</sup>Etä Isaac mía senuk Guerar  
kakkue ki. <sup>18</sup>Ee di' tum bi' iyé tö, e'  
wötewà filisteowak tö iyé blénewa  
ukuöki ta, e' kos biéneitö ta ikiè  
mékaitö wes iyé tö ime'kà es. <sup>19</sup>Ká  
et ta ie' kanè mésopa tso' di' tum  
biök ká e' ki, etä ie'pa tö di' tum  
a di' tuökeka taije ese kué et. <sup>20</sup>Erë  
ká e' obeja kkö'nukwakpa debitü  
ñippök Isaac obeja kkö'nukwakpa  
ta. Ie'pa tö iché tö di' tum e' dör  
ie'pa icha. E' kuekì Isaac tö di' tum  
biule e' kiè méka "Ñippök." <sup>21</sup>E'  
ukuöki ta Isaac kanè mésopa di'  
tum skà bié et, e' ki iskà ñippé-  
rak. E' kuekì di' tum biule e' kiè  
mékaitö "Se' nì bolök."

<sup>22</sup>Ie' mía kamië ká e' ki, ee di'  
tum skà biéitö et. E' kè ki iñi bune-  
rak. Ie' iché: "Iñe ta Jehová tö  
ká bua' mé se' a wë' ta se' serdaë

buaë." E' kuekì ká e' kiè mékaitö  
"Ká tso' taije se' a."

<sup>23</sup>E' ukuöki ta ie' mía Beerseba.

<sup>24</sup>E' nañewe Jehová de ie' ska' ta  
ichéitö ia:

"Ye' dör be' yé Abraham e'  
Kéköl.

Ye' tso' be' ta, e' kuekì kè be'  
suanuk.

Abraham dör ye' kanè móso e'  
dalermik ye' er buaë chöraë  
be' a,  
nies be' aleripa alöweraëyö  
taije."

<sup>25</sup>Ee Isaac tö ák kataté et ká'ie  
iyiwak jchoie Jehová dalöioie. Ee  
ie' sené ta ikanè mésopa tö di' tum  
bié et ee.

### Isaac ena Abimélec kawö mé nì a

<sup>26</sup>Ká et ta, Abimélec datse Guerar  
debitü ttök Isaac ta. Iyamipa  
debitü böл ie' ta. Eköl kiè Ahuzat.  
Iéköl kiè Ficol. E' dör Abimélec  
ñippökakpa wökir. <sup>27</sup>Isaac tö  
iché ia:

—A' éna ye' ar suluë. A' ye'  
yö'shkar a' ká ki. Etä čiök a' do ye'  
ska?

<sup>28</sup>Ie'pa tö iiuté:

—Sa' isué tö Jehová tso' be' ta.  
E' kuekì sa' bitea be' a ichök tö  
kawö mùwäsö ñita. <sup>29</sup>Sa' kè wa  
be' tsiriqule ì wa. Kekraë sa' tö be'  
kimé. Mik be' manetwa, etä sa' kè  
wà i tté kù' a' ki. Iñe ta iwénewa  
tö be' a Jehová er buaë chöke taije.  
E' kuekì be' ttè mü sa' a tö be' kè  
tö ì sulu wamblepa sa' ki.

<sup>30</sup>Eta Isaac tö kawö buaë tkö'wé ie'pa ta, chkè wa di'yè wa. <sup>31</sup>Bule es bla'mi tą ie'pa tö ikawö mé ñì a tö kë nippöiärak. E' ukuökı ta ie'pa e' chéat ñì a er bua' wa.

<sup>32</sup>E' diwò shà ta Isaac kanè mésopa tso' di' biök, e'pa wą ibiyó de tö sa' di' kué. <sup>33</sup>Ie' tö di' e' kiè méka Sebá.\* E' kueki lñe ta ká e' kièia Beerseba.

<sup>34</sup>Mik Esaú kí duas de dabom tkéyök (40), eta ie' senewá alakölpa ból tą. Eköl kiè Judit e' yé kiè Beerí, e' dör hititawak. Iéköl kiè Basemat e' yé kiè Elón, e' dör hititawak ñies. <sup>35</sup>Alakölpa ból e'pa tö Isaac ena Rebeca eriawéka tsiri-wéka taię.

**Isaac er buaë ché  
Jacob ena Esaú a**

**27** <sup>1</sup>Isaac dewa kékpalatke. Ie' kë wöbla waweria. Ká et tą ilà kibi Esaú e' kiéitö ta ichéitö ia:

—iA alà!

Esaú tö iiuté:

—A yéwö, ñì?

<sup>2</sup>Eta Isaac iché ia:

—Be' tö isué tö ye' kénéwatke dö' wekké alè tą ye' duòwá. <sup>3</sup>E' kueki ye' kí ikiane tö be' kuaböt klö'ú tą be' yú ye' a yéblök. <sup>4</sup>Eta iwakaneú ña buaë wes ye' wöbatsö iwa es, ta itsúbitu ña katè. E' wa ye' er buaë chöke be' a kám ye' duòwá e' vöki.

<sup>5</sup>Erë Isaac ttöke Esaú tą e' ttsé Rebeca tö. E' kueki mik Esaú mía yéblök kañiká <sup>6</sup>eta bet ie' tö iché Jacob a:

—A alà, ye' ttò ttsó. Ye' tö be' yé ttsé ttök be' él Esaú tą, tą iché ia: <sup>7</sup>“Be' yú yéblök, e' wakaneú ña buaë tą itsúbitu ña katè. E' ukuökı ta ye' tö be' a íyi kos bua' e' kewö mekeyö be' a Jehová wörki kam ye' duòwá e' vöki.” <sup>8</sup>E' kueki ye' ttò ttsó buaë. <sup>9</sup>Be' yú chibo pupula bua'bua ese tsúbitu ña böto tą ikanewekeyö buaë wes be' yé wöbatsö iwa es. <sup>10</sup>E' ukuökı ta be' tö chkè tsúmi be' yé a as iñuitö. Es íyi kos e' kewö atmi be' a be' él skéie.

<sup>11</sup>Erë Jacob tö iché imì a:

—Ye' él pa shamamaë. Ye' kë dör es. <sup>12</sup>Ye' yé tö ye' këmi, e' ta ittsewämi tö ye' idir, eta ie' ichémi tö ye' tso' ie' daloseukwa. Ie' kë er buaë chepa ye' a. E' skéie ie' er sulu chöraë ye' kí.

<sup>13</sup>Erë imì tö iiuté:

—A alà, as ie' er sulu chò ye' ki. Ye' ttò iutó. Be' yú chibola chéyö be' a e' tsük.

<sup>14</sup>Eta Jacob mía chibola tsük e' debitu iwá imì a. E' kanewé imì tö buaë wes Isaac wöbatsö iwa es.

<sup>15</sup>Ilà kibi Esaú datsi' tso' blëue u a e' bua'bua yéttas iékaitö ilà tsirla kí. <sup>16</sup>E' ukuökı ta chibola kkuölit wa Jacob ulà ena ikuli' patréwaiitö. <sup>17</sup>Chkò bua' ena pan yuétkeitö, e' méitö Jacob a tsémi iyé a.

<sup>18</sup>Jacob dewa iyé ska' tą ichéitö ia:

—A yéwö.

Isaac tö iiuté:

—A alà, ñe' dör ye' alà wéne ék?

<sup>19</sup>Ie' iiuté:

\* 26.33 Sebá: Hebreoie di' biule kiè e' wà kiane chè ttè mène ñì a.

—Ye' dör Esaú, be' alà kibi ék. Ì chébö ña, e' kanewétkeyö. Be' e'  
tkóser iyiwak ttéyö e' katök. E'  
ukuökì tå be' iyí buaë e' kewö<sup>mekebö ye' a, e' mú ye' a.</sup>

<sup>20</sup>Eré Isaac tö ichaké ia:

—A alà, ɬwes be' ulà de iyiwak e'  
ska' bet?

Ie' iiuté:

—Jehová dör be' Kéköl e' tö ye'  
kimé e' wa ikuéwayö bet.

<sup>21</sup>Isaac tö iché ia:

—Be' e' skówä ye' o'mik pattsèyö  
tö mokië be' dör ye' alà Esaú.

<sup>22</sup>Ie' e' skéwa iyé o'mik as  
ipattsòitö. Isaac tö iché:

—Be' ttò e' dör Jacob ttò. Eré be'  
ulà e' dör Esaú ulà.

<sup>23</sup>Jacob ulà kò shamamaë wes  
iël kibi ulà es, e' kuëki Isaac kë éna  
iæne buaë tö e' dör Jacob. Mik ie'  
er buaë chöketke ilà a, <sup>24</sup>eta iskà  
chakéneitö:

—Mokì be' dör ye' alà Esaú?

Ie' iiuté:

—Tò, ye' dör Esaú.

<sup>25</sup>Iyé tö iché ia:

—A alà, iyiwak ttébö kanewébö e'  
mú ña katè as ye' er buaë chò be' a.

Ie' tö iyé tié ñies vino mé ia yé.

Isaac chké, vino yé. <sup>26</sup>E' ukuökì tå  
ichéitö ia:

—A alà, be' e' skówä ye' o'mik ye'  
wöalatتسö.

<sup>27</sup>Mik Jacob e' skéwa iyé wöala-  
ttsök, eta iyé tö idatsi' alattsé tå ier  
buaë ché ilà a ttè ikkë wa:

“Tò, ipaalar wes ye' alà paalar  
es.

Ie' paalar buaë wes kañika  
kkö'nè Jehová tö e' alar è.

<sup>28</sup>As Skéköl tö be' a mó wöli mè  
kekraë be' dalikua ki.

As ie' tö be' dalikua kos e' wöù  
buaë  
as be' wä trigowö tå taië ena  
vino tå taië.

<sup>29</sup>Ká kua'ki wakpa taië as e' dò  
be' kanè mésopae.

As ie'pa e' tulòwärak kuchë ki  
be' wörki be' dalöök.

As be' mú dò be' élpa wökirie.  
As ie'pa e' tulòwä kuchë ki be'  
wörki be' dalöök.

Wépa er sulu ché be' ki, esepa  
ki Skéköl er sulu ské chöraë.  
Nies wépa er buaë ché be' a,  
esepa a Skéköl er buaë ské  
chöraë.”

<sup>30</sup>Isaac er buaë chétke Jacob a  
tå Jacob míatke. E' bet tå Esaú tso'  
yéblök e' dene. <sup>31</sup>Nies ie' tö chkè  
alé buaë, e' mí iwä iyé a tå ichéitö  
ia:

—A yéwö, dúla ttéyö e' alí katö.  
E' ukuöki tå be' er buaë chöke ye' a  
e' chö ña.

<sup>32</sup>Isaac tö ichaké:

—¿Yi dör be'?

Ilà tö iiuté:

—Ye' dör Esaú be' alà kibi.

<sup>33</sup>Isaac tkinewä painéka taië tå  
ichéitö:

—E'ma ɬyi dare yéblök, e' wa  
chkè debitü ña? E' katéwayö seraa  
kam be' dò e' yöki. E' a ye' er buaë  
chétke. Es ie' a ye' er buaë chè e'  
atetke.

<sup>34</sup>Mik Esaú tö i ché iyé tö e'  
ttsé, eta ie' erianeka qanekå taië tå  
ichéitö:

—iA yéwö, ye' a er buaë chò ñies!

**35** Erë Isaac tö iiüté:

—Be' él datke ye' kitö'uk e' a ye' er buaë chétké be' skéie.

**36** Esaú tö iiüté:

—Wëe' ie' kiè Jacob. I' tå bötkicha iwambléito ye' tå i' es. Be' íyi kewö mekebö ye' a ye' dör be' alà kibi e' kuékij, e' kewö yé' ttsa ye' ulà a ie' tö kuaë. Íñë tå be' er buaë chöke ye' a e' yétsaitö ye' yoki. ïWarma be' er buaë chöke ye' a e' kë ta'ia?

**37** Isaac tö iiüté:

—Ittsö. Ye' tö ie' mékatke be' wökirie. Ye' tö be' aleripa kos e' métke ie' kanè mésopaie. Ñies ye' tö ichétké as chkewö ena vino dö ie' ulà a tajë. A alà, ñi memiiq ye' tö be' a i' ta?

**38** Erë Esaú tö ikí ché iyé a:

—A yéwö ñbe' er buaë chöke sa' a e' dör etkë? ïYe' a er buaë chó ñies! Etä Esaú iéka tajë.

**39** Isaac tö iché ia:

“Be' serdaë wé mó wöli kë ta' tajë ese ska!”

Ee be' dalikua kë wörpa buaë.

**40** Be' ñippöraë tabè wa o'ka ta iíyi kuékij, e' mik be' serdaë. Be' döraë be' él kanè mésosie. Erë mik be' ñippémi ie' ta, etä be' e' yörattsa ie' ulà a.”

### Jacob tkashkar Esaú yoki

**41** Isaac er buaë ché Jacob a Esaú skéie. E' kuékij Esaú éna suluë Jacob arke. Ie' ibikeitsé: “Ye' yé duökewatke. Mik iduowa e' kewö tka, etä ye' él tterawayo.”

**42** Mik Rebeca wá ijchenewa tö Esaú tö iél bikeitsé ttewa, etä Jacob tsuk patkéitö tå iché ia:

—A alà, ittsö. Be' él Esaú e' pablöke tö ie' be' tterawa. **43** E' kuékij ye' ttö ttsö. Be' tkóshkar bet ye' aké kiè Labán serke Harán e' u a. **44-45** Be' e' tsúat ie' ska' ká tajë dö mik be' él er buanene be' kí ena i sulu wamblébö e' chowane ie' éna etä. E' ukuökij tå ye' tö be' tsuk patkeraë, e' wa be' döne. ïYe' kë kí ikiane tö ye' ala'r ból e' duòwa diwö etkë a!

**46** E' ukuökij tå Rebeca tö iché Isaac a:

—Esaú alakölpa dör hititawak e'pa tö ye' shtriwétké tajë. Jacob senéwá alaköl ese ta, e' tå ye' mü duòwa.

**28** <sup>1</sup>Etä Isaac tö Jacob kié ta ishke'wéítö tå ichéítö ia:

—Kë be' senukwá canaánwak ta. <sup>2</sup>Be' yú be' duöchke kiè Betuel serke Padán-aram e' ska'. Ee be' senúwá be' nau Labán alà busipa e' eköl ta. <sup>3</sup>Skéköl Diché Tå! Íyi Ulitane Tsata as e' er buaë chö be' a. Ñies as ie' tö be' aleripa alöy tajë ká wa'ñie. <sup>4</sup>Ie' tö iyé'atbak Abraham a tö ká i' meraëítö ie' a. E' kí se' serke shkal. As ie' er buaë chö be' a ena be' aleripa a wes ie' er buaë yé' Abraham a es as ká i' dö a' ulà a.

<sup>5</sup>Es Isaac tö Jacob patkémi Padán-aram. Jacob demi inau Labán ska! Labán dör arameowak kiè Betuel, e' alà. Ie' dör Rebeca aké. Rebeca dör Jacob ena Esaú e'pa mì.

### Esaú senéwá Mahalat ta

**6** Esaú wá ijchenewa tö Isaac er buaë ché Jacob a ñies tö ipatkémii-tö ká kiè Padán-aram senukwá ee.

Nies ie' wā ijchenewā tö mik iyē er bua' ché Jacob a eta ichéitō ia:

—Kè be' senukwā canaánwak ta.

<sup>7</sup>Nies ie' wā ijchenewā tö Jacob mía ká kiè Padán-aram wes iyé ena imí tö iché ia es. <sup>8</sup>Es ie' éna iane tö iyé kè kí ikiane tö ie'pa serwā canaánwakpa ta. <sup>9</sup>E' kueki ie' mía alaköl skà yulök Ismael dör Abraham alà e' ska'. Ee ie' senewá Ismael alà busi kiè Mahalat e' ta, e' dör Nebaiot kutà. Es alaköl kí tséwaitö eköl e' kè dör canaánwak wes imalepa es.

### Jacob kabsué Betel

<sup>10</sup>Eta Jacob e' yéttsa Beerseba michoë Harán. <sup>11</sup>Ie' michoë wé katuine ikí ta ee ikapere. Ák méwaitö wökir kataie, e' kí ie' kapöwa. <sup>12</sup>Ee ie' kabsué. Ie' isué tö klökata batsië tkér iski ibata döka ká jaì a. E' kí ie' isué tö Skéköl biyöchökawakpa shköke wo'k wa'k. <sup>13</sup>Nies ie' isué tö Jehová dur ie' o'mik ta ichéitö ia: "Ye' dör Jehová. Ye' dör be' talà, Abraham, ena be' yé, Isaac, e'pa Kéköl. Ká i' wé be' tér, e' meraëyö be' a ena be' aleripa a. <sup>14</sup>Ie'pa alördäë taië wes ká po es. Ie'pa michoë senuk ká wa'ñe. Ye' er buaë chöraë ká ulitane wakpa a be' ena be' aleripa e'pa batamik. <sup>15</sup>Ye' tso' be' ta. Ye' tö be' kkö'neraë ká wa'ñe wé be' mir ee. Be' dörane ye' wa ká i' kí. Kè yó be' we'ikepa. Ttè kos méyö be' a, e' waweraëyö es."

<sup>16</sup>Mik Jacob ti'lneka, eta ie' ibikeitsé: "Moki Jehová tso' ká i' kí, e'

kè jcher ye' wa." <sup>17</sup>Taië ie' suane ta ibikeitséitö: "Ká i' dör batse'r taië. iíle dör Skéköl wé! iíle dör ká jaì wékkö!"

<sup>18</sup>Bule es ta Jacob e' kékä bla'mi. Ák méwaitö iwökir kataie, e' kékaitö duékaatitö iwà kkachoie tö ká e' dör batse'r. Kiò téítö ák bata kí iwà kkachoie tö ká e' tso' Skéköl dalöioie. <sup>19</sup>Ká e' kiè mane'wétsané ie' tö Betel \* Kewe ta ká e' kiè Luz.

<sup>20</sup>Ee ie' tö ittè mé Jehová a i' es: "Be' tso' ye' ta ena ye' kkö'né be' tö i' ye' mir eta, ena be' tö chkè ena datsi' mé ye' a, <sup>21</sup>nies ye' dene buaë ye' yé ska', e' kos wébö ye' a, e' ta be' klö'weraëyö ye' Kékölie. <sup>22</sup>Ák duékayö i', e' dör iwà kkachoie tö fe be' dalöierdaë. A Skéköl, i kos mekebö ye' a, e' mú blatësö dökä dabop ta e' tsá eyök meraneyö be' a."

### Jacob demi Labán ska'

**29** <sup>1</sup>E' ukuökí ta, Jacob mía pë' serke diwö tskirke e' èka. <sup>2</sup>Ee ie' tö di' tum biule sué et kañika. E' pamik obeja daparke mañayök ènuk ee di' e' yekerakitö e' kueki. Di' tum biule kkö kí ákkue bërie me'l et. <sup>3</sup>Iyiwak kkö'nukwakpa wöblanewatke tö as iyiwak ultane daparka ee, e' ukuökí ta ákkue skeuke di' tum biule kkö kí as iyiwak di'yò. Iyiwak di'yane one ta ie'pa tö ikkò pabaké-wane ákkue wa. <sup>4</sup>Jacob tö iyiwak kkö'nukwakpa a ichaké:

—A yampi, èká wé wakpa a' dör?

\* **28.19 Betel:** Hebreoie kiè e' wà kiane chè Skéköl wé.

1e'pa tö iiuté:  
—Sa' dör Harán wakpa.  
5Ie' tö iskà chakéné:  
—¿A' wà wém kiè Labán dör  
Nahor alà, e' suule?  
1e'pa tö iiuté:  
—Tó, e' suule sa' wa.  
6Ie' tö ichaké:  
—¿Is ie' tso'?  
1e'pa tö iiuté:  
—Ie' tso' bua!. Isaú. Wì busi datse  
e' dör ie' alà kiè Raquel e!. Ie' datse  
iyé iyiwak wëttsé.  
7Ie' tö iché:  
—Ká tso'ià ñiwe. Diwö tso'ià  
kakkeé iyiwak dapa'wowà ek tsiní.  
Ì kueki a' kë tö di' mè ià tå ièmirak  
chök.  
8Eré ie'pa tö iiuté:  
—Kè sa' a e' wamblénuk. Sa'  
kawöta ipanuk. Mik obeja de seraà,  
etå sa' tö di' tum kkò ppekekå tå di'  
meke sa' tö iyiwak a.  
9Ie' ttöke ie'pa tå, e' dalewa  
Raquel debitü iyé iyiwak wëttsé,  
ie' dör iyé iyiwak kkò'nukwak e'  
kueki. 10Jacob tö Raquel sué inau  
iyiwak wëttsé, e' bet ie' tunemi di'  
kkò kékå tå iyiwak a di' méitö. 11E'  
ukuöki tå Raquel shke'wéitö wöa-  
latséitö tå ie' iékaie ttsé'ne buaë  
kueki. 12Ie' tö iché ià: "Ye' dör  
Rebeca alà ena Labán nauyö." E'  
bet tå Raquel tunemi ichök iyé a.  
13Mik Labán tö inauyök tté  
ttsé, etå bet itunemi iñaletsuk.  
Ipaklö'wéwaitö tå iwöalattséitö  
tå imítser iwà iu a. Ì kós tka Jacob  
ta e' pakéitö inau a. 14-17Tå Labán

tö iché ià: "Mokië be' dör ye' yami  
ekka."

### Jacob senéwa Lía ena Raquel tå

Labán alà busi ból, ikibi ék kiè  
Lía, itsirla ék kiè Raquel. Lía wöbla  
e' kë dör buaala\* erë Raquel dör  
buaala wa'ñe.

Jacob sené Labán ska' dò si' et. E'  
ukuöki tå Labán tö iché ià:  
—Be' dör ye' yami, erë be'  
kë kawöta kaneblök ye' a éme.  
Ichó ña ¿kos be' tö ye! ña'wëmi?  
18Jacob wöbatse Raquel wa, e'  
kueki ie' tö Labán iuté:

—Be' tö kawö mé ye' a senukwa  
Raquel tå, e' tå e' skéie ye' kane-  
blöke be' a dökå duas kul.

19Labán tö iiuté:  
—Ye' a tå e' dör buaë. Be' je' a ye'  
tö imèmi buaë. Ye' kë éna imak  
o'ka a. Be' e' tsúat ye' ska!.

20Es Jacob kaneblë' dökå duas kul  
Raquel dalérmi. Erë ie' kí Raquel  
kiane taië, e' kueki kawö ekké e'  
ttséitö ká bërbër è. 21Mik duas kul  
tka, etå Jacob tö iché Labán a:

—Kawö yë'yö be' a, e' detke.  
Kawö mü ye' a senukwa be' alà  
busi Raquel tå.

22Etå Labán tö sultane a  
ishkeñé tö a' shkó ulabatsè e' kewö  
tkö'uk. 23Eré katuine, e' shua Lía  
mí ie' wa Jacob a Raquel skéie tå  
Jacob kapé ie' ta. 24Labán tö ikanè  
mëso eka kiè Zilpá, e' me'tke Lía  
a ikanè mësoie. 25Bule es bla'mi  
ta Jacob tö isuéwa tö e' dör Lía. Ie'  
míä Labán ska' tå ichéitö ià:

\*29.14-17 Lía wöbla e' kë dör buaala: Hebreoie ttè e' wà kë jcher se' wà bua'iewa. Isalema e'  
wà kiane chè Lía wöbla dör buaala.

—¿Iì wamblé be' tō ye' ta? Ye' kaneblé be' a Raquel dalermik. ¿Iók be' tō ye' kitö'wé es?

<sup>26</sup>Labán tō iiuté:

—Íe sa' wöblar tō alà busi kibi ese serkewá keweie, e' itökí itsir-la ék. <sup>27</sup>Se' kawötä Lía ulabatsöke e' kewö tkö'uk döka ká kul. Mik kewö e' tka, etá ye' tō be' a Raquel meke ñies. Eré be' kawötä skà kaneblökne ye' a duas kul Raquel dalermik.

<sup>28</sup>E' dör buaë Jacob a. Mik Lía ulabatsè kewö e' diwö tka, etá Labán tō Raquel mé Jacob a ala-kolie ñies. <sup>29</sup>Ñies ie' tō ikanè mésø eka kiè Bilhá e' mé Raquel a ikanè mésøie. <sup>30</sup>Es Jacob senéwa Raquel tā ñies. Eré ie' kawötä kaneblökne skà Labán a döka duas kul, eré ie' éna idalér kibie Lía tsata.

### Jacob ala'r

<sup>31</sup>Jehová tō isué tō Jacob kè ki Lía kiane bua'ie. E' kueki Lía a alà méitö. Eré Raquel kè döta' alaë.

<sup>32</sup>Lía dunekä alà kune tā ie' tō iché: “Ye' eriarke taië e' sué Jehová tō, e' kueki iñe tā ye' dalérdaë ye' wém éna.” E' kueki ikiè mékaitö Rubén.\*

<sup>33</sup>E' ukuökí tā ie' alà skà kune eköl tā ichéitö: “Ye' wém kè tkine ye' ki e' sué Jehová tō e' kueki alà skà méitö ye' a.” E' kueki ikiè mékaitö Simeón.\*

\* 29.32 *Rubén*: Hebreoie s'kiè e' wà kiane chè ye' eriane e' suéitö.

\* 29.33 *Simeón*: Hebreoie s'kiè e' wà kiane chè ittsök.

\* 29.34 *Leví*: Hebreoie s'kiè e' wà kiane chè ñita.

\* 29.35 *Judá*: Hebreoie s'kiè e' wà kiane chè Skéköl kikèkasö.

\* 30.6 *Dan*: Hebreoie s'kiè e' wà kiane chè Skéköl tō s'tsatkè buaë.

\* 30.8 *Neftalí*: Hebreoie s'kiè e' wà kiane chè ñippök.

<sup>34</sup>Íe' alà skà kékä tā ichéitö: “Ire' ye' ala'r deka mañal e' kueki ye' wém éna ye' dalérmi kibie.” E' kueki ikiè mékaitö Leví.\*

<sup>35</sup>E' ukuökí tā ie' alà skà kékä tā ichéitö: “Iñe tā ye' tō Jehová kikekekä.” E' kueki ikiè mékaitö Judá.\* Etá ekké è ie' alà dë!\*

### Raquel ala'r

**30** <sup>1</sup>Mik Raquel tō isué tō ie' kè dò alaë, etá ie' sibineka iél kí. Ie' tō iché iwém a:

—Be' kè tō ye' a alà mè, e' tā ye' duörawa.

<sup>2</sup>Jacob ulunekä ie' ki tā ichéitö ia:

—Ye' dör Skéköl kalì, e'ma ye' a alà mermi be' a. Ie' wák tō be' méat kè dò alaë.

<sup>3</sup>Je' tō iiuté:

—Ittsö, ye' kanè mésø kiè Bilhá, e' tā be' senú. Mik ie' alà kékä eta e' dör wes ye' alà es. Es ye' döraë alaë ie' batamik.

<sup>4</sup>Es ie' tō ikanè mésø Bilhá e' mé iwém a alakolie, e' tā Jacob sené.

<sup>5</sup>Ie' tā Jacob alà kékä. <sup>6</sup>Raquel tō iché: “Skéköl tō ye' tsatké buaë. Ie' tō ye' ttò ttsé tā alà méitö ye' a wém.” E' kueki ie' tō ikiè méka Dan.\*

<sup>7</sup>E' ukuökí tā Bilhá alà skà kune Jacob tā. <sup>8</sup>Raquel tō iché: “Ye' ñippé taië ye' él tā etá ye' e' aléka iki.” E' kueki ikiè mékaitö Neftalí.\*

<sup>9</sup>Mik Lía tö isué tö ie' kë dë'ia alàë, etä ie' tö ikanè méso kiè Zilpá, e' mé Jacob a alakölle. <sup>10</sup>Zilpá alà kékä Jacob ta. <sup>11</sup>Lía tö iché: “iEdaa ì mène ye' a!” E' kuékí ilà kiè mékaitö Gad.\*

<sup>12</sup>E' ukuökí tå Zilpá alà skà kékä Jacob ta. <sup>13</sup>Lía tö iché: “iYe' ttsé'r buaë! Ire' alakölpa kos tö icheraë tö be' ttsé'r buaë.” E' kuékí ilà kiè mékaitö Aser.\*

<sup>14</sup>Trigo wö alirke e' késka' ta Rubén mía kañikä. Eę ie' tö kalwö kiè mandrágora \* e' alí kué. E' bite iwä imì Lía a. Mik Raquel tö kalwö e' sué tå ichéitö Lía a:

—Be' we'ikèyö, kalwö debitü be' alà wä be' a, e' kakmú ña.

<sup>15</sup>Lía tö iiuté:

—¿Be' kë a wë' idir tö be' wa ye' wëm mítser? iKíie tå be' éna kalwö debitü ye' alà wä ye' a, e' yaktsa ye' ulà a!

Eré Raquel tö iché ia:

—Kalwö e' skéie iññe nañewe ye' wëm patkekeyö be' tå kapök.

<sup>16</sup>Katuirketke tå Jacob tso' kaneblök e' debitü tå Lía mía iñaletsük tå ichéitö ia:

—Ye' tö ye' alà mandrágora e' mé Raquel a, e' skéie be' kawöta kapök ye' ta iññe nañewe.

E' nañewe Jacob kapé ie' ta. <sup>17</sup>Etä Skéköl tö Lía ttò ttsé tå iduneka ta

ilà skà kune Jacob ta. Es ie' alà dekä skel. <sup>18</sup>Lía tö iché: “Ye' tö ye' kanè méso mé ye' wëm a e' skéie Skéköl ye' a alà i' mé.” E' kuékí ilà kiè mékaitö Isacar.\*

<sup>19</sup>E' ukuökí tå Lía alà skà kékä Jacob ta, e' tå idekä teröl. <sup>20</sup>Le' iché: “Skéköl tö ye' a ì buaë kakmé. Ire' ye' ala'r de teröl. E' kuékí ye' wëm éna ye' dalérdaë jaishet.” E' kuékí ilà kiè mékaitö Zabulón.\*

<sup>21</sup>Bata ekkë tå ie' alà skà kune alaköl. E' kiè mékaitö Dina. <sup>22</sup>Eré ñies Raquel kímé Skéköl tö. Le' tö ala'r mé ia wes Raquel tö ikié ia es. <sup>23</sup>Le' duneka tå ilà tsá kune kiè mékaitö José. Le' tö iché: “Ye' jaëne' siärë e' yétsa Skéköl tö ye' ki.

<sup>24</sup>Jehová mú tö ye' a alà kí mè ia eköl.” E' kuékí ikiè mékaitö José.\*

### Jacob iyiwakalone taië

<sup>25</sup>José kune e' ukuökí tå Jacob tö iché Labán a:

—Ye' ómine ye' kaska!. <sup>26</sup>Ye' alakölpa ena ye' ala'r e'pa mú ye' a as imi'rak ye' ta. Ye' kaneblétke be' a ie'pa skéie. Be' wä ijcher buaë tö kos ye' kaneblé be' a.

<sup>27</sup>Eré Labán tö iiuté:

—Be' we'ikèyö. Be' e' tsúatia senuk ye' ska!. Ye' tö itötke tö Jehová er buaë ché ye' a be' batamik. <sup>28</sup>Ichó ña kos be' ki inuköl kiane

\*<sup>30.11</sup> *Gad*: Hebreoie s'kiè e' wä kiane chè *kawö buaë mène*.

\*<sup>30.13</sup> *Aser*: Hebreoie s'kiè e' wä kiane chè *ittsé'r buaë*.

\*<sup>30.14</sup> *mandrágora*: Ká e' kewöksa tå ie'pa tö ibikeitseke tö mandrágora wö katé alakölpa tö, e' tå e' tå ie'pa kímèmi dök alàë.

\*<sup>30.18</sup> *Isacar*: Hebreoie s'kiè e' wä kiane chè *ské*.

\*<sup>30.20</sup> *Zabulón*: Hebreoie s'kiè e' wä kiane chè *kakmeule*.

\*<sup>30.24</sup> *José*: Hebreoie s'kiè e' wä kiane chè *ilè kímú*.

be' kanè skéie, e'ma ekké ye' be' patuèmi.

<sup>29</sup>Ie' tö iiuté:

—Be' wá ijcher tö ye' kaneblé buaë be' a. Ñies ye' tö be' iyiwak kkö'né buaë be' a. <sup>30</sup>Mik ye' dë'lbitu be' ska', eta be' kè wá i kú' taié. I'ñe tå be' wá íyi tso' taié. Jehová er buaë ché be' a ye' kueki. Eré ñmik ye' kaneblomi ye' wák a? Ye' woché yamipaë.

<sup>31</sup>Labán tö iskà ché ia:

—¿Kos be' kí ikiane tö be' patuèyö?

Le' tö iiuté:

—Be' kè tö ye' patauk. Eré i chekeyö be' a e' iutó, e' tå ye' tö be' iyiwak kkö'nemi. <sup>32</sup>I'ñe ye' mi'ke be' iyiwak shushtök. Obeja kos dalolo ena chibo kos wöaule shkitshkit ö ulaula ese klö'wékeyö ye' wák a e' patuoie. <sup>33</sup>Mik be' de ye' iyiwak sáuk tå ee' be' isuèmi tö obeja dalolo ö chibo wöaule shkitshkit ö ulaula ese è tso', e' tå be' wa ijcherwámi tö ye' dör wém yésyésë. E' kè dör es, e' tå be' wá ijcherdaë tö ye' tö be' iyiwak ekiblé.

<sup>34</sup>Labán tö iiuté:

—Tó, buaë idir. Iùsö wes be' iché es.

<sup>35</sup>Eré e' diwö shà tå ie' mía ie' iyiwak shushtök. Ie' chibo kos tso' wöaule skékshkék ö ulaula ese yéluritö. Ñies ie' obeja kos tso' dalolo ese yéluritö tå iméitö ila'r wëpa a kkö'nè. <sup>36</sup>E' ukuöki tå iyiwak yélur ie' tö e' wëttsé ie' mía shkè dò ká mañat Jacob yoki. Etå Jacob kawötä Labán iyiwak malepa e' kkö'nuk.

<sup>37</sup>Eré Jacob tö kal kua'kí kua'kí dò mañalka e' ulà aki téé. Elka

kiè álamo, skà kiè almendro, skà kiè castaño. Kal ulà kkuölit takla jchéloritö as iwér wöaule saruru skékshkék. <sup>38-39</sup>E' ukuöki tå kal ulà e' tuléwaitö wé iyiwak daparke di'yök e' wöshaë. Ee iyiwak wöbatsöke ñì wa. Iywak wöbatsöke ñì wa kal ulà ñe' wöshaë e' ala'rla kos tskirke wöaule skékshkék ö shkitshkit ö ulaula. <sup>40</sup>Iywak tskirke wöaule e' kos dapa'wéítö bánet ie' wák a. Ese wé'ñe kos uyéwaitö Labán iyiwak kos wöaule ö dalolo ese a as itskir wöaule ö dalolo. Es ie' iyiwak alörke taié bánet, kè kú' Labán icha tå ñita. <sup>41</sup>Mik iyiwak bua'bua ese wöbatsöke ñì wa, eta ie' tö kal ulà ñe' tuléwá wé iyiwak di' yoke ee. Es ie'pa tö kal ulà wöaule e' sué mik iwöbatsöke ñì wa e' dalewa. E' ala'rla tskirke kos e'pa dör wöaule. <sup>42</sup>Eré mik iyiwak sí po ese datse, eta ie' kè tö kal ñe' tuléwá. E' kueki iyiwak sí po ese ala'rla kos tskirke e' dör Labán icha. Eré wé bua'bua ese dör ie' icha. <sup>43</sup>Es ie' de íyi blú taié. Obeja ena kanè mésopa wëpa ena alakölpá ñies kameio ena burro e' kos tso' ie' wá taié.

### Jacob tkakshkar Labán yoki

**31** <sup>1</sup>Eré Jacob tö ittsé tö Labán ala'r dulakölpá tö icheke: "Jacob tö se' yé íyi kos e' klö'wéwa, e' wa ie' e' blu'wé taié." <sup>2</sup>Ñies ie' tö isué tö Labán kè tö ie' suèia buaë wes kenet es. <sup>3</sup>Etå Jehová tö ie' a iché: "Be' yúne be' yépa kaska' wé be' yamipa tso' ee. Ye' michoë be' tå be' kkö'nuk."

<sup>4</sup>Jacob tö Raquel ena Lía tsuk patké dò wé ie' tso' obeja wëttsé ee <sup>5</sup>tå ichéitö ia:

—Ye' wā ijchenewā tö a' yē kē ki ye' kianeia wes kēnet es. Erē ye' yē e' Kéköl tso' ye' tā kekraë ye' kīmuk. <sup>6</sup>A' wā ijcher buaë tö ye' kaneblé a' yē a moki. <sup>7</sup>Erē ie' tö ye' kitö'wé kekraë ye' kanè ské wa. Erē Skéköl kē wā ie' a ikewö mène as ì sulu wamblöitö ye' kī. <sup>8</sup>Mik ie' tö ye' a iché: “Ye' be' patueke iyiwak wöaule shkitshkit ese wa”, eta iyiwak ultane pāne wöaule shkitshkit ème. Mik ie' tö ye' a iché: “Ye' be' patueke iyiwak wöaule shkékshék ese wa”, eta iyiwak ultane pāne wöaule shkékshék ème. <sup>9</sup>Es Skéköl tö a' yē iyiwak yē'lur mè ye' a.

<sup>10</sup>“Iywak wöbatsöke nì wa e' kewö ska' tā ye' kabsuē tö iyiwak wē'ñe wöbatsöke iláki wa, e' kos wák dör wöaule shkékshék ena shkitshkit ena ulaula. <sup>11</sup>Kabsuè e' a, Skéköl biyöchökawak ye' chaké ye' kiè wa tā ye' iiuté: ‘¿I?’ <sup>12</sup>Ie' ye' a iché: ‘Isaú bua'ie tā be' isueraë tö iyiwak wē'ñe wöbatsöke iláki wa, e' kos dör wöaule shkékshék ena shkitshkit ena ulaula. Ì sulu kos wamblé Labán tö be' kī, e' suéyö, e' kueki ye' tö iwé es. <sup>13</sup>Ye' dör Kéköl dë'bitü be' wörki kā kiè Betel ee e'. Ee be' tö ák du'kqat ye' dalöioie. Ee be' tö kawö me' ye' a. Be' e' kókä bet, be' e' yóotssä kā i' a. Be' yúne wé be' kune ee.”

<sup>14</sup>Eta Raquel ena Lía e'pa tö iiuté: —Kè sa' a sa' yé daliukuö tā'iā. <sup>15</sup>Nies sa' sué sa' yé tö suluë wes o'ka es. Kíe tā sa' wato'ttsaitö be' a, sa' ské klög'lítö buaë e' ewéwaitö yés. <sup>16</sup>E'ma kos Skéköl tö íyi yē'lur sa' yé ulà a, e' dör sa' icha ena sa'

ala'r icha. E' kueki ì kos ché Skéköl tö be' a e' iutó.

### Jacob e' yéttssä Padán-aram

<sup>17-18</sup>E' ukuöki tā Jacob tö ila'r ena ilakölpä e'pa ké e' tkökka kameio kī. Ie' iyiwak kos ena ie' íyi kos dë' ie' ulà a Padán-aram ikanè skéie, e' patkémiitö keweie ie' yoki. Eta ie' e' yéttssä micho iyé Isaac ska' Canaán. <sup>19</sup>Labán mía ká bánet ioveja köyök tök, e' dalewa ie' wā íyi diököl tso' dalöiè e' kos bléwami Raquel tö. <sup>20</sup>Jacob kē wā iyéne Labán a tö ie' mi'kea. Es ie' tö ikité buaë. <sup>21</sup>Ie' tkashkar. Íyi tso' ie' wā e' kos wéttssë. Bet tā ie' tkattssä dil' kiè Éufrates, e' wished. Ee tā ie' micho ká kiè Galaad e' ká kowö kī.

### Labán tö Jacob tötié

<sup>22</sup>Jacob bakshkar e' kī kā de mañat, eta Labán wā ijchenewā tö ie' bakshkar. <sup>23</sup>Eta ie' mía itökí iyamipa tā. Kā de kul tā ie' tö ikué Galaad kā kowö kī. <sup>24</sup>E' nañewe Labán kabsué tö Skéköl de ie' wörki tā ichéitö iā: “Ye' ttò ttsö. Kè be' kane ttök Jacob tā kësik wa.”

<sup>25</sup>Ie' de wé Jacob úla tulur Galaad kā kowö ki ee. Ee ie' ena iyamipa, e'pa tö iúla tulékä kapowaië ñies. <sup>26</sup>Ie' tö iché Jacob a:

—¿I' wamblé be' tö i' es? ¿Iók be' tö ye' kitö'wé i' es? Be' wā ye' alà busipa bitetser wes ñippökwakapa tö s'tsëmi es. <sup>27</sup>¿I' kueki be' ye' kitö'wé? Be' tkashkar akir ye' yoki. Be' e' biyó chópa ye' a, e'ma kawö buaë tkö'wé ye' tö a' wéttssë ttséne buaë wa, ma'ma kicha tā' ese wa



*Jacob yamipa úla tuléka kapowae. (Génesis 31.25)*

ena sabak blar buaë ese wa. <sup>28</sup>Kè be' wə kawö méne ye' a ena ye' ala'r busipa ena ye' duöchkepa e'pa a as sa! e' chòat nì a. Be' tö iwam-blé wes pë! suluë es. <sup>29</sup>Ye' wə diché tso! a' ultane tsaoie buaë, erë eniä nañewe be' yé e' Kéköl tö ye' a iché: 'Ye' ttö ttsö. Kè be' kàne ttök Jacob tə kësik wa.' <sup>30</sup>Be' mitkene be' yé u a wes be' kí ikiane taië es, etä ñlie be' tö ye' wə íyi diököl tso' dalöiè e' ekiblé?

<sup>31</sup>Eta Jacob tö iiuté:

—Ye' suane be' yöki. Ye' ibikeits dö' be' ye' yöki be' ala'r busipa yèttsane er sulu wa. <sup>32</sup>Yi wə be' íyi diököl tso' dalöiè e' tso!, e' tə as e' wák duòwa. Se' yamipa kos tso' íe se' sauk, e'pa wörki be' yú be' íyi yulök. E' kuébö, e' tə itsúmi.

Erë ie' kë wə ijcher tö Raquel tö iyé íyi diököl e' blé'wəbitu.

<sup>33</sup>Eta Labán tkawa Jacob úla a ie' íyi yulök. E' ukuökí tə ie' tkawa Lía úla a. Ñies Lía ena Raquel kanè

mésopa böl e'pa úla shuyuléitö. Erë kë ie' wə ikune. Ie' e' yéttsa Lía úla a mía Raquel úla shuyulök. <sup>34</sup>E' dalewa Raquel tö iyé íyi diököl bléwə kameio tsikkuö dikia tə ie' wák e' tkékä ibata ki, Labán tö ie' úla ultane shuyulé erë kë iwa ikune yës. <sup>35</sup>Raquel tö iché ia:

—A yéwö, kë be' ulunuk ye' ki. Ye' e' kökämi be' wörki, erë ye' duoke sik duè wa.

Labán tö ie' íyi diököl yulé taië. Erë kë ie' wə ikune. <sup>36</sup>E' kueki Jacob ulunekä taië tə ichéitö Labán a:

—¿I sulu wambléyö be' ki, e' kueki be' ye' tötié dö íe? <sup>37</sup>Be' tö ye' íyi kos e' shuyulé tə ñbe', ñkuébö? E' tulö íe se' yamipa wörki as ie'pa tö ichö tö yi ttè dör mokië, be' ö ye'. <sup>38</sup>Ye' kaneblé' be' a duas dökä dabom böyük (20), e' dalewa tə be' chibo ena be' obeja e' kos tskirke bua'buaë. Be' iyiwak bobokpa kë tkëulettsa yës. Ñies ke'

ye' wā be' obeja pupula è kataulewa.<sup>39</sup> Namu tö be' iyiwak ttewā, e' tā kē ye' wā inū dē'bitu. E' nu' pato' ye' tö be' a. Niwe ö nañewe be' iyiwak ekiblélur akblökwakpa tö, e' patauk be' tö ye' ka!.<sup>40</sup> Niwe ye' tteke kāba tö. Nañewe tā ye' tteke kāse tö. Kē ye' kapowa buaë.<sup>41</sup> Ye' kaneblē' be' a duas dabom böyök (20) eta es ye' bak weinuk kekraë. Ye' kaneblē' duas dabom eyök kī tkël (14) be' alà busipa dalermik. E' ukuöki tā ye' skà kaneblē' duas teröl be' iyiwak kueki, erë be' bak ye' kitö'uk kekraë ye' kanè ské wa.<sup>42</sup> Abraham ena ye' yé Isaac e'pa Kéköl kē kúpa ye' tā, e'ma be' ye' patkē'bitu ulà wöchka. Erë Skë-köl tö isuë tö ye' siarla, e' kaneblē' taië, e' kueki ie' tö be' wöuñé enia nañewe.

**Jacob ena Labán e'pa  
kawö mé nì a**

<sup>43</sup>Eta Labán tö Jacob iúté:

—Be' alakölpa dör ye' alà busipa. Be' ala'r dör ye' duöchkepa. Obeja kos e' dör ye' icha. I kos suébō íe, e' dör ye' icha è. ¿Wes ye' a ye' alà busipa ena ye' duöchkepa e'pa ormi?<sup>44</sup> E' kueki be' shkó. Mishka kawö muk nì a. Es se' wā ijcherdaë tö wes se' kawötä nì dalöiök.

<sup>45</sup>Ee tā Jacob tö ák duékä ek ie'pa kawö muke nì a e' wà kkachoie.<sup>46</sup> Ie' tö iché iyamipa a:  
—Ák dapa'ú íe.

Ie'pa ultane tö ák dapa'wé tā ichkérak ák dapaule e' o'mik.<sup>47</sup> Eta

Labán tö ká e' kiè mékä iwák ttò wa "Jegar Sahadutá". Nies Jacob tö ikiè mékä iwák ttò wa "Galaad."<sup>\*</sup>

<sup>48</sup>Labán tö iché:

—Iñe ák ikkë dapa'wéatsö kawö mésö nì a e' wà kkachoie.

E' kueki Jacob tö ká e' kiè mékä es.<sup>49</sup> Ká e' kine nies Mispá, wà dör tö Labán tö iché:

—Mik kē se' nì suneria, eta as Jehová tö se' saú tö wes se' nì wamblöke.<sup>50</sup> Be' tö ye' ala'r busipa we'iké ö be' senewa alakölpa kua'ki ta, e' tā e' sueraë Skéköl tö. Erë kē yi ku! e' sauk chène ye' a, erë Skë-köl wák tö isueraë.

<sup>51</sup>Eta Labán tö ikí ché Jacob a:

—Ák dur i' ena ák dapaule i' e' dapa'wéyö se' böl shushaë.<sup>52</sup> Ák dur i' ena ák dapaule i' e' dör se' böl a iwà kkachoie tö íe è se' kawötä dökwa. Kē ye' tköpami be' kker nippök be' tā. Nies kē be' tköpami ye' kker nippök ye' tā.

<sup>53</sup>Abraham dör be' duöchke ena Nahor dör ye' duöchke, e'pa Kéköl eköl è, as e' tö se' shulò.

Eta Jacob tö kawö mé mokijé Labán a Skéköl dalöieke iyé Isaac tö e' wörki.<sup>54</sup> E' ukuöki tā ie' tö iyiwak jchë ña'wé Skéköl dalöioie ee. Ie' tö iyamipa kié chkök. Ie'pa ultane chké tā ikaperö ee.

<sup>55</sup>Bule es bla'mi tā Labán tö iduöchkepa ena ila'r busipa e'pa wöalattsé e' choat ie'pa a. Ie' tö iché iarak: a' mú kawö tkö buaë kekraë. E' ukuöki tā imichone ikaska!.

\*<sup>31.47</sup> *Galaad*: Ká e' kiè dör böt erë iwà kiane chè ñies. E' dör ák dapaule kawö mène e' wa kkachoie.

Jacob tö Esaú ma'wé er bua'wé

**32** <sup>1</sup>E' ukuöki tą Jacob mir  
è wé imírō ee. Ñala kí  
Skéköl biyöchökawka de ie' ska!.  
<sup>2</sup>Mik e'pa suéítö, eta ichéítö: "I'pa  
dör Skéköl nippökawka." E' kuëki  
ie' tö ká e' kiè méka Mahanaim.\*

<sup>3</sup>Eta ie' tö ikanè mésopa patkémi  
biyò muk ie' él Esaú a tö ie' datse.  
Ie' él serke ká kiè Sefr ate Edom  
ee. <sup>4</sup>Ie' tö ichémi ikanè mésopa  
a: "A' tö ichó ye' él a; 'Be' él Jacob  
datse be' wöki be' kanè mésocio. Ie'  
tö ichébitu be' a: Duas ikkë kos  
ye' sené Labán ska!. <sup>5</sup>Ye' wá baka  
tso' ena obeja tso' ena burro tso'  
taië. Ñies kanè mésopa tso' ye' wá  
taië wëpa ena alakölp. Be' dör ye'  
kékäpa. Be' a ttè i' patkémiyö as be'  
tö ye' kiowá er bua' wa."

<sup>6</sup>Mik ibiyò wakpa dene, eta ie' a  
ichéítö:

—Sa' dare be' él ska!, e' wák datse  
bet be' shke'uk. Eta ie' wá wëpa  
datse e' tą döka cien tkéyök (400).

<sup>7</sup>Mik e' ttséítö, eta taië ie' suane.  
Taië ie' kabikeitséka wes ye' e'  
umi. E' kuëki ie' tö iyamipa ena  
ikanè mésopa ena iobeja ena ibaka  
ena ikameio e' kos blabatsélor böл  
tsiní. <sup>8</sup>Ie' ibikeitsé tö isalema ye'  
él nippömi ek tsiní tą, e' dalewa  
iék tsiní tköshkarmirak. E' kuëki  
ie' iblabatsélor es. <sup>9</sup>E' ukuöki tą  
ie' tö iché Skéköl a: "A Jehová, be'  
dör ye' talà Abraham ena ye' yé  
Isaac e'pa Kéköl. Be' ye' a iyé!: 'be'  
yúne be' yamipa ska!, eta ye' tö  
be' kimeraë as be' kawö tkò buaë."

<sup>10</sup>Be' er bua' ché ye' a. Be' kë wá  
ye' meatule bërbér è. Warma e'  
kë dör ye' siarla e' a. Ye' bakmi di'  
Jordán wı a kë wá tą!, e' kewö ska'  
ta ye' wá shko kéli è dami. Eré j'ñe  
ta ye' wöché taië iyiwakie ena se'le  
blabutsule böл tsiní. <sup>11</sup>Be' we'ikèyö,  
ye' tsatkó ye' él Esaú e' ulà a. Ye'  
suane ie' yoki dö' ie' datse nippök  
ye' tą; ñies dö' ye' alakölp ena ye'  
ala'rla e'pa kos ewëwa ie' tö. <sup>12</sup>Be'  
tö ye' a iyé'atbak yësësë tö be' tö  
ye' kimeraë as ye' kawö tkò buaë.  
Ñies be' tö iyé' tö ye' aleripa alör-  
daë taië wës dayë tséwö kë shtarta'  
es.

<sup>13</sup>E' nañewe ie' kapére ee.  
Iywak tso' ie' tą ee e' shushté ie'  
tö kakmè ie' él a. <sup>14</sup>Ikkë shushté  
ie' tö: chibo alaki döka cien böyük  
(200); chibo wë'ñe döka dabom  
böyük (20); obeja alaki döka cien  
böyük (200); obeja wë'ñe döka  
dabom böyük (20); <sup>15</sup>kameio alaki  
pane ñiköl ilà tą, ese döka dabom  
mañayök (30); baka alaki döka  
dabom tkéyök (40); baka wë'ñe  
pupula döka dabop (10); burro  
alaki döka dabom böyük (20);  
burro wë'ñe döka dabop (10). <sup>16</sup>E'  
ukuöki tą iyiwak ekkë kos tuléitö  
ikanè mésopa a iwakmik iwakmik  
ulawa ulawa tą ichéítö iarak:

—A' yú ye' yoki kewe. Ká ulat  
múat iyiwak a ulat ulat as kë  
iwoierwá ñita.

<sup>17</sup>Eta kanè mésa kewe patkémii-  
tö e' a ichéítö:

—Mik be' tö ye' él kué tą ie' tö  
be' chaké: "¿Yi be' wökir? ¿Wé be'

\* 32.2 Mahanaim: Hebreoie ká kiè e' wá kiane chè nippökawka böltëpa.

micho? ¿Sekké dör yi iyiwak?”,  
 18 eta iiutó: “A kékëpa, iyiwak i' kos  
 e' kak patké be' kanè mésos Jacob  
 tö be' a. Ie' wák datse sa' itöki.”

19 E' sù ikanè mésopa malepa  
 patkémiitö iyiwak wétsë, e'pa a  
 ichémiitö nies:

—Mik a' tö Esaú kué, eta ichó ia  
 es è. 20 Kè a' éna ichökwa chè ia:  
 “A kékëpa, be' kanè mésos Jacob e'  
 datse sa' itöki.”

Ie' tö ibikeitsé: “Iywak  
 patkémiyö keweie ye' él a e' dör  
 as ie' er buarne ye' ki. E' ukuöki  
 ta ye' wák tö isuëmi. Es ie' tö ye'  
 kiëwamí er bua' wa.” 21 Es iyiwak  
 kak patkémiitö keweie ie' yoki. Eré  
 ie' wák e' tséat kapökrö ie' úla a.

### Jacob nippé kapa wa Skéköl ta

22-23 E' nañnewe Jacob e' kéka. Ie'  
 tö ilakölpä ból ena e'pa kanè mésopa  
 ból ena ila'r dökä dabom eyök ki  
 eköl e'pa kos dapa'wéítö ta iuyöksa  
 ké di' Jaboc wishet nies i' kos tso'  
 iwa ekké uyéttasaitö. 24 Ie' e' tséat  
 eköl. Ee' ta wém de eköl ie' ska' ta  
 ie'pa nippé kapa wa dareré dò ká  
 ñine eta. 25 Eré wém e' tö isué tö kè  
 ie' e' alòpaka Jacob ki. E' kueki ie'  
 tö itewa itu' wöiérkewa e' ki ta itu'  
 wöyénettsa. 26 Etá wém ñe' tö iché  
 ie' a:

—Ká ñirkewatke e' kueki ye' ówa.

Ie' tö iiuté:

—Kè be' tö ye' a kawö bua' mè,  
 eta kè ye' tö be' epamine.

27 Wém tö ie' a ichaké:

—¿Ima be' kiè?

Ie' tö iiuté:

—Ye' kiè Jacob.

28 Wém tö iché ia:

—Kè be' kièja Jacob. Be' kirdaë  
 Israel.\* Be' nippé Skéköl ta ñies  
 s'ditsö ta etá ñ kiane be' ki e' de be'  
 ulà a, e' kueki be' kiè mékayö es.

29 Jacob tö ie' a ichaké:

—Ichó ña, ¿ima be' kiè?

Ie' iiuté:

—¿Iök be' ki ye' kiè kiane  
 jchenuk?

Ee' ta wém ñe' er bua' ché ie' a.  
 30 Ie' tö ká e' kiè mékä Penuel.\*

Ie' tö iché: “Eré ye' tö Skéköl wák  
 suéwa ye' wöbla wa, eré kè ye'  
 du'wa.” E' kueki ká e' kiè mékaitö  
 es.

31 Mik ie' tkökemitke Penuel, eta  
 diwö tskine. Eré ie' tu' wöyénettsa,  
 e' kueki ie' shkörampi shaotshaot.

32 Ie' tñewa itu'kicha ki, e' kueki  
 dò ikké ta ie' aleripa kos kè tö  
 iyiwak tu'kicha kateta!.

### Esaú er buanene Jacob ki

**33** <sup>1</sup>Mik Jacob tö isué tö ie'  
 el datse ena wëpa taije  
 datse ie' wä dökä cien tkéyök (400),  
 eta ie' tö ila'rла blabatsé. E'pa  
 méitö Lía a ena Raquel a ena e'pa  
 kanè mésopa ból a. <sup>2</sup>Kanè mésopa  
 ból e'pa patkémiitö keweie ila'r  
 ta. E' ukuöki ta ie' tö Lía ena ila'r  
 patkémi. Bata ekké Raquel ena ilà  
 José e'pa patkémiitö. <sup>3</sup>Etá ie' wák  
 tkami kewe ie'pa yoki. Ie' mirwa  
 ie' él wörki e' dalewa ie' wöémi  
 dò iski es iwöömir dökä kuktöki-

\*32.28 *Israel*: Hebreoie s'kiè e' wà kiane chè nippé Skéköl ta.

\*32.30 *Penuel*: Hebreoie ká kiè e' wà kiane chè Skéköl wö.

cha (7 veces). Es ie' demi tsinet iël wörki. <sup>4</sup>Eta Esaú tunebitu ie' wöki, ta ipaklö'wéwaítö ikuli' a ta iwöa-lattsítö ta iérak ñita. <sup>5</sup>E' ukuöki ta Esaú tö Jacob alakölpa ena ila'rла e'pa sué ta ichakítö ia:

—¿Wíkköpa dör yi?

Jacob tö iiuté:

—A kékëpa, Skéköl tö ala'rла wíkköpa mé ye' a.

<sup>6</sup>Eta ilakölpa kanè mésopa e'pa de ila'rlae ta iwö éwarak dò iški. <sup>7</sup>E' ukuöki ta Lía de ila'rë ta ie'pa wöéwa iški ñies. Bata ekké ta Raquel de ilà José ta eta ie'pa wöéwa dò iški ñies. <sup>8</sup>E' bet ta Esaú tö ie' a ichaké:

—Iyiwak kuéyö ñala kí ulawa ulawa ñie e' dör?

Ie' iiuté:

—E' dör as be' er buarne ye' ki.

<sup>9</sup>Esaú tö iiuté:

—Au, kë be' tkinuk ye' ki. Ye' wa itso' taië. E' tsúat be' wák tö.

<sup>10</sup>Erë Jacob tö iskà ché ia:

—Au, kë be' tö ye' ttè watöktsa. Be' er buanene ye' ki e' ta íyí kakmekeyö be' a e' klö'ú. Be' tö ye' kiéwá buaë. Be' suéneyö e' dör buaë ye' a wës Skéköl wák suéyö es. <sup>11</sup>Taië Skéköl tö ye' blu'wé. Kë i kianeia ye' ki. E' kueki ye' be' pablë tö íyí kakmeyö be' a e' tsú ye' ulà a.

Jacob tö iyiwak watké ia taië, e' kképa iël Esaú tö iyiwak tsé iulà a.

<sup>12</sup>Esaú tö iché ia:

—E'ma mishka ñita. Ye' mi'ke kewe.

<sup>13</sup>Erë Jacob tö iiuté:

—A kékëpa. Be' wä ijcher bua' tö ye' ala'r iä tsitsirla. Nies obeja ena baka tso' alàë e' bikeitséyö dö' ishtrirwa ta iduölurmí sekka ká etkéme. <sup>14</sup>Ye' a ta buaë idir tö be' yu'tke kewe, eta wë' ye' do be' itöki enaena wës ye' iyiwak ena ye' ala'rla shkömir es. Es ye' mir ie'pa ta dò be' sérke Seír ee.

<sup>15</sup>Eta Esaú tö iiuté:

—E'ma buaë idir. Käwö mú ña ye' kanè mésopa welepa mukat be' a be' kimoie.

Erë Jacob tö iiuté:

—Au, ciók be' e' we'ikö ye' wa ekké chökle?

<sup>16</sup>E' è diwö ta Esaú míane Seír iyamipa ta. <sup>17</sup>Erë Jacob mía ká kiè Sucot' ee. Ee ie' u yué iwák a. Nies iyiwak wé chali'wéitö. E' kueki ká e' kiè mékaitö Sucot.

<sup>18</sup>Es Jacob manétat Padán-aram dò Canaán. Ie' dettsä buaë. Ie' sené ká kiè Siquem, e' wösha. <sup>19</sup>Wé ie' tö ká yué e' tuéettsä ie' tö. E' ské dör inuköl wömulé dökä cien eyök (100). Hamor dör Siquem yé, e' ala'r tö ká watué Jacob a. <sup>20</sup>Ká e' a Jacob tö ák kataté et ká'ie iyiwak jchoie Skéköl dalöioie. E' kiè mékaitö El-elohé-israel.\*

### Dina dalösewéwá Siquem tö

**34**

<sup>1</sup>Jacob alà busi Lía ta kiè Dina, ká et ta e' mía ká e' wakpa busipa pakök. <sup>2</sup>Eta Hamor e' dör heveowak e' dör ká e' wökir, e' aladulaköl kiè Siquem e' tö Dina

\* **33.17** *Sucot*: Hebreoie ká kiè e' wà kiane chè u yöule chalichali.

\* **33.20** *El-elohé-Israel*: Hebreoie kiè e' wà kiane chè Israel Kéköl diché ta' taië.

sué. Etá ie' tö iklö'wéwa tā isenéka itā kësik wa. <sup>3</sup>Erë ie' wöbatse Dina wa taiē tā ipabléitö taiē. <sup>4</sup>Etá ie' tö iché iyé a:

—A yéwö, be' yú këkëpa Jacob ska' ilà busi kiöktsa ye' a as ye' serwā ie' tā.

<sup>5</sup>Ì sulu wamblé Siquem tö Dina tā e' jchenewā Jacob wa. Erë ie' aladulakölpa tso' kañikä iyiwak kanéuk, e' kuékī ie' kë wā iyène ie'pa a. <sup>6</sup>E' dalewa Hamor dör Siquem yé e' mía Jacob ska' ttök ie' tā.

<sup>7</sup>Mik Jacob aladulakölpa dene u a, etá ì wambléne Dina tā e' jchenewā ie'pa wā. E' tö ie'pa uluwéka taiē. Siquem senéka Jacob alà busi tā e' dör íyi suluë Israel aleripa a. E' kë kawö tā' wamblé es. <sup>8</sup>Erë Hamor tté ie'pa tā, tā ichéítö ia:

—Ye' aladulaköl Siquem, e' wöbatse taiē a' kutà wa. A' we'ikèyö kawö mú ie' a senukwā ie' tā. <sup>9</sup>Es a' yörmi sa' yamipai. Es sa' serwami a' alà busipa tā. Nies a' serwami sa' alà busipa tā. <sup>10</sup>A' e' tsúat senuk sa' shua. A' senú sa' ká a wé a' kí ikiane ee. A' tö íyi wataú ena íyi taú. A' tö ká taú. Kë yi tö a' wöklö'wepa.

<sup>11</sup>Nies Siquem tté Dina yé tā ena ikëpa tā, etá ichéítö ia:

—Ye' a' pablè tö ye' tté klö'ú. Ye' tö a' a íyi kakmeraë kos a' kí ikiane ekké. <sup>12</sup>Kos iské\* dör e' tsata a' tö ye' a ikí kié, e' tā ekké meraëyö a' a. E' kë kí ye' tkine. Ye' tö íyi meraë taiē a' a, erë kawö mú ye' a senukwā be' kutà tā.

<sup>13</sup>Erë Siquem tö ie'pa kutà dalösewéwa, e' kuékī ie'pa tö ie' ena iyé iuté kachè wa. <sup>14</sup>Ie'pa tö iché ia:

—Kë sa' a sa' kutà menuk wëpa kë tottola kkuölitla tēule tsir, esepa a. E' dör suluë sa' a jaë taiē. <sup>15</sup>Es è sa' tö a' iutèmi. A' wëpa kos tottola kkuölit tée tsir wes sa' es, e' tā sa' tö a' ttò iutèmi. <sup>16</sup>Es a' serwami sa' alà busipa tā. Nies sa' serwami a' alà busipa tā. Es sa' sermi a' tā ñita wes ká etkë wakpa es. <sup>17</sup>Erë kë a' wā a' tottola kkuölitla tēne wes sa' tö iché a' a es, e' tā sa' míyalne ká i' kí. Sa' kutà mítserne sa' wā.

<sup>18</sup>Etá Hamor ena ilà Siquem e'pa a imène buaë. <sup>19</sup>Taiē duladula e' kí Jacob alà busi kiane, e' kuékī bet iwéítö wes ie'pa tö iché es. Ie' dalò taiē iyé ska' imalepa tsata. <sup>20</sup>E' kuékī ie' mía iyé tā ká kköi-éule e' wékkö a. Ee ká e' wakpa ñi dapa'uke ttè shulioie. Ee Siquem ena iyé mía ttök iká wakpa tā. Ta ichéítö iarak:

<sup>21</sup>—Pë' debitü íe er buaë se' tā. Ie'pa de senuk se' tā, íyi tauk ena íyi watauk se' shua. Ká tso' wë' ie'pa a. Se' serwami ie'pa alà busipa tā. Nies ie'pa serwami se' ichapa tā. <sup>22</sup>Etá as se' dò ká etkë wakpaie ie'pa tā ñita, etá s'kawötä iuk wes ie'pa tö iché es. Ie'pa tö iché tö se' wëpa ultane kawötä itóttola kkuölitla tök tsir wes ie'pa wöblane iuk es. <sup>23</sup>Etá kos ie'pa wā iyiwak tso', i tso' e' döraë se' icha. Sö ichò ie'pa a tö. Etá es ie'pa e' tsukeat senuk se' shua.

\* 34.12 iské: E' kewö ska' tā ie'pa wöblar tö ilà busipa watueke inuaki a.

<sup>24</sup>Eta wëpa tso' ká e' ki kibinetke, e'pa ultane a buaë idir. Eta ie'pa kos tottola kkuölitla télor tsir.

<sup>25</sup>E' ukuökí bökkí es ta mik e' dalérkeia taië kë wa ie'pa e' tsatkér, eta Jacob aladulakölpa dör Dina akëpa kiè Simeón ena Leví, e'pa míyal Siquem, eta ká e' wakpa wëpa télurdakítö sera tabè wa. <sup>26</sup>Es ie'pa tö Hamor ena ilà Siquem e'pa ttewa tabè wa. Ie'pa tö ikutà yétsa Siquem u a ta imiyal. <sup>27</sup>Ká e' wëpa ttelur sera. E' ukuökí ta Jacob aladulakölpa malepa debitü ta íyi kos tso' ká e' ki e' tsémirakitö. <sup>28</sup>Es ie'pa wä obeja ena baka ena burro ena íyi kos tso' ká kköiëulewa e' a, nies i kos tso' kañika e' mítser. <sup>29</sup>Nies íyi tso' kos u a, e' mítser ie'pa wä sera. Ala'rla kos ena alakölpa kos e'pa klö'wélur ie'pa tö ie'pa kanè mésopae. <sup>30</sup>Eta Jacob tö iché Simeón ena Leví a:

—A' tö se' tsaié. A' kueki ká i' wakpa e' dör canaánwak ena feresowak e'pa ulurdaë se' ki taié. Ie'pa ñì dapa'uraë ñippök se' ta. Kè se' wä ñippökawakpa ta' taié, e' kueki ie'pa e' alöraká se' ki. Ye' ena ye' yamipa kos ttelurdaë ie'pa tö.

<sup>31</sup>Eré ie'pa tö iiuté:

—¿Ima ie'pa erbikò tö ie'pa wä sa' kutà mi'lmitser wes alakölpa sulusi es?

Skéköl er buaë ché  
Jacob a Betel

**35** <sup>1</sup>E' ukuökí ta Skéköl tö iché Jacob a: "Be' yú

senuk Betel. Ee ák katató ka'ie ye' dör be' Kéköl e' kkayé' be' a mik be' bakshkar Esaú yoki eta, e' dalöioie." <sup>2</sup>Eta Jacob tö iché iyamipa a ena kos itso'rak ie' ta, e'pa a nies:

—Íyi diököl tso' a' wa dalöiè, ese kos tulóttsa bet. A' kuó tå a' datsil mane'úlor. <sup>3</sup>Mishkarak bet Betel. Ee ye' tö ák katateke et ka'ie iyiwak jchoie Skéköl dalöioie. Ie' tö ye' ki'mik ye' bak erianuk taié eta. Ie' tö ye' kköna' kos ye' káka're ekké.

<sup>4</sup>E' bet ta íyi diököl tso' ie'pa wa dalöiè ese tulérakitö Jacob a. Nies ikukuöio kos, e' tulérakitö Jacob a. E' kos wötéluritö kós klò ter tsinet Siquem e' dikia. <sup>5</sup>Eta ie'pa e' yélur. Eré ká tso' tsinet tsinet e' wakpa kos suawékä tajé Skéköl tö, e' kueki e'pa kë wä ie'pa töiène.

<sup>6</sup>Eta Jacob ena iyamipa kos demi ká kiè Luz até Canaán. Ká e' kiè nies Betel. <sup>7</sup>Eta ee ák katatéitö et ka'ie iyiwak jchoie Skéköl dalöioie. Ee Skéköl e' kkayé' ie' a mik ie' bakshkar iël yoki eta. E' kueki ák katatéitö e' kiè mékaitö El-Betel.\*

<sup>8</sup>E' ukuökí ta ká e' a Rebeca kkö'nukwak bak kiè Débora, e' blénewa ta inú bléwárakitö kós klò ter ee e' dikia. Kal e' ter ká kiè Betel e' o'mik. Jacob tö ká e' kiè méka "Iè kéli".

<sup>9-10</sup>Mik Jacob biteane Padánaram dene Canaán, eta Skéköl e' kkachéne etökichane ie' a. Etá Skéköl er buaë ché ie' a i' es:

"Be' kiè Jacob,

\* 35.7 *El-Betel*: Hebreoie kiè e' wä kiane chè *Skéköl tso' Betel*.

erë be' kë kièiq̄ es.  
Iññe t̄a be' kiè mékayö Israel."

Skéköl tö ie' kiè mane'wéttsa,  
11 e' ukuök̄i t̄a ichéitö ia:

"Ye' dör Skéköl Diché Ta' Íyi  
Ulitane Tsata e';  
Be' ala'r ena be' aleripa alönú  
taij̄.  
Be' aleripa alördäë taij̄,  
e'pa döraë ká taij̄ wakpiae.  
Ñies ie'pa shuq̄ blu'pa döraë.  
12 Ká me'bakyö Abraham a ena  
Isaac a,  
e' méyö be' a ñies be' aleripa  
a."

13 Mik Skéköl tté one Jacob t̄a, t̄a  
imía. 14 Ee Jacob ák duék̄ ek së sù.  
Ák e' kí ie' tö kiò ena vino té iwà  
kkachoie tö e' dör batse'r Skéköl a.  
15 Ká e' kiè mékaitö Betel.

### Raquel blénewa

16 E' ukuök̄i t̄a ie'pa e' yélur  
Betel míyal Efrata. Kám ie'pa dòmi  
Efrata e' tso'ia elkeë, eta Raquel  
alà kurketke e' diwö de. E' tö  
Raquel kiri'wéw̄a taij̄ erë kë iwà  
kur yës. 17 Ie' tso'tke suluë ichók  
eta ikkö'nukwak dur ee, e' tö iché  
ia: "Ké be' suanuk. Be' alà kune.  
E' wák dör wém." 18 Etä Raquel  
wake' duökewatke, isiwá' bata  
tkökeia, e' shuq̄ ilà kiè mékäatitö  
Ben-oní. \* Erë ilà yé tö ikiè mane'wé  
Benjamín.\*

19 Es Raquel blénewa. Inú wöté-  
wärakítö Efrata ñalé kí. Iññe t̄a ká  
e' kiè Belén. 20 Etä wé Raquel nu  
bléwāitö e' kí ák duék̄ ek Jacob  
tö iwà kkachoie. Iññe t̄a ák e' tkériä  
Raquel pö kkachoie.

21 Etä Israel \* michoë wé imi'kerö  
ee. Ie' e' tséat senuk ká kiè Mig-  
dal Éder e' wishke. 22 Ie' tö ká yué  
senoie ee, e' ukuök̄i t̄a ilà Rubén  
senéka ie' alaköl kiè Bilhá e' t̄a, e'  
jchenewa ie' wa.

### Jacob aladulakölp̄a

Jacob aladulakölp̄a döka dabom  
eyök kí böl (12). 23 Ie' ala'r Lía t̄a e'pa  
dör Rubén, e' dör ikibi, ñies Simeón,  
Leví, Judá, Isacar ena Zabulón.

24 Ilal' Raquel ta e'pa dör José ena  
Benjamín. 25 Raquel kanè méso kiè  
Bilhá, e' t̄a ilal' dör Dan ena Neftalí.  
26 Lía kanè méso kiè Zilpá, e' t̄a ilal'  
dör Gad ena Aser. E'pa dör Jacob ala-  
dulakölp̄a kune Padán-aram e'pa.

### Isaac blénewa

27 Jacob minea iyé Isaac sauk ká  
kiè Mamré ee. Ká e' kiè ñies Arbá  
ö Hebrón. Ká e' a Abraham ena  
Isaac bak senuk. 28-29 Isaac kène-  
watk̄e. Mik ie' kí duas tso' cien  
eyök kí dabom paryök (180), eta  
iblénewa mía idëutöpa itök̄i. Ilal'  
Esaú ena Jacob e'pa tö inú wötéwa.

### Esaú aleripa

**36** 1 I'pa dör Esaú aleripa.  
Esaú kiè ñies Edom. 2 Esaú

\* 35.18 Benoni: Hebreoie s'kiè e' wà kiane chè ye' eriane e' alé.

\* 35.18 Benjamín: Hebreoie s'kiè e' wà kiane chè ye' ulà buakka e' alé.

\* 35.21 Israel: E' dör Jacob kiè pa'alí me'ká Skéköl tö iki e'!

senéwá canaánwak alakölpa mañal tā. Eköl dör Adá, e' dör hititawak kiè Elón, e' alà busi. Iéköl kiè Oholibamá, e' dör Aná alà busi ena heveowak eköl kiè Sibón, e' talà. <sup>3</sup>Bata ēk kiè Basemat, e' dör Ismael alà busi ena Nebaiot kutà. <sup>4</sup>Adá alà tsá kune e' kiè Elifaz. Basemat alà kiè Reuel. <sup>5</sup>Oholibamá ala'r kune mañal. E'pa kiè dör Jeús, Jaalam ena Coré. E'pa dör Esaú ala'r kune mik ie' bak senuk Canaán eta e'pa.

<sup>6</sup>Esaú wā ilakölpa ena ila'r wëpa ena ila'r busipa ena imalepa kos serke ie' ska' e'pa kos míyal ie' wa e' ta senuk ká bánet iél Jacob e' yoki. Ñies ie' wā iyiwak kos ena i kos dēl ie' ulà a Canaán, e' mítser sera. <sup>7</sup>Esaú ena Jacob wa íyi tso' tai. E' kueki ie'pa kē ché'kaija ñita. Kè i ku'iā wēl ie'pa ból iyiwak a katè. <sup>8</sup>E' kueki Esaú (e' kiè ñies Edom) e' mía senuk Seír kébata a.

<sup>9</sup>I' dör Esaú aleripa bak senuk Seír kē kowö ki, e'pa kiè edomwak. <sup>10</sup>I'pa dör Esaú ala'r: Elifaz e' dör Esaú alà Adá tā, ena Reuel e' dör Esaú alà Basemat tā.

<sup>11</sup>Elifaz ala'r dör Temán, Omar, Sefó, Gatam ena Quenaz. <sup>12</sup>Elifaz alaköl skà bak eköl kiè Timná, e' tā ilà tā' eköl kiè Amalec. E'pa dör Esaú alaköl kiè Adá e' uyökpa.

<sup>13</sup>Reuel ala'r dör Náhat, Zérah, Samá ena Mizá. E'pa dör Esaú ala-köl kiè Basemat e' uyökpa.

<sup>14</sup>Esaú alaköl kiè Oholibamá, e' dör Aná alà busi ena Sibón talà. Ie' ala'r dör Jeús, Jaalam ena Coré.

<sup>15</sup>I'pa dör Esaú aleripa e'pa ditsé-wöpa wökirpa:

Esaú alà kibi kiè Elifaz e' aleripa dör: Temán, Omar, Sefó, Quenaz,

<sup>16</sup>Coré, Gatam ena Amalec. E'pa dör Elifaz aleripa e'pa ditséwöpa wökirpa bak senuk Edom. Ie'pa dör Adá uyökpa.

<sup>17</sup>Esaú alà kiè Reuel e' ala'r dör: Náhat, Zérah, Samá ena Mizá. E'pa dör Reuel ditséwöpa wökirpa bak senuk Edom. Ie'pa dör Basemat uyökpa.

<sup>18</sup>Esaú alaköl kiè Oholibamá e' dör Aná alà busi. Ie' ala'r dör: Jeús, Jaalam ena Coré. E'pa dör Oholibamá ditséwöpa wökirpa.

<sup>19</sup>E'pa kos dör Esaú (kiè ñies Edom) e' aleripa. E'pa dör ie'pa ditséwöpa wökirpa.

<sup>20</sup>I'pa dör wém dör horeowak eköl kiè Seír, e' ala'r. Ie'pa bak senuk Edom ñies. Ie'pa kiè dör: Lotán, Sobal, Sibón, Aná, <sup>21</sup>Disón, Éser, ena Disán. E'pa dör Seír ala'r wëpa. Ie'pa dör horeowak wökirpa bak senuk Edom. <sup>22</sup>Lotán ala'r dör Horí ena Hemam. Lotán kutà dör Timná. <sup>23</sup>Sobal ala'r dör Alván, Manáhat, Ebal, Sefó ena Onam.

<sup>24</sup>Sibón ala'r dör Aiá ena Aná. Ká e' tā Aná tso' iyé kiè Sibón e' burro kkö'nuk e' dalewa ie' tō di' tum kué tai. Ká sí po e' a. <sup>25</sup>Aná alà wém kiè Disón. Ie' alà busi kiè Oholibamá. <sup>26</sup>Disón ala'r dör Hemdán, Esbán, Itrán ena Querán. <sup>27</sup>Éser ala'r dör Bilhán, Zaaván, ena Acán. <sup>28</sup>Disán ala'r dör Us ena Arán.

<sup>29</sup>Horeowak wökirpa dör Lotán, Sobal, Sibón, Aná, <sup>30</sup>Disón, Éser, ena Disán. E'pa dör horeowak wökirpa iyamipa wa. Ie'pa bak senuk Seír.

<sup>31</sup>I'pa dör Edom blu'pa, kám Israel aleripa blúpa dò e' yoki.

<sup>32</sup>Bela, e' dör Beor alà, e' de Edom wakpa blúie. Ie' ká kiè Dinhaba. <sup>33</sup>Bela blénewa e' skéie Jobab yönë blu'ie. Ie' dör Zerah alà. Ie' datse Bosrá. <sup>34</sup>Jobab blénewa e' skéie Husam datse Temán e' yönë blu'ie. <sup>35</sup>Husam blénewa e' skéie Hadad dör Bedad alà e' yönë blu'ie. Bedad e' ali'ka Madián wakpa kí ká kiè Moab ee. Husam ká kiè Avit. <sup>36</sup>Hadad blénewa, e' skéie Samlá yönë blu'ie. Ie' ká kiè Masrecá. <sup>37</sup>Samlá blénewa, e' skéie Saúl yönë blu'ie. Ie' ká dör Rehobot. Ká e' ate di' kkò a tsinet. <sup>38</sup>Saúl blénewa, e' skéie Baal-hanán yönë blu'ie. Ie' dör Acbor alà. <sup>39</sup>Baal-hanán blénewa, e' skéie Hadad yönë blu'ie. Ie' ká kiè Pau. Ie' alaköl kiè Mehetabel, e' dör Matred alà busi ena Mezaab talà.

<sup>40</sup>I'pa dör Esaú aleripa kiè iyamipa wa ñies iká wa: Timná, Alvá, Jetet, <sup>41</sup>Oholibamá, Elá, Pinón, <sup>42</sup>Quenaz, Temán, Mibsar, <sup>43</sup>Magdiel ena Iram. Esaú kiè ñies Edom. E'pa kos dör Edom ká blu'pa wé isenerak iká kí ee.

**37** <sup>1</sup>Jacob e' tséat senuk Canaán wé iyé bak senuk ee. <sup>2</sup>Ttè i' dör Jacob aleripa e' pakè.

### José ena iélpa

Jacob alà kiè José, mik e' ki duas tso' dabom eyök kí kul (17) eta ie' tso' iyé obeja kkö'nuk iélpa tā. Iélpa dör iyé alakölpa kiè Bilhá ena Zilpá, e'pa ala'r. Etā ì sulu kos wambleke iélpa tö ie' wöwa, ese kkateke seraq ie' tö iyé a.

<sup>3</sup>Ie' kune mik iyé Jacob këne-watke eta. E' kuékí Jacob kí ie' kiar

ila'r malepa tsata. E' kuékí Jacob tö datsi' yué ie' a kitkëule buaë. <sup>4</sup>Erë mik ie' élpa wá ijchenewa tö ie'pa yé kí ie' kiar ie'pa ultane tsata eta ie'pa éna iar suluë, kë ishke'weta!

—Ká et tā ie' kabsué e' pakéito iélpa a. E' kuékí ie'pa éna suluë ie' kí aña. <sup>6</sup>Ie' tó ikabsuè paké iélpa a i' es:

—Ye' ttò ttsó. Ye' kabsué e' pakekeyö a' a. <sup>7</sup>Ye' kabsué tö se' ultane tso' kaneblök kañika dalli shua. Se' tso' dalli wöshtök e' tsatésö ettsák ettsák. Ye' tö isué tö bet ye' icha e' duéka bua' shké'ka. A' ichapa e' dapa'wé ye' icha pamik shkit tā e'pa tö ye' icha dalöié.

<sup>8</sup>Etā iélpa tö iiuté:

—¿Be' éna iwà chak tö be' döraë sa' blúie? ¿Sa' serdaë be' dikia?

Ie' kabsué ena wés ipakéito ie'pa a, e' kuékí ie'pa éna suluë ie' kí aña.

<sup>9</sup>E' ukuöki tā ie' skà kabsuéne, e' pakéito iélpa a ñies. Ie' tö iché ie'pa a:

—Ye' kabsué tö diwö ena si'wö ñies békwo dökä dabom eyök kí et (11), e' kos tö ye' dalöieke.

<sup>10</sup>Mik ie' tö ikabsué e' paké iyé a ena iélpa a, eta iyé tö iuñé:

—¿I kiane chè be' kí kabsuè e' wa? Ttséskua be' mì ena be' élpa ena ye', sa' kawötä be' dalöök.

<sup>11</sup>Ie' élpa éna iar suluë. Erë iyé tö ibikeitsé taijé: ¿I kébisué José tö es?

### José watuéttsa iélpa tö

<sup>12</sup>Ká et tā José élpa míyal dò Siquem iyé iyiwak wëttsë kakö yulök. <sup>13</sup>Etā Jacob tö iché José a:

—Be' ēlpa tso' tsinet Siquem iyiwak kkö'nuk. Ye' ki ikiāne tö be' yú isauk.

Eta José tö iiuté:

—E' buaë. Ye' mí isaukrak.

<sup>14</sup>Jacob tö iiuté:

—Ēkékë. Be' yú be' ēlpa sauk, is itso'rak, is iyiwak tso' ñies. E' wa be' wá ye' a itté dömine.

Eta Jacob tö ie' patkémi. Ie' e' yéttsa Hebrón kē kkue ki mía Siquem. <sup>15</sup>Ee' ie' shködur chò kañikä, e' kuéwa wém eköl tö ta' e' tö ie' a ichaké:

—¿L yulök be' tso'?

<sup>16</sup>Ie' tö iiuté:

—Ye' tso' ye' ēlpa yulök. ¿Be' kē wá ijcher wé ie'pa tso' ye' yé iyiwak kkö'nuk?

<sup>17</sup>Wém e' tö iiuté:

Ie'pa kē kū'ia íe. Ie'pa mineyalbak. Ye' ittò ttsérak tö ie'pa mi'keä Dotán.

Eta ie' mía ielpa yulök. Eta ie'pa kuétiö Dotán. <sup>18</sup>Eta ielpa tö ie' sué kāmië tö ie' datse. Käm idò e' dalewa ielpa kawö mérak ní a ie' ttowa. <sup>19</sup>Ichérakitö ní a:

—Kabsaukwak datse. <sup>20</sup>Ittowasö. Inú batröömisö kāuk kē a di' ta' ese a. Eta ichösö tö iyiwak sulusi ie' katéwa. Es ie' kabsuë e' kē wá tköpa yés.

<sup>21</sup>Mik Rubén tö ttè e' ttsé, eta ie' éna iel tsatkak. E' kueki ie' tö iché ielpa a:

—Kè ittarwa. <sup>22</sup>Kè a' tö ie' pé tkö'uk. A' tö iómi kāuk i' a. Kè a' ulà mukka iki.

Rubén éna José tsatkak tsémíne iyé a, e' kueki ie' tö iché ie'pa a es.

<sup>23</sup>Erë mik José debitu ielpa ska', eta ie'pa tö ie' datsi' kítkéule bua', e' yéttsa. <sup>24</sup>Eta iklö'wéwarakitö

batréemi, kāuk tso' di' blóie, erë kë iwà ta' ese a.

<sup>25</sup>E'ukuökì ta ie'pa e' tuléwa chkök, e' shuá ie'pa isué tö taié Ismael aleripa datse. E'pa datse Galaad michoë Egípto dalì dami iwa e' watauk. Kameio ki ie'pa wá kiò alar buaë e' dami. Ñies kiò masmas kiè bálsamo ena mirra e' dami iwa. <sup>26</sup>Eta Judá tö iché ielpa a:

—Se' el ttewasö ta e' tté blésö, e' ta e' wa ñi buaë dömi se' ulà a?

<sup>27</sup>Ye' iché buaë idir tö iwatauttsasö Ismael aleripa a. Ie' dör se' el se' yami ekka, e' kueki kë sö ittòwa.

E' mène buaë ielpa a. <sup>28</sup>Mik íyí wataukwakpa datse Madián e'pa tkami ee, eta ie'pa tö iel yétsa kāuk a watuéttsarakitö Ismael aleripa a inuköl wömulé dökä dabom böyük (20) ské ekké. Es Ismael aleripa wá José minetser Egípto.


<sup>29</sup>Mik Rubén debitu kāuk kkö ki, eta kē iel kū'ia. E' tö ie' eriawé taié. E' kueki idatsi' jchélor. <sup>30</sup>E' ukuökì ta, ie' mía ielpa ska' ta ichéitö ie'pa a:

—Se' el tsirla kē kū!. ¿Wes ye' e' ùmi?

<sup>31</sup>Eta ie'pa tö chibola ttewa ta e' pé wa José datsi' patiékarakitö.

<sup>32</sup>Eta datsi' e' patkémitö iyé a ta ichémi ia: “Datsi' i' kué sa' tö. ñ saú bua'ie. ¿Kè idör be' alà datsi'?”

<sup>33</sup>Eta Jacob tö iché: “iTö, i' dör ye' alà datsi! Iywak sulusi wésele tö ye' alà ttewa katéwa.” <sup>34</sup>Eta Jacob tö idatsi' jchéloyar eriane kueki. Eta datsi' tso' iéno mik schönewa ese iékaítö. Eta ilà blénewa e' eriaitsítö ká taié. <sup>35</sup>Eta ila'r, wépa ena alakölp, e'pa kos de ie' pablök,



*Ismael aleripa wq dalì dami kameio kī watuè. (Génesis 37.25)*

erë kè ie' pablér yës. Ikí juke taië shute ilà dalérmik. Ie' tö iché: "Ye' schó eriaitsérae dò mik ye' duowa ekké, es ye' döraë ie' ska!"

<sup>36</sup>Eta madiánwakpa demi Egípto. Ee ie'pa tö José watuéttsa wém kiè Potifar e' a. Wém e' kaneblöke Egípto blú a. Potifar dör Egípto blú tsatkökawakpa e' wökir.

### Judá ena Tamar

**38** <sup>1</sup>E' kewö ska' ta Judá e'  
batséttss a ielpa yoki mia  
senuk wém kiè Hirá e' ska!. E' serke  
ká kiè Adulam. <sup>2</sup>Ee Judá tö alaköl  
sué eköl. E' dör wém canaánwak  
kiè Súah e' alà busi, e' ta ie' senéwa.  
<sup>3</sup>E' ukuöki ta idunek ta ilà kune  
wém, e' kiè mékaitö Er. <sup>4</sup>E' ukuö-  
ki ilà skà kune wém, e' kiè mékaitö  
Onán. <sup>5</sup>E' ukuöki ta ilà skà kune  
wém, e' kiè mékaitö Selá. E' kune  
mik ie' serke ká kiè Quezib, ee eta.

<sup>6</sup>Judá tö alaköl yulé senowaije ilà  
kibi kiè Er e' ta. E' kiè Tamar. <sup>7</sup>Eta Er  
serke suluë shute Jehová wöq. E' kueki  
Jehová tö ittéwa. <sup>8</sup>Eta Judá tö iché  
Onán a:

—Be' kawöta senukwá be' dabököt  
ta alà kòkä be' ël blenewa e' a wes se'  
wakpa a imeneatbak es.

<sup>9</sup>Onán éna iane tö ie' alà kurmi kos  
ischó tå, e' kè dör ie' wák ala'r. E' kueki  
mik ie' serke ischó tå, eta bet ta ie' e'  
skéu bánet as kè alà kòkä ischó tå. Es  
ie' kè wá iel a idtséwö meneat. <sup>10</sup>E' dör  
suluë ichók Jehová a, e' kueki ie' tö  
Onán ttéwa ñies. <sup>11</sup>Eta Judá tö iché iyàk  
Tamar a:

—Be' yú senuk be' yé u a wes  
schó es dò mik ye' alà Selá talane  
eta.

Erë Judá tso' Tamar kitö'uk. Ie'  
ibikeitsé tö Selá duowami wes  
ielpa duolur es. Es Tamar minea  
senuk iyé ska!.

<sup>12</sup>Ká de tajé tā Judá alaköl dör Súah alà busi e' blènewa. Ie' schó kewó tka tā ie' mía ká kiè Timnat, wé itso'rak ie' obeja köyök tök ee. Ie' yami kiè Hirá e' dör adulamwak, e' mí ie' tā ie' wapiöök. <sup>13-14</sup>Tamar tö isué tö Judá alà kiè Selá, e' detke këchke eré kë ie' senewa ie' tā. E' wa ie' wā ijchenewa tö Judá tö ie' kitó'wé Selá wa. E' kueki mik ie' wā ijchenewa tö inuaki mía Timnat iobeja köyök tök, eta ie' e' paiöke schóie e' mane'wétsaneitö. Iwō pabakéwa datsi'tak wa as kë yi a iwérwa. Eta imía ká kiè Enaim. Ee ie' e' tkéser Timnat ñalé kkò a.

<sup>15</sup>Mik Judá tö Tamar sué tā ie' ibikeitsé tö e' dör alaköl sulusi iwō pabakéwa e' kueki. <sup>16</sup>Eta ie' mía iwöki. Kë ie' wā ieri ta' tö e' dör ie' yák. Eta ichéitö ia:

—¿Se' ser ñita?

Eta Tamar tö iché ia:

—¿I meke be' tö ye' a iskéie?

<sup>17</sup>Eta Judá tö iiuté:

—Ye' chibo patköke be' a etö iskéie.

Ie' iiuté:

—Ékéké. Eré be' íyi tsá múat ye' a dò mik be' tö chibola patké eta.

<sup>18</sup>Judá tö ie' a ichaké:

—¿I kiane be' kí tö ye' iméat be' a?

Eta ie' tö iiuté:

—Be' tabechka tso' e' kiè shtoie, e' múat ye' a ikichaë. Nies be' shko kéli múat ye' a.

Judá tö imé ia ta ie' sené ie' tā. Eta alaköl duneka. <sup>19</sup>E' ukuöki tā Tamar mía iu a eta idatsi'tak wa iwō pabakéwa e' yétsaitö. Eta ie' e' paiéne schó es.

<sup>20</sup>E' ukuöki tā Judá tö chibo patkémi iyami adulamwak e' ulà a as ie' tö imù alaköl a as alaköl e' tö ie' íyi méat alaköl ulà a e' mùbitüne. Eré ie' yami kë wā alaköl e' kuneia. <sup>21</sup>Eta ie' tö ká e' wakpa a ichaké:

—Alaköl sulusi e' dör enaimwak atéat ñala ska', ¿wé e'?

Eta ie'pa tö iiuté:

—Íe alakölpa sulusi kë dë'.

<sup>22</sup>Eta ie' biteane Judá wörki tā ichéitö ia:

—Kë ye' wā alaköl kune. Ye' tö ichaké ká e' wakpa a. Ie'pa tö ye' a iché: ‘Íe alakölpa sulusi kë dë’.

<sup>23</sup>Judá tö iiuté:

—As ye' íyi tsúatitö es kë yi tö sa' jaewepa. Kë ye' iane iwiie. Ye' tö ichibo patkémi be' ulà a, eré kë be' wā alaköl kune.

<sup>24</sup>Eta si' mañat ulatök tā Judá kí biyò dö tö:

—Be' yák Tamar e' sené wépa kua'kí tā. Ie' duneka.

Eta Judá tö iché aaneule:

—Íyóttsa tā iña'íwa!

<sup>25</sup>Eré mik ie' yekettsa ie'pa tö ttewa, e' wösha ie' ttè mémi inuaki a: “Yi íyi a'tser ye' ulà a i', e' wák tö ye' duéka. Be' isaú. ¿Yi kiè shto tabechka i' ikichaë ena shko kéli i'? ¿e' sçule be' wā?” <sup>26</sup>Mik Judá tö ie' íyi suéwa iyàk ulà a tā ichéitö: “Alaköl i' dör buaë. Kë ye' wā iulabatse ye' alà Selá tā. Ye' e' wamble sulu ie' kí.” Eta kë ie' seneia ie' tā.

<sup>27</sup>Tamar alà kune klò wák dör wépa. <sup>28</sup>Itsörke e' wösha, eta eköl ulà dettsa kewe. Eta ie' kkö'nukwak tö datsi'kicha batsë e' muéwa ilà ulà mik tā ichéitö: “I' ék

kune kewe.” 29 Erë e' wöshaë bet tą alà ulà tiéwane etökichane eta iék kune keweie. Eta ikköl'nukwak tö iché ia: “¿Wes be' kune keweie?” E' kueki ikiè mékaitö Fares.\* 30 E' ukuöki tą, iulà a datsi'kicha tkér batsë e' kune, e' kiè mékaitö Zérah.

**José tkashkar Potifar  
alaköl ulà a**

**39** 1 José minetserak iwa Egipto. Ká e' kí wém tso' eköl kiè Potifar, e' tö ie' tuéttsa Ismael aleripa a. Wém e' kaneblöke Egipto blú a. Ie' dör Egipto blú tsatkökawakpa wökir. 2 Erë Jehová tso! José tą, e' kueki i kos kanewékeitö e' dökettsa buaë iwökir egyptowak e' ska!. 3 Iwökir tö isué tö Jehová tso! José tą, e' kueki i kos kanewékeitö e' dökettsa buaë. 4 E' kueki iwökir kí ikiarke taijë. Ie' tö imékä ie' wák kímukwakie. Nies imékaitö ie' íyi kos e' kuebluie. Ie' wá íyi kos tso' e' kkö'nekeitö. 5 Mik Potifar tö ie' mékä ífyi kos kuebluie, eta Jehová er buaë chémi Potifar a. Ie' íyi kos tso' iu a ena kañikä e' kos mir buaë. 6 José tö Potifar íyi ultane kkö'neke buaë. E' kueki Potifar kë wöki i wéneia yés. ñak ie' éna e' è bikeitsebeitö.

José wák dör bua'blukä. 7 Ká de iki taijë eta iwökir alaköl wöbatseka iwa. Ká et tą ie' iché ia:

—Be' senúka ye' tą.

8 Erë José kë wá ie' ttè iutene tą ichéitö ia:

—Ye' ttò ttsó. Ye' wökir íyi ultane méat ye' ulà a sunoie. Ye' tso' íe,

e' ta kë ie' tkine ie' íyi kos ki. 9 Ye' tso' ie' u kueblu kibii. Ye' wökir kë wá i kkéone ye' ki. Be' è kë meneat iwa ye' a be' dör ie' alaköl e' kueki. ¿Wes ye' tö i sulu i' wamblèmi be' ta? ¿Wes ye' tö i sulu wamblèmi Skéköl ki?

10 Kekraë alaköl tö ie' a icheke: “Be' senú ye' ta.” Erë ie' kë tö iuteta' yés. Ie' tö iulawaté kekraë. 11 Ká et tą ie' tkawa weshke íyi kanéuk eta iwökir alaköl e' è tkér. 12 Etä iwökir alaköl tö ie' klö'wéwa idatsi' a ta ichéitö ia:

—Be' senú ye' ta.

Erë ie' tkashkar iulà a mía tñeule. Ie' datsi' yénettsaqat alaköl ulà a. 13 Mik iwökir alaköl tö isué tö José datsi' ate ie' ulà a 14 etä ie' tö ikané mésopa kié tą ichéitö ie'pa a:

—Isaú, ye' wém wá hebreowak dë'bitü e' tso' se' wayuök. Ie' dewa ye' ska!. Ie' senakkä ye' ta késik wa erë ye' anekä taijë. 15 Mik ie' ittsé tö ye' anekä taijë tą ie' tkashkar tñeule. Ie' datsi' yénettsaqat e' ate ye' ulà a.

16 E' ukuöki tą ie' tö José datsi' blé kkayënoie iwém a mik idene etä. 17 Mik iwém dene, eta ipakéitö ia ta ichéitö ia:

—Be' wá hebreowak dë'bitü kané mésolie, e' tkawa weshke ye' ska!. Ie' senakkä ye' ta. 18 Erë mik ye' anekä taijë, eta ie' tkashkar tñeule tą idatsi' ate tér íe. 19 Es be' kané mésö tö ye' daloséwéwa.

Mik iwökir tö ttè e' ttsé etä ilunekä taijë. 20-21 José klö'wéwaitö

\* 38.29 Fares: Hebreoie s'kiè e' wá kiane chè tkabity keweie.

wötökwa patkéitö wé Egipto blú bolökpa tso' wötëule ee. Erë Jehová tso' José kíjumuk s'wöto wé a ñies. Ie' er bua' chöke ia. Ie' tö s'wöto wé wökir ké er buaë chök ia. <sup>22</sup>S'wöto wé wökir tö imékä s'tso' wötérulewa malepa kos kuebluie. José tö i kos weke s'wöto wé a e' kewö meke. <sup>23</sup>Jehová tso' José ta. Ie' tö ikimeke as i kos dötsa buaë ie' a. E' kueki i kaneweke José tö e' kë suekülia s'wöto wé wökir tö tö is imir.

### Kabsuè böt e' wà paké José tö

**40** <sup>1-2</sup>E' ukuöki tå wém dör Egipto blú a vino mukwakpa e'pa kueblu ena wém dör blu' a pan yuökwakpa e'pa kueblu, e'pa ból tö iblú tsiriwéka. E' kueki ie' ulunekä ie'pa ki <sup>3</sup>tå ie'pa patkéitö wötewa ikkö'nukwakpa kueblu e' u a s'wöto wé tso' e' a. Ee José tso' wötëule ñies. <sup>4</sup>Eta Egipto blú kkö'nukwakpa e' kueblu tö José kë wëpa ból ñe'pa kkö'nuk. Ee ie'pa sené wötëule ká taijë.

5Ká et nañewe tå ie'pa ból kab-sué kua'ki kuä'ki. E' wà dör kua'ki kua'ki. <sup>6</sup>Bule es bla'mi tå José debitu isauk. Ie' tö isué tö ie'pa eriane. <sup>7</sup>E' kueki ie' tö ie'pa a ichaké:

—¿Iök lñe tå a' wö wér siar?

8Ie'pa tö iiuté:

—Sa! kabsué, erë kë yi ku' sa' a iwà pakök.

Ie' tö iché ie'pa a:

—¿A! kë wà ijcher tö Skéköl tö s'kabsuè e' wà chëmi se' a? ¿Ima a' kabsué? E' chöf ña.

9Eta blu' a vino mukwakpa kueblu e' tö ikabsuè paké ia ta ichéitö:

—Ye' kabsué tö uva kicha me'r ye' wösha <sup>10</sup>e' ulà tso' mañat. E' dapénéka e' wörkua bune taijë ta iwörkua míane iwöliie e' yua' tso' taijë. <sup>11</sup>Egipto blú tka' a'tser ye' ulà a. E' a uvawöli diò tuéeyo. E' ukuöki tå ye' wák tö imé blu' a. Es ye' kabsué.

12José tö iché ia:

—Be' kabsuè e' wà kiane yénuk i' es: Be' tö uva kicha ulà kébisué mañat. E' wà kiane yénuk ká mañat. <sup>13</sup>Ká mañat tå blu' tö be' shuleraë. Be' kané meraneitö be' a. Vino meranebö ie' a wes be' tö io' kuaë es. <sup>14</sup>Be' we'ikèyö, mik iwà tka, eta kë be' éna ye' chökwa. Ye' tté chöf blu' a as itö ye' yötsa íe. iBe' er buaë chöf ye' a! <sup>15</sup>Ye' dör hebreowak e' ekiblë'wabitü ie'pa tö. Ye' kë wà i sulu wamblène. Ye' tso' wötëule é.

16Mik blu' pan yuökwakpa kueblu e' tö isué tö José tö iyami kabsuè e' wà paké tå idettsa buaë eta ie' tö ie' icha paké ia ñies. Ie' iché:

—Ye' kabsué tö ye' wà kkö dami mañal ye' wökir ki, e' a pan saruru dami. <sup>17</sup>Kkö tkér kákke ék e' a pan dami blu' a daklili. Erë pan dami ye' wà kkö a ye' wökir ki e' ñeke dù tö.

18Eta José tö iché ie' a:

—Be' kabsué e' wà kiane yénuk i' es: kkö mañal e' dör ká mañat. <sup>19</sup>E' wà kiane chè tö ká mañat tå blu' tö be' kuli' töök patkeraë, tå be' nu kichatkerakä kal ulà a. Dù tö be' nu katerawa.

20Ká de mañat tå blu' tö idués-wö tkö'wé chkè wa di'yè wa taijë

ikuēblupa ultane kaneblöke ie' a e'pa a. E' shua ie' tō ivino mukwakpa kueblu ena ipan yuökawakpa kueblu e'pa bōl tsukbitu patké s'wōto wé a ikuēblupa ultane wörki. <sup>21</sup>Vino mukwakpa kueblu e' a ikané méneitō. Ie' tō blu' a itka' méne wes kuaë es. <sup>22</sup>Erë pan yuökawakpa kueblu, e' patkémi nu kichatkékä wes José tō iyë' es. <sup>23</sup>Erë vino mukwakpa kueblu e' kë er aneia José ska!

### Egipto blu' kabsué bötkicha e' wà paké José tō

**41** <sup>1</sup>Duas de bök, e' ukuöki tå Egipto blu' kabsué tō ie' dur di' kiè Nilo e' kkömk. <sup>2</sup>Ie' isuë tō baka deyal di' a kuktö. E' dör baka bua'buaë jani'janila. E' iëter chkök kuachka shua. <sup>3</sup>E' itök*ı* baka skà deyal kuktö di' a. Erë e' dör suluë sí sulula. E' míyal di' kkömk baka malë o'mik. <sup>4</sup>Eta baka sí sulu-la kuktö, e' tō baka bua'buaë kuktö e' katélur.

Ee tå blu' ti'neka. <sup>5</sup>E' ukuöki tå bet ie' kapowane tå ikabsuéne tō i<sup>l</sup> talarke kuò sù kiè trigo e' klò elka è a ila'k deka'kul. Ila'k e' dör bua'buaë iwö blubluë. <sup>6</sup>E' itök*ı* iskà tskine e' klò elka è a ila'k deka'kul nñies, erë sulula idir. Siwa datse diwö tskirke e' kkë e' tō isiwéwa ña'wéwa suluë mía wö yabé è. <sup>7</sup>Eta ila'k kul siulewa sulu e' tō ila'k bua'buaë katélur seraa.

Blu' ti'neka tå iéna iqane tō ie' kabsauke moki. <sup>8</sup>Erë bule es bla'mi tå ie' kabsué e' tō ie' eriawéka. E' kuekj*ı* ie' tō Egipto fýi tötkökawakpa ena íyí jcher taië ese wakpa, kos

tsuk patké. Ie' kabsué e' pakéitö ie'pa a. Erë ie'pa ultane kë a ie' kabsué e' wà qane. <sup>9</sup>Eta vino mukwakpa kueblu e' tō iché blu' a:  
—A blu', erpa ye' éna idaa tō sulu ye' e' wamblé. <sup>10</sup>Mik be' uluneka taije be' pan yuökawakpa kueblu ki ena ye' ki, eta be' tō sa' wötökwa patké' be' kkö'nukwakpa kueblu e' wé a. <sup>11</sup>Ká et nañewe tå pan yuökawakpa kueblu kabsué. Ye' kab-sué ñies. Sa' kabsué e' wà tå' ulawa ulawa. <sup>12</sup>Ee wém dur eköl dula-dula hebreowak, e' dör s'wōto wé wökir e' kanè méso. Ie' a sa' tō sa' kabsué e' paké tå ie' tō iwà ché sa' a. <sup>13</sup>iIwambléne yësyësë wes ie' tō sa' a iyë' es! Ye' dene ye' kané a tå iëkol nu kichatkékä kal ulà a.

<sup>14</sup>Eta blu' tō José tsuk patké tå iyéttsarakito bet s'wōto wé a. José tså tée buaë, e' paié buaë, tå ide ie'pa wa blu' wörki. <sup>15</sup>Blu' tō iché ia:

—Ye' kabsué erë kë yi éna iwà qane. Erë ie'pa tō iché ye' a tō buaë be' tō s'kabsuë e' wà pakë.

<sup>16</sup>Ie' tō iiuté:

—A këkëpa e' kë yënuk ye' a. Erë Skëköl tō e' chëmi be' a be' kimoie.

<sup>17</sup>Blu' tō iché ia:

—Ye' kabsué tō ye' dur di' kiè Nilo e' kkömk. <sup>18</sup>Ye' isuë tō baka deyal di' a kuktö. E' dör baka bua'buaë jani'janila. E' iëter chkök kuachka shua. <sup>19</sup>E' itök*ı* baka skà deyal di' a kuktö. Erë e' dör suluë sí pola. iKë ye' wa baka sule sí poë suluë ká i<sup>l</sup> a ekkë chökle! <sup>20</sup>Eta baka sí sulula kuktö, e' tō baka bua'buaë kuktö e' katélur. <sup>21</sup>Baka sí suluë e' tō baka bua'buaë katélur

erë kë iwër tö ikatélur. Itso'ia sí poë wës kenet es.

"Ee tą ye' ti'neka. <sup>22</sup>Eta bet ye' skà kapowane tą ye' skà kabsuéne tö i talarke kuò sù e' klò elka è a ila'k dekà kul. Ila'k e' dör bua'buaë iwö blubluë. <sup>23</sup>E' itöki iskà tskine e' klò elka è a ila'k dekà kul ñies. Erë e' ala'k dör sulula. Siwa' datse diwö tskirke e' kkë e' tö isiwéwa ña'wéwa suluë mía wö yabé è. <sup>24</sup>Eta ila'k kul siulewə sulu e' tö ila'k bua'bua katélur seraä. E' kos pakéyö s'tötkökwickpa a erë ie'pa shua' kë yi a iwà ane yës."

<sup>25</sup>Eta José tö blu' iüté:

—A kékëpa, be' kabsué bötkicha, e' wà dör etkè. I weraë Skéköl tö kukuie e' chök ie' tso' be' a kab-suè a kam iwà tkò e' yoki. <sup>26</sup>Baka bua'buaë ena ala'k bua'buaë e' wà dör etkè, e' dör duas kul. <sup>27</sup>Baka sulula sí poë dekà ibua'buaë itöki ena ala'k suluë siulewə siwa' wa, e' wà dör etkè. E' dör duas kul skà. E' duéswö wa ketba ardaë s'ki dò duas kul e'. <sup>28</sup>I weraë Skéköl tö kukuie e' chök ie' tso' be' a wes ye' tö be' a ichétke es. <sup>29</sup>Kewe dalì wördaë taië Egípto kos a dökä duas kul. <sup>30</sup>E' ukuöki ta duas skà datskene kul e' dör ketba taië duéswö. Bli e' tö Egípto kos sulu'wérawa. E' kueki duas kul buaë e' a dalì wöne taië e' kë arpaiä yi éna. <sup>31</sup>Bli ardaë taië darérë, e' kueki dalì wönebak taië e' peli kë wérpaiä yës. <sup>32</sup>A kékëpa, be' kabsué bötkicha, e' wà kiane chè tö Skéköl tö iweraë mokijë. Bli döraë se' ki bet.

<sup>33</sup>A kékëpa, be' kawöta wém yulök eköl erbikò buaë wà íyi

jcher taië ese. E' múka ká kuebluie.

<sup>34</sup>Ikaneú i' es: wëpa yuló as ie'pa mi' Egípto kos a daliwö kak blök daliwö tso' taië duas kul e' dalewa. Mik daliwö tso' dökä saco skel eta ikiö ia saco et blenoie ketba yoki. <sup>35</sup>Ie'pa a ichö tö daliwö ñe' kos dapa'ú bánet bánet ká tso' kos Egípto e' a. E' kkö'nuk patkó be' wák tö sulitane tioie. <sup>36</sup>Es daliwö blérdaë a' wakpa ultane a as ie'pa kë ttò ketba tö mik ketba duéswö de s'ki eta.

### José yone Egípto wökirie

<sup>37</sup>I ché José tö ie' a e' mène buaë ie' a ena ikuéblupa kos e'pa a. <sup>38</sup>E' kueki ie' tö iché ie'pa a:

—Wém i' a Skéköl Wiköl tso!. Kë se' a wém skà kurpa wes ie' es.

<sup>39</sup>Eta ie' tö iché José a:

—Skéköl tö íyi ultane ikkë e' kkaché be' a. E' kueki be' erbikò buaë, be' wà íyi jcher taië sulitane tsata. <sup>40</sup>Be' tkekekayö ye' ká kos e' wökirie. Sa' wakpa kos tö be' ttò dalöieraë. Ye' eköl è dör kibii be' tsata, ye' dör blu' e' kueki. <sup>41</sup>I'ñe ye' tö iché tö be' dör Egípto wökir kibi. <sup>42</sup>Eta blu' tö iulatsio tso' iwa' ikka shtoie, e' yétsa iéwa José ulatska a. José paierakítö datsi' bua'bua ese wa. Ñies bulé dör oro ese iéwaitö José kuli' a et. <sup>43</sup>E' ukuöki ta ie' tö José kë e' tkökka shkök karreta shköke ie' karreta itöki e' ki. Ie' tö ie'pa welepa patkémi kewe ichök pë' a aneule: "iA' e' skö! iKawö mu se' wökir kibi datse as e' tkömi!" Es ie' tö José yué Egípto wa'ñe e' wökirie.

<sup>44</sup>Eta blu' tö iché José a:

—Ye' dör Egipto blú erë kë yi  
a ì qonuk ká i' ki, be' kë wá ikéwö  
mènë e' tå.

<sup>45</sup>Ie' tö José kiè méka Safenat-panéah egiptowak ttò wa. Ie' tö tayë kiè Asenat e' mé José a senowiae. E' dör wém kiè Potifera e' alà busi. Potifera dör egip towak sacerdote<sup>\*</sup> eköl. Ie' kaneblöke ká kiè On ee. Es José atë Egipto wa'ñe e' wökirie. <sup>46</sup>Mik ie'pa wá José dë'bitü blu' ska', e' kewö ska' tå ie' kí duas tso' dabom mañayök (30).

José e' chéat blu' a tå imítke ikaneuk Egipto kos a. <sup>47</sup>Duas kul tsá shuá dalì wöne taië shute. <sup>48</sup>Daliwö e' kos kak dapa'wé José tö tå iblítö ká wa'ñe. Wé dalì e' wöne ese wakpa ká a ibléat u tso' daliwö blóie ese a. Es iblítö ká ultane tso' Egipto e' a. <sup>49</sup>Ie' tö daliwö dapa'wé taië wes dayë tséwö kë ishtar es. E' kuékí ie' kë wá ishtaneia.

<sup>50</sup>Ketba kewö kam döwá e' yoki José alaköl kiè Asenat, e' alà kune böл wëpa. <sup>51</sup>Mik ilà tsá kune, eta José tö iché: "Skéköl tö ye' bak erianuk ena ye' yamipa e' kos chöwéwa ye' éna." E' kuékí ikiè mékaitö Manasés. <sup>\*</sup><sup>52</sup>Mik ilà skà kune, eta ie' iché: "Skéköl tö ye' a alà mé ká wé kí ye' bak weinuk taië ee." E' kuékí ikiè mékaitö Efraín.\*

<sup>53</sup>Duas kul dalì wöne taië Egipto e' tka. <sup>54</sup>E' ukuökí tå duas kul skà

debitü e' dör ketba poë duéswö wes José tö iyël es. Ketba de ká wa'ñe erë Egipto kos a chkewö tso!. <sup>55</sup>Mik Egipto wakpa tekete ketba tö, eta ie'pa mía iblú a chkewö kiök. Ie' tö iché iarak: "A' yú José ska' tå ì kos chéitö a' a e' wá iutö."

<sup>56</sup>Mik ketba de ká wa'ñe, eta José tö dalì tso' blëule iwé a e' kos kköppée chkewö watuø Egipto wakpa a. Ketba kí datse taië shute. <sup>57</sup>Ká ultane wakpa a kë ì kú'iá katanoie, e' kuékí ie'pa de Egipto chkewö tauk José ska'.

### José élpa mía Egipto

**42** <sup>1</sup>Mik Jacob wá ijchenewa tö chkewö tso' Egipto watuè, eta ila'r a ichéitö: "Jók a' iëter ní sáuk è? <sup>2</sup>Ye' a iyëne tö chkewö tso' Egipto. A' yú ee chkewö tauk as kë se' duòlur ketba wá."

<sup>3</sup>Etä José élpa dökä dabop, e'pa míyal Egipto chkewö tauk. <sup>4</sup>Eré Jacob kë wá ilà Benjamín, e' dör José él táie imì wa, e' patkënenem iëlpa tå ie' ibikeitsé dö' ì tkò ita ñala kí. <sup>5</sup>Ketba tso' taië Canaán e' kuékí taië Canaánwakpa míyal chkewö tauk Egipto. Esepa shuá Jacob ala'r mirwàrak chkewö tauk nies.

<sup>6</sup>José dör Egipto ká kuéblu. Ie' tö chkewö watuëke sulitane datse itauk e'pa a. Mik iëlpa demi iwörki, eta ie'pa wöéwa dò iški ie' dalöiök. <sup>7</sup>Ie' tö ie'pa suéwá bet tö ie'pa dör

\* **41.45 sacerdote:** Sacerdote i' kë dör wes i'ñe itso' es. E' skéie ie'pa dör egip towakpa siwa! e' wá kaneukwakpa.

\* **41.51 Manasés:** Hebreoie s'kiè e' wá kiane chè ichöwéwa ye' éna.

\* **41.52 Efraín:** Hebreoie s'kiè e' wá kiane chè alà kékä ò dalì wör.

iëlpa. Erë ie' e' éwa iyöki wës kë ie' wä isuule es. Kë ie' e' kkayënewa ie'pa a' tö ie' dör ie'pa él. Etä ie' tö iëlpa chaké kësik wa:

—¿Wé a' sekképa bite?

ie'pa tö iiuté:

—Sa' bite Canaán chkewö tåuk be' ska!.

8 ie' tö ie'pa suéwä, erë ie'pa kë wä ie' sunewä. 9 ie' tö iëlpa kékisu' e' anewä ie' éna. ie' tö iché ie'pa a:

—A' dör sa' bolökpa datse sa' sãuk tö wës a' döwami ñippök sa' ta e' aloka sa' ki.

10 ie'pa iiuté:

—A kéképa, e' kë dör es. Sa' kë dör a' bolökpa. Sa' debitü chkewö è tåuk. 11 Sa' kos i' e' yé dör eköl è. Sa' serke buaë yësyësë. Kë sa' dör yi bolökpa.

12 ie' tö ichéne ie'pa a:

—Au. A' sekké tso' kachök. A' datse sa' ká sãuk tö wës a' döwami ñippök sa' ta e' aloka sa' ki.

13 Erë ie'pa tö iiuté:

—Sa' tso' be' wörki wës be' kanè mésopa es. Sa' dökä dabom eyök ki böл (12). Sa' yé dör eköl è. Sa' serke Canaán. Sa' él tsirla ék e' ate sa' yé ta. Ieköl blënewatke.

14 Erë ie' tö iskà chénerakiä:

—Ye' ichétke tö a' dör sa' bolökpa.

15 Egipto blú ttò wa yö ichè a' a tö a' kë wä a' él tsirla e' dë' íe, e' ta a' kë mi'pa ká i' ki. Es ye' isuëmi tö a' ttò moki. 16 A' eköl yú a' tsirla tsükbitü. A' malepa ate wöteule. Es ye' wä ijchermi tö a' ttöke e' dör moki. E' kë yëne, e' ta a' dör sa' bolökpa. E' chéyö Egipto blú ttò wa.

17 ie' tö ie'pa wötewä sekka dökä ká mañat. 18 Ká de mañat etä ie' tö iché iarak:

—Ye' tö Skéköl dalötseta'ka. Ì cheke ye' tö a' a e' ú, e' ta ye' kë tö a' ttökwä patkepa. 19 Yëne tö a' dör wëpa ttò moki ese, e' ta a' eköl múat wöteule. A' malepa yúne, chkewö tsúmi a' yamipa tteke ketba tö e'pa a. 20 E' ukuöki ta a' él tsirla e' tsúbitu ye' a suè. Es ye' tö isuëmi tö a' ttöke e' dör moki. E' kë dör es, etä a' duöralur.

Etä ie'pa tö iché: “E' dör buaë sa' a.” 21 Etä ichérakitö ñì a:

—Mokië se' e' wamblel' suluë se' él José ta. Mik ie' kkoyé' taijë se' a tö ì sulu kë wamblar ie' ki eré se' isu' tö taijë ie' eriane, erë kë e' ska' se' tkine. E' nuí ki se' weirke iñé.

22 Etä Rubén tö iiuté:

—Ye' tö iyë' a' a: “Kë ì wamblar José ki.” Erë a' kë wä ye' ttò iutëne. E' kueki iñé ta se' kawöta idu'wä e' nuí patauk.

23 José ttöke iëlpa ta egip towak ttò wa e' pakekene o'ka tö ie'pa a iwakpa ttò wa. E' kuékij ie'pa kë wä ijcher tö ie'pa ttöke e' ane ie' éna. 24 Mik ie' tö ie'pa ttöke e' ttsé, etä ie' e' skétsa mía bánet iuk. Mik ie' er dekané ttoie, etä ie' dene ie'pa ska!. Ie' tö Simeón yoktsa patké ta ipayuéraraktö iëlpa wörki.

25 E' ukuöki ta ie' tö ikanè mésopa patké iëlpa sku' wä iök chkewö wa. Nies ichéítö iarak: “Ie'pa chkewö e' ské iñwä iwakpa bil ekké sku' a. Nies chkè bakómirakiä ñè ñala ki.” Etä ie'pa tö iwé wës ie' tö iché iarak es. 26 E' ukuöki ta ie'pa tö ichkewö mékä iburro ki ta imiyal.

27 Mik ie'pa demi ñala ki wé ie'pa kapökerö ee etä ie'pa eköl tö isku' a burro chkö tso' e' kkö

wöttsée iburro tioie t<sub>a</sub> isué tö inuköl àr sku' shua. <sup>28</sup>Ie' tö iché iëlpa a:

—iIsaú! Ye' inuköl mébitune ie'pa tö e' àr sku' a.

Ie'pa ultane suane taië eriane taië. Ichérakito ñì a:

—¿Ì wamblök Skéköl tso' se' t<sub>a</sub>?

<sup>29</sup>Mik ie'pa demine Canaán, eta i tka ie'pa t<sub>a</sub> Egipto e' k<sub>os</sub> pakéra-  
kitö iyé a. Ie'pa tö iché ia:

<sup>30</sup>—Ká e' wökir e' tté sa' t<sub>a</sub> kësik wa. Ie' tö iché tö sa' dör ie'pa bolökpa. <sup>31</sup>Sa' tö iché ia: "Sa' serke buaë. Kè sa' dör yi bolökpa. <sup>32</sup>Sa' dökä dabom eyök k<sub>i</sub> böl. Sa' yé dör eköl è. Sa' él eköl blénawatke, iëlköl ate sa' yé t<sub>a</sub> Canaán." <sup>33</sup>Eta ie' tö sa' iuté: "A' ttò moki, e' t<sub>a</sub> a' él eköl e' müat íe ye' ska' eta chke-wö tsúmi a' yampi a. <sup>34</sup>Erë a' él tsirla ék e' tsúbitu ña suè. Es ye' wa ijchermi tö a' ttò moki. A' tö iwé es, e' t<sub>a</sub> ye' tö a' él èmimine. Nies a' íyi tuëmi bua' sa' ká i' ki."

<sup>35</sup>Mik José élpa tso' isku' wakkauk, eta ie'pa isué sku' a inuköl deyal parratulewa. Mik e' sué, eta ie'pa tkirulune iyé nies. <sup>36</sup>Jacob tö iché iàrak:

—A' tso' ye' mukat alà k<sub>e</sub> t<sub>a</sub>. José blénawu se' yoki. Simeón nies, k<sub>e</sub> k<sub>u</sub> se' t<sub>a</sub>. I' t<sub>a</sub> Benjamín kiane tsèmi a' ki darë wa. Kekraë ye' weirke.

<sup>37</sup>Rubén tö iché iyé a:

—Bejamín múmi ye' a. Ye' tö ikkō'neraë buaë. Ye' wa idörane be' a. Ye' k<sub>e</sub> wa idë'ne, e' t<sub>a</sub> ye' alà böl e' ttólur.

<sup>38</sup>Ie' tö iuté:

—Ye' alà k<sub>e</sub> mìnne a' t<sub>a</sub>. Iël José du'wa t<sub>a</sub> ie' è dawaia. Dö'~ì suu

tkò ie' t<sub>a</sub> ñala ki, e' t<sub>a</sub> këkëla i'  
duömiwq ilà dalërmik t<sub>a</sub> a' iane  
iwiie.

### Benjamín élpa wa imítser Egipto

**43** <sup>1</sup>Ketba tkëneia darë-  
rë Canaán. <sup>2</sup>Chkewö dë'biturak iwq Egipto, e' qnewa. Etq Jacob tö iché ila'r a:

—A' yúne chkewö skà t<sub>a</sub>uk se' a.

<sup>3</sup>Erë Judá tö iuté:

—Wëm tso' ee' e' tö iyé' sa' a yësyësë: "A' k<sub>e</sub> wa a' él tsirla dë' íe, e' t<sub>a</sub> a' k<sub>e</sub> tö ye' suepa." <sup>4</sup>Be' tö sa' él tsirla émi sa' t<sub>a</sub>, e' t<sub>a</sub> sa' mi'mi chkewö t<sub>a</sub>uk be' a. <sup>5</sup>Erë be' k<sub>e</sub> tö ièmi sa' t<sub>a</sub>, e' t<sub>a</sub> k<sub>e</sub> sa' mìnne. Wëm e' tö sa' a iché: "A' k<sub>e</sub> wa a' él tsirla dë' íe, e' t<sub>a</sub> k<sub>e</sub> a' tö ye' suepa."

<sup>6</sup>Jacob tö iuté:

—¿Iók a' tö i suu wambleke taië ye' ki? ¿Iók a' tö iché wëm e' a tö a' él skà tso'iq eköl?

<sup>7</sup>Ie'pa tö iuté:

—Wëm e' tö sa' chakéwaie darë wa: "¿A' yé tso'iq ttsë'ka? ¿A' él skà tso'?" Kè wes sa' a ionukia. Sa' kawötq iutök yësyësë. Sa' k<sub>e</sub> wa ijcher tö wëm e' tö sa' a ichémi: "A' él tsúbitu ye' a suè."

<sup>8</sup>Judá tö iché ie' a:

—Se' senakiq, e' t<sub>a</sub> be' alà ómi ye' t<sub>a</sub>. Ye' tö ikkō'neraë. Es be' ena sa' ena se' ala'r k<sub>os</sub> k<sub>e</sub> duöpalur ketba wa. <sup>9</sup>Ye' e' chò ie' skéie. Ì de wes ie' t<sub>a</sub>, e' nuí tueraëyö. Ye' k<sub>e</sub> wa ie' dë'ne be' ska', e' t<sub>a</sub> ye' iane iwiie kekraë. <sup>10</sup>Kè sö kawö chöuk taië. Warma i' t<sub>a</sub> sa' daretket böökicha.

<sup>11</sup>Iyé tö iuté:

—E'ma k<sub>e</sub> wes ionuk. A' tö iú i' es: A' sku' a íyi bua'bua tso' se' ká

a, ese kak tsúmi wém e' a. Bálsamo elkela ena bul alí elkela ena kiò masmas ena mirra ena kalwö wödalo katanoie ese kos kak tsúmi ia elkel. <sup>12</sup>Ñies inuköl tsúmi ia jaishet dökä bötkicha. Wé a' wa idë'ne e' tsúmine múne ia a' wák ulawa dö! ie' wöa ká chë'wa. <sup>13</sup>A' yúne wém e' ska'. Alà tsúmi. <sup>14</sup>Skë-köl Diché Ta' Íyi Ulitane Tsata e' a ikiéyö as wém ñe' tö a' saù er siarë wa ta imú tö be! él ena Benjamín óbitune. Ye' atë alà kè ta!, erë ¿wes ye' e' ümiiia?

<sup>15</sup>Eta Jacob ala'r tö íyi kak ié, ñies inuköl ié jaishet dökä bötkicha. Ñies Benjamín mırak iwá ta imíyal. Mik idemirak José ska' <sup>16</sup>eta ie' isué tö Benjamín debitü ie'pa wa. Ie' tö iché iu kueblu a:

—Wépa wíkké tsúmi ye' u a. Be' yú baka ttökwa elka e' kaneú se' a. Ie'pa chköke ï'ñe ye' ta dibata a.

<sup>17</sup>Eta iu kueblu tö iwakanewé wes ichéitö ia es. Imítserak iwá e' ta José u a. <sup>18</sup>Erë taijë ie'pa tkine-wa imítsarak iwá José u a e' kueki. Ie'pa ttöramirak ñita: Ie'pa tso' se' kitö'uk. Ie'pa tö inuköl ië'mi se' sku' a e' nuí tkene se' mik. E' nuí kueki ie'pa tö se' klö'werawa kaneblök ie'pa a kanè mésopae kè patuè ta' ese. Ñies se' iyiwak klö'werawärakitö nuí ki.

<sup>19</sup>Mik ie'pa demi u wékkö a, eta ie'pa de tsinet u kueblu wörki <sup>20</sup>ta ichérakitö ia:

—A kékëpa, suköt sa' dë! ie' chkö-wö taul. <sup>21</sup>Erë sa' dë'mi wé sa' kapökerö ee ta sa' sku' kos kkö wötsée ta e' a kos sa' tö chköwö to' e' inuköl kuéne sa' tö seraq. E'

debitune sa' wa mène. <sup>22</sup>Ñies sa' wa inuköl skà de chköwö kí tuoie. Erë kè sa' wa ijcher yi tö sa' inuköl ië'kane sa' sku' a.

<sup>23</sup>U kueblu tö iiuté:

—Kè a' tkinuk. Kè a' suanuk. Ye' tö a' chköwö pato' e' inuköl klöö!. A' Keköl dör a' yé Keköl ñies, e' tö inuköl e' ië'wa a' sku' a.

E' ukuöki ta ie' tö Simeón yéttsa tsémi wé ielpa tso' ee. <sup>24</sup>E' ukuöki ta imítserak iwá seraq José u a. Eta di' méitö iarak klö skuoie. Ñies iburro tiérakitö. <sup>25</sup>Ie'pa wa ijchenewá tö ee ie'pa chköke José ta dibata a. E' kueki ie'pa wa íyi kak de ie' a e' dapawérakitö mè ie' a.

<sup>26</sup>Mik ie' dewá weshke, eta ie'pa wa íyi kak de e' mé ia. Ie'pa wöéwaije dö iski idalöiök. <sup>27</sup>Ie' tö ie'pa shke'wé ta ichakéitö:

—A' yé de kékëpalatke yë! a' tö ye' a suköt ñis e' tso'? <sup>28</sup>Idobyérkeia?

<sup>28</sup>Ie'pa skà wöéwane dö iski ta ichéitö:

—A kékëpa, tö, sa' yé tso' buaë. Ie' dobyérkeia.

<sup>29</sup>Eta José ká sué ipamik shkit, ta Benjamín dör iël ekka imì wa ena iyé wa e' suéitö. Eta ichéitö ie'pa a:

—A' él tsirla yé! a' tö ñe' dör wí?

Ie' tö iché Benjamín a:

—A alà, Skëköl er buaë chò be' a. <sup>30</sup>Ie' tö iël suéwa e' tö ie' ttsë'wé buaë ta ie' iakká. Bet ta ie' e' ské-ttsa mía wé ikapöke ee iuk. <sup>31</sup>Mik ie' ie' one ta ier pablène ta iwö skuée ta imíane ielpa skà ta ichéitö: "Chkò watió bet."

<sup>32</sup>José tiérakitö bánet. Ielpa tiérakitö bánet. Egip towak chköke

José u a e'pa tiérakito bánet ñies. Hebreowak dör ñá egip towak a e' kueki ie'pa kë a kawö tą chökök ie'pa tą ñita. <sup>33</sup> José tö ie'pa tulökwa patké chökök ní o'mik wes duas tso' iki es dò ibataë. Ie'pa tö ibikeitsé: “¿Wes ie'pa wə se' duéswö jcher?” E' kueki ie'pa tkinewā taję tą iñi suéka. <sup>34</sup> Ie'pa dëne chkè tso' José mesa kí e' wa. Es iméitö ultane a. Erë Benjamín a chkè méitö kibiie dökä sketökicha ielpa dëne e' tsata. Ie'pa chké taję blo'yé José tą ttse'në buaë.

### José tka' tso' iwə wayè

**44** <sup>1</sup>E' ukuöki tą iu kueblu kiére José tö tą ichéitö ia:  
—Ie'pa sku' kós wə iókä chië chkekwo wa. Ñies ie'pa inuköl iókane isku' kós kkö kí. <sup>2</sup>Ñies ye' tka' yóule inukölchka wa tso' ye' wə wayè e' iókä ie'pa él tsirla e' sku' kkö kí, inuköl chkekwo patuo e' tą ñita.

Età u kueblu tö iwakanewé wes José tö iché ia es. <sup>3</sup>Bule es bla'mi diwö tskine tą José tö ielpa a kawö mé shkökne iu a iburroë. <sup>4</sup>Kam ie'pa dòmi kamie, età ie' tö iché iu kueblu a:

—Be' yú ie'pa itoki. Mik be' ikué, età ichó ia: ‘Ye' e' wé buaë a' tą, iók a' e' wamblé sulu ye' kí? Iók a' tö ye' wökir tka' yóule inukölchka wa, <sup>5</sup>e' dör wayè ena íyi tötkoie, e' bléwabitu a' tö? A' e' wamblé suluë.’

<sup>6</sup>Mik ie' ikuérak, età ichéitö wes iwökir tö iché ia es. <sup>7</sup>Età ie'pa tö iiuté:

—Iók be' tö ttè e' ché sa' a es? Kë ekké chók sa' e' wamblöpa.

<sup>8</sup>Sa' bité Canaán tkörö íe inuköl mìne sa' sku' a e' mukne. ¿Wes be' ibikeitsémi tö sa' tö inukölchka ö orochka e' blèwami be' wökir u a? <sup>9</sup>Sa' sku' shuyulö. Yi icha a ikuébö, as e' wák duówə. Sa' malepa ate be' kanè mésopaie.

<sup>10</sup>Ie' tö iché ie'pa a:

—Iwà tköraë wes a' tö iché es. Erë wé ék sku' a ikunewə e' è döraë ye' kanè mésolie. A' malepa kë iane iwiie. A' mi'mine buaë.

<sup>11</sup>E' bet ie'pa ultane tö isku' éwa iski tą ikkò wöttselor. <sup>12</sup>U kueblu tö sku' shuyulérap ikibi ék kewe dò itsir-la Benjamín ska!. Età Benjamín sku' kkö a tka' àr. <sup>13</sup>Ie'pa datsi' jchélör eriane taję kueki. Ie'pa dalì payuéné burro kí tą ibiteyalne José ska!. <sup>14</sup>Mik Judá ena ielpa demine José ska!, eta José duriä. Ie'pa wöéwa iski iwörki. <sup>15</sup>E' dalewa ie' tö iché iarak:

—Iók a' e' wamblö es? ¿A' kë wə ijcher tö wém dör wes ye' es, e' s'tötkè buaë?

<sup>16</sup>Judá tö iiuté:

—Ima sa' tö be' iutémi? Èl wa sa' tö be' a ikkachémi tö sa' kë wə i sulu wamblène? I wambléule sulu sa' wə e' sué Skéköl tö. I' sa' ieter be' wörki. Sa' klö'ú be' kanè mésolie. Yi sku' a be' tka' kune e' klö'ú ñies.

<sup>17</sup>Erë ie' tö iiuté:

—Kë ye' a e' wamblénuk es. Yi sku' a ye' tka' kune, e' è ate ye' kanè mésolie. A' malepa mi'mine buaë a' yé ska!. Kë yi tö a' tsiriwepa.

### Judá kkoché siarla Benjamín dalermik

<sup>18</sup>Età Judá debitu José wörki tsinet, età ichéitö ia:

—A kékëpa, be' we'ikèyö, mishka ttök se' böl è. Be' dalò dör wes Egipto blú dalò es e' kueki kë be' ulunuk ye' ki. <sup>19</sup>Be' tö sa' a ichaki tö sa' yé ta', sa' él skà ta!. <sup>20</sup>Sa' tö be' iuté! tö, sa' yé ta' kékëpalatke, ñies sa' él ta' eköl ià duladula. E' kune mik sa' yé kénnewatke eta. Sa' be' a iyé! tö sa' yé ki taië ilà tsirla ék kiar. Alà e' è atéat imì a. Ie' él blenewa. <sup>21</sup>Be' tö sa' a iyé! tö alà e' tsúbitu suèyö. <sup>22</sup>Sa' tö be' a iyé! tö kë ie' dòpa. Kë ie' a iyé menukät ekörla. Mik ie' tö iyé méat eköl, eta iyé duowami ie' dalermik. <sup>23</sup>Erë be' sa' a iyé! tö sa' kë wä ie' dë!, e' ta' be' kë sa' kiepawa.

<sup>24</sup>"Mik sa' dë'mine sa' yé wörki, eta ì kos yé! be' tö sa' a, e' paké sa' tö ie' a. <sup>25</sup>Ie' tö sa' a iché: 'A' yúne chkewö tåuk.' <sup>26</sup>Erë sa' tö iiuté: 'Sa' kawötä sa' él tsirla tsükmi. Sa' kë wä ie' mìnè, e' ta' wém e' kë tö sa' kiepawa.' <sup>27</sup>Ie' tö sa' iuté: 'A' wä ijcher buaë tö ye' alaköl e' tö ye' a alà mé böl è. <sup>28</sup>Iaiaë eköl minea ye' yöki, kë ye' wä isuneia. Ye' iklö'wé tö ie' kötwä iyiwak sulusi tö. <sup>29</sup>A' wä ye' alà bata i' mítser ta' ì sulu tka ie' ta' ñalä wa, e' ta' wö'kela i' duörawa eriar è wä. Itka es, e' ta' a' iane iwiie.'

<sup>30-31</sup>"Sa' yé éna ilà dalér taië. E' kueki sa' demine ie' ska', erë ie' isué tö ilà tsirla kë dë'ne sa' wa, e' ta' ie' duörawa eriar è wä. E' wiie sa' iardaë. <sup>32</sup>Ye' tö ye' yé a iyé!: 'Ye' e' chò be' alà tsirla kkö'nuk. Ye' kë wa idë'ne, e' ta' ye' iane iwiie kékraë.' <sup>33</sup>E' kueki ye' kkochò be' a tö ye' tsúat be' kanè mésocio, alà tsirla skéie. Ie' ómi as imi' ielpa ta. <sup>34</sup>Alà

tsirla kë minene ye' ta, e' ta ćwes ye' mi'mine ye' yé ska'? Ye' kë ki ye' yé kiane suè weinuk siaré."

### José e' chékä ielpa a

**45** <sup>1</sup>José kë a iwöklöneia ikanè mésopa ultane tso' kaneblök ee e'pa wörki. E' kueki ie' tö iché ie'pa a aneule: "A' kos yúshka bánet. Sa' müat sa' wakpa è." Es mik José e' chékä ielpa a, eta ikanè mésopa kë ku' yés ie' ta.

<sup>2</sup>Etä ie' iéka taië, e' ttsé Egipto wakpa tö. Egipto blú a itté demi tö José tso' iuk. <sup>3</sup>José tö iché ielpa a:

—Ye' dör José. ¿Se' yé tso'ia ttsë'ka?

Ie'pa tkirulune taië suane José yöki, e' kueki kë ie'pa a ie' iuténeia. <sup>4</sup>José tö iché ie'pa a:

—A' shkowä tsinet ye' o'mik.

Mik ie'pa e' skewä tsinet, eta ie' tö iché ie'pa a:

—Ye' dör a' él José wato'ttsa a' tö tsèmi Egipto e!. <sup>5</sup>Skéköl tö ye' patkë'bitu íe a' yöki kewe s'tsatkoie ketba ulà a. E' kueki kë a' erianuk, kë a' tkinuk ye' wato'ttsa a' tö e' kueki. <sup>6</sup>Ketba de e' ki duas de böök. Etä duas skel kianeia. E' shua íyi kos kuatkémisö erë kë itskirpa yés. <sup>7</sup>Erë Skéköl tö ye' patkë'bitu ká i' ki a' yöki kewe as a' aleripa kë erwa as Skéköl tö a' tsatkò ie' diché taië e' wa. <sup>8</sup>Es Skéköl wák tö ye' patkë'bitu íe, e' kë dör a' ye' wato'ttsa e' kueki. Skéköl tö ye' méka Egipto blú pattökawkie. Ye' dör ie' u kueblu ena Egipto wa'ñe wökir. <sup>9</sup>A' yúne bet ye' yé ska' ta' ichó ia: 'Be' alà José ttè i' patkébi-tu be' a: Skéköl tö ye' méka Egipto

ká kos, e' wökirie. Be' shkő ye' sauk bet. Kè bö ipanuk taië. <sup>10</sup>Be' serdaë ká kiè Gosen ee be' yamipa kos ta, ñies be' iyiwak kos ena ì kos tso' be' wa ekkë ta. <sup>11</sup>Ketba duéswö kianeïa skel. E' kueki ye' tö chkewö meraë a' ultane a as a' wa chkewö tso' wë! <sup>12</sup>Ye' él Benjamín ena a' ultane tö ichëmi ye' yé a tö mokí ye' wák tté a' ta. <sup>13</sup>Ipakó ye' yé a tö ye' dör Egípto wökir. Ñies ì kos sué a' tö íe, e' pakó ia. iYe' yé tsúbitu bet íe!

<sup>14</sup>Eta José tö iél Benjamín paklö'wéwa ta iiéka. Es Benjamín tö José paklö'wéwa ta iié ñies. <sup>15</sup>Eta José tö iélpa kos wöalattsé, ñì paklö'wéwarak ta iiérak. Eta erpa iélpa er deka ttök ie' ta.

<sup>16</sup>Eta Egípto blú u a tté demi tö José elpa debitü ie' ska!, e' tö Egípto blú ena ikueblupa kos e'pa ttsé'wé buaë. <sup>17</sup>Eta Egípto blú iché José a:

—Ichó be' elpa a: 'A' chkewö payuo iyiwak kí ta a' yúne Canaán. <sup>18</sup>Eta a' yé ena a' yamipa kos e' tsúbitu ye' a. Ká tso' Egípto e' bua'ie mekeyö a' a. Ñies chkewö tso' Egípto e' bua'ie mekeyö a' a.' <sup>19</sup>Ñies ichó ie'pa a: 'karreta tsúmi taië a' alakölpa ena a' ala'r ena a' yé e'pa kos tsobitu. <sup>20</sup>Egípto íyi tso' bua'bua e' kakmraëyö a' a. E' kueki kè a' tkinuk ì tso' a' wa e' ki.'

<sup>21</sup>Eta Jacob ala'r tö iwé i' es. José tö karreta mé ie'pa a wes Egípto blú tö iché es. Ñies shkó méítö ie'pa a ñè ñala ki. <sup>22</sup>Ñies datsi' pa'ali mé iarak e' mane'woie. Eré Benjamín a datsi' kak-méítö sketökicha iënoie. Ñies

inuköl wömulé méítö ia döka cien mañalyök (300). <sup>23</sup>Íyi bua'bua tso' Egípto e' kak patkémi iyé a payöule burro kí döka dabop. Ñies trigowö ena pan ena chkewö skà e' payuítö burro dabop skà kí iyé a ñè ñala ki. <sup>24</sup>Mik José elpa mitke, eta José tö iché ie'pa a:

—Kè a' mía ñippök ñala ki. <sup>25</sup>Ie'pa e' yétsa Egípto a demí Canaán iyé ska!. <sup>26</sup>Eta ie'pa tö iché iyé a: "Be' alà José tso'ia ttsé'ka. Ie' tso' Egípto ká kos e' wökirie." Ttè e' tö Jacob wökrawéwa taië. Kè utcia. Ie' kè wa tté e' klöone. <sup>27</sup>Eré mik ie'pa tö ì kos yé! José tö ie'pa a e' paké iyé a, ñies mik Jacob tö karreta patké José tö ie'pa tsomí e' sué, eta ie' er dekane ttsé'ne buaë. <sup>28</sup>Eta ie' iché: "E' è kata ye' a, ye' alà José tso'ia ttsé'ka. Ye' mi'ke isauk kam ye' blérwa, e' dalewa."

### Jacob mía Egípto

**46** <sup>1</sup>Eta Jacob e' yétsa iu a. ì kos tso' iwá e' mítser seraas. Mik idemirak ká kiè Beer-seba ee, eta iyiwak ña'wéitö iyé Isaac, e' Kéköl dalöioie. <sup>2</sup>E' nañewe Skéköl tté ie' ta kabsueie ta ikiéítö ikiè wa:

—A Jacob.

Jacob tö iiuté:

—¿?

<sup>3</sup>Eta Skéköl iché ia:

—Ye' dör be' Kéköl. Ye' dör be' yé Kéköl. Kè be' suanuk shkök-mi Egípto. Ee ye' tö be' aleripa alöweraë taië. <sup>4</sup>Ye' mi'ke be' ta Egípto. Ñies ye' wák tö be' aleripa yerattsané ká e' a. Ñies mik be' duökewatke eta José tso' be' o'mik.

<sup>5</sup>E' ukuöki tā Jacob e' yétsa Beerseba a. Eta ie' ala'r tö ie' iékä karreta patkē! Egipto blú tö ie'pa tsomí e' a. Ñies ie'pa ala'r ena ie'pa alakölpa e'pa iékaraktö karreta a. <sup>6</sup>Eta Jacob mía Egipto iyamipaë se. Ie' baka kos ena ie' obeja kos e' mítser ie' wa. Ñies i kos dē! ie' ulà a Canaán e' mítser ie' wa sera. <sup>7</sup>Ila'r kos ena isibayökpa kos e'pa mía da'a Egipto.

<sup>8</sup>Ikképa dör Israel aleripa mineyal Egipto. E'pa dör Jacob ena ila'r.

Rubén, e' dör Jacob alà kibi ék. <sup>9</sup>Eta Rubén ala'r kiè: Hanoc, Falú, Hesrón, ena Carmí.

<sup>10</sup>Simeón ala'r kiè: Jemuel, Jamín, Óhad, Jaquín, Sóhar, ena Saúl. Saúl mì dör canaánwak.

<sup>11</sup>Leví ala'r kiè: Guersón, Quehat ena Merarí.

<sup>12</sup>Judá ala'r kiè: Er, Onán, Selá, Fares ena Zérah. (Er ena Onán, e'pa blénewa Canaán.) Fares ala'r kiè Hesrón ena Hamul.

<sup>13</sup>Isacar ala'r kiè: Tolá, Puvá, Job ena Simrón.

<sup>14</sup>Zabulón ala'r kiè: Séred, Elón ena Jahleel.

<sup>15</sup>E'pa kos dör Jacob ala'r kune Padán-aram Lía tā. Ie'pa kutà kiè Dina, e' kune ee ñies. Jacob aleripa kos wépa ena alakölpa e' dökä dabom mañayök ki mañal (33).

<sup>16</sup>Gad ala'r kiè: Sefón, Haguí, Esbón, Suní, Erí, Arodí, ena Arelí.

<sup>17</sup>Aser ala'r kiè: Imná, Isvá, Isví ena Beriá. Ie'pa kutà kiè Sérah.

Beriá ala'r kiè Heber ena Malquiel.

<sup>18</sup>E'pa dör Jacob aleripa Zilpá tā, e' mé Labán tö ilà busi Lía, e' a ikanè

mésoie. Ie'pa kos dökä dabom eyök ki teröl (16).

<sup>19</sup>Jacob alaköl kiè Raquel, e' ala'r kiè José ena Benjamín. <sup>20</sup>José ala'r dör ilaköl Asenat tā e'pa kiè Manasés ena Efraín. Ie'pa kune Egipto. Asenat dör wém kiè Potifera, e' alà busi. Potifera dör egiptowak awá eköl. Ie' kaneblöke ká kiè On ee. <sup>21</sup>Benjamín ala'r kiè Bela, Béquer, Asbel, Guerá, Naamán, Ehi, Ros, Mupim, Hupim ena Ard. <sup>22</sup>E'pa dör Jacob aleripa Raquel tā. Ie'pa kos dökä dabom eyök ki tkél (14).

<sup>23</sup>Dan alà kiè Husim. <sup>24</sup>Neftalí ala'r kiè: Jahseel, Guní, Jezer, ena Silem. <sup>25</sup>E'pa dör Jacob aleripa ilaköl Bilhá tā, e' mé Labán tö ilà busi Raquel a ikanè mésoie. Ie'pa dökä kul (7).

<sup>26</sup>Jacob tā iyamipa ekka mìn Egipto, e' wakpa dökä dabom teryök ki teröl (66). Ie' ala'r e' alakölpa, kë shtane ishu. <sup>27</sup>José ala'r kune Egipto e'pa dör bö'l. Jacob yamipa dë'mi Egipto dökä dabom kuryök (70) sera.

<sup>28</sup>Eta Jacob tö ilà Judá patkémi kewe José a ibiyöchök: "Be' shkó Gosen ye' ñaletsuk." Eta mik ie'pa demí Gosen, <sup>29</sup>eta José tö ikanè mésopa ké ie' karreta yöktṣa tsémi iyé ñaletsoie. Mik idemi iyé ska' eta iyé paklö'wéwaitö eta ie' ié taié.

<sup>30</sup>Eta Jacob tö iché José a:

—iIre' ye' blérwami buaë! Ye' be' suéne buaë, be' serkeia e' kueki.

<sup>31</sup>Eta José tö iché iyamipa kos a:

—Ye' mía Egipto blú a' biyöchök tö 'ye' élpa ena ye' yé yamipa kos serke Canaán e'pa

debitu e' tsukat ye' ska!. 32 Ie'pa dör iyiwak alöukwakpa. E' kuékí ie'pa baka kos ena ie'pa obeja kos ena i kos tso' ie'pa wá e' debitu ie'pa wá.' 33 Mik Egipto blú tö a' chaké: '¿I dör a' kanè?', 34 e' ta ichó ia: 'Kekraë sa' kanè dör iyiwak alöuk wes sa' tsá bak es.' Egiptowak kë kâne senuk obeja alöukwakpa ta ñita, e' kuékí Egipto blú kawö mèmi a' a senuk Gosen.

**47** 1 Eta José mía ibiyó muk Egipto blú a ta ichéitó ia: "Ye' yé ena ye' élpa serke Canaán, e'pa debitu íe. I' ta ie'pa tso' Gosen. Ie'pa obeja ena baka ena i kos tso' iwá e' debiturak iwá seraqá." 2 José tö iélpa shushté dökä skel ta imítser iwá Egipto blú ska' as ie' tö iwakpa saqú. 3 Eta Egipto blú tö José élpa a ichaké:

—¿I dör a' kanè?

Eta ie'pa tö iiuté:

—A kéképa, sa' dör obeja alöukwakpa wes sa' tsá bak es. 4 Ketba meneká taié sa' kaska!. Sa' iyiwak a kë chké ta'ia, e' kuékí sa' bitea senuk ká i' ki. Be' we'iké sa' tö, kawö mú sa' a senuk Gosen.

5 Eta Egipto blú tö iché José a: —Be' yé ena be' élpa de senuk be' ta. 6 Ká tso' Egipto e' wé kiane be' ki e' mú ie'pa a senoie. Kos ká tso' Egipto e' bua'ie dör Gosen e' mú ie'pa a senoie. Be' yamipa shua wépa tso' iyiwak kkö'nè buaë, e' ta esepa muká ye' iyiwak kkö'nuk.

7 Nies José wá iyé Jacob mí kka-ché Egipto blú a. Jacob tö Egipto blú shké'wé er bua' wa. 8 Eta Egipto blú tö ie' a ichaké:

—¿Kos duas tso' be' ki?

9 Jacob iiuté:

—Ye' ki duas de cien eyök ki dabom mañayök (130) shkök wí a dià a. Kawö e' kë dör taié. E' tka ye' ki darérë. Erë kám ye' ki duas dò kos ye' yépa ki duas bak ekké.

10 E' ukuökí ta Jacob e' chéat Egipto blú a ta imíá. 11 Etá José tö ká bua'bua tso' Egipto, e' mé iyé ena iélpa a senoie wes Egipto blú tö iché es. Ká e' ate Ramsés. 12 Nies ie' tö chkewö meke iyamipa a kos ila'rla tso' u a u a ekké.

### José tö chkewö watué Egipto wakpa a

13 Ká ultane kë íyí wöriá, e' kuékí ketba kí tkérke poë. Ketba tö s'tteke taié Canaán ena Egip-to. 14 Chkewö tué Egipto wakpa tö ena Canaánwakpa tö, e' ské kos blé José tö Egipto blú u a. 15 Mik Egipto wakpa ena Canaánwakpa inuköl énewa seraqá, eta Egipto wakpa mía José ska' ta iché ia:

—iBe' sa' a chkewö mú! Kë sa' inuköl ta'ia. Kë idör bua' tö e' è kuékí be' tö sa' méttsa duökwa ketba a.

16 Eta ie' tö ie'pa iiuté:

—A' kë wá inuköl ta'ia, e' ta a' iyiwak tsúbitu ña, e' skéie ye' tö a' a chkewö meke.

17 Egipto wakpa wá kabaio ena obeja ena baka ena burro e' kos mí ie' a. E' skéie ie' tö chkewö mé ie'pa a dò duas ek. 18 Duas e' tka eta ie'pa míyalne ie' ska' ta iská ché ia:

—Be' wá ijcher buaë tö kë sa' wá inuköl ta'ia. Nies sa' iyiwak kos, e' dör be' icha. Sa' ká è tso'ia sa' wá ena sa' wakpa, e' è tso'ia sa' wá mè

be' a <sup>19</sup>Sa' wákpa taú. Sa' ká taú ñies. E' skéie iyiwö mú sa' a. Sa' kaneblomi sa' wákpa ká a Egipto blú a. Es sa' ate Egipto blú kanè mésopaie. Etá chkewö è memibö sa' a as kë sa' duòlur ketba wa ena sa' ká kë weir é ichók.

<sup>20</sup>Egipto wakpa tö iká watuétsa José a ketba kueki. Es Egipto ká kos de Egipto blú ulà a. <sup>21</sup>Nies Egipto wakpa kos ate blu' kanè mésopaie. <sup>22</sup>Ie'pa sacerdotepa ká e' è kë tone José wa. Egipto blú tö chkewö kakmeke ie'pa a, e' kueki ie'pa kë wa iká watonettsa.

<sup>23</sup>E' ukuökí tā José tö iché Egip- to wakpa a:

—A' wákpa kos ena a' ká kos e' to'ttsa ye' tö se' blú a, e' kueki i'ñe tā a' kos ate ie' ulà a. Iyiwö i' tsúmi a' tö tā ikuatkó. <sup>24</sup>Mik iwöne tā iyiwö tso' döka saco skel, eta itsá yötttsa saco et mè Egipto blú a. Iyiwö éyök ate e' dör a' a kuatkè, ñies a' yampiá ultane a ñanoie.

<sup>25</sup>Etá ie'pa tö iiuté:

—Be' tö sa' tsatké ketba ulà a. Be' er bua' sa' ta. E' kueki sa' e' chöke Egipto blú kanè mésopaie.

<sup>26</sup>Es José tö kawö mé Egipto wakpa a tö iyiwö tso' döka saco skel e' tsá yötttsa saco et mè Egipto blú a. I'ñe tā e' wekeia ie'pa tö es. Egipto sacerdotepa è kë kawöta iyiwö tsá muk Egipto blú a, ie'pa ká kë dë' Egipto blú ulà a e' kueki.

### Jacob tö ittē bata ché José a

<sup>27</sup>Es Israel aleripa e' tséat senuk Gosen, ká e' ate Egipto. Ká e' kos de ie'pa ulà a. Ee ie'pa alöne taijé. <sup>28</sup>Jacob sene'ia ká e' a duas döka

dabom eyök kí kul (17). Duas de ie' kí cien eyök kí dabom tkéyök kí kul (147).

<sup>29</sup>Mik ie' tö ittsé tö iduökewatke, etá José tsük patkéitö tā ichéitö ia:

—Moki be' er buaë chak ye' a, e' tā be' ulà múwá ye' tu' dikia iwa kkachoie tö moki i kiekeyö be' a e' waweraëbö. Ye' nu kë wötarwa Egipto. <sup>30</sup>Mik ye' blènewa mía ye' dëutöpa itökí, etá ye' nu yötttsa ká i' kí tsúmi wötewa ie'pa pö a.

Etá José tö iiuté:

—Es yö iweraë.

<sup>31</sup>Iyé tö iché ia:

—Ichó ña moki Skéköl wörki tö be' iweraë es.

Etá José tö ittē mé moki iyé a. Etá Jacob wömewa ika' kí tā Skéköl kikékaítö.

### Jacob er buaë ché José ala'r a

**48** <sup>1</sup>E' ukuökí tā ie'pa wa biyò debitü José a: “Be' yé duoke tso' suluë.” Etá José mía isauk ila'r böл mí iwa e' tā. <sup>2</sup>Mik ie'pa tö iché Jacob a tö José debitü be' sauk, etá ie' e' tkéka isulú wa ika' kí. <sup>3</sup>Etá ie' tö iché José a:

—Skéköl Diché Ta' Iyi Ulitane Tsata e' e' kkayë' ye' a ká kië Luz ate Canaán ee. Ee ie' er buaë ye' ye' a <sup>4</sup>tā ichéitö ña: “Ye' tö be' aleripa alöweraë taijé. Ie'pa döraë ká taijé e' wakpaie. Ká i' meraëyö ie'pa a, e' atdaë ie'pa ulà a kekraë michoë.”

<sup>5</sup>Be' ala'r böл, Efraín ena Manasés, e'pa kune kam ye' dö Egipto e' yoki. Ie'pa tsétköyö wes ye' wák ala'r es wes ye' ala'r Rubén ena Simeón dör ye' ala'r es. <sup>6</sup>E' kueki ká meraëyö ie'pa a wes ye' wák

ala'r a es. Ie'pa itöki be' ala'r skà kürmi, e'pa dör be' wák a. Erë ie'pa dör Efraín ena Manasés elpa, e' kueki ká ñe' kak döraë ie'pa ulà a ñies. <sup>7</sup>Mik ye' manét Padán-aram e' demi Canaán döketsatke Efrata, eta ee ñala kí be' mi blénewa ye' yöki. Ee ye' tö ie' nu blé'waat Efrata ñalé kí. (Iñe ta ká e' kiè Belén.)

<sup>8</sup>Mik Jacob tö José ala'r sué eta ichakéitö:

—¿Sepa dör yi?

<sup>9</sup>Ie' tö iiuté:

—I'pa dör ye' ala'r mé Skéköl tö ye' a ká i' kí.

Eta iyé tö iché ia:

—Ie'pa tsúbitu ye' ska' as ye' er bua' chò ie'pa a.

<sup>10</sup>Jacob kënewartke e' kueki iwöbla kë wawériä buaë. E' kueki José tö ila'r patkémi tsinet iyé o'mik. Eta Jacob tö italapa paklö'wé wöalta-ttsé. <sup>11</sup>E' ukuöki ichéitö José a:

—Ye' ibikeits tö ye' kë tö be'  
suepaia, erë Skéköl tö kawö mé ye'  
a be' ena be' ala'r suoie.

<sup>12</sup>Eta José tö ila'r skéttsa iyé o'mik tå iwöéwa dö ißki iyé dalioioie. <sup>13</sup>E' ukuöki tå ila'r böklö'wéwaiòt iulà a. Efraín mí José ulà bua'kka, Manasés mí José ulà bakli'kka. Es itsémitö iyé ska'. Eta Efraín atë Jacob ulà bakli'kka, Manasés atë Jacob ulà bua'kka. <sup>14</sup>Erë Jacob ulà bua'kka mékä Efraín dur ie' ulà bakli'kka e' wökir ki. Erë e' dör alà tsirla. Eta iulà bakli'kka mékaitö Manasés dur ie' ulà bua'kka e' wökir ki. Erë e' dör alà kibi. Es Jacob ulà tsétkö wi'ké iq'ké. <sup>15-16</sup>Eta ier bua' ché José a i' es:

“As Skéköl er buaë chò ala'r bölk i' a kekraë.

Ye' yépa bak Abraham ena Isaac, e'pa bak Skéköl e' dalöiök,  
e' tö ye' kkö'nami kuaë dö ikkë ta.

Ie' tö ye' tsatqué kekraë íyi sulusi ulà a.

As ala'r i' wa kë ye' chöwa sulitane éna kekraë.

Nies ye' yépa bak Abraham ena Isaac as e'pa kë chöwa sulitane éna kekraë.

As ala'r i' alör taië ká ultane ki.”

<sup>17</sup>Jacob ulà bua'kka mékä Efraín wökir ki, e' kë mène José a buaë. E' kueki ie' tö iyé ulà bua'kka e' klö'wéwa mèkä ilà kibi dör Manasés e' wökir ki. <sup>18</sup>E' dalewa ichéitö ia:

—iA yéwö, kë idör es! I' dör alà kibi. Be' ulà bua'kka mukä i' wökir ki.

<sup>19</sup>Erë iyé kë wa iöne es. Ie' tö iché ia:

—iA alà, e' jcher ye' wa, e' jcher ye' wa! Ie' alördaë taië, ie' döraë kékëpa taië. Erë itsirla ék e' döraë kékëpa taië shute ikibi tsata. Nies ie' aleripa döraë ká taië e' wakpaie.

<sup>20</sup>Es e' è diwö wa Jacob er buaë skà ché italapa a i' es:

—Mik Israel aleripa er buaë cheke nì a eta ie'pa tö icheraë nì a i' es: ‘As Skéköl er buaë chò be' a wes Efraín ena Manasés e'pa a er buaë yéne es.’

Es Jacob er buaë ché Efraín a, Manasés a imène, e' tsata. <sup>21</sup>E' ukuöki tå José a ichéitö:

—Ye' duökewatke erë Skéköl tö a' kkö'nераë. Ie' wä se' aleripa mira-ne Canaán wé se' yépa bak senuk ee. 22 Ye' tö ká bua'ie méat be' a' ime'bakyö be' élpa a' e' tsata. Ká e' kiè Siquem. E' yé'ttsa ye' tö amor-reowak ulà a' nippè wa.

**Jacob tö ittè bata ché ila'r kos a**  
**49** <sup>1</sup>Jacob tö ila'r kié e' ska'  
 ta ichéitö ie'pa a: "A' e'  
 skówä ye' o'mik. Í tköraë a' ta e'  
 wà chekeyö a' a:

2 "A ala'rla, a' e' skówä tsinet ye'  
 ttò ttsök,  
 ye' dör a' yé. Ye' ttò ttső.

3 "A Rubén, be' dör ye' alà kibi.  
 Be' dör ye' diché tsá e' alé.  
 Be' dalöiérta' taië, be' diché ta'  
 taië be' élpa tsata.

4 Erë iññe ta kë idör es.  
 Be' dör wes di' yöliie es kë  
 iwöklör yës.  
 Be' tö ye' daloseo'wa. Be'  
 sene'ka ye' alaköl ta.  
 E' kueki be' kë dalöiérpaia  
 wes ko'k es.

5 "Simeón ena Leví, e'pa dör nì  
 élpa;  
 ie'pa tabè tso' nippoie è.

6 iWé ie'pa e' dapa'uke ee ye' kë  
 shkak!  
 Ie'pa tö wëpa kötulur kësik è  
 kueki.  
 Baka wë'ñe klökicha blublu e'  
 télorakito öanas.

7 Ie'pa kësik dör suluë ichökle  
 e' kueki ie'pa kawö tköraë  
 suluë.

iYe' tö ie'pa aleripa powerami  
 senuk ielpa malepa aleripa  
 shua wì a dià a!

8 "A Judá, be' élpa tö be' kikera-  
 ka taië.

Be' bolökpa klö'wewaraë be'  
 tö ikuli' a,  
 es be' e' alörakä ie'pa ki.  
 Be' élpa ekka e' wöörawa iski  
 be' dalöioie.

9 iA Judá, be' dör ye' alà!  
 Be' dör wes ma'name alà es.  
 Mik ì ttéitö ta' ikaté one,  
 eta ie' e' wöéwa e' téwa iski  
 wes ma'name këchke es.  
 ¿Yi dòmi ie' tsiriuk?

10 Judá aleripa döraë blu'paie  
 taië kékraë dò mik iblú  
 chök de eta.  
 Blu' e' ttò iüteraë sulitane tö.

11 Ie' tö iburro pupula mueke  
 uva shua.

Nies idatsi' skuöke uva diò wa.

12 Ie' wöbla dör daloloë uva diò  
 tsata.  
 Ie' kà dör saruruë baka tsu'diö  
 tsata.

13 "Zabulón serdaë dayë kkömk.  
 E' taië kanò irirke ese kë tso'.  
 E' ká kkö dör rawa Sidón kkömk.

14 "Isacar dör wes iyiwak tso'  
 dalì oie diché ta' taië ese e'  
 mütér enuk iwé a es.

15 Mik ie' isuë tö ká e' dör buaë  
 senoie nies enoie,  
 eta ie' tsiwö ki dalì dekané  
 kaneblök.  
 Ie' e' mëttsa kaneblök kanè  
 mésoie, kë tkine e' ki.

- 16 "Dan ditséwö shua s'shulirdaë buaë yësyësë wës Israel aleripa e' ditséwö malepä es.
- 17 Dan döraë wës tkabë chôk tso! ñala kkò a tö kabaio kuè iklö a ta iwák brutane itsiwökka ese es.
- 18 "iA Jehová, ye' tso! be' panuk tö ye' tsatkó!
- 19 "Gad ppök ñippökawakpa döraë taië. Erë ie' tö ie'pa pperaë, itötieraë.
- 20 "Aser ká kí chkë kata' buaë tskirdaë. I wörke kos e' dör buaë shute mène buaë blu'pa a.
- 21 "Neftalí dör wes suli alaki dur áie ala'rla ta' bua'buaala ese es.
- 22 "José dör wës burro kañiru suë dur di' tum kkömic es, wës burro pupula kañiru suë dur ká tukir kí es.\*
- 23 Kuaböt namépa éna sulu iar, ie' kí kuaböt uyérakitö kësik wa.
- 24 Erë ie' ulà diché darërë; e' wa ie' wa ishkame' shuirikar darërëe, kë ulà shtrirta'wa yës. Skéköl tö ie' a diché e' mé. Skéköl e' dör Jacob Kéköl e' diché ta' taië.

- Skéköl e' dör Israel aleripa kkö'nukwak. Ie' tö Israel aleripa tsatkeke.
- 25 A José, be' yé e' Kéköl tö be' kimeke këkraë. E' dör Skéköl Diché Ta' Íyi Ulitane Tsata, Ie' er buaë chöraë be' a. Kalí buaë patkeraë ie' tö be' daliwö ki. Nies be' a di' atdaë buaë íyök ki as be' dalikua talar buaë. Be' aleripa alakölpa ala'r döraë taië, nies be' iyiwak döraë taië. Es Skéköl er buaë chöraë be' a.
- 26 Be' yé er buaë yë! be' a, e' tköka ye' yé er buaë yë! ye' a e' tsata. Skéköl tö José shukit ielpa shua iwökirie, e' a ie' er buaë chò michoë wes kabata yöbië kë erta'wa es.
- 27 "Benjamín dör wës chichi kañiru kësikie ese es; bla'mi ta iyiwak ttewaitö katè, tsáli ta ibata watiéwaitö."
- 28 E'pa dör Israel ditséwöpa daia itöki döka dabom eyök kí böt (12), e' yépa tsa. Es ie'pa yé tö ie'pa a iché mik ie' tö ittè bata ché ie'pa a eta.
- Jacob blénewa**
- 29 Jacob tö iché ila'r wëpa a: "Ye' blérkewa e' kewö dökewatke. Mik ye' blénewa, eta ye' nu blówa ákuk

\* 49.22 José dör wës burro...ká tukir kí es: Nies hebreoie ttè e' mane'wëmisö i' es: José dör wes kal tskirke di' kkömic es; tkaka iké kköiëule e' mik buaë, nies iwördäë taië.

a ká wé ye' yamipa nu bléne ee. Pö e' atē wém kiè Efrón dör hititawak e' ká a. <sup>30</sup>Ká e' atē Macpelá Mamré wöshäe. Ká e' atē Canaán. Ká e' ena ákuk e' wato'ttsa Efrón tö Abraham a as Abraham tö iyamipa nu blö ee. <sup>31</sup>Ee Abraham ena ilaköl Sara, ñies Isaac ena ilaköl Rebeca, e'pa nu bléne. Ee ye' tö ye' alaköl Lía, e' nu blö'wá ñies. <sup>32</sup>Ká e' ena ákuk e' wato' hititawak tö.

<sup>33</sup>Mik Jacob tö ttè e' kos ché one età ie' e' téwane ika' ki ta iblénewan mia idéutöpa itöki.

**50** <sup>1</sup>Età José tö iyé nu paklö'wewá wöalattséitö ta iié taijé. <sup>2</sup>E' ukuöki ta ie' tö egiptowak dör s'nu kanéukwakpa e'pa kié iyé nu kapeyökwa as kë inurwá. Età es ikanewérakítö. <sup>3</sup>Ikanewérakítö döka ká dabom tkeyök (40 días), ekké kawö kiane ikanewoie e' kueki.

Egiptowak tö ischó eriaitsé kawö dökä dabom kuryök (70 días). <sup>4</sup>E' ukuöki ta José tté Egip-to blú kueblupa ta, ta ichéitö ie'pa a:

—A' éna er bua' chak ye' a, e' ta a' yú ichök Egipto blú a <sup>5</sup>tö mik ye' yé duökewatke, età ie' tö ye' ka' ie' a ttè muk Skéköl wörki tö inú blerawayö ákuk kaneo'at ie' wák tö atē Canaán e' a. E' kueki kawö mú ña ie' nu tsomí blèwá ee. Mik ye' ibléwá ta ye' dotkene.

<sup>6</sup>Età Egipto blú tö iiuté:

—Be! yú be' yé nu blökwa wes ie' tö be' a iki' es.

<sup>7</sup>Età José mia iyé nu blökwa. Egiptowak kueblupa kos e'pa míyal ie' ta. <sup>8</sup>Jacob yamipa ekka ena José yamipa ekka ena ielpa e'pa kos mí ñies. Ie'pa ala'r ena ie'pa iyiwak e'pa è atéat Gosen. <sup>9</sup>Nies pë' mí taijé karreta ki ena kabaio ki. Es pë' mí taijé José ta. <sup>10</sup>Mik ie'pa demi ká kiè Goren-ha-atad atē tsinet di' Jordán diwö tskirke e' kker ee, età ee ie'pa ultane tö Jacob nu wötérkewa e' kewö tkö'wé dalò taijé wa. Ee José tö iyé eriaitsé dökä ká kul.

<sup>11</sup>Mik canaánwak serke ee, e'pa tö Jacob nu wötérkewa kewö tkö'wé e' sué, età ie'pa tö iché: "Mokí egip-towak tö s'nu wötérkewa e' kewö tkö'weke dalò taijé wa." E' kueki ká e' kiè méká ie'pa tö Abel-Misraim.\* Ká e' atē tsinet di' kiè Jordán e' kkömik.

<sup>12</sup>Es Jacob ala'r tö iyé nu kanewé wes ie' tö iyé ie'pa a es.

<sup>13</sup>Ie'pa wá inú mítser Canaán iblé-warakítö ákuk yöule Abraham wá iyamipa pöie e' a. E' atē Macpelá. E' wato'ttsa hititawak kiè Efrón tö Abraham a. Ká e' atē Mamré wöshäe. <sup>14</sup>Mik José dëutö nu bléne one, età ie' biteqane Egipto. Ie' elpa ena pë' ultane mìne ie' ta e'pa kos biteyalne ie' ta.

### José ëlpa suanékane ie' vöki

<sup>15</sup>Jacob blénewan e' ukuöki ta José ëlpa tö ibikeitsé: "Isale-ma José éna sulu se' arke. I kos wamblë! se' tö ie' ki e' skéie se' we'ikeraëitö." <sup>16</sup>E' kueki ie'pa ttè

\* 50.11 Abel-mizraim: Hebreoie ká kiè e' wá kiane chè egiptowak schó eriaitsé.

mémi ie' a: “Kám be' yé blérwá,  
 17 eta ie' tö sa' a iché tö ichó be'  
 a: ‘I kós suluë wamble' sa' tö be'  
 ki, e' olo'yó sa' ki.’ E' kueki sa'  
 kköchò be' a tö e' olo'yó sa' ki.  
 Sa' tö be' yé e' Kéköl dalöieke e'  
 kueki.”

Mik biyò e' demi José a, eta ie'  
 ié siaré. 18 Eta ielpa demi iwoki.  
 Ie'pa wöewá dò iski idalöioie ta  
 ichérakitò:

—I' sa' de be' wörki. Sa' dör be'  
 kanè mésopa.

19 Eta ie' tö ie'pa iuté:

—Kè a' suanuk. Ye' kè a a'  
 shulinuk Skéköl skéie. 20 A' íyi  
 sulu bikeits wamble ye' ki, eré e'  
 mane'wétsane Skéköl tö buaë se'  
 ki. E' wa taië pël tsatkëne il'ñe ta.  
 21 E' kueki kè a' suanuk. Chkewö  
 meraëyö a' a ena a' ala'r kós a.

Es ie' tö ie'pa a iché er buaë wa.  
 E' tö ie'pa ttsë'wéne buaë.

### José blënewá

22 José ena iyé alikpö yamipa  
 e'pa sene'ia Egipto. Ie' sene' döká  
 duas cien eyök ki dabom eyök  
 (110). 23 Ie' tö ilà Efraín talapa e'  
 ala'r suéia. Ñies ie' tö ilà Manasés  
 e' alà kiè Maquir e' ala'r suéia.

24 Ká et ta ie' tö iché ielpa a: “Ye'  
 duökewá e' kewö kianeiq tsir. Eré  
 Skéköl wák tö a' kímeraë. Ie' tö  
 a' yelurdaë ká i' ki. Ká yé'bakitö  
 mè Abraham a ena Isaac a ena  
 Jacob a e' a a' tsemiraëitò.” 25 Eta  
 ie' tö ielpa kié as ie'pa ttè mù ie'  
 a Skéköl wörki. Ie' tö ie'pa a iché:  
 “Skéköl tö a' yeratqa ká i' ki. Mik e'  
 tka, eta ye' sik tso' blëule e' tsúmi  
 e' ta.”

26 Mik ie' blënewá Egipto, eta  
 ie' ki duas de cien eyök ki dabom  
 eyök (110). Ie' nu kapeyanewá as kè  
 inurwá e' ienewá s'nu kélkuö a.

# Israel aleripa yërulune Egipto

## Éxodo 1.1-20.21

Yëkkuö i' kiè si'kuaie *Éxodo*, e' wà kiane chè *yérulune*. Käm sa' tö yëkkuö i' mane'ù *séraa se'ie*, ishaböts maneo' sa' tö dò capítulo 20.21. Ì maneo' sa' tö e' blatëule mañat tsiní. Et tsiní e' dör capítulo et dò capítulo dabom eyök kí skel (1-15). Iét tsiní e' dör capítulo dabom eyök kí teröl dò capítulo dabom eyök kí pàköl (16-18). Ibata ék tsiní e' dör capítulo dabom eyök kí *sulitu* dò capítulo dabom böyök (19-20).

Et tsiní e' tö se' a ipakè tö ì bak Israel aleripa ta ie'pa mía Egipto e' tsatkök ketba yöki e' ukuöki. Kewe ie'pa kawö tka buaë Egipto. Ie'pa ena ie'pa iyiwakalone taië. Ká tka taië ta egyptowak suanémi dö' Israel aleripa e' alòkä ie'pa kí. E' kueki ie'pa tö Israel aleripa sué suluë ta iwe'ikérakitö siarë. Ie'pa kérakitö kaneblök darérëe kë patueta!. Erë Skéköl tö ie'pa weirke e' sué ta wëm kékaitö eköl ie'pa yoktsa egyptowak ulà a. Wëm e' kiè Moisés, e' è tö yëkkuö i' kit. Skéköl e' kkayë! ie' a ta iwák kiè yë'itö ia. E' ukuöki ta ipatkéitö Israel aleripa yoktsa Egipto. Moisés tö iché Egipto blú a tö Israel aleripa ómine. Erë Egipto blú kë éna Skéköl ttò iutak. E' kueki Skéköl tö egyptowak we'iké siarë tsakjë ie' diché taië wa. E' wa ie' tö ikkaché ie'pa a ena Israel aleripa a tö yi dör ie'. Skéköl tö Israel aleripa tsatkée yétsa Egipto ie' diché taië wa, e' wa ie'pa de ie' ichaie ena ie' de ie'pa Kékolie. Ie'pa yénettsa Egipto e' kewö tkö'uk ie' tö ie'pa patké duas bit ekkë.

Iét tsiní e' tö se' a ipakè tö wes Skéköl tö ie'pa wëttse' ena ie'pa kime'itö shkötktö ká sir poë wé kë yi serky! ee. Erë ie'pa tö ie' tsiriwé taië kabene wa, erë ie' tö ie'pa tié ena ie'pa tsatkéitö ibolökpa yöki er bua! wa.

Ibata ék tsiní e' tö se' a ipakè tö Skéköl ena Israel aleripa ttè me' nì a. Mik ie'pa de Sinaí kékata a, eta ie' tö ittè dalöiëno mé ie'pa a dökä dabop. Ie' tö iché ie'pa a tö ie'pa tö ie' ttè dalöiëno e' kós iuté buaë, e' ta ie'pa döraë ie' wák ichachókie ena ie'pa a ie' er buaë chöraë ká malepa wakpa tsatä.

**Israel aleripa tso' Egípto  
e'pa weine taië**

**1** <sup>1-4</sup> Israel kiè ñies Jacob e'  
ala'r dë'mi Egípto ie' ta, e'pa  
kos yamipa ta!. Ie'pa kiè Rubén,  
Simeón, Leví, Judá, Isacar, Zabu-  
lón, Benjamín, Dan, Neftalí, Gad  
ena Aser. <sup>5</sup> Jacob yamipa mìne ie'  
ta Egípto e'pa döka dabom kuryök  
(70) seraas. Erë José, e' tso'tke Egip-  
to kewe iyamipa yoki.

6 Kawö tka taië, eta José ena  
iëlpa blérulune. Ñies iyamipa dë'mi  
Egípto ie'pa ta, e'pa kos blérulune  
se. <sup>7</sup> Erë Israel aleripa alóne taië, e'  
kueki ie'pa de diché ta! taië. Ie'pa  
tso' Egípto wa'ñie.

8 E' ukuöki ta blu' ské tkénéka  
eköl e' kë wä José pakë jcher. Ie'  
tö iché egiptowak a: <sup>9</sup> "Ye! ttò ttsó.  
Israel aleripa dör taië. Ie'pa diché  
tkökä se' diché tsata, dö' ie'pa  
e' alöka se' ki. <sup>10</sup> Mik se' bolökpa  
ñippòmi se' ta, e' ta dö' ie'pa ñi  
wöiöka se' ppök se' bolökpa ta, ta  
es imi'miyal se' yoki. E' kueki se' tö  
ibikeitsó bua'iewa tö wes se' tö ie'pa  
wöklö'wèmi as kë ikí alör taië."

11 E' kueki egiptowak tö iwökirpa  
patké Israel aleripa we'ikök kanè  
darërë wa as ieriardak. Ie'pa tö iké-  
rak ká yuök böt chkewö dapa'woie  
Egípto blu a. Ká e' kiè Pitón ena  
Ramsés. <sup>12</sup> Israel aleripa we'ikeke  
ie'pa tö siarë, erë ikí alörkerak taië.  
E' kueki egiptowak suarke taië  
ie'pa yoki.

<sup>13</sup> Egiptowak tö ie'pa kë kaneblök  
kësik wa. <sup>14</sup> E' tö ie'pa eriawé taië.  
Ikérakitö skaychka yuök shtrót  
shtrót u yuoie. Ñies ikérakitö  
kaneblök kañikà kanè ultane uk.  
Es Israel aleripa kos we'ikérakitö  
siarë. <sup>15</sup> E' kíie ta Egípto blú tté  
alakölpa kiè Sifrá ena Puvá e'pa ta.  
Ie'pa dör hebreowak<sup>\*</sup> alakölpa alà  
kürke e' kanéukwakpa. Ie' tö iché  
ie'pa a:

<sup>16</sup> —Mik a' tö hebreowak alaköl-  
pa alà kürke, e' kaneweke, eta isaú  
ði iwák dör? Iwák wém e' ta ittòwa.  
Iwák dör alaköl, e' ta imúat, kë  
ittarwa.

<sup>17</sup> Erë alakölpa e'pa tö Skéköl  
dalöieta!. E' kueki ie'pa kë wä Egípto  
blú ttò iutène wes itö iché es. Ie'pa  
ala'r wëpa méat ttsé'ka. <sup>18</sup> Eta Egip-  
to blu tö ie'pa kiére ta ichéítö iarak:  
—¿Iók a' tö iwamblé es? ¿Iók a'  
tö ala'rла wëpa e' méat ttsé'ka?

<sup>19</sup> Ie'pa tö iiuté:  
—Hebreowak alakölpa kë alà kur  
wes egiptowak alakölpa es. Ie'pa  
alakölpa dör darërë. Ie'pa alà kur  
bet buaë. Mik sa' demi, eta ie'pa  
alà künnetke.

<sup>20,21</sup> Es Israel aleripa kí alönëmi  
taië. Ie'pa diché kí iérke taië. Sifrá  
ena Puvá e'pa tö Skéköl dalöieta!.  
E' kueki Skéköl tö ie'pa kímé, ala'r  
méitö ie'pa a taië.

<sup>22</sup> Eta Egípto blu tö ikueblupa  
ultane a kawö mé tö hebreowak  
ala'rla wëpa kune kos e' ómi di' ki.  
Alakölpala è müat.

\* 1.15 hebreowak: E' kiè ñies Israel aleripa.

**Moisés kune'**

**2** <sup>1</sup>E' kewö ska' ta wäm eköl dör Leví aleri, e' senéwa alaköl dör Leví aleri ñies ese ta. <sup>2</sup>Eta ie' alà skà kéka' e' dör wäm. Eta imì tö isuë tö alala buaala, e' kueki ibléwaitö dò si' mañat. <sup>3</sup>Mik imì kë a ilà bléneia, eta ie' kkö yulé et, patié buaë kiöchka tso' chkuä'chkuä ese wa as kë a di' tköwa. E' ukuökì ta alala iéwaitö kkö a, méreitö di' kiè Nilo e' kkömic kækö tso' e' shua. <sup>4</sup>Eta alala kutà e' duéser kamië ikí sauk tö wes idömi.

<sup>5</sup>E' ukuökì ta Egipto blú e' alà busi mía kuök di' a. E' dalewa tayëpa tso' ie' wä ikanè mésopaie e'pa shkò iéter ákitö ki. Eta ie' tö kkö sué kækö shua. Ikanè mésopa eköl patkémítö itsükbitü. <sup>6</sup>Eta ie' tö ikkökékà ta isuë tö alala wäm a'riä eköl e' iuke. Ie' isuë er siärë wa ta ichéitö:

—Bëbëla i' dör hebreowak.

<sup>7</sup>E' wösha bëbëla kutà de ta ichéitö ia:

—¿Be' ki ikiane tö ye' mi' tayë hebreowak yulök eköl be' a alala se kkö'noie as itala'ùitö itsu' wa?



*Moisés mì tö iiéka kkö a itsatkoie. (Éxodo 2.3)*

<sup>8</sup>Età Egipto blú alà busi tö iiuté:  
—Be' yú iyulök.

Età bëbëla kutà mía imì yulök  
ta idebitu iwa. <sup>9</sup>Età Egipto blú alà  
busi tö iché alà mì a:

—Alà i' tsúmi kkö'nú ña tala'ú ña  
buaë. Ye' tö be' patueke iki. Età imì  
wa ilà mítser tala'wè. <sup>10</sup>Mik alà de  
bërie, età imì wà ibitetserne Egip-  
to blú alà busi a. Età ie' tö iklö'wé  
wes ie' alà ekka es. Ikiè mékaitö  
Moisés. \* Ie' tö iché:

—Ye' tö iyé'ttsa díl a.  
E' kueki ie' tö ikiè méka es.

### Moisés tso' Egipto e' tkashkar

<sup>11</sup>Moisés kibineone. Ká et ta ie'  
mía iyamipa hebreowak, e'pa pakök.  
Età ie' tö isué tö iyamipa weirke  
siarë kaneblök darërë. Età ie' isué tö  
egiptowak eköl tso' iyami hebreo-  
wak eköl e' ppök siarë. <sup>12</sup>Età ie' ká  
sué ká wa'ñe. Kè ie' wà yi suné. E'  
dalewa ie' tö egyptowak e' ttewa inú  
wötewa ie' tö ttsa'wö a. <sup>13</sup>Bule es  
ta ie' skà e' yétsa, età ie' isué tö  
hebreowak ból tso' nippök ñita. Ie'  
tö iéköl tso' eköl ppök, e' a iché:

—¿Iók be' tso' be' yami ppök?

<sup>14</sup>Età hebreowak e' tö iiuté:

—¿Yi tö be' tkéka sa' wökirie sa'  
shulökawakie? ¿Be' tso' ye' ibikeitsök  
ttewa wes egyptowak kötwabö es?

Mik ttè e' ttsé Moisés tö, età e'  
tö ie' suawé. Ie' ibikeitsé: “Ie'pa  
wa ijchenewa tö ye' tö egyptowak  
kötwabö.” <sup>15</sup>Mik e' jchenewa Egipto

blú wa, età ie' tö Moisés ttök-  
wà patké. Erë Moisés tkashkar ie'  
yöki, mía sénuk ká kiè Madián  
ee. Ee ie' e' tkére díl tum biule  
kkömkik.

<sup>16</sup>Ká e' a sacerdote\* serke eköl  
kiè Reuel. E' alà busipa dökä kul. E'  
diwö wa alà busipa e'pa dë'bitu di'  
chkök kulë' a mè iyé iyiwak a yè.  
<sup>17</sup>Età iyiwak kkö'nukwakpa skà  
wëpa debitu busipa trë'wémi. Età  
Moisés e' kéka e' tö busipa tsatkée.  
Età ie' tö díl mé iyiwak a. <sup>18</sup>Mik  
ie'pa demine iyé ska!, età iyé tö  
ie'pa a ichaké:

—¿I wa i'ñe a' dene bet?

<sup>19</sup>Ie'pa tö iiuté:

—Egiptowak eköl tö sa' tsatkée  
iyiwak kkö'nukwakpa ulà a. Ie' di'  
yétsa mé iyiwak a.

<sup>20</sup>Iyé tö iché ia:

—¿Wé wëm e'? ¿Iók a' iméat ekör-  
la? A' yú itsukbitu as ichkò se' ta.

<sup>21</sup>Es Moisés e' tséat sénuk wém  
e' ska!. E' ukuöki ta Reuel tö ilà  
busi kiè Séfora, e' mé Moisés a  
senowaije ita. <sup>22</sup>Età Moisés alà kéka  
eköl kiè mékaitö Guersón\* wà chéi-  
tö: Ká i' ki ye' dör o'ka.

<sup>23</sup>Duas tka taië, età Egipto  
blú blénewa. Erë Israel aleripa  
kköchökeia taië kékraë kanè darë-  
rëe kueki. Ie'pa kköchöke taië e'  
ttsé Skéköl tö. <sup>24</sup>Ttè me'bak ie' tö  
Abraham a ena Isaac a ena Jacob  
a e' wà tsá detke kanewë. E' kueki  
ie' tö ibikeitsé tö Israel aleripa

\* 2.10 Moisés: Hebreoie s'kiè e' wà kiane chè iyéuletsa.

\* 2.16 sacerdote: Kè se' wà ijcher yësyësë tö sacerdote wëse e' dör, erë kè idör wes i'ñe itsö! es.

\* 2.22 Guersón: Hebreoie s'kiè e' wà kiane chè ká bánet wakpa.

kimeraëyö i' tə. 25 Ie' tö ie'pa sué ta ie' éna iæne tö i tköke ie'pa tə.

**Skéköl tö Moisés patké  
Israel aleripa tsatkök**

**3** 1 Ká et ta Moisés tso' inuaki Jetró, \* e' iyiwak kkö'nuk. Inuaki kaneblöke sacerdoteie Madián. E' dalewa ie' wə inuaki

iyiwak mítser ká sir po, e' jaishet, demi Skéköl kékata kiè Horeb\* ee. 2 Etä ee Jehová biyöchökaw bua'ie e' e' kkachewa ie' a bö' wörkueie taië kal tsir elka shua. Moisés tö isuewa bua'ie tə isué tö kal wöbatasekä taië bö'ie, erë kë iñarwa. 3 Etä Moisés tö ibikeitsé: "¿Wì dör i? Ye' mí isauk i kuekj kal wì kë ñarwa."



*Skéköl e' kkaché Moisés a bö' wörkueie taië kal tsir elka shua. (Éxodo 3.2)*

\*3.1 *Jetró*: E' dör Moisés nuaki. Ie' kiè ñies Reuel ena Hobab.

\*3.1 *Horeb*: E' kiè ñies Sinaí.

<sup>4</sup>Mik Jehová tö isué tö Moisés dökewatke tsinet bö' ñarke e' o'mik isauk, eta Skéköl tö ichaké:

—iA Moisés! iA Moisés!

Moisés tö iiuté:

—¿I?

<sup>5</sup>Etä Skéköl tö iché ia:

—Kè be' dökwa tsinet. Wé be' dur e' ké dör batse'r, e' kueki be' klö-kkuö yótsa. <sup>6</sup>Ye' dör be' yé e' Kéköl ena be' yépa bak ká iaqë kiè Abraham, Isaac ena Jacob e'pa Kéköl.

Moisés suane Skéköl saukwa, e' kueki ie' e' wöpabakéwá. <sup>7</sup>Eré Jehová tö iché ia:

—Ye' isué tö wépa dör ye' icha tso' Egipto e'pa weirke siaré. Ie'pa kköchöke tajé ikanè wökirpa ulà a e' ttséyö. Ye' wá ijcher buaë tö iweirkerak siaré. <sup>8</sup>E' kueki ye' dë'ttsa ie'pa tsatkök egip towak ulà a. Ye' tö ie'pa yeratتسا ká e' ki. Ye' wá ie'pa miraë ká tajé buaë ese ki. Ká e' ki íyi ultane tskir buaë, iwà wör buaë shute.\* Ká e' ki pëi tso' taié. E'pa ditséwöpa dör canaanwak, hititawak, amorreowak, fere seowak, heveowak, ena jebuseowak. <sup>9</sup>Ittsó, ye' tö Israel aleripa kköchöke e' ttsé. Ye' tö isué tö egip towak tö ie'pa we'ikeke siaré. <sup>10</sup>E' kueki ye' tso' be' patkök Egipto blú ska' Israel aleripa dör ye' icha e'pa yokulur Egipto a. Be' yú Egipto.

<sup>11</sup>Eré Moisés tö iché ie' a:

—¿Yi ye' dör e' döwami Egipto blú wörki Israel aleripa yokulur ie' ulà a?

<sup>12</sup>Ie' tö iiuté:

—Be' kè mi'l'pa ekörla. Ye' tso' be' ta be' kimuk. Mik be' tö Israel aleripa yélur Egipto a, eta a' tö ye' dalöieraë kabata i' ki. E' wa be' wá ijcherdaë tö ye' wák tö be' patkë!

<sup>13</sup>Eré Moisés tö ie' iuté:

—Dö' ye' mía ta ye' tö iché ie'pa a: “A' yépa bak iaiaë e' Kéköl tö ye' patkë' a' tsatkök.” Dö' ie'pa tö ye' a ichaké: “¿Ima e' kiè?”, e' ta ci chèmi ye' tö ie'pa a?

<sup>14</sup>Etä ie' tö iiuté:

—Ye' dör yi tso'tke e!. Ichó ie'pa a tö Ye' Tso'tke e' tö ye' patké a' ska'.

<sup>15</sup>Skéköl tö ikí ché Moisés a:

—Nies ttè i' chó Israel aleripa a: ‘Se' yépa bak ká iaiaë kiè Abraham, Isaac ena Jacob, e'pa Kéköl kiè Jehová\* e' tö ye' patké a' tsatkök.’ Ttè e' chó ie'pa a. Ye' kiè dör Jehová i' dör ye' wák kiè kekraë. Kiè i' wa ye' kirdaë aishkuö ta kekraë.

<sup>16</sup>Be' yú Israel aleripa kueblupa dapa'uk ta ttè i' chó ie'pa a: ‘Jehová, dör se' yépa bak ká iaiaë kiè Abraham, Isaac ena Jacob e'pa Kéköl e' e' kkayë' ye' a ta ye' a iyë'itö tö ie' tö a' weirke siaré egip towak ulà a e' sué. <sup>17</sup>Nies ye' a iyë'itö tö a' tsatkeraëitö egip towak tso' a' we'ikök e'pa ulà a. Ie' wá a' miraë ká buaë ese ki. Ká e' ki íyi ultane tskir buaë, iwà wör buaë shute. Ká e' wakpa ditséwöpa dör canaanwak, hititawak, amorreowak, fere seowak, heveo-

\*<sup>3.8,17</sup> Ká e' ki íyi ultane tskir buaë, iwà wör buaë shute: Ttè e' dör Hebreoie i' es: Wé baka tsu'diö ena bul alí shköke di'ie.

\*<sup>3.15</sup> Jehová: Hebreoie kiè e' wi dör ye' tso'tke.

wak, ena jebuseowak.' Ttè e' chô ie'pa a. <sup>18</sup>Israel aleripa kueblupa tö be' ttò ttserä tå be' yú ie'pa tå Egipto blú ska' tå ttè i' chô ie' a: 'Jehová dör hebreowak Këköl, e' dë'bitu sa' wöki. E' kueki sa' ömi ká mañat shkar ekkë wé kè yi ku' ese ska' iyiwak ña'uk Jehová dör sa' Këköl e' dalöioie.' Ttè e' chô ie' a. <sup>19</sup>Erë ye' wá ijcher buaë tö ie' kè tò ie'pa a kawö e' mepa éanas. Ye' kawötä ie'pa yöktsä ye' diché taië e' wa. <sup>20</sup>E' kueki ye' diché taië e' kkacheraéyö egip towak a. <sup>21</sup>I weraéyö ie'pa shua e' tò ie'pa tkiweraë. E' wa ie'pa we'ikeraéyö siarë. E' ukuöki tå Egipto blú tò Israel aleripa erami as imi'yal. <sup>22</sup>Nies ye' tò egip towak keraë ie'pa dalöiök taië. E' kueki mik a' e' yokettsa Egipto a, etå a' kè minuk ulà wöchka. <sup>23</sup>Israel aleripa e' alakölpa kos e'pa tò íyi yöule inukölchka wa ö orochka wa ö datsi' ese kak kieraë egip towak alakölpa serke bánet ö iserkerak Israel aleripa u a esepa a, e' kos ieraë a' ala'r tö. Es a' tò íyi bua'bua tso' taië Egipto e' yerattsa ie'pa ulà a.

## 4

<sup>1</sup>Erë Moisés tò iiuté:  
—Ie'pa kè tò ye' ttò klö'wëpa. Kè itö ye' ttò iutepa. Ie'pa tò ye' a icheraë: "Jehová kè dë'bitu be' ska!"

<sup>2</sup>Etå Skëköl Jehová tò ie' a ichaké:

—Ì a'tser be' wá ulà a?

Moisés tò iiuté:

—Ye' shko kéli.

<sup>3</sup>Jehová tò iché ia:

—Iuyömi iski!

Etå Moisés tò iuyémi iski. E' wösha tå ishko kéli yönane tkabëie. Moisés e' skéu iyöki bet 4'erë Jehová tò iché ia:

—Iklö'úwa ikirë bata a ulà wa!

Etå Moisés tò iklö'wéwa eta imíane shko kéliie.

<sup>5</sup>Etå Jehová tò iché ia:

—Mik be' dene Egipto, etå be' tò iú es as ie'pa tò iklö'ù mokí tò ye' dör a' yépa bak ká iaiæä kiè Abraham, Isaac ena Jacob e'pa Këköl e' e' kkaché be' a. <sup>6</sup>I' tå be' ulà tiúwa be' batsi' a.

Etå Moisés ulà tiéwa ibatsi' a. Mik ie' ulà yétsa, etå ie' isué tò iwölinekä saruruë duè kiè lepra e' wá. <sup>7</sup>Etå Skëköl tò iché ia:

—Be' ulà skà tiúwane be' batsi' a.

Etå Moisés tò iwé es. Mik ie' ulà yétsa, etå ie' ulà buanene buaë. <sup>8</sup>E' ukuöki tå Skëköl tò iché ia:

—Ì kkachéyö be' a kewe e' kè klönerak iwá, nies ie'pa kè wá be' ttò iutene, e' tå iët skà ú. Isalema e' klö'wëmi ie'pa tò. <sup>9</sup>Erë e' kos wa ie'pa kè wá be' ttò klöne be' ttò iutene e' tå di' chkökä di' kibi a e' tötsä ká sí ki. Mik e' tënëtsä ká sí ki etå di' miaraë pëie.

<sup>10</sup>Moisés tò iiuté:

—iAyëwë! iA ye' Këköl! Ye' siarala, kè tto buaë. E' kè dör iñë ème be' ttöke ye' tå eta. Es ye' wák dör ká iaiæä. Ye' ttò enaë. Ye' kè a s'iutér buaë.

<sup>11</sup>Erë Jehová tò iiuté:

—¿Yi tò a' a kkò méat? Ye' wák tò a' méat kè tto ö kè kukuò wattsér. Nies a' wöbla kè wawër ö a' wöbla wawër e' kos méat ye'

wák tö a' a. <sup>12</sup>E' kueki be' yú. Mik be' ttöke, eta ye' tso' be' ta. Ì kiane ye' ki tö be' tö iché, e' kkacheraë ye' tö be' a.

<sup>13</sup>Erë Moisés tö iché ia:

—iA kékëpa! Ye' kkochò be' a tö o'ka patkómi ye' skéie.

<sup>14</sup>Eta Jehová ulunekä ie' ki ta ichéitö ia:

—E'ma be' él Aarón dör Leví aleri ñima e' bikeitsè be' tö? Ye' wá ijcher tö ie' ttö buaë. Ie' tso'tke ñalä ki datse be' ska!. Mik ie' tö be' sué, eta e' tö ie' ttsé'wëmi buaë. <sup>15</sup>Ì kos chak be' éna e' kos chô Aarón a as ie' tö ichòne. Ye' wák tö a' böl kímeraë as a' ttö buaë. Ì kiane ye' ki tö a' tö iwë e' kkacheraë ye' tö a' a. <sup>16</sup>Aarón ttöraë be' skéie. Ie' döraë be' ttekölie wes be' dör ye' tteköl es. Ì cheke ye' tö be' a e' cherane be' tö ie' a ta e' cherane ie' tö a' yamipa a. <sup>17</sup>Shko kéli se tsúmi. E' wa ì kè or yi a ese wéraëbö. Ie'pa wökrardawä iweblök.

### Moisés míane Egipto

<sup>18</sup>E' ukuöki ta Moisés míane inuäki, Jetró ska' ta ichéitö ia:

—Kawö mú ña. Ye' kawötä shkömine Egipto ye' yamipa saük tö itsoi'iarak ttsé'ka.

Eta Jetró tö iiüté:

—Ekékë. Be' shkó wöbla wa.

<sup>19</sup>Moisés tso'ia Madián, eta Jehová tö iché ia:

—Yi ki be' kiarke ttèwa Egipto, e'pa blérulune. Kè ì dalò ta'ia be' ki ee. E' kueki be' yúne Egipto.

<sup>20</sup>Eta Moisés tö ilaköl ena ila'r tkékä burro ki ta imýal Egipto. Ie' wa Skéköl shko kéli dami ulà a.

<sup>21</sup>Jehová tö ie' a iché:

—Mik be' demi Egipto, eta ye' tö diché me'bak be' a ì kè or yi a ese woie, e' wakaneú kröröö Egipto blú wörki. Erë ye' tö ie' a er suluë meraë as kè ie' tö Israel aleripa òmine. <sup>22</sup>Eta ttè i' chô ie' a: ‘Jehová tö iché be' a: Israel aleripa dör wes ye' alà wëm tsá es. <sup>23</sup>Ye' tö be' a ichétké tö ie'pa ómine as imi'yalne ye' kikökka. Erë be' kè wá ie'pa a kawö mène as imi'yal. E' kueki be' alà wëm tsá e' tterawayö.’ Ttè e' chô ie' a.

<sup>24</sup>Moisés ena iyamipa minia ñala ki eta wé ie'pa kapökerö ñalä ki, ee Jehová débitu Moisés ska' ittökwa.

<sup>25</sup>Erë Moisés alaköl Séfora e' tö ák di'diè klö'wéwá e' wa ilà tottola kkuölit tée tsir. E' kkuölit takla pé wa ie' tö Moisés klö patié ta ichéitö Moisés a: “Moki be' tso'ia ye' wëmie pé i' wa.”

<sup>26</sup>Eta Jehová tö Moisés émi. (Séfora tö ilà tottola kkuölit tée tsir e' kueki ie' tö iché Moisés a tö ‘be' tso'ia ye' wëmie pé i' wa.’)

<sup>27</sup>Eta Jehová tö Aarón a iché: ‘Be' yú Moisés ñalé yulök wé kè yi serkü' ee.’ Aarón mía Moisés ñalé yulök ta ie' ikué Skéköl kékata a. Ee ishke'wéitö wöalattsè wa. <sup>28</sup>Eta ì kos chök Jehová tö Moisés patkë!, e' pakéne Moisés tö Aarón a. Nies ì kè or yi a ese kkayë! Jehová tö Moisés a wawë e' kos pakéneitö Aarón a.

<sup>29</sup>E' ukuöki ta ie'pa böl míyal Israel aleripa kueblupa dapa'ukka kapakök ie'pa ta. <sup>30</sup>Ì kos yé! Jehová tö Moisés a e' pakéne Aarón tö Israel aleripa kueblupa a. Nies ì kè

or yi a ese kkayé! Jehová tö Moisés a e' kos wé Moisés tö Israel aleripa ultane wörki.

<sup>31</sup> Israel aleripa tö Aarón ttè klö'wé. Mik ie'pa éna iane tö Jehová éna ie'pa dalérke, ñies tö ie'pa weirke siärë e' suéítö, eta ie'pa e' wöéwa iski ie' dalöiök.

### Moisés ena Aarón tté Egipto blú tå

**5** <sup>1</sup>E' ukuöki tå Moisés ena Aarón míyal Egipto blú ska' tå ichéítö iå:

—Jehová dör Israel aleripa e' Kéköl, e' tö iché be' a tö e'pa dör ie' icha. Ie'pa ómi a imí'yal wé kë yi serku' ee' kawö tkö'uk ie' dalöioie.

<sup>2</sup>Erë Egipto blú tö iiuté:  
—¿Yi dör Jehová? Ye' kë wå ie' suule. Ye' kë kawötä ie' ttò iutök. Ye' kë kawötä Israel aleripa ökmi. E' kueki kë ye' tö Israel aleripa epami.

<sup>3</sup>Eta ie'pa tö iché:  
—Hebreowak Kéköl e' dë'bitü sa' wöki. E' kueki sa' ómi ká mañat shkar ekkë wé kë yi kú' ese ska' iyiwak ña'uk sa' Kéköl Jehová e' a idalöioie dö' ie' tö sa' wömëttsa duökwa duè a ö tabè a.

<sup>4</sup>Erë Egipto blú tö iiuté:  
—A Moisés. A Aarón. ¿Ióök a' ki ie'pa kiane wöklö'wë ikanè a? iA' ena a' yamipa yúshka kaneblök!

<sup>5</sup>Ñies Egipto blú tö iché ie'pa a:  
—I'ñe tå Israel aleripa tso' taië ká i' ki, eta ¿wes a' ki ikiane tö ie'pa kë kaneblöia?

<sup>6</sup>E' diwö wa Egipto blú tö iché ikanè wökirpa a:

<sup>7</sup>—Tala'chka kösi e' kë tsarbituia Israel aleripa a skäuchka shtrót shtrót yuoie wës se' tö ikane-wérö es. As ie'pa wákpa mi' itsuk.  
<sup>8</sup>Erë ikórapak iyuök kos kekraë iyuekerakitö ekkë, kë wöarwa yës. Ie'pa bikénak è taië, e' kueki ie'pa arkerak: 'iMishka iyiwak ña'uk se' Kéköl a!' <sup>9</sup>Ie'pa kí kó kaneblök darérëe. Kanè mü ie'pa a taië as kë itö kachë iutö.

<sup>10</sup>Eta ikanè wökirpa míyal tå ichéítörapak Israel aleripa a: —Egipto blu' tö kawö mé tö kë a' a tala'chka kösi tsarbituia. <sup>11</sup>I'ñe ta a' wakpa kawötä iyulök wé a' ikué, e'ma ee' itsúbitu. Erë a' kawötä iyuök kos a' iyueke kenet ekkë, kë wöarwa.

<sup>12</sup>Eta Israel aleripa míyal Egipto ká wa'ñe kachka ese yulök tala'chka skéie. <sup>13</sup>Kanè wökirpa tö ikérak kaneblök késik wa tå ichekerakitö ie'pa a kekraë: "A' tö iyuö kos a' tö iyueke kenet mik sa' tö tala'chka mekeia a' a ekkë." <sup>14</sup>Egiptowak tö Israel aleripa wëlepa me'kä ñi wöki-rie. E'pa ppeke egiptowak tö ttsa' bata wa tå ichekerakitö ie'pa a:

—¿I' kueki a' kë wå iyöne chki ena i'ñe wës kenet es?

<sup>15</sup>Eta Israel aleripa kanè wökirpa míyal kköchök Egipto blú wöa. Ie'pa tö iché iå:

—A kékëpa. ¿I' kueki be' tö be' kanè mésopa we'ikë es?

<sup>16</sup>Tala'chka kë mèneia sa' a, erë ie'pa kí ikiane tö sa' tö iyuë kos sa' a tala'chka merkeia tå iyörke ekkë. Ie'pa tö sa' ké kaneblök késik wa. Ñies sa' ppekeitö siärë. iA kékëpa, be' wakpa iane iwiie!

<sup>17</sup>Egipto blú tö ie'pa iúté:

—iA' dör bikëwakpa wöchka! E' kueki a' icheke kekraë: “lMishka ká bánet iyiwak ná'uk Jehová a!” <sup>18</sup>iA' yúshka kaneblök! Eré kë tala'chka kösí merku'a a' a, erë a' kawöta iyuök kos kënet a' tö iyueke ekkë.

<sup>19</sup>Mik Israel aleripa kanè wökirpa a iyëne tö ie'pa kawöta iyuök kekraë kos iyuekeräkitö kënet ekkë, etä ie'pa eriane taië. <sup>20</sup>Ie'pa e' yélur Egipto blú ska' de wé Moisés ena Aarón tso' ie'pa panuk ee. <sup>21</sup>Ie'pa tö iché iqrak:

—I' wamble a' tö sa' kí e' kueki as Jehová tö a' we'ikò. Egipto blú ena ikueblupa e'pa éna sa' ar suluë. A' iane iwiie. E' dör wes a' wakpa tö tabè mé ie'pa a' as sa' ttòwa ie'pa tö es.

### Moisés kkoché Skëköl a

<sup>22</sup>Etä Moisés tö iché Jehová a:

—A Jehová. ¿Iók be' tö Israel aleripa we'ikeke siarë? ¿Iók be' tö ye' patkë'bitu íe? <sup>23</sup>Mik ye' dë'bitu ttök Egipto blú ta' be' ttò wa, etä ie' tö wépa dör be' icha e'pa kí we'iké siarë. Dò ikkë ta' iweirkeia iwák suë. Erë be' kë wá i one yës ie'pa tsatkoe.

**6** <sup>1</sup>Etä Jehová tö ie' iúté:

—Kukuie bö isueraë tö wes ye' tö Egipto blú we'ikeraë. Ye' diché taië e' wa ye' tö ie' keraë ie'pa ökmi. Ye' diché wa ye' tö ie' keraë ie'pa patkökmi iká kí.

### Skëköl tö Moisés skà patkémine Egipto blú ska'

<sup>2</sup>Ñies Skëköl tö iché Moisés a:

—Ye' dör Jehová. <sup>3</sup>Mika ye' e' kkayë' Abraham a ena Isaac a ena Jacob a, etä ye' iché tö ye' dör Skëköl Diché Ta' Íyi Ulitane Tsatä e!. Erë ye' kiè Jehová, e' kë yëne ye' wa ie'pa a. <sup>4</sup>Ye' tö ttè me' ie'pa a. Ye' tö iyë'at ie'pa a tö ká kiè Canaán e' merayö a' aleripa a. Ee ie'pa bak senuk wes o'ka ká es. <sup>5</sup>I'ñe ye' wa ijcher tö ie'pa weirke siarë. Egiptowak tö ie'pa keke kaneblök darérëe kësik wa. E' kueki ttè me'bak ye' tö ie'pa a e' wawékeyö i'ñe ta. <sup>6</sup>E' kueki be' yú ichök ie'pa a tö ye' dör Jehová. Egiptowak tö a' we'ikeke siarë kanè darérëe wa, e' kos ulà a' yeratssä ye' tö. Ye' tö egiptowak we'ikeraë siarë ye' diché taië e' wa. Es a' tsatkeraë ye' tö egiptowak ulà a. <sup>7</sup>Ye' tö a' klö'weraë ye' ichapaie. Ye' döraë a' Këköl. A' wa ijcherdaë tö ye' dör Jehová. Ye' dör a' Këköl. A' wa ijcherdaë tö ye' tö a' yé'lur egiptowak bak a' we'ikök kanè darérëe wa e' ulà a. <sup>8</sup>Ye' wa a' miraë ká muk ye' kablë' Abraham, Isaac ena Jacob e'pa a ee. Ká e' meraë ye' tö a' a. E' atdaë a' a. Ye' dör Jehová e' tö iché es.

<sup>9</sup>Etä Moisés tö ttè e' skà chéne Israel aleripa a. Erë ie'pa eriarke taië kanè darérëe kueki. E' kueki ie'pa kë wá ittò iütëne. <sup>10</sup>Etä Jehová tö iché Moisés a:

—Be' yú ichök Egipto blú a tö kawö mü ye' ichapa a e' yoktsa Egipto a.

<sup>11</sup>Erë Moisés tö Jehová iúté:

—Israel aleripa kë tö ye' ttò iütë, etä ñwes Egipto blú ye' ttò iütëmi? Ye' kë tto buaë.

<sup>13</sup>Età Jehová tö Moisés ena Aarón e'pa patkémi ichök Israel aleripa a ena Egípto blú a tö "Jehová tö sa' patké Israel aleripa yökultur Egípto."

#### Moisés ena Aarón ditséwöpa

<sup>14</sup>I' dör Moisés ena Aarón ditsé-wö datse iyépa wa:

Rubén e' dör Jacob alà wém tsá, e' ala'r dör Hanoc, Falú, Hesrón ena Carmí. Ditséwöpa datse ie'pa wa e'pa kos dör Rubén aleripa.

<sup>15</sup>Simeón ala'r wëpa dör Jemuel, Jamín, Óhad, Jaquín, Sóhar ena Saúl. Saúl mì dör cananeawak. Ditséwöpa datse ie'pa wa e'pa kos dör Simeón aleripa.

<sup>16</sup>Leví sene' duas dökä cien eyök kí dabom mañayök kí kul (137). I'pa dör ila'r wëpa ikibi ék dò ibata ék: Guersón, Quehat, ena Mera-rí. <sup>17</sup>Guersón ala'r wëpa dör Libní ena Simí. <sup>18</sup>Quehat sene' duas cien eyök kí dabom mañayök kí mañat (133). Ie' ala'r wëpa dör Amram, Ishar, Hebrón ena Usiel. <sup>19</sup>Mera-rí ala'r wëpa dör Mahli ena Musí. Ditséwöpa datse ie'pa wa e'pa kos dör Leví aleripa.

<sup>20</sup>Amram sene'wá iyéchke kiè Jocabed e' tå. E' dör Moisés ena Aarón mì. Amram sene' duas cien eyök kí dabom mañayök kí kul (137).

<sup>21</sup>Ishar ala'r wëpa dör Coré, Néfeg ena Zicrí.

<sup>22</sup>Uziel ala'r wëpa dör Misael, Elsaafán ena Sitrí.

<sup>23</sup>Aarón sene'wá alaköl kiè Eliseba e' tå. E' dör Aminadab alà busi

ena Nahasón kutà. E' ala'r wëpa kiè Nadab, Abihú, Eleasar ena Itamar.

<sup>24</sup>Coré ala'r wëpa dör Asur, Elca-ná ena Abiasaf. Ditséwöpa datse ie'pa wa e'pa kos dör Coré aleripa.

<sup>25</sup>Eleasar dör Aarón alà, e' sene'wá Futiel alà busi tå. E' alà kune kiè Finees. E'pa kos datse iyé tsá kiè Leví e' wa.

<sup>26</sup>Aarón ena Moisés e'pa patké! Jehová tö Israel aleripa yökultur Egípto a dapauleka wës nippök-wakpa taië e' dapa'lù es. <sup>27</sup>Aarón ena Moisés e'pa ut Egípto blú tå as ie' tö kawö mù ie'pa a Israel aleripa yöktarak Egípto a.

#### Aarón tté Egípto blú tå Moisés skéie

<sup>28</sup>Mik Jehová tté Moisés tso' Egípto e' tå, <sup>29</sup>età ichéitö iä:

—Ye' dör Jehová. Ì kos chekeyö be' a e' skà chónë Egípto blú a.

<sup>30</sup>Erë Moisés iüté:

—A Jehová, ye' kè tto buaë, età ñwës Egípto blú ye' ttò iütëmi?

**7** <sup>1</sup>Età Jehová tö iché Moisés a:

—Ye' ttò ttsö. Be' él Aarón ttöraë Egípto blú tå be' skéie wes ye' ttekölpa ttöke ye' skéie es. <sup>2</sup>Ì kos chekeyö be' a, e' cherane be' tö Aarón a tå Aarón tö iché-rane Egípto blú a as ie' tö kawö mù a' a Israel aleripa yöktarak Egípto a. <sup>3</sup>Erë ye' tö Egípto blú er darë'wékewa. Ì kè or yi a ese wéravö Egípto ye' diché taië e' wà kkachioie. Ie'pa wökrardawa isauk. <sup>4</sup>Egípto blú kè tö a' ttò iütëpa. Erë ye' tö egiptowak we'ikeraë siarë

ye' diché tajë e' wa. Es ye' tö Israel aleripa yeralur. Ie'pa dör ye' a wes nippökwakpa tso' tajë es. Ie'pa dör ye' icha. <sup>5</sup>Egiptowak we'likéyö siarë ye' diché tajë wa ñies Israel aleripa yéttsayö e' ukuökì tå egip-towak tö isueraë tö mokië ye' dör Jehová.

<sup>6</sup>Moisés ena Aarón e'pa tö iwa-kanewé węs Jehová tö iché ie'pa a es. <sup>7</sup>Mik ie'pa tté Egipto blú tå eta Moisés kì duas tso' dabom paryök (80). Aarón kì duas tso' dabom paryök kì mañat (83).

### Aarón shko kéli yönane tkabèie

<sup>8</sup>Jehová tö iché Moisés ena Aarón a:

<sup>9</sup>—Egipto blu' tö a' a iché: Ì kë or yi a ese ú, e' tå ichöö Aarón a tö ishko kéli iuyómi iskì as iyönar tkabèie Egipto blú wörki.

<sup>10</sup>Etä Moisés ena Aarón mía Egipto blú ska' etä ie'pa iwé węs Jehová tö iché ie'pa a es. Aarón tö ishko kéli uyémi iskì Egip-to blú ena ikuéblupa e'pa wörki tå iyönanе tkabèie. <sup>11</sup>Etä Egip-to blú tö wëpa wà íyi jcher tajë ena ie'pa awápa esepa tsük patké. Ie'pa tö ikanewé ñì suë isiwé wa. <sup>12</sup>Ie'pa shko kéli uyémi iskì ñies tå iyönanе ñies tkabèie. Erë Aarón shko kéli tö Egipto shko kéli katé-warak seraa. <sup>13</sup>Erë Egipto blú er téwà darërëeë węs Jehová tö iyë' es. Ie' kë wà ie'pa ttò iutëne yës.

### Jehová tö di' yuée péie

<sup>14</sup>E' ukuökì tå Jehová tö iché Moisés a:


—Egipto blu' er téwà darërëeë. Kè ie' éna Israel aleripa akmine. <sup>15</sup>Bule bla'mi mik ie' mía di'lka, eta be' yú ttök ie' tå. Ie' panú di'lka. Shko kéli yönane tkabèie e' kéli tsúmi. <sup>16</sup>Ie' a ichöö: 'Jehová dör hebreowak Kéköl, e' tö ye' patké ichöök be' a tö ie' ala'r ómine as imi'rak ie' kikökka kà wé ki kë yi serkü' ee. Ikkë tå kàm bö ie' ttò iutò yës.' <sup>17</sup>E' kuékì Jehová tö ye' patké ichöök be' a: 'Ire' bö isueraë tö moki ie' dör Jehová. Mik ye' tö di' ppé shko kéli a'tser ye' wà e' wa, eta di' miaraë pé wöchka. <sup>18</sup>Nima duölurdaë. Di' alaburdakå suluë. Egiptowak kë a di' e' yanuk, tajë ie'pa dakò'wekaraëitö.'

<sup>19</sup>Ñies Jehová tö iché Moisés a:

—Ichöö Aarón a tö ie' shko kéli klö'ú tå ikökä di' kos tso' ie'pa wà yè ese tsákä. Di'la, batsöri, di' wöble, di' bló tso' ese kos tsákä ie' ulà kökä as imi'la péie. iEs imiaraë pé wöchka di' bló ultane yüule kal wa ö ák wa ese a!

<sup>20</sup>Etä Moisés ena Aarón iwaka-newé węs Jehová tö iché ie'pa a es. Aarón tö ishko kéli kékä e' wa di' ppéitö Egipto blú ena ikuéblupa wöshäe. Etä di' kos ekkë mía péie. <sup>21</sup>Nima kos duolur. Di' alane-wà suluë kë yar egiptowak a. iKá wa'ñe di' mía pé wöchka!

<sup>22</sup>Erë egiptowak awápa tö iwé ñies isiwé wa. E' kuékì Egipto blú er téwà węs Jehová tö iyë' es. Ie' kë wà Moisés ena Aarón ttò iutëne yës. <sup>23</sup>Ie' míane iu a. Kè tkine íyi kos kì. <sup>24</sup>Egiptowak kos kë a di' yar e' kuékì ie'pa tö di'



*Bukuë' alöneka tajë Egipto. (Éxodo 7.25-8.15)*

wöblë bié di' kkömic di' manene  
yottsaie.

**Jehová tö egyptowak  
we'iké siaré bukuë' wa**

25 Jehová tö di' kiè Nilo e'  
suluó'wq e' kí ká de kul,  
**8** 1 etä ie' tö iché Moisés a:  
—Be' yú Egipto blú ska' tå  
ichó iá: 'Jehová tö ye' patké ichök  
be' a i' es: Ye' ichapa ómine as imi'  
ye' dalöiök. 2 Kè be' tö ie'pa èmi, e'  
ta ye' tö bukuë' alöweraka tajë a'  
ká kí a' we'ikoie. 3 Di' Nilo a bukuë'  
alördæ tajë shuteë. E' e' yöralur di'  
a mirawa be' u a. Idörawa weshke  
wé be' kapöke ee, be' ká kí. Ñies  
idörawa be' kueblupa u a ena be'  
yamipa kos e'pa u a. Ie' tiurawa wé  
a' ulöke ese a ena wé a' pan wötuöke  
ese kos a. 4 Bukuë' urdaká be' kí  
ena be' kueblupa kí ena kos be' ká  
wakpa tso' e'pa kí.'

5 Eta Jehová tö Moisés a iché:

—Ichó Aarón a tö ie' ulà ena ie'  
shko kéli kókä di' kibi ena di' tsitsir  
ena batsöri kos ekkë tsakä as  
bukuë' döka di' a Egipto kos wà  
iökka.

6 Aarón tö ishko kéli kéka Egipto  
di' kos tsakä. Eta Egipto ká wa'ñe  
bukuë' alöneka tajë. 7 Eré egypto-  
wak awápa tö iwé nì sùe isiwé wa.  
Ie'pa tö bukuë' alöwékä ñies. 8 E'  
ukuöki ta Egipto blú tö Moisés ena  
Aarón e'pa tsuk patké ta ichéitö  
ie'pa a:

—A' tö ikió Jehová a tö bukuë'  
yólur ye' kí ena ye' ká wakpa kos  
kí ñies. E' yéluritö etä ye' tö a'  
yamipa émimi as imi' iyiwak ña'uk  
Jehová dalöioie.

9 Etä Moisés tö Egipto blú iuté:

—Ichó ña tö òMik be' kí ikiane  
tö ye' tö ikiè Jehová a be' kí ena  
be' kueblupa kí ena be' ká wakpa  
kos kí as bukuë' kè tö a' tsiriwëia ta  
iatdaë di' è a?

<sup>10</sup>Egipto blú iiuté:

—Ikiő Jehová a bule.

Età Moisés tö iché ie' a:

—E' wà tköraë wes be' kí ikiane es as be' wà ijcher tö kë yi dör wes sa' Kéköl Jehová es. <sup>11</sup>Bukuë' e' yölurdane be' u a atdaë di' è a. Kè itö be' tsiriwepaiä. Ñies be' kueblupa ena be' ká wakpa kos kë tsiriwepaiäitö.

<sup>12</sup>Età Moisés ena Aarón e' yétsa Egipto blú wöwa. E' ukuöki ta Moisés ikié Jehová a tö bukuë' patkë'bitu Egipto blú kí e' trë'umi ie' yoki. <sup>13</sup>Età Jehová tö iwakanewé wes Moisés tö ikié ia es. Bukuë' tso' egiptowak u a iupamik u'rki e' kos duolur. <sup>14</sup>Egiptowak tö bukuë' nu kos shté dapa'wé taië. E' nu alabunekä suluë ká e' kos a. <sup>15</sup>Erë mik Egipto blú tö isuë tö ie' tsatkëne bukuë' ulà a, età ier téwane darërëe wes Jehová tö iyë' es. Kè ie' wà Moisés ena Aarón ttò iutëne.

### Mulu'shwak patké taië Jehová tö ie'pa ki

<sup>16</sup>E' ukuöki ta Jehová tö iché Moisés a:

—Ichö Aarón a tö ie' shko kéli kókä siwa' kí e' wa íyök po ppö as imi'a mulu'shwakie Egipto wa'ñe.

<sup>17</sup>Età iwakanewérakitö es. Aarón tö shko kéli kékä ta íyök po ppéítö iwa età íyök po tso' Egipto wa'ñe e' mía mulu'shwakie e' ienekä se' kí ñies iyiwak kos kí. <sup>18</sup>Egiptowak awápa ima'wé mulu'shwak alöükka isiwé wa, erë kë iwà yönë ie'pa a. E' dalewa mulu'shwak ienekä taië ie'pa ki ñies iyiwak kí. <sup>19</sup>Età iwépa tö iché Egipto blú a:

—i'l' dör Skéköl kanè moki!

Erë ie' er téwà darërë wes Jehová tö iyë' es. Kè ie' wà ie'pa ttò iutëne.

### Ó iékä taië Skéköl tö ie'pa ki

<sup>20</sup>E' ukuöki ta, Jehová tö iché Moisés a:

—Bule bla'mi Egipto blú mi'ke dl'kka, e' kuékä be' e' kókä bla'mi ta be' yú ñì kükwä itä. Ichö ie' a: 'Jehová tö ye' patké ichök be' a i' es: Ye' ichapa ómine as imi' ye' kikökka.

<sup>21</sup>Kè be' tö ie'pa èmine, e' ta ye' tö ó taië patkeraë be' kí ena be' kueblupa ki ena kos be' ká wakpa tso' e'pa ki. Ó iérdakä egiptowak u kos ekké kí dò íyök kí. <sup>22</sup>Mik e' wà de a' kí, età ó patkeraëyö a' è kí. Wé ye' ichapa serke Gosen ee ó kë suepasö yës. Es be' éna iarmi tö moki ye' dör Jehová, e' durse ká i' kí. <sup>23</sup>Be' ká wakpa e'pa è we'ikeraë ie' tö. Erë ye' ichapa kë we'ikepayö. E' wà tköraë bule.'

<sup>24</sup>Es Jehová tö iwakanewé. Ó dettsa chkaie Egipto blú u a ena ikueblupa u a ñies Egipto wa'ñe e' a. Ó tö Egipto ká kos klö'wéwa se, sulu'wéwa yës.

<sup>25</sup>Età Egipto blú tö Moisés ena Aarón tsük patké ta ichéítö ie'pa a:

—A' yú, e'ma a' Kéköl a iyiwak ña'uk. Erë kë a' e' yokulur Egipto a.

<sup>26</sup>Moisés tö iiuté:

—Kè e' dör buaë es. Sa' iyiwak ña'wéke sa' tö sa' Kéköl Jehová e' a, e' dör iyiwak dalöieke a' tö skékölle ese. A' tö sa' sué iyiwak ese ña'uk, e' ta a' tö sa' ttewämi ák wa.

<sup>27</sup>Sa' kawötä shkök dò ká mañat dò

wé kè yi serku' ese ska'. Ee sa' tö iyiwak ña'weke sa' Kéköl Jehová a wes kawö méatitö sa' a es.

<sup>28</sup>Egipto blú tö iché:

—A' kè mìne kamië shute, e' ta ye' tö a' èmimirak wé kè yi serku' ese ska', iyiwak ña'uk a' Kéköl Jehová e' a. A' Kéköl Jehová a ikiö ye' ki.

<sup>29</sup>Moisés tö iiuté:

—Mik ye' e' yétsa íe, eta ye' mía Jehová a ikiök be' ki as ó pormi be' yoki ena be' kueblupa yoki ena be' ká wakpa kos e'pa yoki. Eré kè be' tö sa' kitö'ukia. Kè be' tö Israel aleripa wöklö'uk as imi' iyiwak ña'uk Jehová a.

<sup>30</sup>Mik Moisés e' yétsa Egipto blú wöwa, eta ie' ikié Jehová a. <sup>31</sup>Eta Jehová tö iwé wes Moisés tö ikié ie' a es. Es ó po'wémiitö Egipto blú yoki ena ikueblupa yoki ena iká wakpa kos e'pa yoki. Kè ó ateia etkla wéia. <sup>32</sup>Eré Egipto blú er skà téwane dareré. Kè ie' wa Israel aleripa anemi.

### Jehová tö egyptowak iyiwak ttélur

**9** <sup>1</sup>E' ukuöki tą Jehová tö iché Moisés a:

—Be' yú ttök Egipto blú tą, tą ichó ia: 'Jehová dör hebreowak Kéköl, e' tö iché i' es: Ye' ichapa ómine as imi' ye' kikökka. <sup>2</sup>Be' kè tö ie'pa èmine, be' tö ie'pa wöklö'wekeia, <sup>3</sup>e' tą ye' tö duè mekaraë be' iyiwak kos e' ki ye' diché tajé wa. Be' kabao, be' burro, be' kameio, be' baka ena be' obeja ekkë kos duölurdaë. <sup>4</sup>Eré Israel aleripa

iyiwak ultane kè duöpalur etö wéia. Es ye' tö ikkacheraë tö ie'pa dör ye' ichapa.'

<sup>5</sup>Eta Jehová tö ikewö méwā i' es:

—E' kos weraëyö bule.

<sup>6</sup>Bule es tą Jehová tö iwé. Egiptowak iyiwak kos e' duolur. Eré Israel aleripa icha kè du'wa etö wéia. <sup>7</sup>Egipto blú tö Israel aleripa icha səuk patké eta ie' isué tö moki Israel aleripa icha kè du'wa etö wéia. Eré ie' er kitewa dareré. Kè ie' wa Israel aleripa a kawö mène as imi'rak.

### Jehová tö duè méka egiptowak ki skuëkie

<sup>8</sup>E' ukuöki tą Jehová tö iché Moisés ena Aarón a:

—Muluchka tso' bö'kkö a e' klö'ü tą as Moisés tö iuyò siwa' ki Egipto blú wörki. <sup>9</sup>Muluchka e' po ardaë Egipto kos e' ki. E' tskirdane ie'pa ki skuëkie ñies iyiwak ki.

<sup>10</sup>Eta Moisés ena Aarón muluchka klö'wé bö'kkö a tą imia Egipto blú ska' tą e' wörki Moisés tö muluchka uyé siwa' ki. Eta egyptowak mik imoneka skuëkie. Ñies iyiwak kos mik imoneka skuëkie. <sup>11</sup>Egipto awápa ki skuëk tskineka taië wes imalepa es, e' kueki ie'pa kë dë! Moisés wörki. <sup>12</sup>Eré Jehová tö Egipto blú er darë'wéwa as kë itö Moisés ena Aarón ttö iutö wes ie' tö iyë! es.

### Mò wösi seseë ese patké Jehová tö egyptowak ki

<sup>13</sup>E' ukuöki tą Jehová tö iché Moisés a:

—Be' e' kókä bule bla'mi etä be' yú Egipto blú a ichök: 'Jehová dör hebreowak Kéköl, e' tö ichè be' a i' es: Ye' ichapa ómi as imi'rak ye' kikökkä.<sup>14</sup> Kë be' wä ye' ttò iuténe i' ta, e' ta ye' tö íyi sulusi kos patkeraë be' ki ena be' kueblupa ki ena a' wakpa kos e' ki. Es be' wä ijcherdaë tö kë yi ku' ye' tsata ká wa'ñe.<sup>15</sup> Ye' mú kí ikiane, e'ma ye' tö íyi sulusi me'kabak be' ki ena be' yamipa ultane ki a' eukwa ká i' ki.<sup>16</sup> Erë ye' wä be' tso'iq ttsë'ka as be' tö ye' diché tajë e' sañ, ñies as yi dör ye' e' tté pakar ká wa'ñe.<sup>17</sup> Erë be' er dör suluë kekraë. Kë bö ye' ichapa Israel aleripa émi.<sup>18</sup> Bule ikkë mò wösi seseë ese patkeraëyö a' ki tajë. E' dardaë tajë a' ki tköka kenet idarke Egipto e' tsata.<sup>19</sup> Mò wösi ardaë e' tö a' tso' u'rki ena a' iyiwak kos tso' kañikä e' ttémilur se. E' kueki a' iyiwak ena i' kos tso' a' wä kañikä e' blök patkó u dikia as itsatkér.

<sup>20</sup> Etä Egipto blú kueblupa welepa suane Jehová ttò yoki. E'pa tö iiyiwak blé, ñies ikanè méso-pa blé u dikia.<sup>21</sup> Erë imalepa kë wä Jehová ttò klöne, e'pa tö icha méat u'rki.<sup>22</sup> Etä Jehová tö Moisés a' iché:

—Be' ulà kókä siwa' ki as mò wösi seseë ese dar tajë Egipto kos a. E' ardaë ie'pa ki ena iiyiwak ki nies idaliwö tso'rak iwä e' ki.

<sup>23</sup> Mik Moisés tö shko kéli kéka siwa' ki, etä Jehová tö alá bla'wé tajë wöñawéítö tajë döttsa iyök ki etä mò wösi seseë ákwöie e' patkéítö Egipto kos a.<sup>24</sup> Es Jeho-

vá tö mò wösi seseë ese patké tajë Egipto ká wa'ñe a. Etä mò wösi ese darke tajë ena ká wöñarke tajë, kë iwöklörtä!. Kë yi wä e' sçule yës Egipto.<sup>25</sup> Etä mò wösi e' bitesha tajë i' kos tso' ká áie a' ki, se' ki ena iyiwak ki ñies. Dalì kuá kos péluritö sulu'wéluritö. Kal tso' ká wa'ñe e' ulà jchërolone.<sup>26</sup> Erë ká kié Gosen, wé Israel aleripa serke, e' a mò wösi kë dane yës.

<sup>27</sup> Etä Egipto blú tö Moisés ena Aarón tsuk patké ta' ichéítö ia:

—Ire' yo' isué tö ye' e' wamble suluë. Jehová e' ttè dör mokë. Eta ye' ena ye' ká wakpa sa' iane iwiie.<sup>28</sup> Taië alá blarke ñies mò wösi darke tajë e' kë dalë'ttsëneia sa' a. Jehová a ikió tö iwöklö'úne, e' ta ye' tö a' ekemi. Kë yo' a' wöklö'wëja.

<sup>29</sup> Etä Moisés tö iuté:

—Ye' e' yétsa' ká i' a ta bet ye' ikieke Jehová a, etä mò wösi ena alá wöñarke kos e' wöklordawa as be' wä ijcher tö Jehová dör ká wa'ñe e' wák.<sup>30</sup> Erë ye' wä ijcher buaë tö be' ena be' kueblupa kam tö Sa' Kéköl Jehová e' dalöiò.

<sup>31</sup> Etä daliwö kié lino e' tso' wör-kuaie ena cebada e' wö ta'tke, e' kueki iweinewa se.<sup>32</sup> Erë daliwö kié trigo ena centeno, kë e' dë' wes kam iwörkua bur e' kueki.

<sup>33</sup> Mik Moisés e' yétsa' ká e' a míá bánet, etä ee' ie' tö ikié Jehová a. Etä bet ta mò wösi kë daneia ñies ká kë wöñaneia. Kal tajë e' kë yëneia.<sup>34</sup> Mik Egipto blú tö isué tö kalí kë yérkul'ia, mò wösi kë darkul'ia ena alá kë blarkul'ia,

etá ie' e' wambléne suluë. Kè ie' è er darënewä ñies ikueblupa. <sup>35</sup>Es Egipto blú er téwä darérëe. Kè iwa Israel aleripa a kawö mène as imi'yal wes Jehová tö iyë'iä Moisés ttè wa es.

**Jehová tö ditski  
patké taië Egipto**

**10** <sup>1</sup>E' ukuökì tå Jehová tö Moisés a iché:

—Be' yúne Egipto blú ska!. Ye' tö ie' ena ikueblupa er téwä darérëe as ie'pa tö isaqü tö ye' diché taië, e' wa ì kë or yi a ese wè ye' tö taië. <sup>2</sup>Ye' tö ie'pa er téwä darérëe as be' tö ipakò be' ala'r a ena be' talapa a tö wes egyptowak we'ikéyö ñies wes ì kë or yi a ese wéyö taië ie'pa wörki. Es a' ulitane wä ijcher tö ye' dör Jehová.

<sup>3</sup>Eta Moisés ena Aarón míyal Egipto blú ska! eta ichéitö iä:

—Jehová dör hebreowak Kéköl, e' tö ichè i' es: “¿Mik be' tö ye' ttò dalösewemirö? Ye' ichapa ómi as imi' ye' kikökka. <sup>4</sup>Kè be' tö ie'pa èmi bule, e' ta ditski patkeraëyö a' ká ki. <sup>5</sup>Ditski tö a' ká wà ierawa taië, kè a íyök ulat wëneia. A' daliwö bata méat mò wösi tö e' kos katerawaiöt yës. Ñies kal ulitane katerawaiöt seraä. <sup>6</sup>Ñies ditski dörawa taië be' u kos a ena be' kuëblupa u a ena egyptowak kos a. Ílyi i'se kë suule a' yépa bak ká iaiäe e'pa wä ie'pa tsä dë'bitü ká i'ki dò ikkë ta!”

Moisés tté one ta ie' e' wötrée ta imíä. <sup>7</sup>E' bet ta Egipto blú kuëblupa tö iché iblú a:

—¿Mik tå wëm e' kë tö se' we'ikèia? A blu', ie'pa ómi ie'pa Kéköl dör Jehová, e' kikökka. A blu', ¿be' kë wä isune tö se' ká sulunewatke seraä?

<sup>8</sup>Eta Egipto blú tö Moisés ena Aarón tsük patkéne eta ichéitö iä:

—A' yúshka Jehová dör a' Kéköl, e' kikökka. Erë keweie a' tö ye' a ichö tö ca' wénepa è mi'ke?

<sup>9</sup>Moisés tö iuté:

—Sa' kawöta shkökmi sekka. Sa' kawö taië tkö'uke Jehová a. E' kuëki sa' ala'r ena sa' kékëpa, e'pa kos kawöta shkökmi. Ñies sa' obeja kos ena sa' baka kos e' mi'ke sa' wä.


<sup>10</sup>Eta Egipto blú tö iché iä:

—iWënëwëa wöshak tö a' erbiköke suluë ye' ki! <sup>11</sup>Ima a' erbikö tö Jehová tö a' kimëmi as ye' tö a' òmi a' alakölpae ena a' ala'rë? <sup>12</sup>Kè iwamblärpa es. A' wëpa kibineone esepa è yú Jehová kikökka es a' ki ikiane e' kuëki.

Eta Egipto blú tö ie'pa tsükmi kë ie' yoki. <sup>13</sup>Erë Jehová tö iché Moisés a:

—Be' ulà kókä Egipto ki as ditski bitü Egipto kos wä iökkä ñies dali-kua bata méat mò wösi tö e' kos katökwa.

<sup>14</sup>Eta Moisés tö ishko kéli kéka Egipto ki eta Jehová tö siwa' patké-bitü diwö tskirke e' kkë Egipto kos ki ñiie nañee. Bule es bla'mi ta siwa' wä ditski debitü. <sup>15</sup>Ditski tö Egipto ká kos e' wä iéwa taië. Ekkë kë suule yi wa ká iaiäe es kë yi tö isuepaiane. Es ditski dapaneka ká kos ekkë ki. Kè a íyök ulat ta'iä. Dalí kuá ena kalwö e' kos bata méat mò wösi tö



Ditski alönekä taië Egip-to. (Éxodo 10.1-20)

e' katélur ditski tö yës. Egipto kos a kakö kos kal kò kos e' kè ateia yës.

<sup>16</sup>E' bet ta Egipto blú tö Moisés ena Aarón e'pa tsuk patké ta iché ia:  
—Ye' e' wamblé sulu a' Kéköl dör Jehová e' ki ñies a' ki. <sup>17</sup>Ye' kköchò a' a iññe è tö a' tö e' olo'yó ye' ki. Ikiö a' Kéköl dör Jehová e' a ye' ki tö ditski è tré'ílur ye' ki as kë sa' duölur.

<sup>18</sup>Moisés e' yétsa Egipto blú u a ta bet ikiéitö Jehová a. <sup>19</sup>Etä Jehová tö siwa' e' wötréene tsikka darérëe e' wa ditski mítsér ñanene dayë kiè Dayé Mat, e' ki. Etä ditski kè ate yës Egip-to. <sup>20</sup>Erë Jehová tö Egipto blú er sulu téwane darérëe. Ie' kë wa Israel aleripa a kawö mène as imi'rak.

### Jehová tö ká ttsettseë patké Egipto ki

<sup>21</sup>Etä Jehová tö Moisés a iché:  
—Be' ulà kókä siwa' ki as ká ttserwa ttsettseë shuteë.

<sup>22</sup>Etä Moisés ulà kékä eta ká ttsenewä mía ttsettseë Egipto ká wa'ñe ki dökä ká mañat. <sup>23</sup>Kë yi wa iyami serke tsinet e' sunë yës. Kë yi a e' yënuksa wé itkér ee dökä ká mañat. Erë Israel aleripa u a, ee je' ká olo tso' dalölö.

<sup>24</sup>Etä Egipto blú tö Moisés tsuk patké ta iché ia:

—A' yúshka Jehová kikökka. A' ala'r kos tsúmi. Erë a' obeja ena a' baka e' kos müat.

<sup>25</sup>Etä Moisés tö iiuté:

—Au. Be' kawöta kawö muk sa' a sa' iyiwak tsukmi ña'wë sa' Kéköl dör Jehová e' a idalöioie. <sup>26</sup>E' kíie ta' sa' icha kos, e' michoë sa' wakpa wä. Sa' iyiwak shushteke sa' tö ña'wë sa' Kéköl Jehová a ikikokaqie. Kam sa' dömi ee etä kè sa' wa ijcher iyiwak isie étö kiane sa' ki ña'wë Jehová a. E' kuékì kè sa' tö sa' iyiwak mepaat yës.

<sup>27</sup>Etä Jehová tö Egipto blú er sulu téwä darérëe. E' kuékì ie' kè wa kawö mène Israel aleripa a as imi'rak. <sup>28</sup>E' kíie ta Egipto blú tö iché Moisés a:

—Be' e' yóotsa íe. Be' e' kkö'nú ye' yoki. Be' dene ye' sauk, e' ta be' duörawa.

<sup>29</sup>Etä Moisés tö iiuté:

—Buaë bö iché es. Kë ye' dëliane be' sauk.

### Ala'r wëpa kibi esepa duöralur e' biyöché Moisés tö

**11** <sup>1</sup>E' ukuöki ta Jehová tö iché Moisés a:

—Ye' tö Egipto blú ena egiptowak ultane e' bata we'ikeleiä. E' ukuöki ta Egipto blú tö a' erami, e' kíie ie' wák tö a' ultane uyaerattsä da'iae iká ki. <sup>2</sup>Etä ichó Israel aleripa ultane a, wëpa ena alakölpä tö íyi yöule orochka wa ena inukölchka wa, ese kak kiö egiptowak serke ie'pa pamik esepa a.

<sup>3</sup>Etá Jehová tö egiptowak ké Israel aleripa dalöiök taië. Egipto blú kueblupa ena egiptowak ultane e'pa tö iklö'wé tö Moisés dör kékëpa taië.

<sup>4</sup>Etá Moisés tö iché Egipto blú a: —Jehová tö iché i' es: Ká shaböts nañewe ye' mi'ke Egipto kos a.

<sup>5</sup>Ala'r wëpa kibipa e' kos duöralur. Egipto blú tso' s'wökirie e' alà wém kibi duörawa, ñies egiptowak malepa icha kos dö s'siarépa tso'rak iwa iyiwö woie esepa icha duöralur ñies. Ñies iyiwak uru alà wé'ñe kibi ese kos duöralur. <sup>6</sup>Sulitane iuraë taië Egipto kos a. Kè ese ttséule yi wa es, ñies kè yi tö ese ttsepaia es. <sup>7</sup>Eré Israel aleripa shuä kè chichi isie arpa yës se' wöa ena iyiwak wöa. Es a' wä ijcherdaë tö ye' dör Jehová e' tso' Israel aleripa kimuk, eré egiptowak we'ikök ye' tso'.

<sup>8</sup>Etá Moisés tö ikí ché ia: —Be' kueblupa kos döraë ye' ska', etá ie'pa e' tkörawä kuché ki ye' wörki ta ikköchörarak ye' a: 'Be' yúshka. Be' yamipa tso' kos be' ta e'pa tsúmirak ñies.'

Etá Moisés ulune taië e' yéttsa Egipto blú wörki. <sup>9</sup>E' ukuöki ta Jehová tö iché Moisés a:

—Egipto blu' kë tö a' ttò iütepa as ye' tö i kë or yi a ese kí ù taië Egipto.

<sup>10</sup>Iyi ekké kos wé Moisés ena Aarón tö Egipto blú wörki, eré Jehová tö ie' er darë'wéwa as kë itö ittò iüto. E' kuekí ie' kë wä kawö mène Israel aleripa a as imi'yal.

Israel aleripa tsatkëne e' kewö

**12** <sup>1</sup>Jehová tö iché Moisés ena Aarón tso' Egipto e'pa a:

<sup>2</sup>"Si' i' döraë a' a duas si' tsawe kekraë. <sup>3</sup>Israel aleripa ultane a ichó: 'Si' i' e' diwö dabop (10) etá u bitkue ekké wakpa tö obeja ö chibo ese wé'ñe pupula yulö etö katè ila'r ta. <sup>4</sup>U wakpa welepa kë dör taië, kë a chkè ekké katarwa, e' ta ie'pa tö iyamipa tso' iupamik esepa kiö chkök ie'pa ta ñita kos iwakpa dökä ekké ena kos ie'pa a ikatar ekké. <sup>5</sup>Obeja ö chibo wé'ñe bua'bua, kë kī sulu ku'kī duas tso' ek ese yulö etö. <sup>6</sup>E' blö. Si' i' e' diwö de dabop kī tkél (14) e' tsáli eta a' wä iyiwak tso' blëule ese ttö u a u a. <sup>7</sup>E' ukuöki ta a' tö iklö'ú ta u wé a a' tö ikateke, e' wékkö kätke patiúka a' tö ipé wa. <sup>8</sup>Ká e' nañewe chkè e' katö katuule bö' a ár bacha'bacha ta ñies pan kë yöule iwölöwoka wa, ese ta. <sup>9</sup>Kè ikatar aki ena paliule elkela wé'ia. Ichkà kos, iwökir, ikla'tska, ena iñattse e' kos kawötä kakuëwä bö' a. <sup>10</sup>Kè a' tö ibata mukat dö bulle es. Ibata ateia, e' ta iña'lúlor bö' a. <sup>11</sup>Mik a' chköketke etá a' e' paio, a' klökkuo iö, a' shko kéli klö'ú. Ye' dör Jehová e' tö a' tsatkeke e' kewö tkö'wëke a' tö, e' kuekí a' chkó bet.

<sup>12</sup>"I'ñe nañewe ye' tköraë Egip-to ká kos a egiptowak ala'r tsá wém esepa ttökultur. Ñies ie'pa iyiwak ala'rla tsá dör wé'ñe e' kos tteralur ye' tö. Es këkölpa kos tso' egip-to-wak wä dalöiè e' we'ikeraë ye' tö taië. Ye' wák dör Jehová e' tö iché es. <sup>13</sup>U kos a wé a' tso' e' wékkö ta'oule ipamik iyiwak pé wa e' dör a' wakpa a ikkachioie. Mik ye' tö pé e' sué, etá ye' damitkö u e' ttömk. Mik ye' tso' egiptowak we'ikök siarë, etá e' kë döpa a' ska!.

14 “ ‘A’ kawötä kawö e’ tkö’uk. A’ kawötä itkö’uk kekraë duas bit ekké ye’ dör Jehová e’ dalöioie. 15 Ká dökä ká kul e’ shua a’ kè kawö ta’ pan yüole iwölöwokä wa ese ñuk. E’ kueki kawö tkö’weke e’ diwö tsá etä pan wölöwokä kos ese tulötsä a’ u a. Yi tö pan yüole iwölöwokä wa ese ñe ká kul e’ shua, e’ ta ese wák kè kawö ta’ senuk Israel aleripa shua. 16 Kawö tkö’weke e’ tsá diwö etä a’ e’ dapa’úka ek tsiní ème ye’ dalöioie. Nies e’ diwö bata ta’ a’ e’ dapa’úkane. Ká tsá ena ibata, e’ diwö kè a’ kawö ta’ kaneblök yés, ù è alirmi a’ a. 17 Kawö kiè Pan Kè Yöule Iwölöwokä Wa, e’ kewö tkö’uk a’ kawötä. E’ è kewö wa ye’ tö a’ yeratتسا Egipto a seraa. E’ kueki a’ kawötä e’ kewö tkö’uk. E’ kewö tkö’weraë a’ tö kekraë. E’ meneat dalöiè a’ a ena a’ ditséwopa datse a’ itökì aishkuo ta’ e’pa kos a. 18 Si’ i’ dör duas si’ tsá, e’ diwö dabom eyök ki tkél (14) e’ tsáli a’ kè kawö ta’ pan yüole iwölöwokä wa ese ñuk dò si’ i’ ki diwö de dabom böyök ki et (21), e’ tsáli etä a’ tö iñemine. 19 Kawö kul e’ shua a’ kè kawö ta’ pan wölöwokä seuk u a. Yi tö pan yüole iwölöwokä wa ese ñe ká kul e’ shua, ká kuä’ki wakpa ö Israel aleripa, e’ ta ese wák kè kawö ta’ senuk Israel aleripa shua. 20 E’ kueki i’ kos yüole pan wölöwokä wa, ese kè ñar yés. Wé a’ tso’rō ee ta’ a’ kè kawö ta’ pan yüole iwölöwokä wa, ese ñuk.’ ”

21 Etä Moisés tö Israel aleripa kuéblupa dapa’wé ta’ ichéitö ia: “A’

wakpa bil ekké yú obeja ö chibo klö’uk etö etö, tsúmi a’ u a’ yamipa a. Ittówa, Jehová tö se’ tsatkere i’ñe, e’ kewö tkö’woje. 22 Ipé klö’ú tka’ a. Etä kækö kiè hisopo e’ ulà klö’ú eyök, e’ nuúka pé wa, e’ wa u wékkö kàtké patiúka. Kè a’ e’ yokulur u a’ kám ká ñir e’ yoki. 23 Mik Jehová tkömi egip-towak ttökulur, etä ie’ tö u wékkö e’ kàtké sué iauleka pé wa etä ie’ dami-tkö u e’ ttömk. Es Jehová kè kawö mepa ibiyöchökawak tö s’ttekeler e’ a a’ ttökulur weshke. 24 A’ kawötä ttè i’ kos dalöiök kekraë, ñies a’ aleripa kos datse a’ itökì e’pa kawötä idalöiök. 25 Mik a’ demi ká yë! Jehová tö tö imeraë se’ a ee, etä a’ kawötä kawö i’ tkö’uk. 26 Mik a’ ala’r tö ichaké a’ a: ‘Ilök se’ tö kawö i’ tkö’weke?’, 27 etä a’ kawötä iutök: ‘Iyiwak i’ ttekesö Jehová dalöioie ie’ tö se’ tsatké’ egip-towak ulà a’ kueki. Mik ie’ bakmi egip-towak ttökulur, etä ie’ bakmi se’ Israel aleripa u ttömk kè dë’wá. Es ie’ tö se’ yamipa tsatké’lor.’ ”


Etä Israel aleripa e’ tkélur kuchë ki Jehová dalöioie. 28 E’ ukuöki ta ie’pa mía iwakanewé wes Jehová tö iché Moisés ena Aarón a es.

### Ala’r wëpa kibipa esepa duolur

29 Ká shaböts Jehová tö egip-towak ala’r wëpa kibipa esepa kos ttélur seraa. Egipto blú tso’ s’wökirie e’ alà wém kibi e’ duowa. Egip-towak malepa icha kos dò s’tso’ wötëule s’wöto wé a’ e’pa ala’r wëpa kibipa e’pa duolur ñies. Nies iyiwak alà wë’ñie kibi e’ kos duolur. 30 E’ nañe-we Egipto blú ena ikueblupa ñies egip-towak kos e’pa e’ kékarak seraa



*Jehová tö Israel aleripa patké ie'pa wékkö kàtke  
patiükka pé wa. (Éxodo 12.22)*



*Israel aleripa tö egiptowak íyi bua'bua ese kos tsémi. (Éxodo 12.36)*

iuk ème. Kè u kù! yés e' kè a s'nu kù!.

<sup>31</sup>E' nañewe Egípto blú tö Moisés ena Aarón tsuk patké tā ichéitó iā:

—A' yúshka a' yamipaë. A' e' skó bánet sa' yöki. A' yúshka Jehová kikökka wès a' tö iyé! kuaé es.  
<sup>32</sup>Iiyawak kos tsúmi wes a' ki ikiane es. A' yúshka sa' yöki. Ñies a' kköchó Jehová a as ie' ye' kimù.

<sup>33</sup>Eta egiptowak tö iché Israel aleripa a: “A' yúshka betbet sa' yöki. A' kè mìne e' tā sa' ultane duöralur.”

<sup>34</sup>Israel aleripa tö harinachka, kè wötuule iwölöwokà wa, ese patré-wa tka'ë idatsi! a iéka ppékä kuli' ki tā imfyal. <sup>35</sup>Ie'pa tö orochka ena inukölchka ena datsi! e' kos kak kié egiptowak a wès Moisés tö iyé! iā es.  
<sup>36</sup>Jehová tö egiptowak ké Israel aleripa dalöiök e' kuékì ie'pa tö íyi kos kak kiérakitö e' mé Israel aleripa a. Es Israel aleripa tö egiptowak íyi bua'bua e' kos tsémi.

**Israel aleripa e' yélur Egípto a**

<sup>37</sup>Israel aleripa e' yélur Ram-sés, míyal Sucot. Ie'pa wëpa kibineonetke döka 600.000. Alakölpa ena ala'rla kè shtaqoule.  
<sup>38</sup>Ie'pa ta pë! kua'kipa mí nies taië. Ñies iiyawak mírak iwä taië obeja ena chibo ena baka. <sup>39</sup>Egiptowak tö Israel aleripa ka' e'  
yöksa bet kè wä kawö meneat ie'pa a uloie, e' kuékì ie'pa wa harinachka mir kè iwölöwokà ta!. E' wa ie'pa pan yué ñala ki.

<sup>40</sup>Israel aleripa bak sénuk Egípto duas döka cien tkéyök ki dabom mañayök (430). <sup>41</sup>Ie'pa séné Egípto duas döka cien tkéyök ki dabom mañayök (430) tas, eta e' nañewe wöshäe ta ie'pa e' yélur Egípto a iditsewö wa iditsewö wa wès nippökawpa taië es. <sup>42</sup>E' nañewe Jehová

tō ie'pa kkö'né buaë as ie'pa e'  
yölur Egipto a. E' kueki nañewe  
e' kewö kawötä tkö'wè wöñine  
wa duas bit ekkë kékraë Jehová  
dalöioie.

### Wes Israel aleripa kë itsatkëne e' kewö tkö'uk

**43** Jehová tö iché Moisés ena  
Aarón a:

"Ye' tō a' tsatkeke egiptowak ulà  
a e' kewö tkö'uk a' kawötä i' es:  
Ká kua'ki wakpa esepa kë kawö ta'  
obeja ö chibo tteke a' tō e' kewö<sup>1</sup>  
ska' ta' ese chkà katök. **44** Erë ká  
kuä'ki wakpa wëpa ena alakölp  
wëpa to'ttsatke a' tō kanè mésoie  
ena e' wëpa tottola kkuölit tëule  
tsir, esepa è tō ikatëmi. **45** Erë ká  
kua'ki wakpa tso' shkar ö kane-  
blök inuköl klö'uk, esepa kë kawö<sup>2</sup>  
ta' ikatök. **46** A' kawötä chkë e'  
katök weshke. A' kë kawö ta' chkë  
e' tsükmi u'rki yés. Nies a' kë kawö<sup>3</sup>  
ta' idichewö pükwa. **47** Israel aleri-  
pa ultane kawötä kawö e' tkö'uk.  
**48** Erë a' shua<sup>4</sup> ká kua'ki wakpa tso'  
senuk esepa éna kawö e' tkö'wak  
a' ta' Jehová dalöioie e' ta' as  
itö itkö'ùñak. Erë kewe ie'pa tō  
iyamipa wëpa ultane tso' ie' u a  
e'pa keraë itóttola kkuölit tök tsir.  
E' ukuöki ta' ie'pa kawö tkö'wëmi a'  
ta' a' yampiaie. Erë wëpa kë tottola  
kkuölit tëule tsir esepa kë kawö ta'  
a' kawö tkö'uke e' chkë katök. **49** A'  
ultane ena ká kua'ki wakpa serke  
a' shua<sup>5</sup> e' kawötä ttè i' dalöiök  
ñikkëe."

**50** Israel aleripa tō ttè i' kos iuté  
wes Jehová tō iché Moisés ena

Aarón a es. **51** E' diwö Jehová tō  
Israel aleripa yélur Egipto iditséwö  
wa iditséwö wa wes nippökawka  
taië es.

**13** <sup>1</sup>Jehová tō iché Moisés a:

<sup>2</sup>"Israel aleripa ala'r  
wëpa kibi esepa kos dör batse'r  
ye' a. Nies a' iyiwak alà tsá wë'ñie  
e' kos dör batse'r ye' a. E' kueki e'  
kos blö' ye' a."

<sup>3</sup>Eta Moisés tō iché Israel aleripa  
a: "I'ñie Jehová tō a' yekettsa Egipto  
a ie' diché taië e' wa. Ká i' a' weine  
siarë kaneblök egiptowak a kë patuë  
ta'. E' kueki a' er anú diwö i' ska!.  
A' kë kawö ta' pan yöule iwölöwok  
wa ese ñuk. <sup>4</sup>I'ñie a' e' yokettsa,  
sil' i' kië Abib e' a. <sup>5</sup>Mik a' demi ká  
muk Jehová kablë' se' yépa bak ká  
iaiaë e'pa a ee, eta a' kawötä kawö<sup>6</sup>  
i' tkö'uk sil' i' a. Ká e' ki' íyi ultane  
tskir buaë, iwà wör buaë shute. Ká  
e' dör canaanwak, hititawak, amor-  
reowak, heveowak ena jebuseowak,  
e'pa ká. <sup>6</sup>A' kawötä kawö i' tkö'uk  
i' es: Ká kul shua<sup>7</sup> a' kë kawö ta' pan  
yöule iwölöwok wa ese ñuk. Kawö e'  
diwö bata, eta kawö tkö'weraë bua'ie  
Jehová dalöioie. <sup>7</sup>Kawö kul e' shua<sup>8</sup>  
a' kë kawö ta' pan yöule iwölöwok  
wa ese ñuk. Pan wölöwok ena  
pan yöule iwölöwok wa ese kos  
kë kawö ta' se'wë a' tō a' ká kos e'  
a. <sup>8</sup>E' diwö ta' a' tō ichó a' ala'r a:  
Kawö e' tkö'weke se' tō, e' wà dör  
tō Jehová tō se' yé'lur Egipto a. <sup>9</sup>Ie'  
tō se' yé'ptsä Egipto a idiché taië wa,  
e' kueki se' dör ie' icha. Mik se' tō  
kawö e' tkö'weke, eta e' tō se' ulta-  
ne a ieri meraë as Jehová ttè kí se' er  
me'rie. E' dör wes se' e' wakyuò se'

wötsə k̄i ena se' ulà kkue k̄i es. <sup>10</sup>E' kuek̄i a' kawötä kawö e' tkö'ük duas bit ekké idiwö i' è wa.

<sup>11</sup>"Ká iaiq̄e Jehová tö iyë'at a' yépa a tö ie' tö canaánwak ká meraë a' a. Mik ie' w̄a a' demi ká e' a, <sup>12</sup>eta a' kawötä a' ala'r wëpa kibi esepa kos blök ie' è a e'pa kos dör ie' icha, e' kueki. Ñies a' iyiwak parke kos wë'ñe, e' kibi kos e' dör ie' icha, e' kuek̄i ese kawötä blè ie' è a. <sup>13</sup>Eta obeja wë'ñe pupula ö chibo wë'ñe pupula e' mú a' tö burro alaki e' alà wë'ñe kibi e' skéie burro alà tsätkoie. Eré a' k̄e a' patuak es, e' ta burro alà wë'ñe kibi e' kuli' púwa. Es a' kawötä a' ala'r wëpa tsá k̄une esepa kos skéie iyiwak muk itsätkottsa. <sup>14</sup>Aishkuö t̄a mik a' ala'r tö a' chakeke tö: 'Uók a' tö ikanewè i' es?', eta iiutó: 'Jehová tö se' yë'ttsa Egipto a idiché tajé e' wa. Ee se' bak weinuk siaré kaneblök k̄e patuè ta!'. <sup>15</sup>Mik Egipto blú er të'w̄a darerëe, ie' k̄e w̄a kawö mène se' a' e' yöktsané ie' ká a, eta Jehová tö egip towak ala'r wëpa tsá k̄une e'pa kos tteluritö. E' kuek̄i se' tö se' iyiwak alà wë'ñe kibi, ese kos meke Jehová a. Ñies se' ala'r wëpa tsá k̄une, ese skéie iyiwak mekesö Jehová a itsätkottsa. <sup>16</sup>E' kuek̄i kawö i' tkö'ük as k̄e a' éna ichòwa tö Jehová tö a' yë'ttsa Egipto a idiché tajé e' wa. E' dör w̄es se' e' wakyuö se' wötsə k̄i ena se' ulà kkue k̄i es.' "

### Jehová tö Israel aleripa wëttséke mò wa

<sup>17</sup>Mik Egipto blú tö Israel aleripa émi, eta Skéköl tö ibikeitsé tö

Israel aleripa mú k̄e ñippò filisteowak ta, e' ta ie'pa bitumiane Egipto. E' kuek̄i ie' k̄e w̄a ie'pa wëttsenemi ñalà michoë filisteowak ká a e' wa, e' dör ñalà yësyësë. <sup>18</sup>E' kuek̄i ie' tö ie'pa wëttsémi bánet kampië ñala tköke ká sir po e' shua döttsa dayë kiè Dayë Mat e' ska'.

Israel aleripa e' yë'lur dapaulekä wes ñippökwakpa tajé e' e' dapa'ü es. <sup>19</sup>Moisés w̄a José sik këchke e' mítser ie'pa ta ñita. Kam José blérwā e' yöki ie' tö iyë' iëlpa a: "Moki Skéköl dörane a' tsätkök. Mik e' w̄a tka, eta ye' sik tsúmi a' ta." Es ie'pa tö kawö mé ñi a. E' kuek̄i Moisés w̄a José sik mítser ie'pa ta.

<sup>20</sup>Eta Israel aleripa e' yélur ká kiè Sucot míyal ká kiè Etam, ee ie'pa e' tséat. Ká e' até ká sir po e' kkömk tsinet. <sup>21</sup>Ñiwe t̄a Jehová tö ie'pa wëttséke mò àr tajé alabo e' wa. E' mir ie'pa yöki kewe ñala kkachioie ie'pa a. Nañewe t̄a mò e' wöñarke bö'wöie dalöburke. E' wa ie'pa shkömir wes ká ñiwe es. <sup>22</sup>Ñiwe t̄a mò e' mir kekraë ie'pa yöki kewe. Nañewe t̄a mò e' wöñarke bö'wöie e' mir ie'pa yöki kewe.

### Israel aleripa tkattsə Dayë Mat a

**14** <sup>1</sup>Eta Jehová tö iché Moisés a:

<sup>2</sup>"Ichö Israel aleripa a: A' yúne a' itò wane t̄a a' e' tsúat ká kiè Pi-hahirot e' wöshä. Ká e' até ká kiè Migdol ena dayë kkömk e' shushä, ká kiè Baal-sefón, e' wöshä. E' wöshä dayë kkömk tsinet úla yuö. <sup>3</sup>Es Egipto blú tö ibikeitse-



I' dör karreta tso' ñippoie ese. (Éxodo 14.6)

raë: 'Israel aleripa kë wä ijcher wé imi'mirö. Ie'pa cholurmi ká sir po, e' shua.<sup>4</sup> Erë ye' tō ie' er terawa darërë as ie' tō a' tötiłumi. Ye' e' alöraka ie' ki ena iñippökawakpa kos ki, e' wa ye' dalöiérdaë taię. Egiptowak ultane wä ijcherdaë tö moki ye' dör Jehová.'

Etä Israel aleripa tö iwakane-wé es.<sup>5</sup> E' dalewa Egipto blú wöki ibiyö demi tö Israel aleripa tkayal. Ie' ena ikueblupa erbikéne kuə'ki ta ichérakitö nì a: "¿Wes se' tō i wamble i' es? ¿Lie se' tō Israel aleripa émi ta yi kaneblömiä se' a?"

E' ukuöki bet ta Egipto blú tö ikarreta tso' ñippoie e' tsuk patké ta iñippökawakpa patkéitö nì dapa'uk.<sup>7</sup> Etä imíä Israel aleripa itökí karreta ñippoie ibua'bua dökä cien teryök (600) ekkë. Egipto karreta ñippoie e' malepa kos mírak iwa ñies. Karreta kos e' a ñippökawaka wökir shköke ek ek.<sup>8</sup> Jehová

tö Egipto blú er darë'wéwá as ie' mi' Israel aleripa itökí eré ie'pa yénettса Egipto a Jehová diché taię wa.

<sup>9</sup>Etä Egipto ñippökawakpa mirwa kabaio ki, karreta ki, e'pa kos tö Israel aleripa tötiémi kuérakitö wé Israel aleripa tso' dayë kkömic ká kiè Pi-hahirot e' o'mik ena ká kiè Baal-sefón, e' wöshaë.<sup>10</sup> Mik Israel aleripa isué tö egiptowak datse, e' tō ie'pa suawé taię. Ie'pa kkoché taię Jehová a tö sa' tsatkó.<sup>11</sup> Moisés a ichérakitö:

—¿Ima be' iklö'wé pö kë ta' Egipto, e' kuékí be' tō sa' yël'ttsa duökwa íe ká sir po shua? ¿Iók bö iwamblé es sa' ta? ¿Lie be' tō sa' yël'lur Egipto a?<sup>12</sup> Kuaë sa' tō be' a iyë! Egipto: 'Sa' müat kaneblök bëre egiptowak a. iSa' wirke siarë kaneblök egiptowak a, e' dör bua' sa' a duökulur íe ká sí poë a e' skéiel'

<sup>13</sup>Erë Moisés tö iiuté:

—Kè a' tö egiptowak suepaia. E' kueki kè a' suanuk. A' e' tkówa dareréë. I'ñe Jehová tö a' tsatkeräe e' saú. <sup>14</sup>Kè se' tkinuk ñ ki. Jehová nippöraë se' skéie.

<sup>15</sup>Jehová tö iché Moisés a:  
—iKè be' kköchökia ye! a! Ichó ie'pa a tö a' shkó wöwí è. <sup>16</sup>Be' shko kéli kóka dayë tsakä as dayë blaténar ñalaie shkotkö poppo dayë shua. <sup>17</sup>Erë ye' tö ie' er terawä darerë as ie' tö a' tötiümi. Ye' e' alöraka ie' ki ena iñippökwakpa kos ki, e' wa ye' dalöierdaë taië. Egiptowak ultane wä ijcherdaë tö moki ye' dör Jehová. <sup>18</sup>Egiptowak ultane wä ijcherdaë tö moki ye' dör Jehová.

<sup>19</sup>E' wöshäe ta Skëköl biyöchökawak mirwä Israel aleripa yoki kewe e' e' mane'wétsane ie'pa tsikkane. Nies mò àr taië alabo e' mía ie'pa tsikkane. <sup>20</sup>Es mò e' ate Egípto nippökwakpa ena

Israel aleripa e' shushä. Egiptowak kké mò ettaie dör ttsettseë, e' kueki ie'pa tso' ká ttsettse a. Erë Israel aleripa kké mò e' dalöburke taië ká ñiwe sù. E' kueki egiptowak kè ulà dë' Israel aleripa ska! e' nañewe.

<sup>21</sup>Etä Moisés ulà kékä dayë tsakä ta Jehová tö siwa' bitsiwéka darerë datse diwö tskirke e' éka. E' bitsine nañee dayë ki. E' tö dayë blatée shushä. Es Jehová tö ká ulat poppo yué ñalaie dayë shua ie'pa a shkotkö. <sup>22</sup>Le'pa tkami ká poppo a. Es dayë wötuki ate wi'ké io'ké.

<sup>23</sup>Etä egiptowak nippökwakpa mirwä kabaio ki ena karreta ki e'pa kos tö Israel aleripa tötiémi dayë a. <sup>24</sup>E' bla'mi ká ñirketke eta mò wöñarke bö'wöie e' shua Jehová tso' egiptowak sauk. Le' tö ie'pa suawéka taië e' tö ie'pa wöa ká chowéka taië. <sup>25</sup>Nies ie' tö ie'pa karreta wöshki kos e' wötélur dö a as kè ishkò bet. Ie'pa tö iché ñì a:



Dayë wötuki ate wi'ké io'ké as Israel aleripa tkomi. (Éxodo 14.22)

—Mishka Israel aleripa yoki.  
Jehová tso' ñippök se' ta ie'pa  
tsatkoie.

<sup>26</sup> Jehová tö iché Moisés a:

—Be' ulà kókā dayë tsaka as  
iwöiérwane Egipto ñippökwakpa ki.  
<sup>27</sup> Moisés ulà kékä dayë tsaka.

Mik ká ñine, eta dayë wöiñenewane  
es. Mik egyptowak mí tkökshkar, eta  
dayë wöiñenewa ie'pa ki. Es Jehová  
tö ie'pa ewéwa dayë a. <sup>28</sup> Es Egipto  
ñippökwakpa mineyal Israel ale-  
ripa itöki e'pa kos durulune seraä  
dayë a ikabaioë. Egipto blú ñippök-  
wakpa e' kë ate yes ttsé'ka. <sup>29</sup> Erë  
Israel aleripa tkami buaë dayë a dò  
wishes ká sí ki, dayë wötukí wi'ké  
io'ké e' shusha.

<sup>30</sup> E' kewa Jehová tö Israel ale-  
ripa tsatkée egyptowak ulà a. Ie'pa  
tö egyptowak nu sué dayë kkömk.  
<sup>31</sup> Mik ie'pa tö isué tö wes Jehová  
tö egyptowak ewéwa idiché taië e'  
wa, eta ie'pa tö ie' dalöié taië. Ie'pa  
er blé ie' mik ñies itteköl Moisés e'  
mik.

### Moisés tö Jehová kikéka ttsè wa

**15** <sup>1</sup> Moisés ena Israel aleripa  
ttsé Jehová kikoka ttsè i' wa:

“Ye' ttsöke Jehová dalöioie.  
Kabaio taië ena iwákpa kos e'  
ewéwaitö dayë a.  
Es ie' e' alé taië shute ie'pa ki.  
<sup>2</sup> Ye' tso' ttsök Jehová è a.  
Ie' tö ye' a idiché mé. Ie' tö ye'  
tsatkée.  
Ie' dör ye' Kéköl. Ye' kawöta  
ie' kikökka buaë.

Ie' dör ye' yé Kéköl. Ye' tö ie'  
dalöieraë er moki wa.

<sup>3</sup> Ie' dör ñippökwak darerëë  
bua'ie.

Jehová e' dör ie' kië.

<sup>4</sup> Egipto blú karreta tso' ñippoie  
ena ie' ñippökwakpa  
e'pa kos émi dayë a Jehová tö.  
Egipto blú ñippökwakpa  
bua'bua

e'pa kos duolur se Dayë Mat a.

<sup>5</sup> Ie'pa katsirulune dayë shua  
wes ák es.

Dayë iskië e' è me'r ie'pa ki.

<sup>6</sup> A Jehová, be' ulà bua'kka  
diché taië,  
e' wa be' tö be' bolökpa  
batsélor.

<sup>7</sup> Ie'pa demi ñippök be' ta,  
erë ie'pa kos ewéwa be' tö be'  
diché taië, e' wa.  
Be' ulunekä ie'pa ki,  
ta ie'pa ñanewa wes kákö sí  
es.

<sup>8</sup> Dayë wöikébö darerëë  
ta iwöklönewaie wi'ké io'ké  
míä wes ká ukuö es.  
Dayë wöklönewa, kë  
shkökü'ia.

<sup>9</sup> Be' bolök e' ttsékä taië ta iché:  
‘Ye' mi' ie'pa itöki wéyö ikuérö  
ta ee i mirwarak iwa e'  
yerattsayö iulà a,  
e' wà tierayö kos ye' kí ikiane  
ekkë.

Ye' tabè yerattsä iñaléka,  
e' wa yo ie'pa tterawa.’

<sup>10</sup> Erë be' tö dayë wöiké ta e' tö  
ie'pa ttelur.

Ikatsinewa dayë a wës tabe-chka es.

<sup>11</sup> A Jehová,  
iWépa skà kiekerakitö “skë-köl”, esepa kos tsata be' dör!  
iKè yi dör batse'r taië wës be' es!

iKè yi diché ta' taië wës be' es!  
iÍ kë or yi a ese wë be' tö buaë,  
e' tö sulitane tkiwëwa!

iSulitane kawötä be' kikökka!

<sup>12</sup> Be' ulà bua'kka kéka  
ta' íyök tö ie'pa maléwa.

<sup>13</sup> Be' tö sa' tsatkée. Be' éna sa'  
dalér taië,  
e' kueki be' tso' sa' wëttsuk.  
Be' wà sa' mi'ke be' diché wa  
dò wé be' wák serke ee.

<sup>14</sup> Mik ká ultane wakpa wà e'  
jchenewa,  
età ie'pa painuraë suane è wà.  
Filisteowak krardawa suane  
è wà,

<sup>15</sup> Edomwak wökirpa chkerdawa suane è wà,  
Moabwak wökirpa painuraë taië.  
Canaánwak ultane kësik kos  
e' chörawa yës.

<sup>16</sup> A Jehová, ias ie'pa tkirwa! ias  
ie'pa suar taië!  
Be' diché wa as ie'pa at kë tiriä  
suane kueki  
dò mik sa' ultane dör be' icha  
e'pa tka eta.

<sup>17</sup> A Jehová,  
Sa' tseramibö dökä be' kabata  
buaë e' a.

Ee sa' serdaë buaë kekraë.  
Kabata e' shukitbö be' a senoie.  
Ee be' wák e' wé yué e'dör  
yöbië.

<sup>18</sup> Jehová tso' se' wëttsuk s'blúie  
kekraë.”

María tö Jehová kikékä ttsè wa

<sup>19</sup> Mik Egipto blú nippökwakpa  
tkawä dayë a kabaio ki, karreta  
ki, età Jehová tö dayë wöiéwane  
ie'pa ki erë Israel aleripa tka buaë  
ká poppo a. <sup>20</sup>E' ukuökì tå Jehová  
tteköl kiè María, e' dör Aarón kutà,  
e' tö ma'ma klö'wéwa ttsoie, ta ala-  
kölpa kos mí ie' itökì klötökerak  
es ima'ma blardami. <sup>21</sup>E' dalewa  
María ttsöke i' es:

iA' ultane ttsö Jehová kikoka!  
Kabaio ena iwákpa uyéwaitö  
dayë a.  
Es ie' e' aléka ie'pa ki.

Jehová tö di' bacha'bachaë  
e' bua'wéne.

<sup>22</sup> Moisés tö Israel aleripa kë e'  
yöksa Dayë Mat e' kkömik. Ie'pa  
míyal ká sir poë kiè Sur e' a. Ee  
ie'pa shkére ká mañat età kë ie'pa  
wà di' kune yè yës. <sup>23</sup>Mik ie'pa  
demi ká kiè Mará, età eë di' tso'  
bacha'bachaë, kë yar ie'pa a. E'  
kueki ká e' kiè mékarakitö Mará\*

<sup>24</sup> Età Israel aleripa tö Moisés  
chémi suluë. Moisés chakérakitö:  
“il yémisö?” <sup>25</sup>Età Moisés tö Jehová  
a ikié tö sa' kimú. Età Jehová tö ie'

\* 15.23 Mará: Hebreoie Mará e' wà kiane chè i bacha'bacha.

a kal tsitsir kkaché elka e' iéwāitö di' a etá di' baché chowa de buaë yé.

Ee Jehová tö ittè dalöiëno mé ie'pa a, ñies ie'pa ma'wéitö isuoie tö ie'pa tö idalöièmi. <sup>26</sup>Ie' tö iché ie'pa a: "Ye' dör Jehová. Ye' dör a' Kéköl. Ye' dör a' bua'ukwak. Ì cheke ye' tö a' a' ttsé a' tö, e' iúte a' tö ñies a' sené buaë wés ye' ki ikiane es, e' ta ye' kë tö a' we'ikepa ì sulu patkë'yö egiptowak ki ese wa."

<sup>27</sup>E' ukuöki tå ie'pa demi ká kië Elim. Ee di' tum tso' dökä dabom eyök ki bööt (12). Ñies ì klò tso' dikó klò sù ese tso' dabom kuryök (70). Ee ie'pa e' tséat di' kkömic tsinet.

### Jehová tö Israel aleripa tié chkè kiè maná e' wa

**16** <sup>1</sup>E' ukuöki tå Israel aleripa ultane e' yélur ká kië Elim míyal ká sir poë kië Sin ee. Ká e' atë Elim ena Sinaí, e' shusha. Ie'pa e' yë'ttsa Egípto e' ki si' de et ki shaböts. <sup>2</sup>Etá ee ká sir poë shua ie'pa ttémi taië kësik wa Moisés ena Aarón ki. <sup>3</sup>Ie'pa tö iché iarak: —iJehová tö sa' ttöpalur Egípto! Ee sa' e' tulokeser ù tulurkä wà iëule chickhië chkè wa e' o'mik tå sa' bak iwà katök wé! kos sa' ki ikiane ekké. Eré a' wá sa' dë'bitu ká sir po i' a sa' ultane ttowa bli wa.

<sup>4</sup>Jehová tö iché Moisés a:

—Sýyo pan da'wè siwa' ki a' a. E' shtö ká bit ekké. Eré ishtö kos iñar ká etkë ekké è. Ye' ki ikiane suë tö wépa tö ye' ttò iùtèmi ena wépa

kë tö ye' ttò iùtepa. <sup>5</sup>Ká de teröl e' bule es ta a' tö chkè kí shtö wé! katar ká böt ekké. Es a' tö iú kekraë.

<sup>6</sup>Etá Moisés ena Aarón tö iché Israel aleripa a:

—I'ñe tsáli tå a' tö isueraë tö moki Jehová tö se' yë'lur Egípto a. <sup>7</sup>A' ttöke kësik wa e' ttsé ie' tö, e' kuëki bule bla'mi tå ie' wák olo taië dalö-lööe e' sueraë a' tö. Ì cheke ie' tö sa' a' e' è chökne sa' tso' a' a. E' kuëki a' kë ulurkü' sa' ki. A' ulurke ie' ki.

<sup>8</sup>Ñies Moisés tö iché iarak:

—A' ulurke taië e' sué Jehová tö. E' kuëki i'ñe tsáli tå ie' tö iyiwak chka patkeraë a' a. Bule bla'mi tå pan patkeraëtiö a' a ñè taië kos a' ki ikiane ekké. Sa' kë dör yi, as a' ulur sa' ki. A' ulurke Jehová ki.

<sup>9</sup>E' ukuöki tå Moisés tö iché Aarón a:

—Ichö Israel aleripa a tö a' ttöke kësik wa e' ttsé Jehová tö e' kuëki a' e' dapa'ú Jehová wörki.

<sup>10</sup>Aarón tso' ttök ie'pa ta, e' dalewa ie'pa ultane ká sué ká sir po e' ëka. Ie'pa isué tö Jehová olo dalö-lööe dettsa mò tso' ie'pa wëttsük e' a. <sup>11</sup>Etá Jehová tö iché Moisés a:

<sup>12</sup>—Israel aleripa ttöke kësik wa, e' ttséyö. Be' ttö ie'pa ta, tå ichö iarak: <sup>13</sup>I'ñe tsáli a' tö iyiwak chka kateraë. Bule bla'mi tå a' tö pan ñieraë kos a' ki ikiane ekké. Es a' wa ijcherdaë tö ye' dör Jehová, e' dör a' Kéköl.'

<sup>13</sup>Ká e' tsáli tå taië dù debitü kaklö sù. E' tö wé ie'pa serke e' wà iéwá seraä. Etá bla'mi tå upa kos shkene mò wöli è. <sup>14</sup>Mik mò wöli kaneka, etá itòa iski ì ate taklaie

sabubula. <sup>15</sup>E' kè s̄uule Israel aleripa wā. E' kueki mik ie'pa tö isué, eta ie'pa tö iché ñi a: “¿Dió dör i?”

Età Moisés tö iché iarak:

—E' dör pan mé Jehová tö a' a ñè. <sup>16</sup>Ie' tö iché tö a' kawötä iuk i' es: A' tö ishtó eköl eköl kos a' tso' u a e' a iñar ekké è. Ishtó skátke böt ulatök wák eköl eköl a.

<sup>17</sup>Età Israel aleripa ishté wés ikewö mène es. Welepa tö ishté bérerbérë, welepa tö ishté kibie. <sup>18</sup>Mik ie'pa tö ima'wé, età wé tö ishté taijé ese icha kè bata ate. Wé tö ishté bérerbérë ese icha deka wé!. Ie'pa ultane tö ishté eköl eköl kos iñar ekké è. Es sultane iñé wé!.

<sup>19</sup>Moisés tö iché ie'pa a: “Kè a' kawö ta' pan e' blök dò bule es.”

<sup>20</sup>Erë welepa kè wā Moisés ttò iütene. E'pa tö icha bata blé dò bule es. E' a öna iñekà ena ilabunekà sulué. E' kueki Moisés ulunekà ie'pa ki.

<sup>21</sup>Mik dìba ba'nebitu, età pan e' diarolone, e' kueki ie'pa wakpa bik tö ishteko bla'mi kos iñar ekké. <sup>22</sup>Erë mik ká de teröl, età ie'pa ishté dò iñar ká böt ekké. E' dör skátke tköl wák eköl eköl a. Età Israel aleripa wökirpa mía ichök Moisés a. <sup>23</sup>Età Moisés tö iché ià:

—Jehová tö iché tö a' kawötä iuk i' es: Bule dör eno diwö. Diwö e' dör se' a ie' dalöioie. A' kè kawö ta' ylök e' diwö wa. E' kueki i aleke a' tö e' alô iñie. Ibata ate e' blö ñè bule.

<sup>24</sup>Età ie'pa tö iwé wés Moisés tö iché es. Ie'pa tö chkè bata e' blé dò

bule es. Età kè ilane sulu, kè ià öna iñekà. <sup>25</sup>Età Moisés tö iché ie'pa a:

—Iñe dör eno diwö e' dör se' a Jehová dalöioie. Iñe kè iuepa a' tö ñe u'rki. E' kueki chkè bata ate e' è ñú. <sup>26</sup>A' ishtemi kekraë dò ká teröl. Erë e' bule es dör eno diwö, e' diwö kè a' tö i uepa u'rki.

<sup>27</sup>Età eno diwö shuq ie'pa welepa míyal chkè shtök, erë kè iwà i kune yés. <sup>28</sup>Età Jehová tö iché Moisés a:

—¿E'ma kos a' tö ye' ttè dalösewemirö? <sup>29</sup>A' éna ianú tö ye' dör Jehová, ye' tö eno diwö me'atbak a' a. E' kueki eno diwö e' chkì es ye' tö a' a chkè meke taijé ñe ká böt ekké. E' kueki a' ultane kawötä senuk weshke è eno diwö wa. Kè a' patkene bánet.

<sup>30</sup>E' kueki Israel aleripa enuke diwö e' wa, kè kaneblerak.

<sup>31</sup>Israel aleripa tö chkè shteko e' kié mékà maná<sup>\*</sup> Iwà chkà dör saruruë wés suiyök es. E' dör blo'bloë wés pan yöule bul alí wa es.

<sup>32</sup>E' ukuöki tå Moisés tö iché: —Kanè i' me' Jehová tö se' a: ‘Maná e' ió skátke böt ekké tå iblö a' aleripa a kkachè as ie'pa tö chkè me' ye' tö a' a ká sir poë e' a mik a' yé'ttsayö Egípto età, e' saù.’

<sup>33</sup>Età Moisés tö iché Aarón a:

—Tka' klö'ú et, e' a maná ió skátke böt ekké. E' blö Jehová wörki as a' aleripa tö isaù.

<sup>34</sup>Età Aarón tö maná e' blé wé Jehová a iyí tso' bléule, e' kélkuö wöshaë wés Jehová tö iyé' Moisés a es.

\* 16.31 maná: Hebreoie maná e' wà kiane chè ¿Dió dör i?

<sup>35</sup>Israel aleripa bak maná ñuk dò mik ie'pa demi wé pë' serke ee eta. E' dör Canaán kkömk. Ie'pa bak maná ñuk duas dökä dabom tkéyök (40) seraas.

<sup>36</sup>(Ì wa Israel aleripa tö maná ma'wè, e' kiè ie'pa tö gomer. E' wà dör skåtké blublu böt ekké. E' dör litro böt ulatök.)

### Ák a di' dettsa

**17** <sup>1</sup>Israel aleripa ultane e' yélur ká sir po kiè Sin ee ta imía ñala kí enaena wes Jehová tö iyé! iarak es. Ie'pa demirak ká kiè Refidim, ee ie'pa e' tséat. Eré ee di' kë tå' ie'pa a yè. <sup>2</sup>E' kueki ie'pa tö Moisés a di' kié késik wa. Ie'pa tö iché ie' a:

—iSa' a di' mú yè!

Moisés iiuté:

—¿Iók a' tö Jehová wönatkeke?

<sup>3</sup>Ie'pa ershine taié e' kueki ie'pa tö di' kiekerak késik wa Moisés a. Ie'pa tö iché ie' a:

—¿Iók be' tö sa' ena sa' ala'r ena sa' iyiwak e' yé'lur Egípto a ttewa ersir wa?

<sup>4</sup>Eta Moisés kkoché taié Jehová a ta ichétio ia:

—¿Wes ye' ie'pa i' wëmi? iTsir eta ie'pa ye' ttewa ák wa!

<sup>5</sup>Jehová tö iiuté:

—Be' yú ie'pa wëttsë keweie. A' kueblupa welepa tsúmiñak. Be' shko kéli wa be' tö di' kiè Nilo

e' buk, e' tsúmi. <sup>6</sup>Be' yú Horeb kékata \* a. Ee ye' be' paneke ák bërie tso' e' ska!. Mik be' tö ák e' ppé be' shko kéli wa, eta di' dörattsa taié ie'pa a yè.

Eta es Moisés tö iwakane-wé Israel aleripa kueblupa wörki. <sup>7</sup>Israel aleripa tö di' ki' késik wa, e' kueki Moisés tö ká e' kiè méka Meribá. <sup>\*</sup> Nies ie'pa tö iyé!, “Sa' kë wá iklöne tö Jehová tö sa' kímëmi.” E' kueki Moisés tö ká e' skà kiè méka Masá. <sup>\*</sup> Ee ie'pa tö Jehová wönatké! e' kueki.

### Amalec aleripa nippé Israel aleripa ta

<sup>8</sup>Amalec aleripa debitü ñippök Israel aleripa ta Refidim. <sup>9</sup>Moisés tö iché Josué a:

—Be' tö se' wëpa welepa shushtö tsúmi ñippök Amalec aleripa ta. Bule ye' tso' kabata wöbata kí Skë-köl shko kéli yaar.

<sup>10</sup>Eta Josué tö iwakanewé wes Moisés tö iché iá es ta imiyal ñippök Amalec aleripa ta. E' dalewa Moisés ena Aarón ena Hur míyal kabata wöbata kí. <sup>11</sup>Mik Moisés ulà kéka, eta Israel aleripa e' alöke ibolökpa kí. Eré mik ie' ulà éwa, eta Amalec aleripa e' alöke ie'pa kí. <sup>12</sup>Ie' ulà shtrinewá taié, e' kueki ie'pa ák yulé ie' a e' tkoie. Nies Aarón ena Hur e'pa tö ie' kímé iulà böt kökka siwa' kí as kë ishtrirwá. Es ie' ulà se'wé ñië siwa' kí dò katuine ekké.

\* 17.6 *Horeb kékata*: Kábata e' kiè nies Sinaí kékata.

\* 17.7 *Meribá*: Hebreoie kiè e' wà kiane chè nippé.

\* 17.7 *Masá*: Hebreoie kiè e' wà kiane chè s'ma'wë.

13 Es Josué ena Israel aleripa e' aléka Amalec aleripa ki tabè wa.

14 Etá Jehová tö iché Moisés a:  
—A' nippé i' e' pakè shtóka  
yékköö ki as a' wakpa kè éna  
ichòwa kekraë. Ichó Josué a tö ye'  
tö Amalec aleripa ultane ewerawa  
yés.

15 Etá Moisés tö ák dapa'wéka  
ka'le et iyiwak ña'woie Jehová  
dalöioie. E' kiè mékaitö "Jehová  
diché wa se' e' aléka."\* 16 Ie' tö  
iché:

"iYe' ulà kéka Jehová a ikiök  
as ie' tö se' kímù!  
iJehová nippöraë Amalec ale-  
ripa ta kekraë!"

E' kueki ie' tö ikiè méka es.

#### Jetró de Refidim Moisés pakök

**18** 1 Jetró dör ká kiè Madián  
e' sacerdote ena Moisés  
nuaki.\* Kos Skéköl tö Moisés ena  
Israel aleripa kime', e' jcher ie' wa.  
Ñies ie' wa ijcher tö wes Jehová  
tö Israel aleripa yé'lur Egípto a.  
2 Moisés tö ilaköl Séfora e' patké'mi  
iyé ska!. 3 Ie' tö ilà busi kiéwá buaë  
ila'r böл tå. Séfora alà eköl kiè  
Guersón. Moisés tö iyé!: "Ye' sene'  
ká kua'kí ki wes ká kua'kí wakpa  
es." E' kueki Moisés tö ikiè méka

Guersón\* 4 Ilà eköl kiè Eliézer. Moi-  
sés tö iyé!: "Ye' yé Kéköl e' dë'bitu  
ye' kímkuk. E' tö ye' tsatké' Egípto  
blú ulà a." E' kueki ie' tö ikiè méka  
Eliézer\*

5 Moisés úla yuéka Skéköl kékata  
o'mik tsinet. Etá ee inuaki Jetró e'  
de Moisés alaköl ena ila'r böл, e'pa  
ta. 6 Jetró tö iché Moisés a:

—Ye' dör Jetró, be' nuaki, ye'  
debitu be' pakök. Be' alaköl ena be'  
ala'r böл e'pa de ye' ta ñies.

7 Moisés e' yétsa tå inuaki  
shke'wéítö buaë dalöiè wa wöa-  
lattsè wa. E' ukuöki tå idewarak  
weshke. 8 Wes Jehová tö Israel  
aleripa tsatké Egípto blú ena egip-  
towak ulà a ñies wes ie' tö ie'pa  
kkö'né ì sulu tka ie'pa tå ñalà wa  
eta, e' kos paké Moisés tö inuaki a.

9 Kapakè e' tö Jetró ttsé'wé buaë.  
Jehová er bua' ché taië Israel  
aleripa a. Ie' tö ie'pa tsatké'lör  
egiptowak ulà a. E' kueki Jetró  
ttsé'ne buaë. 10 Ie' tö iché Moisés a:

—As sulitane tö Jehová kíkóka. Ie'  
tö be' ena be' wakpa kos tsatké'lör  
buaë Egípto blú ena egip towak ulà  
a. 11 Ire' ye' tö isué tö moki Jehová  
dör wépa kiekerakitö "skéköl" esepe  
ultane tsata. Yi bak a' we'ikök  
kësik wa, e'pa kos we'ikéítö siarë.

12 Etá Moisés nuaki, Jetró, e' tö  
iyiwak klö'wéwa etò ña'wéítö Jeho-

\* 17.15 *Jehová diché wa se' e' aléka.* Iwakpa ttò wa Moisés tö ikié *Jehová nisi*, e' wà kiane ché *Jehová dör ye' bandera*. Wësua e' kiéítö es ie' ulà kéka *Jehová a wes bandera kékä* es, e' wa ie'pa e' aléka e' kueki.

\* 18.1 *Jetró:* E' kiè ñies Reuel, e' dör Moisés tayë kiè Séfora e' yé. Éxodo 2.21 saú.

\* 18.3 *Guersón:* Hebreoie s'kiè *Guersón* wà kiane ché ká kua'kí wak.

\* 18.3 *Eliézer:* Hebreoie s'kiè *Eliézer* wà kiane ché ye' Kéköl dör ye' kímkukwak.

vá a idalöioie. Ñies íyi skà méítö ie' a idalöioie. E' ukuökì tå Aarón ena Israel aleripa kueblupa debitu chkok Moisés nuäki tå Jehová dalöioie.

### Moisés tö s'shulökawakpa kí yulé

<sup>13</sup>Bule es ta Moisés e' tkésér ikula' kí Israel aleripa shulök. Ie'pa e' dapa'wé iéter ie' wörki nië bla'mi dò tsáli as Moisés tö ishulörak. <sup>14</sup>E' kos sué Moisés nuäki tö tå ichéitö Moisés a:

—¿I wamblök be' tso' ie'pa tå? Be' è e' tkésér ie'pa shulök tå ie'pa iéter nië be' panuk.

<sup>15</sup>Moisés tö iiuté:

—E'ma ie'pa wák de ye' ska' ittsök tö imá Skéköl tö ichè. <sup>16</sup>Mik ie'pa welepa ñippöke ñita, etä ie'pa datse ye' ska' tå ye' tö ie'pa ttè shuleke. Ñies ye' tö ie'pa patteke Skéköl ttè wa.

<sup>17</sup>Moisés nuäki tö iché ia:

—Wes be' tö iwéke e' kë dör buaë. <sup>18</sup>Be' shtrirwami. Ñies ie'pa tso' be' wörki e'pa shtrirwami. Kanè e' e' alökämi be' kí. Kë be' a iwö-klönuk ekörla. <sup>19</sup>A Moisés, ye' tö be' patteke e' ttsö. As Skéköl tö be' kímù. Be' kawötä ttök Skéköl tå ie'pa skéie. Be' kawötä ie'pa ñippöke e' chök Skéköl a as ie' tö ichò be' a tö wes ishuleke. <sup>20</sup>Ie'pa wöbla'ú Skéköl ttè wa. Ikkachö ie'pa a wes ie'pa kawötä senuk yësyësé. Ichö ie'pa a tö i kiane Skéköl kí tö ie'pa tö iwè. <sup>21</sup>Eré be' kawötä a' wëpa shushtök tseë be' kímuk ttè shuloie. Wépa serke yësyësé, Skéköl dalöietä! taië, kë e'

watautqat'sa ì sulu wambloie, esepa shushtö Israel aleripa shulök be' tå. Ishulökawakpa blatö i' es. Israel aleripa mil biyök (1000) e' kos kí ishulökawakpa múka eköl eköl. Mil biyök e' kos blabatsólor cien eyök (100) cien eyök dökä dabop. Cien biyök e' kos kí ishulökawakpa múka eköl eköl. Cien biyök e' kos blabatsólor dabom skeyök (50) dabom skeyök. E' kos kí ishulökawakpa múka eköl eköl. Dabom skeyök kos e' blabatsólor dabom eyök dabom eyök dökä skel. E' kos kí ishulökawakpa múka eköl eköl. <sup>22</sup>Ie'pa tö Israel aleripa kos ttè shuleraë kekraë be' skéie. Eré ttè wé kë shulinuk ie'pa a ese bituraë ie'pa wá be' ska' shulè. Ttè wé shulirmi ie'pa a e' tå ese shuleke ie'pa tö. Etä es be' kí kanè e' öshtömi. Ie'pa tö be' kímëmi kanè e' wa. <sup>23</sup>Skéköl tö be' kë iwakanéuk, ñies be' tö iwakane-wé es, e' tå be' a ikatatkérmi. Ñies Israel aleripa kos mi'mine iu a ttsë'ne buaë.

<sup>24</sup>Etä Moisés tö inuäki ttò iyté. Iwakanewítö wes inuäki tö iché ia es. <sup>25</sup>Ie' tö Israel aleripa shua wëpa didir ese shushtö. E'pa mékaitö Israel aleripa shulökawakpaie. Welepa menekä mil biyök e' kos kí ishulökawakpaie. Welepa skà menekä cien biyök e' kos kí ishulökawakpaie. Welepa skà menekä dabom skeyök e' kos kí ishulökawakpaie. Welepa menekä dabom eyök e' kos kí ishulökawakpaie. <sup>26</sup>Ie'pa tö Israel aleripa ttè shuleke kekraë. Ttè wé darëréë, ese mí ie'pa wá Moisés a

shulè. Età ttè wé tottola, ese shuleke ie'pa tö. <sup>27</sup>E' ukuöki tā Moisés nuäki e' chéat ie' a tā imíane ikaska!.

### Israel aleripa demi Sinaí

**19** <sup>1,2</sup>E' ukuöki tā Israel aleripa e' yélur Refidim a demirak Sinaí. Ie'pa e' yé'lur Egip-to, e' ki si' de böt kí ká et. Sinaí dör ká sir poë. Ee ie'pa e' tséat Sinaí kékata o'mik tsin̄et. <sup>3</sup>Età Moisés mía kabata a ttök Skéköl tā. Ee Jehová tö ikié tā ichéitö ia:

—Ttè cheke ye' tö be' a e' chónre Israel aleripa a. E'pa dör Jacob aleripa. <sup>4</sup>Ichó ie'pa a: 'Ye' tö egip towak we'ik e' su' a' tö. Nies a' wa ijcher tö wes ye' wa a' dë'bitu buaë fe ye' wörki wes pu wa ilala mi' ipik ki es. <sup>5</sup>Ká ultane wakpa dör ye' icha. Erë ye' ttò iuté a' tö sera, nies ttè mekesö nì a e' wa iuté a' tö buaë, e' tā ká ultane wakpa shua a' döraë ye' icha chökie. <sup>6</sup>A' döraë ye' sacerdotepaie. A' döraë batse'r ye' a'.  
Ttè i' kos chó Israel aleripa a.

<sup>7</sup>Età Moisés biteqane, e' tö Israel aleripa kueblupa kos dapa'wé. Ì ché Jehová tö ie' a e' kos chéneitö ie'pa a. <sup>8</sup>Ie'pa ultane tö iuté nikkëe:

—Ì kos ché Jehová tö e' wa iuteraë sa' tö.

Età Moisés míane ttè e' chökne Jehová a. <sup>9</sup>Età Jehová tö iché ia:  
—Ye' ttò ttsò. Mochka tērdawa kabata ki taië e' shua ye' datse ttök be' tā as Israel aleripa ultane tö ye' ttöke be' tā e' ttsò. Es ie'pa tö be' ttè klö'weraë kékraë.

Età ima Israel aleripa tö iuté e' chéne Moisés tö Jehová a. <sup>10</sup>Jehová tö iché ia:

—Be' yú Israel aleripa batse'uk iñne ena bule. Nies ichó iarak: 'a' datsi' skuółor.' <sup>11</sup>Ye' dör Jehová, e' datse böiki Sinaí kékata a ie'pa ultane wörki, e' kuëki ie'pa batse'ú as ie'pa tso' batse'r böiki yoki. <sup>12</sup>Kabata wakyuö shkit as kë yi mi'tkö e' wishet. Ichó iarak: 'A' kë a kawö tā shkökwa iwakyöne e' wishet. Nies a' kë a kawö tā shkök-wa tsin̄et ipamik. Wépa tkawa e' wishet esepa duörawa. <sup>13</sup>Yi míwa ee ese kë kawö tā kë ulà wa. Ese kawötä ttewa ák wa ö sulè wa. Kë a' tkinuk tö se' idir ö iyiwak idir, a' kawötä ittökwa. Mik a' tö duk blar ttsé e' è tā a' dömiwa tsin̄et kabata o'mik.'

<sup>14</sup>Età Moisés biteqane tö Israel aleripa batse'wé tā ie'pa ultane datsi' skuółor. <sup>15</sup>Moisés tö iché ia:

—A' ultane e' kkö'nú batse'ne böiki yoki. E' dalewa kë a' senukka alakölpa tā.

<sup>16</sup>Böiki es bla'mi tā kabata a ká wöñane alá blane taië. Mò taië dettsa kabata e' ki. Ie'pa tö itsé tö duk blane taië, e' tö ie'pa suawé taië painékaie. <sup>17</sup>Età Moisés tö Israel aleripa tso'rak iwákpa u a e'pa yélur tsémi Skéköl wörki. Ie'pa e' wöklö'wérak kabata kuli' a tsin̄et. <sup>18</sup>Jehová dettsa Sinaí kékata ki bö' shua, e' kuëki kabata e' mía shkle ème. Shkle e' wér wes tē shkle butrò es. Kabata kos wötirke darerëe. <sup>19</sup>Duk kí blarke taië shute. Moisés ttöke tā Skéköl tö ie' iutake alá blar ttsëe.

<sup>20</sup>Jehová dettsa kabata kákkeë, e' wöbata ki tā Moisés kiékaitö ee.

Moisés tkaka ee, <sup>21</sup>ta Jehová tö iché ia:

—Be' e' ówane ta ichó ie'pa a:  
‘Kè a' tkökbütü wé iwakyöule e'  
ioshet ye' weblök dö' ie'pa duòlur  
taië.’ <sup>22</sup>Nies wëpa kaneblöke ye'  
a sacerdotepaie esepa kawötä e'  
batse'lük buaë dö' ñies ye' tö ie'pa  
ttélurmì.

<sup>23</sup>Eta Moisés tö Jehová iuté:

—Be' tö sa' ké iwakyuök as kë  
ie'pa döwa kabantä a tsinet. E' kueki  
kë ie'pa bitüpä kabantä i' a.

<sup>24</sup>Eta Jehová tö iché Moisés a:

—Be' yúne ta Aarón tsúbitü e'  
ta. Erë a' sacerdotepa ena Israel  
aleripa malepa e'pa kë kawö tå'  
shkökbütü wé ye' tso' ee dö' ye' tö  
ie'pa ttélur.

<sup>25</sup>Eta Moisés biteane Israel ale-  
ripa ska' tå' ì ché Jehová tö ie' a e'  
chéne ie' tö ie'pa a.

### Ttè dalöiëno dökä dabop

**20** <sup>1</sup>Skéköl tté tå ichéitö i' es:  
<sup>2</sup>“Ye' dör Jehová. Ye'  
dör a' Kéköl. Ye' tö a' yëlur Egipto  
wé a' bak weinuk siarë kanè wa ee.

<sup>3</sup>“Kè a' kawö tå' kékölpa skà  
dalöiök. Ye' è dalöiö a' Kékolie.

<sup>4</sup>“Kè a' kawö tå' ì diököl yuök  
dalöiè yës. ï kos tso' ká jaì a ena  
ká i' a ena dayë a ena iyök dikia,  
e' kos diököl kë yuar a' tö dalöiè.  
<sup>5-6</sup>Ye' dör Jehová. Ye' dör a'  
Kéköl. A' tö kékölpa kua'kì dalöié,  
e' kë dalë'ttsenuk ye' a. Wépa  
ye' suë suluë esepa we'ikeraëyö,

ñies ileripa dò inukököpaë e'pa  
we'ikeraëyö. Erë wépa tö ye'  
dalëritseke ena ye' ttè dalöiëno

e' iuteke, esepa ena iëtkuöpa dökä  
mil e' dalëritseraëyö. E' kueki kë a'  
e' tulökwä kuchëwö kí íyi ñekkë  
kos wörki idalöioie.

<sup>7</sup>“Ye' dör Jehová. Ye' dör a'  
Kéköl. Ye' kië kë aritsar éanas íyi  
sulu wamble. Yi tö e' wamble ese  
wák we'ikeraëyö.

<sup>8</sup>“Eno diwö e' blö Ye' è dalöioie.  
E' kë chökwa a' éna. <sup>9</sup>Semana bit e'  
a kawö tso' kul. Kawö teröl e' dör  
a' wákpa a kanebloie. <sup>10</sup>Erë kawö  
teröl e' bule es e' dör eno diwö ye'  
dalöioie. E' kewö a' kë kawö tå'  
kaneblök. Nies a' ala'r ena a' kanè  
mésopa ena a' iyiwak ena ká kua'kì  
wakpa serke a' ska', e'pa kos kë  
kawö tå' kaneblök e' diwö a. <sup>11</sup>Ye'  
dör Jehová. Ye' tö ká i' ena ká jaì  
ena dayë ena íyi ulitane e' kos yö'  
ká teröl shua. E' bule es ta ye' eni',  
e' kueki kawö e' batseø'yo me'atyö  
a' a eno diwöie ye' dalöioie.

<sup>12</sup>“A' yé ena a' mì e'pa dalöiö as  
a' ser ká taië ká mekeyö a' e' a.

<sup>13</sup>“Kè a' kawö tå' s'ttökwa.

<sup>14</sup>“Kè a' kawö tå' s'senewabak  
dalösekwa.

<sup>15</sup>“Kè a' kawö tå' akblök.

<sup>16</sup>“Kè a' kawö tå' s'kkatök kachë  
wa.

<sup>17</sup>“Kè a' kawö tå' o'ka u kke-  
chök. Nies ilaköl ena ikanè  
mésopa, alakölpa ö wëpa, ena  
iiywak kos ena ì kos tso' iwa, ese  
kë kkechar.”

### Israel aleripa suane Skéköl yoki

<sup>18</sup>Mik Israel aleripa ulitane tö  
alá blarke e' ttsé ena iwöñarke  
e' suë ñies duk blarke taië e' ttsé

ena shkle butrökekə taīe kabata a e' sué, etā e' yokī ie'pa suane taīe painékarak taīe. Ie'pa ieter isauk kāmië. <sup>19</sup>E' kuekī ie'pa tö iché Moisés a:

—Be' ttō sa' ta, etā sa' tö be' ttō dalöieraë. Erë kë sa' kī ikiane tö Skëköl ttō sa' tā dö' sa' duòlur.

<sup>20</sup>Moisés tö iiuté:

—Kè a' suanuk. Skëköl dettsa a' ma'uk isuoie tö mokī a' tö ie' dalöieke. Ie' kī ikiane tö a' tö ie' ttō dalöiè as kë a' tö ì sulu wamblò.

<sup>21</sup>Ie'pa atē isauk kāmië. Moisés è mía tsinet mò taīe wé Skëköl tso' ee.

# Jonás dör Jehová ttéköl e' pakè

## Jonás

Yëkkuö i' tö se' a ipakè tö ì bak Israel aleri eköl kiè Jonás e' tå. Ie' kaneblë' Skëköl ttekölje duas cien paryök ena duas cien kuryök kí dabom skeyök (800-750 AC) e' shu ulatök kám Jesucristo kür e' yöki.

Skëköl kë wä ie' patkëne Israel aleripa malepa pattök wës Skëköl ttekölpa malepa patkéítö es. E' skéie ie' tö ie' patkë' ká kiè Nínive, e' wakpa pattök. Nínive dör ká kiè Asiria e' ká kibi. Asiria wakpa dör Israel aleripa bolökpa kibi. Ie'pa serke suluë taië shute Skëköl wöä. E' kueki ie' tö Jonás patké ichök ie'pa a tö ká de dabom tkëyök eta ie'pa erdawa. Jonás wä ijcher tö Skëköl tö s'suë er siarë wa. Ie' ibikeitsé: "Nínive wakpa er mane'wé, e' tå ie'pa nuí olo'yeraë Skëköl tö ie'pa kí." Erë ie' kí ikiane tö Skëköl tö ie'pa ewëwa, e' kueki ie' kë shkakmi ie'pa pattök. E' skéie ie' tö ima'wé tkökshkar bánet Skëköl yöki. Erë Skëköl tö ie' wöklö'wé tå ipatkémi Nínive wakpa pattök wake!. Ie'pa er mane'wé, e' kueki Skëköl kë wä ie'pa eonewa.

Yëkkuö i' wa se' éna iãne tö Skëköl tö ká ultane wakpa suë er siarë wa. Ì sulu wamblekesö ese nuí olo'yak ie' éna se' kí. Ie' kí ikiane tö se' er mane'ù ie' a as kë ie' tö se' we'ikò.

### Jonás kë éna Jehová ttò iütak

**1** <sup>1</sup>Etokicha tå Jehová tö iché itteköl kiè Jonás dör Amitai alà, e' a; <sup>2</sup>"Be' yú ká kibi kiè Nínive ee, ta ichó ká e' wakpa a wës a' e' wamblö e' dör suluë ye' wöä, e' kueki ye' tö a' ewerawa."

<sup>3</sup>Erë ie' kë éna Jehová ttò iütak. E' kueki ie' tkashkar iyöki. Ie' mía

dayë kkömkik ká kiè Jope wé kanò irirke ee. Ee ie' tö kanò kué etö mitke ká kiè Tarsis e' patuéítö shkomi tå ie' e' iékä ikí tå imíá.

<sup>4</sup>Erë Jehová tö sérkë patké ie'pa kí taië darérëe. E' tö kanò uyé taië dò wësua itskirwëami. <sup>5</sup>Eta kos ie'pa tso' kanò a, e'pa suane taië. Ie'pa eköl eköl tö ikieke



I' dör ká kiè Jope e'. (Jonás 1.3)

aneule iwák kéköl a: “iSa' tsatkó, sa' tsatkó!” Etä dalì kos tuléttksam dayé kí as kë kanò katsirwa.

Erë Jonás e' a'wa kanò shuá dalì bló wé a, ee ie' kapötér tajé. <sup>6</sup>Etä kanò ñakökawak mía dò wé ie' kapötér ee tå iché ia:

—¿Iók be' kapötér? iBe' e' kóka! Be' kéköl a ikió as ie' tö se' tsatkó. Isalema ie' se' suèmi er siarë wa tå se' tsatkemuitö.

<sup>7</sup>E' dalewa kanò wakpa malepa tö iché ñì a:

—Mishka itötkök isuoie yi iane iwiie e' kueki se' weirke i' es.

Etä iwëne tö Jonás idir. <sup>8</sup>E' kueki ie'pa iché ie' a:

—Ichó sa' a, ðì kueki ì sulu i' tkoke se' ta? ¿Iók be' e' iébitu kanò i' a? ¿Wé be' datse? ¿Yi ditsewö be' dör?

<sup>9</sup>Ie' iiuté:

—Ye' dör hebreowak. Jehová dör Skéköl tso' ká jaì a e' dalioikwak ye' dör. Ie' tö dayé ena ká i' yólat.

<sup>10-11</sup>Ie' tö ie'pa a ipaké tö ie' tso' tkokshkar Jehová yoki. Mik e' ttsé ie'pa tö ñies isuérakitö tö dayé kí ulune tajé, etä ie'pa suane tajé shute. Ie'pa tö ie' a ichaké:

—¿I wèmi sa' tö be' tå as sérkë wöklörwa?

<sup>12</sup>Ie' tö iiuté:

—Ye' wa ijcher buaë tö ye' kueki sérkë i' bitsinékä tajé a' kí. E' kueki ye' uyómi dayé a etä sérkë wöklördawa.

<sup>13</sup>Erë kanò wákpa tö kanò iklémi dareréë as irirkä. Erë kë ie'pa diché dë'ka, dayé kí ulune tajé i' kueki. <sup>14</sup>Etä ie'pa tö Jehová a ikié i' es: “A Jehová, kë sa' maktsa duök-wä wém i' kueki. I' uk be' tso' sa' ta, e' wekebö wes be' kí ikiane es. E' kueki wém i' kë kí ì nuí ta!, e' ta sa' tö ie' uyekemi dayé a e' nuí kë markä sa' kí.”

<sup>15</sup>E' ukuöki tå ie'pa tö Jonás uyémi dayé a, etä sérkë wöklönawa ta dayé míane almié. <sup>16</sup>Mik kanò

wákpa tö e' sué, eta ie'pa suane taię Jehová yoki tą idalöiérakito taię. E' ukuökı tą ie'pa tö iyiwak jché ña'wé mè Skéköl a idalöioie, ñies ie'pa tö ttè mé ie' a tö sa' tö be' dalöieraë.

<sup>17</sup> Etą Jehová tö nima bérie shute patké eto Jonás mulukwə. Etą nima e' tö imuléwa tą ee nima shua ie' sené döka ká mañat ñiē nañeë.

### Jonás tté Jehová tą

**2** <sup>1</sup>Etą Jonás tté Jehová dör ie' Kéköl e' tą nima shua, <sup>2</sup>ta ichéitö ia' i' es:

"A Jehová, ye' eriarke siarë, e' shua ye' tö be' a ikié tö ye' tsatkó, eta be' tö ye' iuté.

Ye' tso'tke ká dià kaska' s'duulewa ké a, ee ye' be' a ikié tö ye' kímú, eta ye' ttò ttsébō.

<sup>3</sup> Be' ye' uyémi dayë a iškië dayë dikia, ye' kitülewa dayë wa.

Dayë urke taię e' patkébō, e' tka ye' kikke.

<sup>4</sup> Ye' ittsé tö ye' kë kū'ia be' wörki.

Ye' ibikeitsé tö ye' kë dë'iāne be' wé buaë e' a.

<sup>5</sup> Dayë taię, e' shua ye' anemi. Ye' kikke, ye' pamik, ye' dikia, e' dör dayë ème.

Dayë a itö'könu tso', e' malitséka ye' wökir mik taię dayë shua.

<sup>6</sup> Ye' anemi dayë a dò iškië, dò wé kabata bitukeka ee.

Ye' ittsé tö ye' wötënewa da'a ká dià kaska!.

Erë, a Jehová, be' dör ye' Kéköl,

be' dör ye' yétsane s'duòwá ulà a dekané ttséi'ka.

<sup>7</sup> A Jehová, mik ye' ittsé tö ye' duökewatke, etą ye' be' a ikié tö ye' tsatkó, etą i' kiéyö, e' ttsébō be' wé buaë e' a.

<sup>8</sup> Wépa tö íyi diököl dalöieke be' skéie,

e'pa kë tö be' dalöiekü'ia.

<sup>9</sup> Erë ye' tö wéstela cheraë be' a kekraë,

iyiwak jcheraë ña'weraëyö be' a be' dalöioie.

Ye' ttè mé be' a, e' waweraëyö. iA Jehová, be' è a sa' tsatkérmi!"


<sup>10</sup> E' ukuökı tą Jehová tö nima patké Jonás tuöksa ká sí ki, ta ituéttsaítö.

### Jonás tö Jehová ttò iuté

**3** <sup>1</sup>Etą Jehová tö iskà chéne Jonás a: <sup>2</sup>"Be' yú ká kibi kiè Nínive ee tą i chekeyö be' a, e' chó ká e' wakpa a."

<sup>3</sup> Etą ie' tö Jehová ttò iuté. Ie' mía Nínive. E' dör ká bérie. Shkotkö ká e' shua, e' dör ká mañat wa'ñe.

<sup>4</sup> Jonás shké ká e' shua ká et wa'ñe tą ie' tö icherami ká e' wakpa a aneule: "Ká i' kí ká de dabom tkéyök (40), etą a' erdawa." <sup>5</sup> Etą Nínive wakpa kos erblé Skéköl mik. E' kuékı ie'pa kos, èsepala ena dalöiérta!, e'pa kos tö iché:



*I' dör ká kiè Nínive e!. (Jonás 3.3)*

“S'kawötä batsök, ñies s'kawötä datsi<sup>l</sup> ajaë ese iök iwà kkachoie tö se<sup>l</sup> er mane'wé.” Eta es ie'pa tö iwé.

“Mik ttè e' ttsé Nínive blú tö, eta ie' e' kéka ikulé ki, ta idatsi<sup>l</sup> bua'buaë iëtkér iwà, e' yéttṣa skéie datsi<sup>l</sup> ajaë iékaitö tạ ie' e' tkésər ıskı muluchka ki. 7-9 Eta ie' tö ttè patké ká e' ultane wakpa a. Ttè e' tö iché i' es: “A' ultane kè kàne chkök di'yök yës. Ñies kë a' kàne a' baka ena a' obeja tiök. A' ultane kawötä datsi<sup>l</sup> ajaë iökka. A' kkochó Skéköl a' a' diché kos wa as a' e' wamblò suluë ese kos nuí olo'yòitö a' ki.

Ñies a' e' wamblò suluë, ese kos olo'yó. Isalema ie' er mane'umine, eta ie' er buarmine se' ki, eta ie' kë tö se' ewepawa. Ttè i' dör ye' dör a' blú e' ttè ena a' wökirpa ttè, e' kueki a' ultane kawötä idalöök.”

10 Eta ie'pa tö ttè e' iüté buaë. Ie'pa e' wamblò suluë ese kos olo'yérakitö. Mik e' sué Skéköl tö, eta ie' ibikeitséné kë yö ie'pa we'ikepa wes ye' ibikeits es.

#### **Jonás ulunekä Skéköl ki**

**4** 1 Erë e' kë dör bua! Jonás a tạ ie' ulunekä taijë. 2 Ie' iché Jehová a:

—A Jehová, be' isué. Mik ye' tkë-riä ye' kaska', eta ye' iyë' tö be' er buaë chöraë Nínive wakpa a. Ye' wä ijcher tö be' dör es, e' kueki ye' bakshkar Tarsis. Ye' wä ijcher tö be' kë ulurta'kä bet. Be' er tottoë. Be' sa' suè er siarë wa. Mik sa' tö i sulu wamblé ta' sa' er mane'wé, e' ta' bet e' nuí olo'yé be' tö sa' ki, kë sa' we'ikè wës be' sa' pañné es. 3 A Jehová, e' kueki ye' be' a ichè ye' ttówa, e' dör bua'ie ye' a.

<sup>4</sup>Erë Jehová tö ie' a ichaké:

—¿Ima be' ibikeitsè tö be' wä kawö ta' ulunukka se es?

<sup>5</sup>Eta Jonás e' yétsä Nínive míä diwö tskirke e' kkë ta' ee úla yuékaitö e' blóie diba yokj. Ee ie' e' tkésér ì tkòmi Nínive wakpa ta' e' wà panuk. <sup>6</sup>Eta Skëköl Jehová tö kalkua tskéka elka tala'wékaitö Jonás tsaka as ikí ttsë'r buaë. E' tö ie' ttsë'wé buaë. <sup>7</sup>Erë bule es bla'mi ká ñine eta Skëköl tö i patké kalkua katökwa ta' isinewa

duowä. <sup>8</sup>Mik diwö deka, eta ie' tö siwa' darérëë ba'baë e' patké diwö tskirke e' kkë Jonás ki. Diba ane darérëë Jonás wökir ki, ta' ie' tö ittsé tö ie' siwa'arkewa. Ibikeitséítö “iYe' mú duòwa!” Ie' iché, “Ye' duowä, e' dör bua'ie ye' a.”

<sup>9</sup>Erë Skëköl tö iché ie' a:

—¿Ima be' ibikeitsè tö be' wä kawö ta' ulunukka kalkua sinewa e' kueki?

Ie' iiuté:

—Tó, ye' wä kawö ta!. iYe' ulune taië mik ye' duowä eta e' alone!

<sup>10</sup>Eta Jehová tö iché ie' a:

—Kal kuá kë tkëne be' wä, kë talane kë kaneone be' wä. E' tskine talane ká et nañewe è, bule es nañewe ta' iduowa, e' dalëne be' éna. <sup>11</sup>Eta ¿wes ye' kë éna Nínive wakpa dalënu? Ie'pa dör taië, ie'pa ala'rla tso' taië döka 120.000 kë wä ijcher ì dör buaë, ì dör suluë. Nies ie'pa iyiwak tso' taië.